

[DA 1]

COMHCHRUIINNEACHA

DO

DH' ORAIN

TAGHTA,

GHAIDHEALACH,

NACH ROBH RIAMH ROIMHE CLO-BHUAILTE GUS A NIS, AIR AN TIONAL O MHEODHAIR,
AIR FEADH GAIDHEALTACHD A'S EILEINE NA H-ALBA.

LE

PARUIG MAC-AN-TUAIRNEIR.

DUNEIDIONN:

CLO-BHUAILTE AIR SON AN UGHDAIR,

LE T. STIUBHARD.

1813.

[DA 2]

<eng>ENTERED IN STATIONERS HALL.

[DA 3]

TO THE RIGHT HONOURABLE

ALEXANDER WENTWORTH

LORD MACDONALD

OF THE ISLES,

&c. &c.

MY LORD,

AS a Publication which contains a Recital of the Exploits of the Warriors of our Country in ancient times, and in which your Lordship's Ancestors often bore a conspicuous part, could be dedicated to none, with so much propriety, as to the Descendant and Representative of the illustrious House of MACDONALD, LORD OF THE ISLES, which numbers, alike among its Descendants and its Ancestors, many of the mightiest Sovereigns of ancient Caledonia; so it cannot but afford the highest gratification to the compiler of this Volume, that he is permitted to usher it into the world under the patronage of your Lordship.

[DA 4]

I shall abstain, my Lord, from indulging myself (in the language usual on such occasions) either in enumerating your Lordship's personal virtues, or in tracing the long drawn honours of your ancient and illustrious House. The first could derive no additional splendour from my humble pen; and the second the pages of History have faithfully recorded. I accept your Lordship's Patronage with gratitude and with pride, and cherish the hope, that, under the sanction of your Lordship's respectable name, this humble attempt, to preserve in their native language and original dress, a few of the fast-fading remnants of our ancient national Bards, will be crowned with success. I have the honour to be, with the greatest respect,

MY LORD,

Your Lordship's much obliged,

and devoted humble Servant,

PAT. TURNER.<gai>

[DA 5]

CLAR INNSIDH.

	Taobh-duilleig
Ach Aonghuis oig Ghlinnich	83
Aig taobh sruthain na shuidhe 's e sgith	151
Air Mios deireannach an fhoghair	38
Alasdair a laoigh mo cheille	186
An t-urram do chruaich Narachain	244
A Rìgh gur h-aotrom leinn an t-asdar	258
A chuideachda' na'n eisdeadh sibh	268
An nollaig mu dheireadh do 'n chiad	271
Ach na'n d' thigeadh Tearlach Stiùbhart	281
An diugh, an diugh is reusantach	359
A Chuachag na'n craobh	298
Bheirinn comhairl' air gach fleasgach	208
Bha mi fhein 's mo mhathair	327
Biodh an uigheam so triall	111
B'fhearr am mor olc a chluinntinn	130
Bhruadair mi 'n raoir 's mi'm chadal	170
Beir mo shoraidh thair a bhealach	175
Bu chaoineil rium-sa 'm bail e Pheairt iad	327
Chunnaic mise thu Ailein	13
Cha b'e bas mo cheann cinnidh	97
Cia sibh a luchd aobhair	189
Cha n'e goirteas mo shroine	229
Chunnaic mi' brudair air Fiunnla'	261

[DA 6]

Chualas sgeul tha ro chruaidh	314
Chiad fhear a shiubhlas do Chata	357
Cluinnibh cumha trom a Bhrunaich	374
Deoch slainte Chabair feidh so	22
Deoch slainte Thighearna Chluainidh	103
Dh'fhalbh mi 'n de gu sunndach, sunndach	122
Deoch slainte Chaiptein Chaimbeil	251
Dh'innsinn sgeula dhuibh le reusan	302
Dh'innsinn sgeul mu'n mhalairt duibh	339
Faill ill ho ro, tha sinn fo mhulad	108
Fhir a dh' imicheas mu'n cuairt	177
Faigheadh cliuth o gach rann-fhear	199
Fhuair mi sgeula moch an de	225
Fhir a mheudaich am bolla	371
Ged a tha mi 'n so am chruban	117
Gur h-e mheudach mo chradh	8
Gu bheil mi air mo bho'radh	28
Gur fad tha mi 'm thamh	87
Gu ma slan 's gu ma h-eibhinn	90
Gur a trom leam a ta mi	99
Gur a mor mo chuis mhulaid	147
Gheibh gach duin' a thuiteamas	154
Gur diombach mi 'n iomairt	157
Gur h-usal am macan	235
Gur a mis' tha fo mhulad	237
Gu 'n innsinn duit sgeula	255
Gur craiteach a mheadhail	278
Gu bheil mise gun tamh	276

Gu ma slan a chi mi, mo chailin dileas donn	324
Gar bheil mi 'm araidh aig daoine' uaisle	353
Ho na 'n d'thigeadh, na 'n d'thigeadh do sgeul	114
Hei ho, tha mulad air m' inntinn	138
Ho faireagan o ho	143

[DA 7]

Ho m' fhaidhreinn, he m'fhaidhreinn	165
Iain mhic Naoghais Mhic Uilleam	366
Lamh Rìgh leinn a dhaoine	53
Leam fhein bu bhlasda pog o d' bheul	370
M i 'g eiridh 'sa mhaduinn	91
Mi 'n so air m' uilinn	56
Mi 'm shuidh air bhruaich torrain	101
Mo chradh-ghal bochd	128
Mo run an t-Alasdair og	163
Maolacha' a's Cailein Chruachain	217
Moch 'sa mhaduinn 's mi 'g eiridh	247
Moch maduinn air la lunasd'	286
Mo chaileag bhian-gheal mheall-shuileach	289
Mìle marbhaisg air an t-suireadh	293
Mìle marbhaisg air a ghoraich	309
Maduinn dhomhsa 'n coille churaidh	319
Moch 's mi 'g eiridh 'sa mhaduinn	332
Moch 'sa mhaduinn 's mi dusgadh	334
Mu 'm faca mo shùil thu	363
Mìle failt' ort fhir na culaidh	369
Mi 'm shuidhe 'sa bhachdan chaorainn	372
'N cuala' sibhse'n tionnadh duineil	49
'N diugh chuala' mi nuaidheachd	74
'N Raon Ruairidh so bh'ann	141
'N ulaidh phriseil bha uainne	182
'Nuair chuir an Fhraing thugainn congnadh,	383
O! gur muladach oirnne	171
Och na 'n och mar a ta mi	291
O gur mis' th'air mo chradh	304
Rìgh gur mor mochuid mhulald	98
Rìgh gur muladach tha mi	231
'S goirt leam gaoir na'm ban Muileach,	1
'S tearc an diugh mo chuis ghaire	42

[TD 8]

'S trom 's gur eisleineach m' aigne	46
'S ann air leith-taobh Beinne-buidhe	60
Slan gun dith dhuit a Mharcuis	64
'S mithich dhuinn marsadh as an tìr	70
'S beag an t-iongnadh mi liathadh	95
'S binn an sgeul so tha iad ag radhainn	106
So an tim tha cuir as domh	158
'S e mheudaich m'airtneal gu geur	168
'S mor mo bhron 's mo thruime-lighe	180
So deoch-slaiente mo ghaisgich	196
'S mi 'm shuidhe air deisir a ghlinne	204
'S mor mo mhulad gu brath	211
'S tric mi tionndadh am leabhaidh	264
'S mi 'm shuidhe 'n sa 'm ònar	283
'S mi 'n toiseach m'aimsir, 's m'uigh ri bargan	296
'S tric ag amharc sios mi	311

'S coma leam a bhrigis lachdunn	330	
Sgeul uaigneach chualas gun bhreug		342
Siubhal marr-ri Seorus dhuinn	350	
'S fhad tha mi 'g eisdeachd ri ur diochuimhn		380
Thi tha 'n cathair na 'm feartan	18	
Thoir soraidh gu Iain Manntach uam		81
Thug Clann Donuill an latha	125	
Tha mulad tha gruaim orm tha bron	135	
The Lord's my targe, I will be stout		153
Tha mi ga m' phianadh, 's mi 'g iarraidh chaileagan		221
Turas chaidh mi sios an gleann	224	
Tha mi craiteach tinn 's tha mi sgith lan dochair		240
Tha mo cheim dol an truimead	243	
Tha mo chridhe ciùirte	322	
Tha rogairean artnealach trom	354	
Thugaibh an t-soraidhs' gu h-iomlan		369
Tha mise 'n so 'n Lunnainn	377	

[TD 1]

COMHCHRUIÑNEACHA
DO DH' ORAIN THAGHTA,
GHAIÐHEALACH.

Gaoir na 'm ban MUILEACH.

Le MAIRIRIAD NI' LACHUINN.

'S GOÌRT leam gaoir na 'm ban Muileach,
Iad ri caoineadh 's ri tuireadh;
Gun Sir Iain an Lunnainn,
Na 'sa 'n Fhraing air cheann turais;
'S trom an sac thug ort fuireach,
Gun thu dh' fhalbh air an loingear,
Gur h-e aobhar air dunach;
'S og a choisinn thu 'n t-urram 's na blaraibh.
'S og a choisinn, &c.

Rìgh na 'm prionnsa da 'n d' rinneadh,
Togail suas ann am barrachd;
'S daor a thug sinn ort ceannachd,
O 'n la thionnsgail a charraid;
Fògar aon Mhac Shir Ailein,

[TD 2]

As a chòraichean fearuinn,
Le foirneart 's le aindeoin,
'S gur h-e turas an earaich so chràidh mi.
'S gur h-e, &c.

Ged a b' fhad thu air siùdan,
Cha robh lochd ort ri chùnntas
Luchd toisich cha b' fhiù leat
Dhol a dheanadh dhoibh ùmhlachd,
Ard-leoghunn bu mhùinntean,
'S e mo chreach gu 'n do dhrùigh ort,
Mèud t-eallaich ra ghiùlan;
'S nach robh léigh ann a dhiùchrachd am bas uait.

'S nach robh, &c.

Mac 'Illeain na 'n lùireach,
Bhi na luidhe sa chrùiste;
Ann an leabaidh na h-ùrach,
An suain chadail gun dusgadh;
'S ruaig bháis air do mhùinntir,
Gar an d' fhuair iad a dh-ùine,
Cead an armachd a ghiùlan;
'S ann a thug iad d' a 'n ionnsaidh na 'n teann-ruith.
'S ann a thug, &c.

B' fhiach do chairdean an sloinne,
Mac Dhonuill 's Mac Coinnich;
'S Mac Leoid o 'n taoibh eile,
'S e mo chreach c' uim' an ceileam,
Earraghaidheal so theirear,
Gu la bhais so mu dheireadh,
Nach biodh t-ait aig fear eile;
Ach cur le cheile gu teiridneach baidheil.
Ach cur le, &c.

[TD 3]

Cha chainnt bhosdail 's cha bharr-ghlóir,
So 'n drasd a tha shannt orm,
Bhì gar faicinnse cailte,
'N déigh gach cruadal a rinn sibh,
Ann an Eirinn sa 'n Albuinn,
Chuidich Eachunn cath Ghairbheach,
Le cruadal a lanntaibh;
Gar nach fuilngear' sa 'n am so a ràdhainn.
Gar nach, &c.

Cha 'n e Ailein no Eachunn,
Na losgadh fir Shasunn,
'So tha mise ag acain,
Ach an t-ogh' ud Shir Lachunn,
Na 'm pios oir 's na 'n corn daidhte,
A thogadh sioda ri crannaibh,
'S mairg Rioghachd dheth 'n deachaidh,
Sir Iain a's Caiptein Chlann Ràghuill.
Sir Iain a's, &c.

Och! 's mise th' air mo chlisgeadh,
Saoir a sàbhadh do chiste,
'S gun do chaireadh fo lic thu,
'N aite falaich gun fhios duinn,
'N airde n' iar air a bristeadh,
'S gun an t-oighre na ghliocas,
So i bhliadhna thug sgrios oirn,
'S daor a phaigh sinn air sibht Mhòirfhear Màrr sin.
'S daor a phaigh, &c.

'S ann diamairt roimh 'n latha,
Bu neo-aoibhneach ar gabhail,
O 'n la dh' eug Mac Illeain;
'Sa chaidh sios sliochd ar taighe,
'S mòr mo dhiobhail o shamhuin,
S o fheillbride so chaidhe,

[TD 4]

Tha mi 'm thruaghan bochd mnatha,
Gu 'n cheann cinnidh thaobh athar no mathar.
Gun cheann, &c.

Mo cheist ceannard na 'n gaisgeach,
Gus a so nach d' fhuair masladh;
Bha do shuaithcheantas taitneach,
Ged a thogar do chreachan,
Cha chluinnear do chaismeachd,
No Ruairidh ga glacail,
Mhathaich suil nach robh ceart duibh,
'N latha chunnacas o Pheairt sibh a màrsadh.
'N latha, &c.

Iar-ogh' dh' Ailein na 'n ruag thu,
Cha neart dhaoine thug uainn thu;
Na 'm b' fheadh, dh' eireadh mu d' ghualain,
Luchd na 'n clogaide cruadhach;
Fir mur gharbh-fhrasa fuara,
Bheireadh leotha na fhuair iad,
'S goirt an nuaidheachd so chualas,
O 'n la chruinnich do shluagh ann an Aros.
O 'n la, &c.

Ach 's e chuir sinne an iomull,
Gun neart slainte no spionnaidh;
Sinn an drasd gun cheann-cinnidh,
Mur Mhaol-Ciarain ga sireadh,
Gur h-ann tiomchioll 'ur teine
Gheibhte bàird agus filidh,
Agus cearraich ri h-iomairt,
Organ 's clarsach bu bhinne,
Aig luchd na 'n cùl fionna cas fàinneach,
Aig luchd, &c.

[TD 5]

Ach a Rìgh 'ga bheil feartan,
Nach cruaidh leat mur thachair,
O 'n là thogadh a mach e;
Le spàinteach ghéur na 'n tri chlaisean,
A'd laimh threibhich gu sgapadh;
Gar nach d' fhuair thu air t-fhacal,
An tir a bh' aig t-athair,
B' fhèrr gu 'm faigheadh do mhac i,
'N Rìgh ga 'r coimhead o mhiosguinn ar nàmhaid.
N' Rìgh ga, &c.

Sliochd na 'n Rìgh 's na 'n long siùbhlach,
Na 'n ceann-bheairt 's na 'n each cruidheach,
Ged bu dìleas do 'n chrùn sibh,
Fhuair iad seòl air ur diùchradh,
Smairg nach gabhadh dhibh curam,
Ann an eirig ur siùdain,
'Nuair nach d'aidmich sibh tionndadh,
'S ann a rinn iad air aon long 'ur fàgail.
'S ann a rinn, &c.

Ach fhir tha 'n cathair an fhreasdail,
Cha 'n eil aon ni mur cheist ort,
Mas mac do 'n Rìgh eisean,
So rinneadh gu teisteil,
Gun chol grand' na gun pheacadh,
Ged a dh' fhuiling e greis deth,
Bhi ga shior chuir an teagamh,
Aig luchd fuath agus measguinn ga aicheadh.
Aig luchd, &c.

Iad a' gabhail mur leith-sgeul
Nach eirich iad leisean,
Thoir da eisdeachd na freagar,
Gus an àicheadh e creidimh,

[TD 6]

Ach 's e aobhar mo ghreadaidh
Mac Mhic Ailein a leagail,
Nis co 's urrainn d' ar seasamh,
Chaill sinn cruadal a's misneach na 'n Gaidheal.
Chaill, &c.

Co an neach ga bheil sùilean,
Nach gabhadh da ionnsaidh
Mur tha choill air a rusgadh,
Fhrois a h-abhull sa h-ubhlan,
Dh' fhalbh am blath bhar gach ùr ros,
O nach mairrionn an t-aon-fhear
Fo laimh Dhia gabh dhinn cùram,
'S ann tha fuasgladh na cuis aig an Ard-Rìgh.
'S ann tha, &c.

Oirne thainig an diobhail,
Tha Sir Iain a dhith oirn,
'S Cloinn Ghilleòin air an dìobradh,
Iad gun iteach gun linnidh,
Ach mur gheoidh air an spionadh,
Cha n' eil fèum bhi ga innseadh,
'S iad a' measg an luchd mio-ruin
Gar an ann ri feall-intleachd a bha iad.
Gar an ann, &c.

Gur h-e turas na truaighe,
Gun bhuidhinn, gun bhuannachd
O 'n la ghabh sibh cead buan
Do dh' oighre Dhubhairt na 'n stuaghan
Ged tha sud na chàs cruaidh oirnn',
Os cionn tuigs' agus smuaintean,
Cha cheist air Dia fuasgladh,
'S e a faicinn sa nuair so mur tha sinn.
'S e a faicinn, &c.

[TD 7]

'S e mo chreach gu 'n do strìochd thu,
Gun òl, gun phoit fiona,
Do chlann òg air an dìobradh,
Co ni 'n deoch dhoibh a lìonadh

Chasg am paghaidh na 'n iota,
Cha' n'eil fath bhi ga chaoidh sin,
Gun thu 'n caidreamh do dhislean
'S ann a dh'fhàg iad thu mhios gus a maireach.
'S ann a dh'fhag, &c.

'S e chuir m' astar a maillead,
'S mo shuilean an doillead
Bhi aig faicinn do chloinne,
'S a 'n luchd foghlum sa 'n oilein
Bhi na 'n ceathairne choille,
'S iad ga 'm fògairt gun choire,
Gun solus gun choinneal
'S iad gun fhios ac co 'n doire 's an tamh iad.
'S iad gun, &c.

Gur a goirt leam ri chluinntinn,
'S gur a h-oil leam ri iomradh,
Gach neach a tha 'g innseadh,
Nach robh agaibh d' ur muinntir,
'S nach d' thug sibh 'ur 'n iondrain,
Oil air mhath da luchd diomba,
Do dh' I mar-ri mhuinntir,
'S gu'm biodh sa 'n Innis m'a thimchioll na càirdean.
'S gu 'm biodh, &c.

Och, 's mis' th' air mo sgaradh!
Nach d' thug iad thu thairis,
Dhol air tir air an Ealaidh,
Dhol fo dhion anns a charruig,
Do reilig na 'Manach,
Far 'm bheil do chàirdean na'n luidhe,

[TD 8]

Mar-ri t-athair 's ri d' shean'air,
Far am faodadh mid teannadh mud' charnan.
Far am faodadh, &c.

'N deagh bhean mhaiseach so chi mi,
'S i nighean a bharain Cairiona,
'S gar nach 'eil i t-fhuil dhireach,
'S trom an sachd th' air a h-inntinn,
A deoir a' sruthadh gu lionor,
'S leann-dubh air a cridhe,
Tha do chumh' air a lionadh;
'S goirt 's gur cruaidh lea' 'n lom sgrìob th'air do chairdean.
'S goirt 's gur, &c.

'S mairg a dh' fhèuchta na fhulang,
Mur a dh' eirich e dhuinne,
Gur a mithich dhomh sgar dhibh
'S gun bhi toiseachadh tuille
'S ann mu 'n taca so 'n uraidh
Rinn mi croghadh a's tional,
Bhrìst an claidhe na dhuille,
'Nuair a shaoil mi gu 'n cumadh mid slan e
'Nuair a shaoil, &c.

Do dh' EACHUNN MAC IAIN DIURAICH.

Le MAIRIRIAD NI'-LACHUINN cheudna.

GUR h-e mheudaich mo chràdh,
'Sa lughdaich mo chàil,
A liuthad latha 'sa bhà,
Mise 's tus' air an traigh,

[TD 9]

Gur a diombach mi 'n bhas,
Thug an fheoil dhìom o 'n chnaimh,
'S gur h-ann againn a bhà na treun-laoich.
'S gur h-ann againn, &c.

Luchd a dh-iomairt an oir,
'S iad a dhìoladh an t-ol,
Leanadh fad air an toir,
Ann an cumasg na 'n stról,
'S co chuireadh orr gleo,
Ann am mùiseadh an t-sloigh,
'S ciod am fath dhomh bhi bron mu 'r deighinn.
'S ciod am fath, &c.

Mo cheist an Leathanach ur,
Bu ghlan seallamh do shul,
Fo amharc gun smur,
C' ait am facadh mi dhiu,
Fear t-fhasain gun tuilg,
Ged a sheasadh iad triùir,
Ri t-fhacal a b' fhiu dhoibh éisdeachd.
Ri t-fhacal, &c.

'S ann 'sa 'n eaglais so shuas,
'N ciste ghiubhais nach gluais,
Tha ùr-cheannard an t-sluaigh,
Agus marcaich na 'n stuagh,
Ri la frionasach fuar,
'S tu gu 'n iarradh i suas,
Ged a bhiodh i 'n sàs cruaidh na h-eiginn.
Ged a, &c.

Och a mhoire mo chall!
Thu bhi 'n cistidh na 'n crann,
Air a sparradh gu teann,
Fhir bu shiobhalta cainnt,

[TD 10]

Nuair a dhuisgte ort fearg,
Cha bu shugradh sud doibh,
'S mor ga 'r dith fear do rannt o 'n dh'eug thu.
'S mor ga 'r, &c.

Marcaich deas na 'n each seang,
Bheireadh roid asd' as srann,
Beart nach b' iongadeach leam,
Thu bhi uasal do 'n ainm,
Lamh thu dh' iomairt na 'n arm,

Gu cruadalach garg,
'S iar-ogh' dh' Ailein na 'n lann, 's na 'n steud thu.
'S iar-ogh', &c.

'S car thu dh' Ailein na 'n ruag,
Chreach a Chorca da uair,
Thug e Rùta le buaigh,
Co b' urrainn thoirt uaith,
'N am cruinneachadh sluaigh,
Gun athadh roimh 'n snuagh,
'Nuair a chaidh e air chuairt a dh' Eirinn.
'Nuair a chaidh, &c.

Agus car thu Mhac Leoid,
Mhic Ailein, Mhic Eòin,
Eachunn ruagh nach eil beo,
Ga 'm biodh taileasg air bord,
Fion a's branndaidh ga òl,
Aig na fir bu chruaidh gleo,
Agus bualadh na 'm bròg ga n teumadh.
Agus bualadh, &c.

Ach na 'm bithinn 'sa bhuth,
'S na h-airm ann a b' fhiu,
Nàile thaghainn do 'm rùn
'Sgiath bhreac na 'm ball dluth;

[TD 11]

Claidhe sgaiteach geur cuil,
Paidhir phiostal nach diult;
'S cha bu chlaoghaire thu thoirt feum asd.
'S cha bu, &c.

Ogha dileas mo ghraidh,
Do dh' Iain dubh a bha 'n laimh,
Sliochd na 'n Iarlachan àrd,
'S fhad o 'n thriall sibh o 'n Spainnt,
'S ann o Lachunn a bha
'Ur 'n iondraichean chràidh,
'S fear do choltais gu bràth cha leir dhomh.
'S fear do, &c.

Gur a cáirdeach mo luaidh,
Do Chlann Donuill na 'm buadh;
Mhic 'Ic Ailein na 'n ruag,
Thu bhi d' luidhe sa 'n uaigh,
Ann an eaglais na 'n stuagh,
Och a mhoire mo chrua's;
Ghabh na fir dhiot cead buan nach b'eibhinn.
Ghabh na fir, &c.

Fhir bu tighearnail gnàs,
Beart bu dligheach sud da;
Mo chreach do nighean gun àird!
'S i na leith-sgeul aig càch,
Nach do ghabh iad a pàirt,
Liuthad còrr oinnseach a thà
Faotainn ionad a's áite féisteil.
Faotainn ionad, &c.

Fhir a cheannaicheadh am fion,
'S tu b' úrrainn d' a dhiol,
'S tu b' airidh air pic,
Bogha glaic na 'n ceann liomh,

[TD 12]

Och a mhoire mo dhith,
Bha mi romhad air tir,
'N uair a thug iad thu dh' I na cleire
'N uair a thug, &c.

'S och a Mhoire mo chall!
'N uair a thug iad thu nall;
Gu reilig na 'marbh,
Mu 'n robh a chaismeachd shearbh;
Bualadh bhasa gu teann,
Gun do chluasag fo d' cheann
'S a rùin cha fhreagair thu 'n t-am gu éiridh.
'S a ruin, &c.

Tha do chéile fo leòn,
'S tric i snitheadh na 'n deòir
'S do dhileachdain og,
Gun áird na gun doigh,
Mu na lochana mòr,
Dh' fhag thu sinne fo bhròn;
'S chaill sinn tuille 'sa chòir mu t-eirig.
'S chaill sinn, &c.

'S ann tha sinn air ar claidh,
Ga'r sàrach' a' caoidh,
O 'n a dh' fhalbh uainn gach saoidh,
Dheanadh féum a's stath dhuinn;
Nis shracadh ar siuil,
Dh' fhalbh ar cairt bhrìst ar sdiùir,
'S Dia thoirt rathad g'a ionnsaidh fhéin duit
'S Dia thoirt, &c.

[TD 13]

Do dh' AILEIN MAC 'ILLEAIN, Tuiteir Bhròlais.

Le MAIRIRIAD NI'-LACHUINN cheudna.

CHUNNAIC mise thu Ailein,
'S tu gu h-aimideach gorach,
Mu 'n do ghlac thu 'n gnìomh fearail,
Na mu 'n d' rinneadh dhiot Coirneal,
Marcaich ùr na 'n steud brasa,
Thu bhi 'n tasgaidh 's na bòrdaibh
Och 's mis' th' air mo sgaradh!
Caoineadh Ailein 's nach beo e.

Fear t-aogais cha 'n fhaic mi,
Ann am faicheachd na 'm foghlum,
Bu mhath cuma dhuit sleisde,
Suil, beul, agus sròine;
Gu 'm bu cheannard air feachd thu

Thoirt doibh smachd agus ordugh;
Fhir nach leughadh a ghealtachd,
'S tu nach seachnadh a chomhruig.

Ogha brathar dhà Lachuinn,
'S e mo chreach nach do phòs thu,
'S e dh' fhag sinne cho galach
Dheagh Mhic Ailein 'Ic Dhomhnuill;
Mhic an fhir a fhuair urram,
Nach cuireadh duin air an fhogradh
Och 's mis th' air mo léireadh,
O 'n la dh' eigheadh an dòibheart.

Air 'ur dol do Dhuneidionn,
Thug sibh reidhte leibh dhachaidh,

[TD 14]

Ghlac Rìgh Seumus air laimh sibh;
S dh' iarr a Bhan-riogh a 'steach sibh;
Cha robh Gall 's cho robh Gaidheal,
'N seomar clàraidh no 'n caisteal
Nach do sheas air a chausair,
Aig meud an geall air 'ur faicinn.

'N sin nuair chunncas na h-àrmuinn,
Agus iadsan na 'n còidse,
'S nach d' iarr iad a dheise;
Ach breacan a's còta
Sgiath bhreac na 'm ball iomad,
Air an slinnein gu còmhruidh
Sin nuair labhair gach duine,
Gu'n robh a chulaidh ud neonach.

C' ait' an robh iad sa 'n t saoghal
Na 'n taobh so do fhlaithes,
Mac samhailt na 'n daoine,
Cha 'n fhaodar am faighinn;
Mach o ghathan na greine,
Ann an speiribh an adhair;
'S nach iarradh-mid air son sgàthan,
Ach cead bhi'n àite ga 'n amharc.

'S thuirt gach Moir-fhear a b' airde,
Gu 'n robh t-aite 's tigh lagha;
Co a dhìobradh gu brath thu
'S gun ghrain bhi air t-aghaidh,
Ach an teacaire dàna
Bha gabhail tàmh sa cheann-adhairt,
Dh' fhag sinne mur tha sinn,
'S nach robh a dh' àgh oirn do ghleithheadh.

'S car' a dh' Iarla na 'm pìos thu,
Bh' ann an an Ile ga 'n stròiceadh,

[TD 15]

'S do Lachunn mor prìseil,
'S e chuir mi ga d' shior fheòraich;
C'ait a bheil iad an Albuinn,

Na thall anns an Olaind,
Leithid cinne mo mhathar
Mach o ardan Chlann Donuill.

'S cha 'n e sin tha mi gearan,
'N dràs, ach eallach fear Bhròlais;
Co sheasas r'a ghualainn,
'S e sa 'nuair so na onrachd;
O 'n a dh' fhalbh uainn do bhrathair,
'N tus àilleachd a's oige,
Gun a' mac theid na àite,
Leam is cràiteach an dòibheart.

'S ogha brathair dha Lachuinn,
Thug an t-each a Strathlòchaidh,
A thug ùmhlachd o 'n mharcaich;
Thug dheth ad a's a chleoca;
Ach cha b' fhiach leis a ghleithheadh,
Ged bhiodh deiltreadh do 'n or air,
Ach a mhathadh d'a ghillean,
Dheanadh iomairt a's ol leinn.

'Sin nuair chruinnich na h-armuinn,
'S na gaidheil gu h-uilidh,
Luchd na 'n clogaide stailinn;
'S na 'n lann spainnteach geur guineach,
'N am tilleadh o 'n bhlar dhuibh,
Bu leibh fàilt agus furan,
Piob roimhibh a' màrsadh,
'S nach b' aill leibh an drum.

'N am tilleadh o 'n bhlar dhuibh
Gu 'ur 'n aiteachan comhnuidh,

[TD 16]

Chluinnte foirm air an damhsa,
Fion as branndaich ga òl ann,
Uisgebeatha na 'm feadan,
Leis an leagte na geocaich;
Fir air urlar na 'n seasamh,
'S iad a' freasdal toirt doibh sud.

'S fhir ga bheil a ghnuis àluinn,
Fo chul tlath na 'n ciabh òrbhuidh;
Com is gile na 'n canach,
'S na 'meall-shuilean mòdhar;
Dh' fhas gu deas, foinnidh, fearail,
'S fhad a leanadh an torachd
'S e do bhàs eadar Ghallaibh,
Dh' fhag galach ri 'r beo sinn.

'S e do bhàs eadar Ghallaibh,
Chuir sinn tamull ga t-iondrainn;
'S nach robh 'n sin agad caraid.
A theannadh gu t-ionnsaidh
Na idir ga d'chàradh,
'Nuair a dhalladh do shùilean;
Ach t-fhagail sa 'n t-seomar,
'Sa chomhl' air a dùnadh.

Ach na 'm biodh tu 'n sin aca,
Far an racht' air do thòrradh,
An talla na h-Innse;
Na 'n I far 'm bu choir dhuit
Ann 'n reilig na 'm Manach,
Far bheil na barranta mòra,
Dhol air tir air an Ealaidh;
'S cha bhiodh tu fad ann a t-onrachd.

Ach na 'm biodh tu 'sa 'n tir so,
Far am bitht' air do thòrradh

[TD 17]

Ghluaiseadh Murcha na Maighe,
'S Mac 'Illeain na 'n roiseol,
Mac Eoghain 's Mac Eachuinn,
O Shiol Airceig a's Lochaidh,
Och mo thruaigh do bhrathair!
'S i do mhathairse brònag.

Ach a Thì leig an sgrios oirnn,
'S ann tha sin air a sgrìobhadh,
Na crainn mhor air am bristeadh,
Mu na dh' fhiosraicheadh dhinn iad;
Na crainn mhor air am bristeadh,
Thug dhinn ar 'n iteach 's ar linnidh,
Thuit a phairc an robh 'n t-abhull;
'S fhrois an snotuch bu phrìseil.

'S mi mur Oisein na 'r diaidh,
O 'n rinneadh tagha na 'n cáor oirbh,
'S gach aon mur a b' fhearr dhiu,
Thugadh iad as an t-saoghal:
O 'n 's e Criosda ghabh toirt dibh,
'Sa dh' fhag goirt-cheannach daor sinn,
Rìgh thoir maitheanas dhùinne,
Bhi ga 'r 'n iondraichin daonnan.

'S co a nis na bheil ann diu,
O 'n dh' fhalbh sibh oirnn mur an raineach,
Fhrois ubhlan a ghàraidh,
Gus an d' fhagadh e falamh;
'S ann tha 'n t-oighre air fògradh,
'S e gun seol aig air fantail;
Och a mhoire mo leónadh,
Chuir do chòir aig Mac Cailein.

'S tric gach aon neach a faighneachd,
Ciod e t-aois a nigh'n Lachuinn,

[TD 18]

'S ciod e 'm fath dhomh sud innseadh;
'S nach creid sibhs e 'n lorg m' fhaicinn,
Cha 'n eil fiacaill am dheudach,
Nach do leum as mo chlaigeann
A sior iargain na 'n daoine,
Ris an glaoidhte na gaisgich.

Do Shir EACHUNN MAC 'ILLEAIN.

Leis an te cheudna.

THI tha 'n cathair na 'm feartan,
Cum ceart agus còir ruinn,
'S cuir deagh sgeul thugainn dachaidh,
Air Sir Eachunn na 'n roiseal;
'S ach ma chaidh thu as t-fhearunn,
'S tu bhi tamull air fogradh;
Gur h-e sgeula mo sgathaidh,
Càch ag aithris nach beo thu.

Shir Eachuinn na 'n lùireach,
Na 'n long siùbhlach 's na 'm bratach,
'S na 'n cuirtinean rìomhach,
Gu 'm bu lionar do ghaisgich;
Sa liuthad Iarla mor priseil,
Theid a sios ann ad bhaiteal;
Bhiodh tu 'n toiseach fir Alba,
'S bu mhor t-armailt ri 'm faicinn.

'S tu chraobh is airde anns an doire,
Th' ann an coille na 'n Gaidheal,
Agus conspunn gun ghiorrag,

[TD 19]

Sgiath air uilinn Phrionns Tearlaich;
Bu tu iuchair an fhuasglaidh,
'Nuair bu chruaidh na bu chàs e;
Meud do ghliocais 's do chéille,
Bheireadh reidh as gach cas thu.

'S tha thu 'd dhalt aig a Bhan-righ' n,
'S mor an gradh thug i fhein duit;
Mur leine chneas aig a brathair;
'S mur aisne chnamha nach treigeadh;
Chaill thu t-oighreachd a's t-fhearunn,
'S thug thu thairis gu leir e;
Air son seasadh gu rioghail,
'S rinn do shinnsreachd fhein sin.

Tha mo chion air an fhior-fhuil,
Og rioghail na h-ealtainn;
Agus cuilein an leoghuinn,
'S og a dh' fhoghlum thu gaisgeadh;
Ursann chath thu roimh mhiltean,
'N am dhol sios ann am batailt;
'S b' urra' shuidheachadh blair thu,
Ged bhiodh càch ann an gealtachd.

Dh' aithnich latha Chuileodair,
Gu 'm bu dosgach na Gaidheil;
'S gu 'n robh thus ann an Sasunn,
'N deigh do ghlacadh le d' namhaid;
Ach na 'm biodh tu aca,
Mu 'n do chaisgeadh an arach;

Cha rachadh fir Shasunn,
Slan dhachaidh gu 'n aite.

Tha do chaistealan geala,
Agus do thallachan priseil;
Far 'm biodh ol agus aidhear,

[TD 20]

Aig luchd a chaitheadh an fhìona;
O luchd na 'n adaichean dubha!
'Sgeul tha dubhach le 'm inntinn;
'S truagh nach robh iad 'sa chaillich
Fo chaitheam a lionaidh.

Tha seannduine laidir
Gabhail tamh anns an Rìoghachd so;
Tha e dìonach na fhearunn,
'S cha charaich an Rìgh e;
Ged a thigeadh fir Shasunn,
'N deigh an cartadh gu 'n intleachd;
Bheireadh easan doibh aite,
'S cha bhiodh màladh mur strìth orr'.

Tha Baintiarn og eile,
'N cois an eilir mu thuath oirnn;
Gu bheil corr a's ciad bliadhna,
O nach d' iarradh a gluasad;
Ged a thigeadh Diuc Uillcam,
'S na tha chruinneachadh sluaigh aig;
Bheireadh ise dhoibh dinneir,
'S cha bu dìhte i uaip e.

Seal mu 'n d' thainig Rìgh Raibeart,
Bha i socrach na h-aite;
Cha do thogadh riamh cis d' i,
Na dìol air son malaidh;
Nuair a dh' eireadh oirr' corraich,
Rìgh bu choimheach a gaire;
Chuireadh crìth air na mìltean,
Rì linn dhol g'a feuchainn.

Tha mo chridh' air a thraghadh,
Mur phaipeir a fhliuchte;
No mur fhiadh air an fhasach,

[TD 21]

A ghearrte gach cuisle;
Gach aon nuaidheachd is cruaidh leinn,
Tighin cho luath ri each trupa;
'S gu bheil cuid aca 'g radhainn,
Fath mo chraidh nach tig thusa.

'S tha do mheasana' guaille,
'S do dhaoine uaisle le cheile,
'S tha do mhialchoin gun fhuasgladh,
'Snaoim chruaidhe air an fhéille,
Iad a fullang gach mùisig,
Slat sgiursaidh na 'm beistean;

'S iad a feitheadh na h-uaire
Gus am fuasgail thu fein orr'.

Cha 'n e cumha na caoireachd,
Tha mi caoineadh sa 'n earrach,
Ach ri iarguin na 'n daoine,
Ris am faodainn mo ghearan;
'S ann diu Ailein Mac Thearlaich,
B' e mo chradh do chall fala,
'S i na ruith as gach taobh dhiot,
Na a caoranabh meara.

Ormsa thainig an t-anrath,
'N tus geamhraidh na gaillinn,
Na h-eich ghorm agus dhubha,
Ga 'r bruthadh 's ga 'r prannadh;
'S nach tug iad do dh' I thu,
Mar-ri sinnsreachd do shean'ar,
Far 'n robh fuil na 'n seachd Rìghrean
Do 'n fhion-fhuil bu ghloine.

'S ann theireadh Clann Lachuinn
Nach fanadh iad uaitse,
Ged nach d' rinn iad sin aidmheil,

[TD 22]

'N am t-fhaicinn 'sa chruadal;
'S ann a leagadh an Caiptein,
A bh' agad ri d' ghualainn;
'S gu 'n d' fhuirich thu aige,
Gus 'n do threachailte uaigh dha.

'S mithich dhomhsa bhi samhach,
Sgur do dh' àireamh na 'n uaislean,
Tha mo dhochas an Crìosda,
Nach fìor mur a chualas;
Ach gu 'n tig Mac 'Illeain,
Nall fhathasd thair chuantain;
'S gu 'n d' theid sinn na chomhail
Gle dheonach 'sa 'n uair sin.

MOLADH CABAR-FEIDH,

Leis a Bhard MAC MHATHAN.

DEOCH slainte chabair feidh so,
Gur h-eibhinn 's gur h-aidhearach;
Ge fada o thir fein e,
Mhic De cuir ga fhearunn e,
Mo chrochadh a's mo cheusadh,
A s m eideadh nar mhealadh mi,
Mur ait leam thu bhi 'g eiridh,
Le treun neart gach caraide.

Gur mise chunnaic sibh gu gunnach,
Ealamh, ullamh, acfuinneach;
Ruith na 'n Reothach, 's math 'ur gnothuch,

[TD 23]

Thug sibh sothadh maduinn doibh,
Cha deachadh Cataich air an tapadh,
Dh' fhag an neart le eagal iad,
Ri faicinn ceann an fheidh ort,
'Nuair dh' eirich do chabar ort.

B' e 'n t-amadan fear Fòluis
'Nuair thoisich e ri cogadh riut,
Reothaich agus Ròsaich,
Bu ghòrach na bodaich iad,
Friseilich a's Granntaich,
An campa cha stadadh iad,
'S thug Feirbeisich na 'n teann-ruith
Gu sean tigh Chuileodair orr',

Theich iad uile, cha do dh' fhuirich,
An treas duine bh' acasan,
'N t-Iarla Catach, ruith e dhachaidh,
Cha do las a dhagachan,
Mac Aoidh na 'n creach, gun thàr e as,
'S ann dh' eigh e 'n t-each a b aigionntaich,
Ri gabhail an raitreuta
'Nuair dh' eirich do chabar ort,

Dh' eigh iad port, 's gu 'n d' fhuair iad coit,
'S bu bheag an toirt mur thachair doibh,
Ciod e 'n droch-rud rinn am brosnach;
Le 'n cuid mosg nach freagaradh;
'S a luithad toirt-fhear 'n chinne Rosach,
Dol air phlod thair chlaigeannan,
'S ann ghabh iad an raitreuta,
Nuair dh' eirich do chabar ort.

Cha cheil mi fhein mo dhurachd,
'S e dhuisg a's mo chadal mi,
An Ti d'a 'n geill na duilean,

[TD 24]

'S da 'n umhlaich a h-uile-ni,
Gu 'n greas e thu gu d' dhuthaich
Gu h-uiseil 's gu h-urramach,
Gur tu nach leigeadh cuis
Leis na dughail nach buineadh dhuinn.

'S tu bheireadh clothamh do 'd luchd cothaich,
Gun fhios co e a throideadh riut,
Am fine Reothach chuir thu fothad
Ge mor leotha 'n gadarnas;
Ga 'n cuir romhad le ruith choimheach
'S a 'm Baile nodha bhiodh na shradagan,
'S na lasair anns' na speuran
'Nuair dh' eireadh do chabar ort.

Chunnaic mi 's taobh tuath thu,
'S gu 'm b' uachdran allail thu,
Bha Cataich fo do churam,
A's dh' umhlaich na Gallaich dhuit,

'S gach ti bhiodh riut an diumba,
'S nach duraichdeadh seallamh ort,
A faicinn bhi da 'n sgiursadh,
Gu duthaich nach buineadh dhuit.

Le gasraidh inealt dheth do chinne,
Nach gabh giorrag eagalach,
Luchd chlogaid 's bhiodag, 's chorca driomunn,
Cha philleadh luchd bagair iad,
Thig feachd Mhic Shimidh gu do philleadh,
'S ruitheadh iad gu saidealta;
'S gu 'n teich iad o lathair t-eudainn,
'N tra dh' eireas do chabar ort.

'Nuair thig am Marcus thugainn dachaidh,
'S na fir ghasd gu freagairt leis,
'S lionar marcaich thig gu d' charraid,

[TD 25]

Null gu h-Asinn leanadh riut,
Dheanadh atack air an Caisteal,
'S cha bhiodh clach gu 'n leagail deth,
'Nuair thogas Uilleam leibhidh,
Gu 'n eirich an cabar ort.

Tha 'm brochan aig toirt saradh,
Tha 'n càl aig toirt at oirbh;
Ach 's beag is miste 'n t-armunn,
'Ur sàth thoirt a nasgaidh dhuibh;
Ge mor thug sibh chaise,
Thair airinean Asinne,
Cha 'n fhacas cuilm am Foluis,
Ge mor bha do chearcann ann.

Caisteal biorach, nead na h-iolair,
Bidh na gilleann gortach ann,
Cha 'n fhaicear biora ann ri teine,
Mur bi dileag bhrochain ann,
Choidhch cha 'n fhaicear ac' a mhairt-fheoil,
Mur bi cearc am poit aca,
'S ga 'n tional air an deirce
'Nuair threigeas gach coisneadh iad.

Sporsail spaideil seol do bhagaist,
Gur a fad o d'choluinn iad,
Fhuair thu spadadh ri cois cladaich,
Ghreas gu grad gu h-onair iad,
Mu 'n d' fhuair si fear gu 'n d' fhuair se bean,
Cha 'n fhàs a chailleach torrach dhà,
'S ann bha i leith-chiad bliadhna,
Mu 'n d' iarr crom-an danais i.

Cha 'n eil eun 's na speuran
Is breine na 'n iolaire,
Cha 'n ionunn idir beus d' i,

[TD 26]

'S do dh' fheidh bhios 's na firichean;

Bidh iadsan moch ag eiridh,
A feuchainn na biolaire;
'S bidh is' air sean each caoile
A slaodadh a mhionaich as.

Chuir i spuir a stigh na churach,
As thug i fuil a chlaiginn as,
An t-eun gun sonas, 'g iarraidh donais,
Bidh na coin a sabaid r'i,
'S breun an t-isein i air iteig
Gun fhios c'ait an stadadh i;
Ma 's olc a lean i h-abhaist
Cha 'n fhearr far 'n do chaidil i.

'S ioma buachaille air fuar chnoc
Agus cuaille bat aige,
Ni guibhe chruaidh do bhean do shnuagh,
'Sa bhuaileas o do thapadh thu,
'Nuair bheir thu ruaig air feadh na 'n uan;
'S a bhios buaireis acrais ort;
'Nuair thachras cabar feidh ort,
Gu 'm feum thu bhi snasadh dha.

Cha 'n eil eun 'san t-saoghal
Dh' fhaodar r'i a chosmhalachd,
Cha 'n ithear a cuid sithne,
Rinn fìrean a mallachadh;
Ged tha ort iteag dhireach,
Mur fhior shaighdean corranach,
'S ged thuirt iad riut am firein,
Tha iongnan an donais ort.

Tha cabar fearunn Donuill
Mur spòrs anns an talamhs' ac,
Nach h-innseadh sibhse dhòmhs' é

[TD 27]

'S gu 'm b' eoil domh a charachadh,
'S chuirinn fios gu h-eolach
Gu Seorus au garaidheach,
Gur h-e Coinneach Achadadonuill
Le a lon chum an t-anam ris.

Bhiast gun mheas, gun mhiagh, gun phiseach,
Riamh bu tric sa 'n talamhs' thu;
Dh' ol a's dh' ith thu trian do d' phiseach,
'S tu a' t-isein amaideach;
Chuir na Reothaich thu air ghnòthach
'S tu a t-amhusg aineolach,
'S ged thug Clann Choinnich miagh dhuit'
Cha b' fhiach thu 'n treas earrunn deth.

Faire, faire, shaoghail!
Gur caochlaideach carach thu,
Chunnaic mise Siophort
Na 'm piob cruaidhe sgalanta,
Nach robh 'n Alba dh' aon-sluagh,
Ged a shineadh Mac Cailein ris,
Na chumadh riut san éudann,

Nuair dh' èireadh do chabar ort.

Dh' eireadh leat an coir sa 'n ceart,
Le trian do neart gu bagarach,
Na bh' eidear Asinnt a's fa dheas,
Gu ruig Scalpa-Chraganach;
Gach fear a ghlacadh gunna snaip,
Claidhe glas no dagachan;
Bu leat Sir Donull Shleibhte,
'Nuair dh' eireadh do chabar ort.

Dh' eireadh leat fir mhuideart
'Nuair ruisgeadh do bhrataichean,
Le 'n lannan daithte dughorm

[TD 28]

Gu 'n ciùirte na marcaich leo,
Mac Alasdair 's Mac Ionmhuinn,
Le 'n cuilbheirein acfuinneach;
'Nuair rachadh iad 'sa 'n iorghuill,
Gu 'm b' iongnadh mur troideadh iad.

Bidh tu fhathasd gabhail aidhear
Ann am Brathainn bhaidealach,
Bidh cinne t-athar ort a feitheadh,
Co bhrathadh bagar ort
Bidh fion ga chaitheadh feadh do thighe,
'S uisgebeatha feadanach,
'S gur lionor piob gá 'n gleusadh,
'Nuair dh' eireas do chabar ort.

Diomoladh Chabair feidh.

Le ALASDAIR MAC DHONUILL.

GU bheil mi air mo bho'radh,
Le toghnadh na h-ealainich,
Bhi falbh air feadh an t-saoghail,
Mur ghaoth chruaidh 's i sgalanta,
Ged eireadh Iarla Shiophort,
'S gach ni mur a ghealladh leis;
Tha fine anns' an Rioghachd,
Bheireadh cìs a dh' aindeon deth.

Cha 'n eireadh leat fir mhuideart,
'S cha b' fhiu leo bhi 'n ceangal riut;
Gur mor tha bhrigh do bheolsa
Na chomhra' ro leamhanach;
Ach c' ait an d' fhuair thu dh' aodann,

[TD 29]

Gad a dh' aontaich do theanga leat;
Na chruinnicheadh am porr ud,
Sàr bhocain nuair chreanaicht iad.

Cha 'n eireadh leat fir Shleibhte,
'S na 'n eireadh b' e 'm breamas e,

Le 'n aigne uasail uaibhrich
Gu tuaireap nuair chreanaicht iad;
Le 'n oigridh sgairteil ghruamach,
Co luath ris an dealanaich;
Gu 'n sgoilteadh iad Triath Shiophort
An latha strith no fionnachais.

Cha 'n fhaod mi sheachnadh 'sa 'n dol seachad,
Gun a ghlacadh farasda,
Cail a mharcuais air sgath facail,
'S lagh ceart na mhearachd leis;
Ag coimeas Shiophort ri neart Rioghachd,
Ann an gnìomh no 'm fearachas;
Le ar leanmhuinn bhuig gun eolas,
A's moran d' i ro ain-eolach.

Ach ar leam fhein gur gorach
A dh' fhogradh Mac Ailein leibh,
'S gur sgeul e chaidh o cho'strith
Gur conspunn air aineol e,
Le a chinne lionar laidir,
'S iad dhasan cho charthannach;
'Na 'm faiceadh sibh air blar iad,
Bu nar dhuibh comh tharruing ris.

Ach c' aite 'n cualas riamh 'ur cruadal,
Ged tha sibh na 'r sluagh iomadai,
Le 'r feachd tuathach 's iad neo bhuadhar,
'S gainne crua's no giorrag leo;
Ged tha sibh laidir, lionar làsdail,

[TD 30]

Sibh gu sasta cilleineach;
'N taobh muigh do 'n bhrataich Shàilich,
Gu 'n d' thag sibh air Sliabh 'n t-Siorram i.

Gun tigh 'n air fine sonruicht;
Tha ioma seorsa bharrachd orra,
Thall 'sa bhos 'san Rioghachd,
Leis nach b' fhiù dol an coimeas riu;
Tha Tighearnan an taobh so,
Gu 'm faodainn dhol am baranntas;
A nochdadh ruibh an aodainn,
Ged tha sibh daonach fearunnach.

Tha iad gu meargant, feargaidh, feargach,
Dana gu garbh guinideach,
Ri uchd naimhdean 'n am adbhansa,
Ceannsgalach, cruaidh, curanta,
Iad mur dheandubh laidir neimhneach;
Sunndach an cas fuileachais;
Mur thoirreann eas le beanntaibh,
Gù 'n cluinnte foirm 'ur gunnaichean.

Ach cuiridh mis thu 'n cuimhne,
A's cluinn mi le faighidinn;
Na chuireadh thu sa 'n tuimhnich,
Ge bruidhneach ro labhar thu;
'N cual thu la Uillt Eire,

Bu cheiteill cinne t-athar ann,
Gu 'n d' fhuair sibh ann déuchainn,
O 'n dream nach éuradh fhathasd sibh.

Ghabh sibh maoim an aird an t-sleibhe,
Bachd an fheidh cha ghabhadh sibh,
Air bheag feum an cas Rìgh Searlais,
Lomlan oillt a's gealtrais;
Ghuil na speuran, sgeith na reultan,

[TD 31]

'G eigheach ruibh bhi aithiseach;
'Sann theap sibh ruith do 'n Eiphit,
Na 'm bu talamh reidh bu rathad duibh.

Ach leugh thus' eachdraidh Mhontros,
Ma shaoil thu gur bosd a th' agamsa,
A's cinnidh tu 'n sin ni 's eolaich,
Air seoladh a bhatailte,
Mu 'n d' thainig Moirfhear Gòrdan,
Na duine choir na saboide;
'S ann thug sibh slinnein comhluath,
'S cha mhor chaidh beo dhachaidh dhibh.

Theich iad uile, cha d' rinn fuireach,
An treas duine bh' acasan;
Mur fhear da 'n d' eirich le trom chreuchdan,
Dol fo ghleus na saboide,
As an deigh air feadh an t-sleibhe,
'S cach na 'n deigh na 'm baidealaich,
'Sann thug iad dhibh buaidh larach,
'S rinn iad àbhair mhagaidh dhibh.

Bha Frisealaich, g'ar comhnugh:
A's ioma seorsa bharrachd orra;
Bha Ionmhuirnis gle dhomhail,
Le mor-shluagh a Ghearasdain,
Ach 's aon cheithir chiad na 'n ònar,
A bha fodh ordugh Alasdair*,
Thug bristeadh as 'ur morshluagh,
'S bha ioma spoltadh salach ann.

Ma ghlac thu 'n cuidseal 's, feumail duitse,
Bhi gu purpail ceannardach,

* Alasdair dubh Ghlinnegaraidh.

[TD 32]

'S ma 's fear steids thu 's fheard thu eideadh,
'S ioma speic a bheanas duit,
O 'n 's pailte eucoir leat na reusan,
Tha do chreuchdan salach dheth;
Tha chuis ud air a comhdach,
O 'n 'se 'm bosd a chanadh leat.

Seinnear piob leinn, 's lionar pios duinn,
'S cuireadh mid sios gu tartarach,

Air ol fiona 'n ainm na ti ud,
Dh' orduigh pris na 'm brataichean;
Cha dean priob a chuir gu h-ìreachd,
An tosta rioghail againne,
Ach toga-mid le foirm i,
Le stoirm a's le beachdalachd.

A shiol na 'n Collaibh treubhach,
Leis an eighthe na batailtean;
O 'n tharladh dhuinn bhi 's tabhairn,
Gun bhairlinn gun teachdaireachd;
Gu 'n ola'-mid gu h-ordail,
Gu morchuiseach, smealpara,
Deoch slainte 'n leoghuinn loinich,
Nach maoineadh roimh 'n t-snapaireachd.

Deoch slaint an leoghuinn threin chalma,
Eugsamhail spraiçalachd;
Na 'n tigeadh do chinn fheadhnaidh,
Bu mheadhrach 'ur brataichean;
Cha b' fhiamhach sibh 'n 'ur campa,
Measg ghall feadh na 'm machraichean;
'S cha bu chabar stangach,
Gun taing bheireadh snasadh oirbh.

Tha iad gu h-oirdhearg, geurbharr, coirilidh,
Teintidh, foirdhearg, lasarach,

[TD 33]

'S iad mur stoirm air mhire chonfhaidh,
'S lainn na 'n dornn gu spealtaireachd,
Le 'n geur cholg, a' strachdadh bholg,
Gearradh cheann a's chorpana,
Cha bu chabar feadh na 'n gleann,
Ag ruith na dheann bu choltach riu.

'S e 'n leoghunn Riogh na 'n ainmhin,
Air ainmealachd a's urrantachd,
Air churantachd, 's air chruadal,
Air uaisl' agus urramachd;
Air dhuinealachd, 's air ghairgead,
'N am feuma ro fhuileachdach;
Gu cumpach, neartor, fuasgailt,
Gu luath chreuchdach, fuileachdach.

'S math do shuaitheantas 'sa bhrataich,
Dosgach, casgach, cumasgach;
Gu 'n eireadh sgairtealachd 's gach neach,
Ri faicinn ceart do chularan;
Nuair a dhearcadh tu gle cheart,
'S a bhiodh tu 'd bheachd gu furachail;
Gu 'n duisgte braise gun bhonn taise;
Le barrachd spraic 's na h-uile fear.

'S tur fhallain gath an leoghuinn;
Ri Strol a chrainn bhaidealaich;
Bu mhearsail, statail, ordail e,
'N dorn an laoich aigionntaich;
Air itealaich gu cruadal,

Dearg ruagh mur bharr lasarach,
Gu 'n cuireadh e stoirm le sgeimhle,
Siubhal sith fo ar casansa.

Gach neach sunndach sios sa 'n iorghuill,
Le 'n cuilibheirean acfuinneach;

[TD 34]

Fead na luaidhe, scread na 'm faobhar,
Surd neo chaomh ri stracaireachd;
Bidh lannan dughorm dol ga 'n dubhlan,
Gearradh smuis a's aisnichean;
Bidh fanna-ghal truagh air feadh na h-araich,
'S gearan craiteach acaineach.

Bidh gaor a's eanachainn ann na sgiodar,
Le gliogartaich dhagaichean;
Cinn ga 'm pronnadh, 's cuirp ga 'n tolladh,
Lainn ri ciogladh aisnichean,
Picean geura ga 'm bualadh,
Ri tarruing suas gu speachara;
Leis an aiteam bhiodh 's an fhuathas,
'S a riamh nach d' fhuaradh ceachara.

Na fir chomasach na 'n sonnadh,
Le fras a tolladh phearsanna;
A dh' fhas somalt air a choinneadh,
An am bhi sonnadh chlaiganna;
Sheinnte ponga air ur chlar loma,
'S pioban pronnadh chaismeachdan;
Gu 'n cuirte anail anns na mairbh,
A dhol gu foirghleus gaisgealachd.

Tharruing thu le d' bhoilich,
Clainn Donuill an coimeas riut;
Mas fear thu bhios ri oran,
Bi eolach mu 'n can thu e;
Na 'm faiceadh tu Diadomhnaich,
Am por ud nuair tharruing iad;
Cha 'n aithnichte duine beo dhiu,
Seach leoghuinn a's nathraichean;

'N tus an latha, bualadh chatha,
Ga 'n crathadh gu rucasach,

[TD 35]

Le treun lamhan, 's le geur chlaidhe,
Gearradh cheann a's chuisseannan;
Righ! b' ait an t-aidhear bhi ga 'n amharc,
Gach saoi 's gach flaith aig tuiteam dhiu;
'S gach treun laoch co bras gu feum dhiu,
'S gun cheann an fheidh ga 'n cuideachadh.

Ach mu dheighinn ceann an fheidh,
Ghearr e leum 's cha b' builear da;
'S ioma miolchu bh' air a dheigh,
Le 'n ruith threun 's le 'n gunnaireachd;
Ach theich easan cho ro ghleusta,

Mur bu bheus na h-uil uair dha;
'S cha robh a thrupairean an Alba,
Bheireadh calg no fionnadh as.

Meirg a chabair thar i as,
Gu 'n d' thug i mach na buidealaich,
Cha d' rinn i stad gus 'n d' rain' i Peairt,
Ruith gu bras an uidil ud,
'S ann thar a h-Ainsein i na achlais
Mur gu 'm paisgte cuigeal leis;
Cha robh bean Lot na 'm measg gu leir,
Suil na 'n deigh cha tugadh iad.

Gun bhothair thu mo chluasan,
Tha t-fhuaim ann mur dhrumachan,
O 'n thog thu do cheann cracach,
Na 's airde na bhuineadh dhuit;
A's mearsadh Earraghaidheal,
'Sa thorc nimhe ri sgath a chularan;
Gu 'n sgoilte ceann an fheidh leis,
Da reubadh na churagan.

Gu bheil mi air mo gheisgeadh
Le reicil an daimh Gharrannaich,

[TD 36]

Gun fhios nach ann 'sa bhuireadh,
Air thus thig do mhearan ort;
Ma theannas tu ri buirich,
Ri uinich na langanaich;
Rinn Dia dhiot creatair fiadhaich,
Ro fhiamhach gu carachadh.

Ach 's beag bu choir a dh' fhear do chail
Bhi labhairt an cas batailte,
Gar am faiceadh tu do namhaid,
Ach air fàir gu 'n starta' tu;
'S ann thugar caileachd anns a chas ud,
Barr air ghearr na 'm machraichean;
Gu 'm foghnadh aon lasag fhudair,
Chur sgeimhle dluth fo 'r casansa.

Duin do bhile 's gun thu t-fhilidh,
Tog do d' learan spaglainneach;
Phocain ghiorraich thoir ort pilleadh,
Tha 'n torc nimhe bagradh ort;
Tha saod millidh air do chinneach,
Mu 'n fhine ud a thachair riut;
Gur mairg bheir cuilgein as a spiolainn
'N am bhi sireadh sabaide.

Ach 's olc a bhagair thu cho ghorach
Air an leoghunn againne;
Creatair aigionntach tha sonruicht
Ri uchd gleois nuair thachradh e;
Lean luaidh larach anns gach cas leis,
Mur b' aibhist 's bu chleachda leis;
Gu maoimeadh feidh na h Alba,
Roimhe charbad na 'n caiste air.

'S tric a theich roimh d' dheudach
Na creatairean bu churaistich;

[TD 37]

Am por bu ghann do shealgairean,
A shealg anns na mullaichean;
'S ann latha 'n t Siorra miùir,
A sgiùrs thu na h-urrad diu;
'S gun thàr a steach a Shruileadh
Am fuighleach a dh' fhuirich dhiu.

Na 'm faiceadh sibh 'n damh Saileach,
Le bharr ard 's le ghliogaidean;
An cuamhlan glas fo 'n arma'
Fir chearbach nach misneachail;
Cha saoilleadh fear ri shealltainn,
Gu 'n robh falls' no bristeadh ann,
'S ann thar e mach air as an ranc,
'Sa 'n ruaig gu teann ri easgaidean.

Ma ni sibh tathaich anns an rathad,
Gheibh sibh caithream ghreadanach;
Le roinn na deannadh, dol gu 'r sagmhain,
Aig leum a maide feadanach;
Gheibh sibh doinionn o Ghleanngaraidh,
O chaithream na deaslaimh,
'S o theanchair an leoghuinn bheucaich,
'S cabar feidh cha teasraig sibh.

Bidh sibh fhathasd mur is cathair,
Ann an tathaich eaglaisean,
Le gair chatha 's le ceann claidhe,
Cuir gu Brathainn teicheadh oirbh;
Cruaidh ga 'r caitheadh shios ga 'r sgathadh,
Siorradh lann a's easgaidean;
'S gur lionar piob ag eigheach,
Raitreut air a chabar ud.

[TD 38]

Oran air blar na Tolainde am bliadhna 1799.

Le ALASDAIR MAC IONMHUINN, Coirpleir bh'ann an Reisimeid, Mhoir-fhear
Hunndaich, 'sa nis air Gearasdan Ionmhuir Lochaidh.

Fonn-Alasdair duhh Ghlinne-garaidh.

AIR mios deireannach an fhoghair,
An dara là gur math mo chuimhne;
Ghluais na Breatunnaich o 'n bhanca,
Dh' iunnsaidh tachairt ris na naimhdean;
Thug Eabarcrombaidh taobh na mara
Dhiu le chanain 's mi ga 'n cluinntinn;
Bha foirneadh aig Mur gu daingneann,
Cumail teine ris na naimhdean.

Thriall Eabarcrombaidh 's Mur na feile,
Le 'n laoich euchdail thun na batailt;

Tharruing iad gu h-eolach treubhach,
Luchd na beurla ri uchd catha;
'Nuair a dhluith na h-airm ri cheile,
Dhubhadh na speuran le 'n deathaich;
'S gur lionor fear a bh' ann 'sa 'n eisdeachd,
Nach do ghluais leis fein an ath-oidhch.

Dh' fhag iad sinne mur a b'annsa,
Fo cheannardachd Mhoir-fhear Hunndaich;
An t-og smiorail, fearail, naimhdeil,
Na 'n teannadh ain-neart ga 'r 'n ionnsaidh;
Le bhrataichean shiod' a stranraich,
Ri 'n cuid crann a damhs' le muisig;
'S na fir a' togairt thun na 'm Frangach,
'S iad mo ruinse chlann nach diultadh.

Bha 'n leoghunn colgara gun ghealtachd,
Le mhile fear sgairteil lamh-ruinn,

[TD 39]

An Camashronach garg o 'n Earrachd,
Mur ursainn chatha 's na blaraibh;
Dh' aontaich sinn mur aon 'sa bhatailt,
Le faobhar lann sgaiteach stailinn;
Cha bu ghnìomh le 'r laoch gun taise,
Fantail air an ais 'sa 'n lamhach.

Bhruchd na naimhdean le 'n trom chàdaibh,
Air muin chaich a' barcadh teine;
'Nuair fhuair Sasunnaich droch caradh,
Phill iad o 'n araich na 'r coinneadh;
Ghlaodh Eabacrombaidh ri chuid armuinn,
Tairngneadh na Gaidheil mu 'n coinneadh;
'S tionndaidh iad an ruaig mur b'abhaist,
An dream ardanach neo fhoilleil.

Greasad air an aghairt 'sa 'n araich
Ghluais na saighdeirean nach pillte,
Mur iolairean guineach gun chaoimhneas,
Nach b' fhurasta chlaoidh le mio-mhodh;
Thug iad sgrios orra mur bhoillsgeadh
Dealanaich, ri oidhche dilinn;
Ri sior iomain romp' na 'n naimhdean,
'S neul fal' air roinn am picean.

'Nuair a dh' iondrain a chonspuinn
Moir-fhear Gordan o uchd bualta;
'Sa chual iad gu 'n robh e leointe,
Dh' ùraich iad le deoin an tuasaid;
Mur mhaoim do thuil na 'm beann mora
Bruchdadh o na neoil mu 'r guaillibh,
Lean iad an ruaig le cruaidh spoltadh,
Gu fuilteach, mhor-bhuilleach, gruamach.

Bha Camshronaich an tus a chatha,
Air an losgadh mur an ciadna;

[TD 40]

Leonadh an ceann-feadhnaidh sgairteal,
Ri comhruig bhatailtean a liath e;
Gur sonruicht' coltach an dearcag,
'Sa 'n fheoil nach taisicheadh fiamh i;
Mu 'n do chrom a ghrian fo cleochda taisgte
Phaigh sinn air an ais na fiachan.

Ged bha na Rioghalaich o Albuinn,
Na fir ainmeil, mheanmnach, phriseil;
Fada uainn ri uair a gharbh-chath,
'S buaidh a b' ainm dhoibh ri uchd mhiltean;
Ghreas iad air an aghaidh g' ar teanachdadh,
'Nuair a chual iad stoirm na 'm picean;
B' e creach luchd na 'm breachdan balla-bhreas,
Bhi le lasair marbh na 'n sineadh.

'Nuair chuireadh am batailt seachad,
'Sa dh' aireadh ar gaisgich threubhach;
Bha ioma treun fhear 'sa 'n deachamh,
Le meud am braise 'sa 'n streupaig;
Fuil a ruith air lotaibh frasach,
O luchd na 'm breachdan an fheilidh;
'S i sior thaomadh leis na glacan
'S truagh nach d' fhaod ar gaisgich eiridh.

Tha na Frangaich math air teine,
Gus an teannar goirid uapa;
'S ann mur sin a loisg iad sinne,
Ri deich mionaidean na h-uaire;
Ach 'nuair a fhuair ar laoch gun tioma,
Dhol an aite buille bhualadh,
Bha roinnean stailinne biorach,
Sathadh guinideach mu 'n tuairmeas.

Gu 'm b' i sin an tuairmeas smiorail,
Chinnteach, amusach, gun dearmad;

[TD 41]

Thug na leoghuinn bhorba nimheil,
Bu cholgail seallamh fo 'n arma;
Ri sgiursadh naimhdean mur fhalusg,
A's driuchdan fallais air gach calg dhiu;
'S bha na Frangaich bruchdadh fala,
Cul ri talamh anns' a ghainmheich.

Mur neoil fhuilteach air an riasladh,
Le gaoth a b' iargalta seideadh;
Ruith na 'm baidibh, ceigeach, liath-ghorm,
'N deigh an cliathadh as a cheile;
Chithte na naimhdean gun riaghailt,
Teicheadh gu dian o uchd streupa;
'S iad a leaghadh air ar bialadh,
Mur shneachd am fiadhnuis na greine.

Ged a phill sinn o an duthaich,
Cha do mhill sinn ar cliuth an cruadal;
Bha sinn gach la ga 'n sgiùrsadh;
Mur chaoiribh aig cu ga 'n ruagadh,
Dh' aindeoin an cuid sloigh gun chunntas,

Tigh 'n o 'n Fhraing as ur g' ar bualadh;
Bu leisg ar gaisgich gu tionndadh,
'Nuair a chord an Diuc ri 'n uaislean.

Nis o 'n chuir iad sinn do Shasunn,
Ghabhail ar cairtealan geamhraidh,
Far am faigh sinn leann am pailteas,
Ged tha mac na praisich* gann oirnn;
Olar leinn deoch slainte Mharcuis,
Ar guala thaice 's ar ceannard;
'S tha sinn cho ullamh 'sa b' ait leis,
Dhion a bhrataichean o ain-neart.

<eng>* Whisky.<gai>

[TD 42]

Cumha clann na Ceapaich, chuaidh a mhort le clann brathar an athar; le
Jain Lom.

Fonn,-
Gur a muladach tha mi
'S mo leannan air fas rium an gruaim.

'S TEARC an diugh mo chùis ghàire,
Tighin na ràidean so 'niar;
'G amharc fonn Ionmhurlaire,
'N deigh a strachdadh le siol;
Tba Cheapach na fasach,
Gun aon aird oirre 's fiach;
'S leir ri fhaicinn a bhraithrean,
Gur trom a bharc oirnn an t-sion.

'S ann oirne thainig an diombuain,
'Sa 'n iomaghuin gheur;
Mur tha claidhe ar fine,
Cho minig n' ar deigh;
Pachda Thurcach gun sireadh,
Bhi a pinneadh ar cleibh;
Bhi n' ar breacain g' ar filleadh,
Measg ar cinne mor fein.

'S gearr o chomhairle na h-aoine,
Dh' fhag a choidhch sinn fo sprochd;
O am na feillmicheil,
Ge b'e nith rinn mo lot;
Dh' fhag sud n' ar miol-mhùir sinn
'Sna' r fuigheall spuir air gach port;
'Nuair theid gach cinneach ri chéile,
Bidh sinne sgaoilte mu 'n chnoc.

[TD 43]

'S ann diasathuirne gearr uainn,
Bhuail an t-earrchull orm spot;
'S mi caoidh na 'n corp geala,
Bha call na fala mu 'm brot;
Bha mo lamhansa croabh-dhearg,
'N deigh bhi taosgadh 'ur lot;

Bhi ga 'r cuir ann an cistidh,
Turnn o 'm miste mo thoirt.

B' iad mo ghraidh na cuirp chùraidh,
Ann 'm bu dluth chur na 'n sgian;
'S iad na 'n sineadh air ùrlar,
'N seomar ùr ga 'n cur sìos;
Fo chasan shiol Dùghaill
Luchd spuilleadh na 'n cliabh;
Dh' fhag àlach 'ur biodaig
Mur sgaile ruidil am bian.

C' aite 'n robh e fo 'n adhar,
A sheall ad bhathais gu geur;
Nach tugadh dhuit athadh,
Dh' fhear do labhairt 's do bheus;
Mach o chlainn bhrathair t-athar,
Chuaidh 'm bairn an aibhisteir threine;
Ach mu rinn iad ar lotne,
'S trom a rosad dhoibh fein.

Tha thu 'd chadal 'n tigh duinte,
Gun smuid deth gun cheo;
Far 'n d' fhuair thu 'n garbh dhùsgadh,
Thaobh do chùil a's do bheoil;
Ach na 'm faigheadh tu ùine
O luchd do mhi-rùine bhi beo;
Cha bu bhaile gun surd e,
Biodh air' air muirn 's air luchd ceoil.

[TD 44]

A leithid do mhurt cha robh 'n Albuinn,
Ged bu bhorb iad na 'm beus;
'S bochd an sgeul eidear bhraithrean,
E dhol an lathair mhic De;
Mur am bàt air an lingidh,
Ge b'e shireadh na dèigh;
Cha d'thain' a leithid do mhilleadh,
Air ceann cinnidh fo 'n ghréin.

Tha mulad air m' inntinn
Bhi 'g innse' 'ur beus
'S ann a ghabh iad am fath oirbh
'Nuair chuaidh 'ur fagail leibh fein
'Sa chuir sibh cungaidh 'ur càsaibh,
Ann an Aros na 'n téud;
'S 'ur buachaillean bàthchruibh,
Ann an garadh na 'm péur.

'S ann an sin a bha 'n cinneach,
Bh' air am milleadh o 'n ceill;
Chuaidh a ghlacadh droch spioraid,
Ann an ionad fiamh Dhe;
Sin am fath mu 'n robh sgianan,
Cho minig n' 'ur deigh;
'Sa 'neach nach do bhualte,
Bhi ga bhuaire anns a bhréig.

Ach a Mhoir-fhear Chlann Donuill

'S fad do chomhnuidh measg Ghall,
Dh' fhag thu sinne n 'ur breislich,
Nach do fhreasdail thu 'n t-am;
Nach do gleidh thu na h-itean,
Chuaidh gun fhios duit air chall;
Tha sinn corrach as t-aogais,
Mur cholainn sgaoilte gun cheann.

[TD 45]

Gur h-ioma oganach sgaiteach,
Lub bhachlach, sgiath chrom;
Eidear drochaid Allt Eire,
'S Rugha Shleibhte na 'n tonn;
A dheanadh leat eiridh
Mu 'm biodh do chreuchdan lan tholl;
'Sa rachadh bras ann a t-eirig,
Dheagh Shir Sheimis na 'n long.

Chuir Dia oirnn craobh shiochaint,
Bha da 'r dionadh gu leoir;
Da 'm bu choir dhuinn bhi striochdadh,
Fhad 'sa 'n cian bhiodh-mid beò;
Ma sinn fhein a chuir dith oirr',
B' olc an dioladh sin oirnn;
Tuitidh tuagh as na Flaitheas,
Leis an sgathar na meoir.

'N glan fhiuran so bh' againn,
'N taobh so Fhlaitheas Mhic De;
Thainig sgiursadh a bhais air,
Chaill sinn thoirt le strachd geur;
'N t-aon fhiuran a b' aillidh,
Bh' ann 'sa phairce 'n robh speis;
Mur gu 'm buaineadh sibh ailein,
Le faladair geur.

Tha lionn-dubh air mo bhualadh,
'N taobh tuathal mo chleibh;
'S mu mhaireas e buan ann,
B' fhearr leam uam e mur chéud:
Gar an d' theid mi g'a innse,
Tha mi cinnteach a' m' sgeul;
Luchd dheanadh na sithne,
Bhi feadh na tire gun deigh.

[TD 46]

Iorram le Iain Lom do shiol Dughail air son iad bhi ga chuir air imrich,
chionn e bhi labhairt na 'n aghaidh air son murt na Capaich.

'S TROM 's gur eisleineach m' aigne,
'N diugh gur feudar dhomh aideach',
O 'n a dh' eigh iad rium cabar 's mi corr.
'S trom 's gur, &c.

Mi ga m' fhogradh a Clachaig,
'S mi gun mhanus gun aitreabh,
'S nach h-e 'mal a ta fairtleachadh orm.
Mi ga m', &c.

Mi ga 'm fhogradh a m' dhuthaich,
'S m' fhearunn poist aig siol Dughail,
'S iad am barail gu 'n uraich iad coir.
Mi ga m', &c.

Mi ga m' fhogradh gun aobhar,
'S nach mi shalaich mo shaobhaidh,
Mur mhada-galla 'sa chaonnag m'a shroin.
Mi ga m', &c.

Mo nith a's m' earnais feadh monaidh,
'S mi mur ghearr eidear chonaibh,
Gun chead tearnadh measg loinidh no feoir
Mo nith a's, &c.

O nach d' fhas mi 'm fhear murta,
Gu bhi sathadh mo chuirce,
Mur bha na caraidean curta 'stigh mhor.
O Nach d' fhas, &c.

[TD 47]

Fuil a taosgadh o lotan,
Dh' fhaoite thogail le copan,
Ruith na caochan mu bholtaibh am brog.
Fuil a taosgadh, &c.

A ruagh ropoach na 'maodal,
Ged a ropadh tu caolain,
Cha n' e do chogadh a shaoil mi theachd orm.
A rugh ropach, &c.

Cleas a bhinne nach mairionn,
Bha 'n Cille sgire Muicheallaig*,
'Nuair a dhìt iad an gearran 'sa mhod.
Cleas a bhinne, &c.

Lagh cho chearr 'sa bha 'm Breatunn,
Rinn a' mearlach a sheasadh,
Bhi ga thearnadh o leadairt na 'n cord.
Lagh cho, &c.

Cleas dana mnaoi a chruiteir,
Mun ghnìomh narach rinn musag,
Thug i lamh thun a phluice le dorn.
Cleas dana, &c.

A bhean choite gun obadh,
Bu choir a dochoir a thogail
Thilg a chlach anns an tobar 's i beo.
A bhean choite, &c.

<eng>* According to the law referred to in the text, women being appointed judges; a thief being brought before them for stealing a horse, the culprit was allowed to escape with impunity, while the horse was condemned to be hanged for allowing himself to be carried away.<gai>

[TD 48]

'Nuair bha a bheisd air a buaireadh
Na cionnta fein 's i lan uaibhir,
Theid an eucoir an uachdar car seoil.
Nuair bha, &c.

Faodar cadal gu seisdeil,
Aig fadal Shir Sheimis,
Leig an ladurnas deistneach ud leo.
Faodar, &c.

Ach na m faicinn do loingeas,
'S mi nach bristeadh a choinneadh,
Na 'm biodh coiseachd air chomas domh beo.
Ach na 'm, &c.

Mire shrutha r'a darach,
Ga cuir an uigheam gu h-aithghearr,
Crainne ghiubhais fo sparaibh a seoil.
Mire shrutha, &c.

'Nuair a lagadh a ghaoth oirnn,
Bhiodh seol pasgaidh air a h-aodach,
'S buidheann ghasda mo ghaoil ri cuir bhòd.
Nuair a lagadh, &c.

Raimh mu 'n dunadh na basaibh,
'S iad a lubadh air bhacaibh,
Sud a chùrsachd o 'n atadh na leois.
Raimh, &c.

Buird ùr air a totaibh,
'S i na deann thun na cloiche,
Muir dhughorm a' spolltadh m'a bord.
Buird ur air, &c.

[TD 49]

ORAN air latha blair IONMHUR-LOCHAIDH, eidear CLANN DONUILL agus na
CAIMBEULAICH; le Iain Lom.

Fonn-Hug oirre ho, suas e bhraithrean.

HI rim ho ro, ho ro leatha,
Hi rim ho ro, ho ro leatha,
Hi rim ho ro, ho ro leatha,
Chuaidh an latha le Clann Donuill.

'N cuala' sibhse 'n tionndadh duineil,
Thug an camp bha 'n Cille Chuimein;
'S fad chuaidh ainm air an urram,
Thug iad as an naimhdean iomain.
Hi rim ho ro, &c.

Dhirich mi moch maduinn domhnuich,
Gu barr caisteal Ionmhur Lochaidh,
Chunnaic mi 'n t-arm a dol an ordugh,
'S bha buaidh a bhlaire le Clann Donuill.
Hi rim ho ro, &c.

Direadh a mach glun Chuil-eachaidh,
Dh' aithnich mi oirbh surd ar tapaidh;
Ged a bha mo dhuthaich na lasair,
'S éirig air a chùs mur thachair.
Hi rim ho ro, &c.

Ged bhiodh Iarlachd a bhraghad,
An seachd bliadhna so mur tha e,

[TD 50]

Gun chur, gun chliathadh, na gun àiteach,
'S math an riadh o bheil sinn paighte.
Hi rim, &c.

Air do laimhse Thighearna Lathair,
Ge mor do bhosd as do chlaidhe;
'S ioma oganach chinne t-athar,
Tha 'n Ionmhur-Lochai na luidhe.
Hi rim, &c.

'S ioma fearr goirseid agus pillein,
Cho math 'sa bha riamh do d' chinneach,
Nach d' fhoad a bhotainn thoirt tioram,
Ach faoghlum snamh air bun Ibheis.
Hi rim, &c.

Sgeul a b' aite 'nuair a thigeadh,
Air Caimbeulaich na'm beul sligheach,
H-uile dream dhiu mur a thigeadh,
Le bualadh lann an ceann ga 'm bristeadh.
Hi rim, &c.

'N latha sin shaoil leo dhol leotha,
'S ann bha laoich ga 'n ruith air reothadh,
'S ioma slaodanach mor othar,
Bha na shineadh air achadh an tothair.
Hi rim, &c.

Ge be dhireadh Tom-na h-aire,
Bu lionor spog ur bh' ann air dhroch shailleadh,
Neul marbh air an suil gun anam,
'N deigh an sgiursadh le lannan.
Hi rim, &c.

Thug sibh toiteal teith mu Lochai,
Bhi ga 'm bualadh mu na srona,

[TD 51]

Bu lion'or claidhe clais ghorm comhnard,
Bha bualadh an lamhan Chlann Donuill.
Hi rim, &c.

Sin nuair chruinnich mor dhragh an fhalachd,
'N am rusgadh na 'n greidlein tana,
Bha iongnan na 'n Guimhneach ri talamh,
'N deigh an luithean a ghearradh.
Hi rim, &c.

'S lionor corp nochte gun aodach,
Tha na 'n sineadh air chnocain fhraoiche,
O 'n bhlar an greaste na saoithean,
Gu ceann Leitir blar a Chaorrainn.
Hi rim, &c.

Dh' innsinn sgeul eile le firinn,
Cho math 'sa ni cleireach a sgrìobhadh;
Chaidh na laoich ud gu 'n dichìoll,
'S chuir iad maoin air luchd am mìoruin.
Hi rim, &c.

Iain Mhuideartaich na 'n seol soilleir,
Sheoladh an cuan ri la doilleir,
Ort cha d' fhuaradh briste coinnidh,
'S ait' leam Barrabreac fo d' chomas.
Hi rim, &c.

Cha b' e sud an siubhal cearbach,
A thug Alasdair do dh' Albuinn,
Creachadh, losgadh, agus marbhadh;
'S leagadh leis coileach Strathbhalgai.
Hi rim, &c.

[TD 52]

An t-eun dona chaill a cheuta,
An Sasunn, an Albuinn, 'sa 'n Eirinn,
Ite a curr na sgeithe,
Gur miste leam o 'n a gheill e.
Hi rim, &c.

Alasdair na 'n geur lann sgaiteach,
Gheall thu 'n dé a bhi cuir as doibh,
Chuir thu 'n raitreuta seach an caisteal,
Seoladh gle mhath air an leantuinn.
Hi rim, &c.

Alasdair na 'n geur lann guineach,
Na 'm biodh agad armuinn Mhuile;
Thug thu air na dh' fhalbh dhiu fuireach,
'S raitreut air prabar an duilisg,
Hi rim, &c.

Alasdair 'Ic Colla ghasda,
Lamh dheas a sgoltadh na 'n caisteal;
Chuir thu 'n ruaig air Ghallaibh glasa,
'S mu dh'ol iad cal gun chuir thu asd' e.
Hi rim, &c.

'M b' aithne dhuibhse 'n Goirtein-othar,
'S math a bha e air a thothar,
Cha 'n inneir chaorach, no ghobhar;
Ach fuil Ghuimhneach an deigh reothaidh.
Hi rim, &c.

Sgrios oirbh mu 's truagh leam 'ur caradh,
'G eisdeachd an-shocair ur paistean
Caoidh a phannail bh' ann 'sa 'n araich
Donnalaich ban Earraghaidheal.

Hi rim, &c.

[TD 53]

Oran do DHIUC GORDON, ri linn fogradh Rìgh Tearlach a dhà, le Iain lom,
Fonn orain na 'n casaga dubha, le Rob Donn.

SEISD.

LAMH Rìgh leinn a dhaoine,
C' uin' a chaochlais a bheart so;
'S gu bheil fios 'sa 'n Roinn Eorpa,
Gur h-i choir tha sibh strachdadh;
Fhir a chruthaich o thus sinn,
Cuir a chuis gu treun taice;
Air na Banntairean* breige,
Rinn an eucoir a chleachdainn.

Mi 'g amharc Strathchuaiche,
'S mor mo ghruaim 's cha bheag 'm eislein;
'S mi 'g amharc na 'n gleanntain,
'N robh an camp aig Iarl Einne;
Ris an goirte 'n t-eun tuathach,
Nach d' fhuaradh ri brein-chirc;
Ged tha e 's an am so,
Gun cheann an Duneidionn.
Lamh Rìgh leinn, &c.

Gur mor mo chuis mhulaid,
'S mi air m' uilinn am onrachd;
'S mi 'g amharc an ruithe,
Far 'n do shuidhicheadh bordaibh;
Tha i 'n diugh fo ghleus chapull,
Feur fada a's folach;

<eng>* Covenanters.<gai>

[TD 54]

Aig aon stata na machrach,
Sar Mharcus o Gordon.
Lamh Rìgh leinn, &c.

Naile chunnaic mi uair thu,
'S gu 'm b' uallach do loiseam*;
Tighin a mach le d' gheard rioghail,
Air na grinneinean gorma.:
Luchd na 'n casagan sìoda,
Ghlacadh pic gu gle mhodhar;
'Sa bheireadh adbhansa,
An am dol an ordugh.
Lamh Rìgh, &c.

Bha mi eolach ad thalla,
'S bha mi steach ann ad sheomar;
Bhiodh ann iomairt air thaileasg,
'S da chlarsaich a co' strith;
Gus am freagradh am balla,
Do mhac talla na 'n organ;
'S bhiodh fion spainnteach ga losgadh,

Am pairt a dh' obair na 'n or-cheard.
Lamh Rìgh, &c.

Cha d' fhoghainn leo t-fhogradh,
Feadh fhrogan ga t-fhalach;
Ach do thur-bhailtean mora,
Bhi gun choir aig Mac Cailein;
'Nuair a fhuair iad thu t-onrachd,
Rinn iad oirnne gnìomh alloil:
Bha t-fhuil rioghail gun fhotus,
Ga dortadh mu 'n scafal.
Lamh Rìgh, &c.

<eng>* A great company of gentry.<gai>

[TD 55]

Ach a Thearlaich oig Stiubhairt,
'S fad an dusgadh so th agad;
Gur fada ad shuain thu,
'S tim dhuit glusad o d' chadal;
Mur eil t-aire gu dìreach,
Air do Rioghachd fein a thagradh;
Leig dhìot 'sa 'n droch uair i,
Mur eil cruadal a t-aighe.
Lamh Rìgh, &c.

'S math an cuideacha sluaigh dhuit,
Thu bhi 'n uachdar na corach;
Gu coir t-athar a dhiuladh,
Air na h-Iudhannaich dheoinidh;
Ach na faireadh iad baòth thu,
No blas baòth air do cho'radh;
No mur chlàidhe bog staoinne,
'N truaille chaoìn air a h-oradh.
Lamh Rìgh, &c.

Tha uaislean do Rioghachd,
Ga 'n sticeadh an claisean;
'S ga 'm falach an giusaich,
'N deigh do chuinneadh a phasadh;
Daoine beag a rinn cillain*,
Do shìol Skineirean chraiceann;
Tha na 'm Parlamaid rioghail,
'N deigh an Rìgh a chur seachad.
Lamh Rìgh, &c.

Tha na h-amraichean muine,
Gabhail iul 'sa chuan fharsuing;

<eng>* A store of money.<gai>

[TD 56]

'Sa 'n loingear daraich a crìonadh,
Dh' oilte fion air an saitse;
Bhi ga 'n tilgeadh air oitir;
As na porta' a chleachd iad;

'S ma mhaireas an tuil so,
'S mairg a dh' fhuirich ri fhaicinn.
Lamh Rìgh, &c.

Oran le Iain Lom, air dha a chluinntinn an dara Rìgh Tearlach bhi air a chrunadh.

MI 'n so air m' uilinn,
An ard ghleann munaidh,
'S mor fath mo shulas ri gaire.
Mi 'n so air, &c.

'S ge fad am thosd mi,
Ma 's e 's olc leibh,
Thig an sop a m' braghad.
'S ge fad, &c.

O 'n bha sheanns' oirne chluinntinn,
Ged bu teann a bha chuing oirnn;
Gu 'n do thionnadh a chuibhlemur b'aill leinn.
O 'n bha, &c.

An ceum so air chois eachd,
Le m' bhata 's le m' phoca,
'Sa 'n lamh ga stopadh gu sarmhaith.
An ceum, &c.

[TD 57]

Gur h-olc an nith dhuinn,
Bhi stad am prìosan,
'N am theachd an Rìgh g'a aite.
Gur h-olc, &c.

Thug Dia dhuinn furtachd,
As na cliabhan druidte,
'Nuair dh' iarr sinn iuchair a gharaidh.
Thug Dia dhuinn, &c.

'Sa Thearlaich oig Stiubhairt,
Ma chuaidhe an crun ort,
Dia na fhear sdiuraidh air t-fhardraich.
'Sa Thearlaich, &c.

Ma chuaidh thu 'sa chathair,
Gun aon bhuille claidhe,
'N ainm an athar 's an ard Rìgh.
Ma chuaidh, &c.

'S thu thigh'n dhachaidh gu d' Rioghachd
Mur a b' oil le d' luchd mioruin
'N coinne ri mìle ciad failte.
'S thu thigh'n, &c.

'S ioma Subseig mhor mhisgeach,
'S measa run duit na mise,
Tha cuir stigh am petisein an drasda,
'S ioma, &c.

Luchd na 'n torra-chaisteal liatha,
Air an stormadh le iarunn,
B' olc na lorgairean riamh ann do gheard iad.
Luchd na 'n, &c.

[TD 58]

Cha b' fhas an dusgadh an cadal,
Na madadh ruagh chuir a braclaich,
'Nuair a fhuaradh thu lag, ach bhi t-aicheadh.
Cha b' fhas, &c.

Na mearlaich uile chuaidh dh' aon-taobh,
Ghearr muineal Mhoir-fhear Hunndaich,
'S math choisinn le bunntaisd am paigheadh.
Na mearlaich, &c.

Leam is eibhinn mur thachair,
Mur dh' eirich do n bhraich ud,
Bha gach ceann d' i na bachlagan bana.
Leam is, &c.

Cha robh uimhir na 'n cairtean,
Nach robh tionnda' mi-cheart orr',
Bha mo shuilean ga m faicinn an trath ud.
Cha robh, &c.

'S olc an leasan diciadain,
Mur a furtaich thu Dhia air,
Tha feitheadh air an Iarla neo bhaidheil.
'S olc an leasan, &c.

'N am rusgadh a cholair,
Theid an ceann deth o choluinn,
Gloir agus moladh do 'n ard Righ.
N am, &c.

Le maighdionn scorr shuileach smachdail,
Dh' fhagas gialan gun mheartuinn,
Dhuineas fiaras a Mharcuis mhio chairdeil
Le maighdionn, &c.

[TD 59]

'S ged 's e thus cha 'n e dheireadh,
Do luchd dhusgadh an teine,
'S mur mo run do 'n chuid eile da chairdean.
'S ged 's e, &c.

Mur bha Liusifer tamull,
'N deigh air thus bhi na Aingeal,
Chaidh a sgiursadh le h-ainiochd a Pharais.
Mur bha, &c.

Bidh tu nis ann ad dheomhan,
Dol timchioll an domhain,
Bhrigh coltais toirt comh-fhillteachd dhasan.
Bidh tu nis, &c.

'S mor a b' fhearr dhuit na moran,

No na chruinnich thu storas,
Bhi tional an otraich gu d' gharadh.
'S mor a b' fhearr, &c.

Na thu fhein 's do gheard misgeach,
Bhi 'n ait as nach tig sibh,
Mur sgaile phictuir 'sa 'n sgathan,
Na thu fhein, &c.

Na farabhalaich bhreaca,
Bha tarring uainn ar cuid beartais,
Chuir an Rìgh mach a Whitehall dhuinn.
Na farabhalaich, &c.

[TD 60]

ORAN air blar Tomaphubuill, eidear na h-Earragha'laich 's na h-Athollaich, le Iain Lom, 's e 'g iomadan nach robh Moir-fhear Chlann Donuill aig an tigh, gu cuideacha' leis na h-Athollaich, agus na h-Earragha'laich air faotainn buaidh.

SEISD.
Ho ro 's fada, s gur fada,
'S cian fada gu leoir,
O 'n a chuaidh thu air thuras,
Do bhaile Lunnainn na 'n cleoc;
Na 'n cluinneadh tu fathar,
Le reothadh an eoin;
'S gu n taoghladh tu 'n rathad,
'S mi nach gabhadh dheth bron.

'S ann air leith-taobh Beinne-buidhe,
Sheas a bhuidheann nach gann;
Luchd dhearcadh an iubhair,
'Sa chur siubhal fo chrann;
'S diombach mise d' ur saothair,
'Nuair a dh' aom sibh a nall,
Nach deachaidh steach air Gleannaora,
Ghearradh braoisg na 'm beul cam.
Ho ro 's fada, &c.

A Mhoir fhear Chlann Donuill,
Chum thu chomhail gu duineil;
'Nuair a shaoil an t-Iarl Aorach,
Do chuir gun aobhar a Muile;
Bha thu roimhe 'n Duneidionn,
'S dh' fhag thu leigheart mu choinne,

[TD 61]

'S gun aon eislein a' t-aighe,
Dh' eisd thu chasaid an Lunnainn.
Ho ro 's fada, &c.

Ach a Mhoir-fhear Chlann Donuill,
'S fad do chomhnuidh measg Ghall;
A laoch aigionntaich phriseil,
Oig riomhaich an àigh:
Tha maise an fhìona,
Ad ghruaidh dìreadh an àird;

'S tha thu shliochd na 'n tri Cholla,
Ga 'm biodh loingear air sàil.
Ho ro 's fada, &c.

'S truagh nach robh iad na ciadan,
Do luchd sgiath agus lann;
Do na h-oganaich threubhach,
Nach euradh adbhans;
Cha bhimid ag eigheach,
Co da 'n eireadh an call;
'S ann aig geat Ionmhuraora,
Ghabh mo laoiach gu camp.
Ho ro 's fada, &c.

'M brúadar chunnaic mi 'm chadal,
B' fhearr gu 'm faicinn am dhùisg e;
'S mi nach fuireadh na b' fhaide,
Ann am plaide air m' ùigh,
Seallamh 'n sin do d' ghnùis aobhach,
'Nuair a phlaosgadh mo shuil,
B' ionunn eiridh do m' aigne,
'S leum a bhradain am burn.
Ho ro 's fada, &c.

Gur mise bha tursach,
'N am dhomh dusgadh o m' bhrúadar;

[TD 62]

Bhi faicinn do chursaibh
Dol a null air Druim-uachdar;
Bhi gad chuir 'sa 'n toll-bùth,
'S gun mo dhuil thu thigh'n uaithe;
Luidh smal air mo shugradh,
Gus an duisgear an uaigh dhomh.
Ho ro 's fada, &c.

Tha pruipe air do chulaobh,
'S math a b' fhiu dhuit am faighneachd;
Eoin Abrach o 'n Ghiùsaich,
Cha toir cubair a ghreim deth;
'S Gilleasbuig a Bhraighe,
Gu latha bhrath nach bi 'm foill duit;
Mac Iain 'sa chinne,
Gu 'n imicheadh an oidhch leat.
Ho ro 's fada, &c.

'S ioma marcaiche statail,
Gar an àir mi ach cuid diu;
Eidear geata bhraighe Acuinn,
Gu slios Blair na 'm fear luidneach;
Mur ghabh sud a s braighe Hårdail,
Agus braighe Bochuidir;
Ghabhadh leigeadh gu statail,
'N eirig la Tomaphubail.
Ho ro 's fada, &c.

'S ioma ogansch guineach,
Laidir, duilich do bh aithnicht;
Eidear braighe uisge Thurraid,

'S caol Mhuile na 'n canach;
Ghearradh beum le 'n arm guineach,
Ga 'n iumain do 'n fheamuinn;

[TD 63]

Ann an eirig na 'm muineal,
Chuaidh a chur sa 'n Airdreanaich.
Ho ro 's fada, &c.

'S fad o 'n chuala' mi seachas,
'S mi 'm sheana-ghiulan gòrach;
Mu 'n do chuir mi crios féilidh,
Os cionn leine no còta;
Bhi ga innse gu soilleir,
Anns' gach coinne a's comhail,
Gu 'm bu chairdeach an sloinne,
Sìol Mhoire 's Clann Donuill.
Ho ro 's fada, &c.

A Rìgh! nach robh iad an geambairn,
Lan teambuill do shluagh;
Do luchd na 'm beul cama,
'S cha b' ainid sud uainn;
'S ioma claidhe geur guineach,
Laidir fulangach cruaidh;
Th' aig mo chinne ga 'm feitheadh,
'S aig Clann 'Illeain na 'm buadh.
Ho ro 's fada, &c.

'S b' fhearr gu 'n tigeadh iad fhathasd,
Clann 'Illeain na 'n tuagh;
'S cha bhiodh sgian ann am fraighe,
No claidhe an truaille;
Bheirte mach na h-airm chatha,
'S cha bhiodh an latha sin buan;
'S ged bu ghuineach na Guimhnich,
'S iad sìol Chuinn a bha cruaidh.
Ho ro 's fada, &c.

[TD 64]

Tha mo run air na gillean,
Leis an cinneadh an t-sealg;
Dh' eireadh fearg orra 's frioghan,
Dhol an iomairt na 'n arm,
Dhol a null thair an lingidh,
Le gillean na cairge;
'S ioma marbh bhiodh ri shireadh,
Air an tilleadh do Chearara.
Ho ro 's fada, &c.

ORAN le IAIN LOM, oir latha blair na h-Airdreanaich aig Ionmhuraora, far an d'fhuair na h-Athollaich buaidh ann an eirig latha Tomaphubail.

SLAN gun dith dhuit a Mharcuis,
Direach, maiseach gun chroma;
Da shuil ghorm fo d' chaol mhalaidh,
Nach d' fhas gu balachail, bronnach;

Cheart cho chinnteach 'sa 'm bas,
Ged tha thu 'n drasd as an t-seallamh;
Gu bheil mulad fo d' chom ort,
Mu bhas Ghoud Iarla Moire*.

'S ceart 's cho cheart mur mo dhurachd,
Le beachd mo shul gur mi chunnaic;
Cha robh againn do sgathan,
Ach greasad trath do 'n tigh ghrunnaich;
Aisling caillich mur a dùrachd,
Gach mio-rùn bha do 'n duin ud;

<eng>* See the sixth verse of the preceding Song.<gai>

[TD 65]

Ged bu ladarna 'n culchainnt,
Stad a chuis air an iomull.

Cha b e aingeachd na tuatha,
Ghluais am Marcus le dhaoine;
Ach togail a bhrataich,
'G iarraidh smachd air luchd aobhair;
Fhuair thu iuchair na corach,
Gu t-ordugh le d' dhaoine;
Agus fosgladh gach caisteil,
Fad slait Ionmhuraora.

Gheill Dunstaidhinis grad duit,
Innis fharsuing na 'm faochag;
Ged bu daingeann a chlach i,
Fhuair thu steach air bheag saoitreach:
Cha robh cuilibheir caol glaice,
No gunna praise gun sgaoileadh;
Eidear Innis Chonnain na 'n canach,
Gu ruig bail' Ionmhuraora.

'S ard Liutenant o 'n Righ thu,
Thug thu sgrìob do dh' Earraghaidheal;
Bu leat Tairbeart 's Cinntire,
'S gach aon nith bh' anns an ait sin;
Agus Ile bheag riabhach,
Mu 'n iath a mhuir shaile;
'S goirt a chnead a ta 'm chliabhsa,
Fhad 's bha 'n t-iasaid gun phaigheadh.

Thighearn oig Ghlinne-garaidh,
Na bi falach do rùin oirnn;
Oighre 'n duin' thu tha mairionn,
Tha thu 'd charaid dhuinn dùbailt;
Cha bheo e 's cha mhairionn,
Na ni ar sgaradh o d' chula',

[TD 66]

A luchd na 'n ceanna-bhearta' crabhaidh,
Thionndaidh falachd a chrùn ruibh.

'S e do charaid mor dealaidh,

Mac 'Ic Ailein a Muideart,
Sliochd an Alasdair Gharaich,
Luchd tharruing na 'm fiuran;
Cha do chuir cainb shalach;
Na taibheid ealamh ri d' chul-chrann;
Bheireadh beum air a h-athlorg,
Fhad sa mhaireadh a fiudhaidh.

Na 'm biodh Tighearn na Learguinn,
Ann an Albuinn 's e mar-riut;
Agus Tighearn an Tairbeirt,
'S iad nach tairgeadh do mhealladh:
Luchd na 'm peighinnean talmhaidh,
'S tu dh' fhaodadh earbs' asd gu daingeann;
Cha 'n eil iad beo do shliochd Cholla,
Na ni 'n comunn ud aithris.

Gur a h-ioma fear goirseid,
Gunna stoilte, 's lann dughorm;
Le 'n gunnaichean caola,
'S na daormuinn ga 'n giulan:
Mac Laomuinn 's Mac Lachuinn,
'S Mac-an-Ab o Ghleanndochart,
Mac Neachduinn, 's Mac Dhughail,
'S Mac Iain Stiubhairt o 'n Apuinn.

Cha 'n iongnadh thusa bhi fiamhach,
'N taobh shios do Bhunatha;
Ged theid Guimhnich g'a 'n dichìoll,
'S gu diodunn a chlaidhe;
'S leat na thubhairt mi chiana,

[TD 67]

Ceart cho dìreach ri saighead;
'S leat Mac Ionmhuinn an t-Stratha
Agus da Mhac Ghilleain.

'S fearr leam fhaicinn na chluinntinn,
Gu 'n do stad a chuimh air am muineal;
Nis o 'n thionndaidh a chuibhle,
'S fad bhios Guimhnich gun urram;
Ged a shaoil le Mac Cailein,
E bhi na bharrach air Muile;
B' fhearr dha chumail na bh'aige,
Na bhi 'g agradh air tuille.

Na 'm biodh fear a bheoil mhoir ann,
O nach doirteadh gloir bhreamais!
Naile chailleadh sibh geoidh ris,
Nach b' fhiach an rostadh ri teallach:
Fhuair sibh sgapadh na 'n caorach,
Na 'm biodh e dhaoine air thalamh;
'S ged a ghlac sibh le foill e,
B' e fhein an saighdeir bu ghloine.

Gur mairg a dh' earbadh a cairdeas,
Neach a dh' fhas air an t-sloinne,
Na 'm biodh cuimhn' air an lath' ud,
Fhuair iad t-athair fo 'n comus;

Chuir iad smuid ri tur-arda,
Chaisteil Bhlair gu gle shoilleir;
'S beag bha dh' fhiughair an la sin,
Gu 'm biodh iad paighte na 'n comain.

'S mor tha eidear dha latha,
Ged bha e grathunn gun tighin;
Chuaidh thu 'n cuirt na bu leatha,
'N deigh t-athar a mhilleadh;
Gun aon bhuille claidhe,

[TD 68]

Gun sathadh biodaig no sgeine;
Mur gu 'm bathadh tu coinnean,
Chaill e 'n oighreachd 'sa 'n cinneach.

'S beag a b' fhiach do Mhac Mhoirich,
Dhol n' ur coinne ach ainneamh;
Na ghabhadh mur chompach,
Ach fear da 'n geallt' bhi na charaid;
'N deigh a Chomasdair Stiùbhairt,
Thain' sibh 'n tus air le h-ainiochd
Thugadh an ceann deth gun sgruba,
Air fearunn Lady Murray.

Buail an teud sin gu sealbhach,
'S na dean searbh i gun bhinneas;
'S na toir t-agaidh neo chearbach,
Ris 'n fhear nach earb thu do shlinnein;
Ma chuir an Rìgh an t-slat sgiùrsaigh,
'N glaic do dhuirn gun a sireadh;
Uair mu seach air an fhurnais,
Mur bhuill' uird air an innein.

Gloir do 'n Rìgh th' air a chathair,
'S mairg a ghabhadh mu na chluinneadh;
No ghuidheadh na bhreig e;
Gach nith dh' eirich sa chunnaic;
Mu 's ann le droch-bheart Iudais,
Dh' fhuaigh thu chlùd air an lunnainn;
Chaill thu 'n luireach 's na breidean,
'S gach aon eideadh bha umad.

'N cuala' sibhse 'sa 'n duthaich,
'N ranntar-buth bh' aig na luchai';
'S iad a cruinneacha' ri cheile,
Na 'n droch reisemeid churta;

[TD 69]

'Nuair bha eagal a chait orr';
Chuaidh droch sgapadh an cuid diu;
'Sa bheisd mhor 'sa 'n robh phlaigh dhiu,
Sgrios gun agh oirr' mur fhurtachd.

Sin 'nuair labhair Dubh-na-h-àmrai,
A bheisd ghrannnd 'sa chrain mhullaich;
Cha robh an sabhal na 'n amh dhiu,
Beisd le 'n àl nach do chruinnich,

Nuair bha 'm mod ga 'r cruaidh sharach'
'S na cuird a fasgadh mu 'r muineil;
'S ann an sud a bha 'n gàtur,
Co a chaireadh iad umaibh.

B' ionunn sin sa 'm bun rutha,
Cha 'n eil iad buidheach da' r 'n ainiochd;
Mur chlach an ionad an uighe,
Na 'm biodh luitheachd na 'n teangaidh;
B' ionunn sin 's do shliochd Dhiarmaid,
Bhi ga 'r biadhadh an ainiochd;
Math an aghaidh an uilc,
Chuir mi luchd sa 'n Airdreanaich.

'Nuair bha 'n ad oirbh a nuiridh,
Bha sibh urranta modhar;
Am bliadhna chaill sibh an currachd,
'S eiginn fuireach gle shamhach:
Chaill an t-Iarl air 'ur turas,
Mheud 'sa bhuinig e mhal oirbh;
Gar am b' fhiach leis an duin' ud,
Bhi ri cruinneachadh cnamhaig.

B' olc a b' fhiach do Dhiuc Atholl,
Dholl an coinne riut Eardsaidh,
'N deigh latha Roinn Liothunn;

[TD 70]

Thug sibh iocshlaint mur earlais,
Mheall sibh null thair an amhuinn,
Marcus Atholl 'sa bhrathair;
Chuir sibh 'n laimh an toll-buth iad,
'S loisg sibh duthaich Iarl Earlaidh*.

Tha thu 'd Mharcus am bliadhna,
'S ad shar Iarl air Tulaich-bhearduinn;
'S ged a dheanadh iad Diuc dhiot,
'S ro mhath b' fhiu thu an t-aite;
Tha do thiotal cho lionor,
Chumail dion air do chairdean;
Geard an Righ fo d' smachd orduigh,
'S tha thu 'd Mhòir-fhear Baile-mhanaidh.

Oran air feachd Righ Sheimis a gluasad gu cumail blar Raoin-Ruairidh, 'n
aghaidh na 'n Sasunnach, le Iain Lom.

Fonn-'Illean bithibh guineach.

'S MITHICH dhuinn marsadh as an tir,
O 'n chuir sinn dith air feoil na 'm mart;
Tamull an ordugh, dhuinne 's d' ar mor-shluagh,
Dh' imhich ar 'n oigridh uainn a mach;
A chuilein oig, ma tha thu leonta,

<eng>* A title formerly in Strathmore, now extinct.<gai>

[TD 71]

Gu 'n seall an Rìgh mor riut anns gach beart;
Air mhaduinn di-mairt, rinn sinn marsadh,
'S facal gach seardsain a ruith oirnn mu seach.

Aig leith-taobh an t-saile, tharruing na h-armuinn,
Suas na 'm bragadaibh gu gle cheart;
Mu bheul an anamoich, shuidhich sinn campa,
A's dh' imich ar ceannard uainn a mach;
Facal ar Coirneil ri Sir Donull,
Mur sud a's ar 'n ordugh bhi n' ar glaic;
"Na leigibh bonn dail, an seasamh a gheard,
"Agus cumaibh ur naimhdean uaibh a mach."

Bu fhliuch a mhaduinn, a thog sinn ar breacain,
'Sa chuaidh sinn air asdar gus an tigh ga 'n robh chairt*,
'Nuair rinn sinn eiridh, gu 'n d' rinn sinn ar eideadh,
A's chuaidh sinn 'n ar leum fo na cnapanna saict†
'S bu lughaid ar 'n airtneal, nuair thainig amfeasgar,
'Nuair loisgeadh an lasag, bu lionor srada;
O Cheann-Lochiall, gu 'n d' rinn sinn triall,
'S 'nuair chrom a ghrian, gu 'n d' rinn sinn stad.

Aig ceann Loch Lochai shuidhich sinn campa,
Latha roimhe dhi-domhnuich 's da latha na dheigh;
Chruinnich ar cairdean uil' air an laraich,
'S thog iad an lamhan an lathair Mhic De;
Bu bheag ar speis do dh' airgiod no spreidh,
'S gu'n d'fhag sinn n' ar deigh ar mnathan 's ar clann;
Cheart aindeoin an sport, ged chiuirte againn corp
Cha dean sinn bonn clos, gus an cosgar leinn Gall.

<eng>* The billet-house.

† The knapsacks.<gai>

[TD 72]

Labhair an Gramach a b' fhearr nadur,
A chlanna na 'n Gaidheal na faiceam 'ur gruaim,
Togaibh 'ur 'n inntinn, thainig an tim dhuibh,
'S mithich dhuinn marsadh do 'n tir so shuas:
Dh' fhalbh sinn a muigh cho ro statail,
Gus 'n do rainig sinn braighe Ghlinn Ruaidh;
Mach ri Gleannturaid, a's monadh sin Dhrumuinn,
Dh' imich gach duine bha guineach sa 'n ruaig.

Mach monadh Dhruim-uachdair, dh' imich na h-uaislean,
Bu mhor cruadal 's bu bheag sgios,
'Nuair rainig sinn Atholl, cha d' fhuair sinn ach mnathan,
Chuaidh fir as an rathad, mu 'n gabhte dhiu cis;
'N deigh mheadhon latha, sinn a falbh air ar 'n athais,
Aig leith-taobh na h-amhunn, ghabh sinn a sios;
Thainig marcaich a steach, air beula' a phas,
Dh' inns' gu 'n d' thainig am prasgan a's Coirneal Mac Aoidh.

B' aithghearr a cheilidh, thug muinntir Rìgh Sheimis,
Leith-taobh an t-sleibhe ghabh iad a suas;
Bu lionor fallas air gach mala,
Aig dìreadh a bhealaich an taobh mu thuath;

Ceann na cuimhne, roimhe mhuinntir,
Pairt d' ar 'n iondrain e bhi uainn:
B' aigionntach sporsail, aigne Chlann Donuill,
Ged fhuair iad an leonadh, bu deonach leo 'nuair.

Ghluais gach fine, gun tlaths gun tioma,
Gun sgath gun ghiorrag, na 'n ionada' fein,
Chuaidh sinn cho statail, 'm brollach ar namhaid,

[TD 73]

'S cha tilgte crann sathte an la sin gun fheum,
Aig deireamh an latha, nuair tharruing sinn claidhe,
Bha toiseach ar sgathaidh, 'n am laidhe do 'n ghrein;
Cheart aindeoin an sparraidh, ged bu laidir am barail,
Gu 'n do chaill iad am fearunn sa t-anam na dheigh.

Ceannard an aigh, gu 'n do thuit thu 'sa bhlar,
'S bu sgathach do lamh, gus an d' thainig a nuair;
'S e do bhas a Dhuindithe, dh' fhag ormsa trom-lithe,
Chuir toll ann mo chridh, 'sa dh' fhag snith air mo ghruaidh
Bu bheag air son t-eirig, na thuit do na beisdean,
An cogadh Righ Sheimis, ged dh'eirich leinn buaidh;
Ach sgapadh na 'n cuileag, air muinntir Righ Uilleam;
Tha sinne fo mhulad, ged chuir sinn iad uainn.

Coirneal Ramsaidh, bu mhor anntlachd,
Anns an am ud tighin a steach;
Gu 'n robh sinn cho aingidh, anns an am sin,
Greim air Gall cha leigimid as;
Choirneil <eng>Balfur, ye son of a whore,
I'll make you sure, ye'll come to the fight;<gai>
Bhris iad do chrun, as t-ad air do shuilean,
'S ghearr iad do bhùtainn air cula' do chas.

[TD 74]

ORAN air Righ Uilleam agus Ban-Righ Marai;
Le Ian Lom.

SEISD.

Hì rin hà rin, hó ro o bha hó,
Hì rin hà rin, hó ro o bha hì,
Biodh gach duin agaibh bronach,
Air son foirneart mo Righ.

'N diugh chuala' mi nuaidheachd,
Air alt nach b' aimhealtach leinn;
Na 'n cumadh e chasan,
'S gu 'm biodh an t-ath-sgeul cho binn;
Righ Seumus le farum,
Cur a dharaich na still;
O'n 's leat uachdar na mara,
Gluais a's tarruing gu tir.
Hi rin, &c.

Mhic Muire na na h-Oighe,
Coimhead foirneart mo Righ;
Co b' urrainn d' ar smaladh,

Ach do lamhans' bhi leinn:
Faic a nis Prionns' Orainns,
Cur na coir os a cinn;
Ach as do chobhair a Shlan'ear,
Thig furtachd a's slaint air gach tinn.
Hi rin, &c.

A Rìgh chumhachdaich fheartaich,
Ga bheil beachd air gach nìth;

[TD 75]

Cum air aghaidh an ceartas,
An lagh seachranach pill:
Faic luchd na 'm breid daithte,
Bhi gun dealt ann am prionnt;
'S ma tha 'n eucoir na 'n aigne,
Beum do shlat os an cionn.
Hi rin, &c.

'Nuair a thainig thu Shasunn,
'S tu rinn aiseag a bhreamais;
'Sheilbh choir thoirt air eiginn,
O 'n athair-cheile thug bean duit:
Cha b' i réul na 'n duilean,
Bha deanadh iùl duit 'sa 'n aineol;
Mur bha riomhe na trì Rìghrean,
'Nuair bha Iosa na leanabh.
Hi rin, &c.

Thug thu 'm follais an t-Slan'ear,
Seula grain do luchd teagaisg;
'S gur mor am fath naire,
'N coig aithne a bhristeadh;
A nighean fhein 's mac a pheathar,
'N aghai labhairt an scriobtuir;
Mur bhreun gearran 'sa chathair,
'S gach b' fhear tighe da 'n sliochd e.
Hi rim, &c.

'S fìor mhallaichte 'n lamhnain,
Thum an spain anns an roinn ud;
Seilbh coir thoirt a dh' aindeoin,
Le muthadh malairt an traiteir:
Ged a stadadh an claidhe,
Gun bhuille chaitheadh ach na rinn e;

[TD 76]

Bidh gach fuil ag eigheach am flaitheas,
Ad dheigh a latha sa dh' oidhche.
Hi rim, &c.

'S mairg a chreideadh droch nuaidheachd,
Thig roimh' amhuch a namhaid;
Chuireadh fùdar na ghreadan,
An grunn na h-eaglaise gnathaicht:
'S lionar lunn tha na teine,
'Sa ghrunn 'n do spealadh an grain-shop;
Ach chì sinn fhathasd sud diolte,

Mas a fìor a ta 'n fhaistinn.
Hi rin, &c.

Nuair chuaidh White Hall a losgadh,
Bu mhall do chois eachd gun bhrogan;
'S mi nach rachadh le pairtidh,
Air mhìre bhathadh na tòite;
Mas a doine rinn suas e,
B' fhaoin an cruadal 'sa 'n seoltachd;
Cha 'n eil mi gearan mo thruaighe!
Ach a lughadh sa fhuair dhiu an rostadh.
Hi rin, &c.

Cha tig ach rucas a's cealgan,
O chruitibh cealgach an ràbuill;
Cuiridh 'n t-aibhisteir a sheul ris,
Bidh Dia a's daoine ga aicheadh;
Cleas eud bean a chruiteir,
Fhuair a cursadh 'n sgath garaidh;
Thog iad airsean mur ursgeul,
Gu 'n do mhurt e dhearbhbhrathair.
Hi rin, &c.

Gu 'm bu ghrannda na sgeoil sin,
Thug na deomhain ga dhiobairt;

[TD 77]

'S nach b' urr' iad ga dhearbhadh,
Ach mur bhuille searbha da 'n luchd mìoruin;
Gu 'n cuirte isein a chlamhain,
Ann nead clannach an fhìreoin;
Mac muice a bhalaich,
Shalcha' fala na 'n Rìghrean.
Hi rin, &c.

'S mairg Rìgh a rinn cleamhnas,
Rì Duitseach shanntach gun trocair;
Cha b' e'n onair bu ghnaths da,
Ged 's tu brathair mathar an rogair;
Ged a thug thu dha Marai,
Air laimh chum a posaidh;
Ghabh e t-oighreachd a t-antoil,
Thair do cheann a's thu 'd bheo-shlaint.
Hi rin, &c.

Bha mac aig Rìgh Daibhidh,
'S bu deas aill air ceann sluaigh e;
Chuaidh 'n aghaidh an athar,
'Sa 'm fear nach cathair da bhuaireadh:
'Nuair a sgaoileadh am blar sin,
Thug Dia paigheadh na dhuais da;
'S o 'n bu droch dhuine cloinn' e,
Chroch a choill air a ghruaig e.
Hi rin, &c.

Ach buaidh an droch sgeoil sin,
Do Phrionns' Orainns gun diaghachd;
Ged a rachadh do bhathadh,
Cha b' ionunn bas duit 'sa dh' iarrainn;

Ach na sùsain bhi t-fhaicinn,
Eidear eacha' ga d' stialladh;

[TD 78]

Dol ad smaladh 'sa 'n adhar,
Mur luaidh dhaithte ga criaradh.
Hi rin, &c.

Sgrios gun iarmad gun duilleach,
Cha 'n iarrainn tuille am dhan duibh;
Gun sliochd a dh' iathadh mu t-uilinn,
Do ghnìomh broinne droch Mharai;
Ged a ghlacadh na theum e,
'S farsuing beul' a mhic lamhaich,
A sheann staoile bhi 'n cuntart,
Aig na rinn thu chruinneach' a graineig.
Hi rin, &c.

Ach sèun gun tuisle air Marai,
'S olc an lan tha na togsaid;
Nar fhaicear laogh càraid,
Nuas gu lar as a poca;
Cha bhi 'n sean-fhacal claidhte,
Air neo 's claon theid a thogail:
Tha 'n da shannt 'sa 'n droch mhnaoi ud,
'S annsa bodaidh no boban.
Hi rin, &c.

Ach na 'n tigeadh an Rìgh sin,
'Sa Mhac dileas air aidmheil;
Ged a theireadh Prionns' Orainns,
Nach h-i choir a bhiodh againn;
Cha bu mho orra Uilleam,
Air sraid Lunnainn an Sasunn,
'N ceann fhuadach deth mhuineal,
Na cluas cuilein an radain.
Hi rin, &c.

Prionns Orainns a mhìo-raith,
Ma 's toil le a Rìgh thoirt gu creidimh;

[TD 79]

'S coir an duilleag so thionndadh,
Air a Bhan-Rìgh nach creid e:
Ma shaoil am biothuntach sanntach,
Na mhac samhla ga ghoid sud;
Na a ruidheachd le a lannan,
Air nighean Seanalair Huitsein.
Hi rin, &c.

B' fhearr gu 'm buaileadh e 'n stàidse,
Tus a bhaidse bu choir dha;
Na 'm bu tuiteam 'sa phlaigh dhuinn;
Mur fhuair Rìgh Phara' 'sa sheorsa;
Mur bha chamhairle bhreige,
Chuir Rìgh Seumus air fogradh;
Aithris cleas na 'n droch Rìghrean,
Leis 'n do dhiteadh Rehobòham.

Hi rin, &c.

Sgeul buan e do 'n mhearcaid,
'S nach tog a mac a cuid oighreachd;
'S ion d' i cùram a ghabhail,
Mu 'n duinear cathair na soills oirr';
Thoill i mallachd a h athar,
O 'n ghabh an t-aibhisteir greim dh' i;
'S olc an duthchas a lean r' i,
Chunnt i a sean'air na thraiteir.
Hi rin, &c.

'S math an toiseach air seannsa,
Ma rinn am Frangach a thapadh;
Ma ghlacadh leis Monsai,
Cha sgeul tumsgeul ach ceartas;
Bu mhath gu 'm biodh an adbhansa,
Air a tionndadh gu Sasunn;

[TD 80]

Na gu 'm faicte an cunntar,
Cho ghrad ri tionndadh na 'n cairtean.
Hi rin, &c.

Ach ma stad air an Diuc sin,
'S nach h-e a run tighin ni 's faide;
Leig e cadal do 'n chirein,
Stad a sgrìob mur bu chleachd leis:
Ma leig gach saighdeir a ghleus deth,
'Nuair tha leigheart mu 'n chaisteal;
B' fhearr gu 'm faicinn an coileach,
Na gu 'n goireadh a chaismeachd.
Hi rin, &c.

Ma tha e 'n dan duit teachd dhachaidh,
'S nar dhuit t-fhaicinn gun speurad;
Ged a fhuair thu pairt leonaidh,
Ri am fogradh Rìgh Sheimis;
Ma tha thu cruaidh air an raiper,
Seall air slachdan a ghleusaigh;
Leis 'n do spìosadh mo sgròban,
Ma 's fìor Tòmas an Réumair.
Hi rin, &c.

[TD 81]

ORAN eidear Brian am bard Asuinneach agus Iain Lom; an dithisd air tachairt 's gun aithn' ac air a cheile, agus Brian cuir soraidh leis an fhear eile thun Iain Mhanntaich agus gur h-ann ri Iain Manntach fhein a bha e bruidhinn.

FONN.—Ma chuaidh thu null thair linntichean, &c.

THUIRT BRIAN.

THOIR soraidh gu Iain Manntach uam,
Rag mhearlach na 'n each breanndalach,
Gur tric a thug a mearlach ud,
Meann a mach o 'n chro.

Gur tric a thug, &c.

B' e fasan fir a Bhraighe ud
Da thaobh Loch-iall a's Arasaig,
Bhiodh sgian 'sa 'n dara brathair dhiu,
Mu uirread àra dh' fheoil.
Bhiodh sgian, &c.

IAIN LOM.

A theangaidh liotaich mhior'uiltich,
Nach tuig thu bhi gad dhiomoladh;
'S mithich tarruing gu cloich shniaraidh leat,
'S gu 'm faigheadh Brian a leoir.
'S mithich teannadh, &c.

Cha bu chùpair a ghoid ghearran mi,
Cha do chuir mi ùidh 'sa 'n ealaidh ud;

[TD 82]

Cha mho chum e caithris orm,
Toirt mult a cara cro.
Cha mho, &c.

Do bheul 's e molach feusagach,
Lan smuig a's uilc a's réumannan,
Gur tric do bhru 'sa gheisgil ort,
'N deigh fuigheal créis na 'm bord.
Gur tric, &c.

'Nuair bu dluithe 'n aileag ort,
Bu lion'or cù a's galla,
Bhiodh toirt na 'n sul 's na 'm mala dhiot;
Le bruchdadh bola' feoil.
Bhiodh toirt na 'n, &c.

A sheann-tur leigh na 'n ursannan,
Is tric a dheith na cupachan,
'S tu 'd shìneadh anns na guiteirean,
'N deigh do ghucaig ol.
'S tu 'd shìneadh, &c.

Gur salchar seit a's urlair thu,
Lan sgeig a's uilc a's iombasaich;
Mur bhairrille 'n deigh a thunndaidh,
Cur sgum gu barr-iall bhrog.
Mur bhairrille, &c.

Ged 's cam a stigh fo d' ghluinean thu,
Gur caime 's tigh fo d' shuilean thu;
'S tu traiteir na 'n seachd duthchannan,
A reic an crùn air ghrót.
'S tu, &c.

Droch coinne ort a shithcheartaich,
Mur caol a reic thu 'n fhirinn,

[TD 83]

Air son na mine Litich*,
Nach deach, 'sa 'n ìre chòir.
Air son na, &c.

ORAN air Aonghus Og Moir-fhear, Ghlinne-Garaidh, le Iain Lom.

ACH Aonghuis Oig Ghlinnich,
Cha robh sinn umad suarach;
'Nuair a dh' éighte leat iomairt,
Bu mhor do chinneach ri ghluasad;
Thigeadh dream ort thair lingidh,
'N taobh so 'n Innein o thuath oirnn;
Ceud conspunn gun ghiorrag,
Nach tilleadh roimh fhuathas.

Sar mharcaich each steud thu,
Thapaidh ghleusd air dheagh inneal;
Bhiodh faicill math sreìn ann,
'Nuair a leumadh tu 'd stiorap;
'Nuair a rachadh tu 'n réis leis,
Cha bu reidh dol ad philleadh;
Bhiodh lann thana ghorm gheur ort,
Cur raitréut mur bu mhinig.

Gun robh maoim air do maimhdean,
Anns gach camp dhiu ri shireadh;

<eng>* Damaged meal bought in Leith port, that was given as a reward for
betraying the Duke of Montrose.<gai>

[TD 84]

Bhiodh cuid dhiu na 'n luidhe,
Gun lamhan r'a 'n slinnein;
Gun chlaigeann gun chluasan,
Ach an cruacan a sileadh,
Sgathadh chasan a's chruaidhchinn,
Thaobh cruadal a Ghlinnich.

Ach Aonghuis Oig Ghlinnich,
Cha robh sinn umad eolach;
'S tu nach gabhadh a ghiorrag,
Dhol a philleadh na torachd;
Bhiodh an t-iubhar ga lubadh,
Le fiùidhinnibh storach,
Air a leigeil gu h-ealamh,
Le taibheidean corcach.

B'e mo run an t-og meamnach,
Sar cheannard air cheud thu;
Fhuair thu uram fir Alba,
Ann an armachd sa 'n gleusdachd;
Mac Muire dhion t-anma,
Anns gach cearna 'sa 'n theid thu,
'S nach faodar do mharbhadh,
Gun earlais Mhic De leat.

Ge magail sibh 'n drasda,

Air mo ghradhsa do dh' fheara;
Mu 'n dicrite tha 'n Croideart,
A bhi 'm poca Mhic Cailein;
'S ioma uisge bu lugha,
Nach leigeadh claothaire thairis;
As an tug thu do chasan,
Thoir coiseachd a dh' aindeoin.

Mur hhith dhomh clibid mo theanga,
Dheanainn seanchas mu 'n cuairt duit;

[TD 85]

Air do ranntainibh farsuing,
A lub ghasda a chruadail,
Cha 'n eil Rothaich no Barraich,
No Gallaich no tuathaich;
Nach dligheach bhi agad,
Ann an caismeachd na h-uaire.

Mac Pharlain 'sa chinneach,
Bu leat sud ri t-uair feuma;
'S Mac Mhoirich a Atholl,
Ge grathunn o cheil iad;
Mur sud 's Mac-an-Aba,
Le acfuinn mhath ghleusda;
Mac Laomainn 's Mac Lachuinn,
Le 'n glas lannan geura.

'Nuair a dheante camp cruinn dibh,
'S neart 'ur 'n ùillean ri cheile;
Co b' urrainn dhol eidribh,
'Nuair nach seasadh sibh fhein e;
Ged thug ro mheud ur 'n uaibhir,
Bhi ga 'r buaireadh o chèile;
'Se 'n stoc as 'n do bhuaibh sibh,
Fuil uasal Chuinn Cheud-chathaich.

Cha 'n fhuil bhodach no graisge,
No pràbar, no tuataidh;
Ach fuil an Iarl Iolaich,
Bha air sioladh 'n ar gruaidhibh;
Shliochd Mhìlidh na 'n cathan,
Bha t-Athair coig uairean;
Dh' fhag sud cruadal ad lamhan,
'N am claidhe a bhualadh.

'Nuair a dh' eighthe Clann Donuill,
Bha mi eolach sa bheachd sin;

[TD 86]

Gu 'n do chuireadh mu 'n cuairt e,
Coig uairean 's mi 'm chadal;
Gar 'n do ghabh mi mor eolas,
Air a Mhoirfhear so thagaibh;
Sin a's onoir Shir Seumus,
Sibh gu leir bhi dh' aon aigne.

Ged tha onoir Shir Seumus,

Leat fein mur ata e;
B' ait leam oighreachd Rìgh Fionnaghail,
Bhi 'n duthchas mur b'aill leam;
Bheirinn bliadhna dheth m' shaoghal,
'S gach ni dh'fhaodainn a tharadh,
Chionn do choir a bhi sgribhte,
O laimh an Rìgh gun dad faillinn.

'S co ni tapadh no tabhachd,
No stath dhuinn air domhan;
Ma ni thu ar fagail,
Tha sinn baitht' am muir dhomhain;
Duine dheanadh oirnn eucoir,
No shaltradh ceim air ar gnothach;
'S tu b' urrainn g'a reiteach,
'Nuair a dh' eireadh tu romhainn.

Cha 'n iarrainn a bharant,
Air bheula' barra no binne;
Ach Moirfhear og Ghlinne garaidh,
'Se mo charaid glan rioghail;
'Se chuir maill air mo sheallamh,
Agus eallach air m' inntinn;
Gun do Mhac a bhi t-aite,
Thun an la thig ceann crìch ort.

Tha na 's mo orm mur iongnadh,
An drasd anns an leum so;

[TD 87]

Meud ardain mo chinnidh,
Dia ga 'm pilleadh gu rèite;
Air chumhnant bhi fallain,
Thngabh aire do m' sgeulsa;
'S treise dithisd sa 'n amhuinn,
Na bhi grathunn o cheile.

Marbhrann do Shir Seumus Mac Dhonuill, Le Iain Lom.

GUR fad tha mi 'm thamh,
Thuit mo chridhe gu lar,
Rìgh! 's deacair dhomh tamh 's mi beo.
Gur fad tha, &c.

'Se do thuras do 'n Dùn,
Dh' fag snith air mo shùil,
'Sa bhi faicinn do thur gun cheo.
'Se do, &c.

Tha do bhaile gun speis,
Gun eich ga 'm modhadh le sreìn,
Dh' fhalbh gach fasan le Seumas og.
Tha do bhaile, &c.

Nuair a rachadh tu strìth,
Ann an armailt an Rìgh,
Bhiodh do dhiollaid air mìl each gorm.
Nuair a racha', &c.

Nuair a rachadh tu mach,

[TD 88]

B' ard a chluinnte do smachd,
Bhiodh Iain Muideartach leat 's Mac Leoid.
Nuair a, &c.

'S leat Mac Pharlain na 'n cliar,
Bh' aig fir t-aièasa riamh,
Mac-an Aba le chiad na dhò.
Fear chann, &c.

Clann Iain a nuas,
'S fir a bhraighe so shuas,
'S Mac Ghriogair o Rua'shruth chno.
Chlainn Iein, &c.

Clann Chamrshoin a nall,
O bhraighe na 'n gleann,
Chuireadh iubhar le srann am feoil.
Clainn, &c.

'S leat Mac Dhonuil a rìs,
Na 'm bratach 's na 'm pìob,
Crunair gasda na 'n Rìgh bhrat sròil.
'S leat, &c.

Gu 'm faiceadh mo Dhia,
Do mhac air an t-sliabh,
Ann an duthaich na 'n cliar 's mi beo.
Gu 'm faiceadh, &c.

Thig a Atholl a nios,
Comhlan ghasda gun sgios,
Ceannard rompa 's e finealt og.
Thig a Atholl, &c.

Coinnlean geala do 'n cheir,

[TD 89]

'S iad an lasadh gu geur,
Urlar farsuing mu 'n eighte 'n t-ol.
Coinnlean, &c.

Bhiodh do ghilleam mu seach,
A lionadh dibhe b' fhearr blas,
Fion Spainnteach dearg aca 's beoir.
Bhiodh do, &c.

Uisge-beatha na 'm pios,
Rachadh 'n tairgiod ga dhiol,
Gheibhte 'n gloin e mur ghriog an oir.
Uisge beatha, &c.

'S ann na shineadh 'sa 'n allt,
Tha deagh cheann-tighe an aigh,
Ged a thuit e le dearmad leo.

'S ann na, &c.

Buidheann eile mo ghaoil,
Ga 'm bu shuaitheantas fraoch,
Och mo chreach! nach d'fhaod iad bhi beo.
Buidheann, &c.

Buidheann eile mo ruin,
Air nach cualas mi chliu,
Thig le Alasdair sunndach og.
Buidheann, &c.

Bhiodh mnaithean og an fhuilt reidh,
Gabhail dhàn dhoibh le 'm beul,
Ann ad thalladh gu 'n eisdeadh ceol.
Bhiodh, &c.

Fhir a dh' fhuiling am bas,

[TD 90]

'Sa dhoirt t-fhuil air ar sgath,
Na leig mulad gu brath na 'r coir.
Fhir a, &c.

Nis o n sgithich mo cheann,
Sior thuireadh do rannt,
Bidh mi sgur anns an am is coir.
Nis o 'n sgithich, &c.

ORAN do dh' ALASDAIR MAC COLLA, 'n deigh latha Allt Eire, Le Iain Lom.

GU ma slan 's gu ma h-eibhinn,
Do 'n Alasdair euchdach,
Choisinn latha Allt Eire le mhor-shluagh.
Gu ma slan, &c.

Le shaighdeirean laghach*,
'N am gabhail an rathaid,
Leis 'm bu mhiannach bhi gabhail a chrònain.
Le shaighdeirean, &c.

Cha bu phrabaire tlath thu,
Dhol an caigneacha chlaidhean,
'Nuair bha thu sa ghàradh a t-ònar.
Cha bu, &c.

Bha luchd chlogaid a's phìcean,
Cuir ort mur an dìchioll,
Gus an d' fhuair thu reliobh o Mhontròsa,
Bha luchd, &c.

* Laoghach.

[TD 91]

'S ioma oganach sulghorm,
Bha fo lot na 'n arm ruisgte,

Aig geata Chinn-Jùdaidh gun chòradh,
'S ioma oganach, &c.

Agus oganach loinneil,
Thuit an aobhar do lainne,
Bha na shineadh am polla' ud Lòchai.
Agus oganach, &c.

'S cha robh Domhach no Geinneach,
Ann an talamh Mhic Coinnich,
Nach d' fhag an airm thein' air a mhointich.
'S cha robh, &c.

Cha robh Tomai no Simidh,
Ann an talamh Mhic Shimidh,
Nach do thàr anns gach ionad am frogaibh.
Cha robh, &c.

Chuir sibh pairt diu air theicheadh,
Gus 'n do rainig iad Muiri,
'S chuir sibh lasraichean teine 'sa Mhorfhaich.
Chuir sibh pairt, &c.

Marbhrann do dh' ALASDAIR dubh GHLINNE-GARAIDH, Le Iain Lom.

Mi 'g eiridh 'sa mhaduinn,
Gur beag m' aiteas ri sùgradh,
O 'n dh' fhalbh uachdran fearail,

[TD 92]

Ghlinne-Garaidh air ghiùlan;
'S ann am Flaitheas na failte,
Tha ceannard aillidh na dùthcha;
Sar Choirnileir foinnidh,
Nach robh foilleil do 'n chrùn thu.

SEISD.

Ho ro 's fada 's gur fada,
'S cian fada mo bhròn;
O 'n latha chàireadh gu h-ìosal,
Do phearsa phriseil fo 'n fhòid:
Tha mo chridhse ciùirte,
Cha dean mi sugradh ri m' bheò;
O 'n dh' fhalbh ceannard na 'n uaislean,
Oighre dualchas an Tròim.

'S mairg a tharladh roimh' d' dhaoine,
'Nuair thogte fraoch ri do bhrataich;
Dh' éireadh stuagh an clar t-éudainn,
Le neart feirg agus gaisgidh;
Sud a phearsa neo sgàthach,
'N t-sùil bu bhlaithhe gun ghaise;
Gu 'm biodh maoin air do naimhdean,
Ri linn duit spainnteach a ghlacadh.
Ho ro 's fada, &c.

Fhuair thu 'n cliùth sin o thoiseach,
'S cha b' olc e ri innseadh;

Craobh chosgairt sa bhlàr thu,
Nach gabhadh sgàth roimh luchd phìcean;
Na roimh shaighdeirean dearga,
Ged a b' armailtean Rìgh iad;
Le 'n ceannardan fuilteach,
'S le 'n gunnaichean cinnteach.
Ho ro 's fada, &c.

[TD 93]

Gur a farsuing do ranntaibh,
Ri sheanachas 's ri shloinne;
Gur tu oighre 'n Iarl Ilich,
Nach do choisinn cìs le gnìomh foilleil;
Marcaich ard na 'n each cruitheach,
Na n srian ùr 's na 'n lann shoilleir;
Lamh threin ann an cruadal,
Ceannard sluaigh a toirt teine.
Ho ro 's fada, &c.

Fhuair thu onair fir Alba,
Bha meas a's ainn air fear t-fhaigsein;
Ann an gliocas 'sa 'n géire,
An cliùth, an céuta 'sa gaisgeadh;
Thug Dia gibhtean le buaidh dhuit,
Cridhe fuasgailteach farsuing;
Fhir bu chiùine na mhaighdeann,
'S bu ghairge na 'n lasair.
Ho ro 's fada, &c.

'S goirt an t earrachull a thachair,
O 'n chuaidh an iomairt so tuathal;
O latha blair Sliabh an t-Siorram,
Chaill ar cinneach an uaislean:
Thionndaidh chuibhl' air Clann Donuill,
'N treasa conspunn bhi uatha;
Ceann a's colar Chlann Ràghnuill,
'N fhuil àrd 's i gun truailleadh.
Ho ro 's fada, &c.

Nis o 'n dh' fhalbh an triùir bhràithrean;
Chleachd mur àbhaist bhi suairce;
Laoich o Gharaidh na 'm bradan,
Caipteine' smachdail a chruadail;
Dh' fhalbh Sir Donuill a Sleibhte;

[TD 94]

Bu mhor reusan a's cruadal;
Cha tig gu brath air Clann Donuill,
Triuir chonnsunn cho cruaidh riu.
Ho ro 's fada, &c.

Chriosda dh' fhuiling am bàs duinn,
O 'n 's tu ar patron ùrnaigh;
Cum an t-aog o dha bhrathair,
Fhad 'sa b' aill leinn le dùrachd;
Dheanadh treise do 'n alach,
So dh' fhag e gun sùilean;
'Sliochd an t-seobhaig 'sa 'n armuinn,

Nach tugadh cach an sgiath chùil deth.
Ho ro 's fada, &c.

'Nuair threig càch an cuid fearuinn,
'S nach d' fhan iad 'sa 'n Rìoghachd;
Sheas thusa gu fearail,
'S cha b' ann le sgainnil a shìn thu;
Chuir thu fuaradh na froise,
Seach ar dorsaibh g' 'ar dìonadh;
Gu 'n robh t-fhaigsein cho làidir,
Ri leoghuinn ard do 'n fhuil Rìoghail.
Ho ro 's fada, &c.

Cha robh Iarl ann an Albuinn,
Gheibheadh earbsa na run riut;
Gu 'm biodh toiseach gach nuaidheachd,
Gu lamhan a chùirteir;
Seobhag firinneach suairce,
Choisinn cruadal gach cùise;
Ceannard mhaithean a's uaislean,
Aig an t-sluagh 's iad ga ghiùlan.
Ho ro 's fada, &c.

[TD 95]

Sgeula b' ait' leam ri in-seadh,
'Sa bhi g'a leirsinn le 'r sùilean;
Do mhac oighr' ann a t-fhearunn,
Mur bu mhath le luchd dùrachd;
Ach aon neach leis am b' oil e,
Luaidhe ghlas le neart fùdair;
Roimhe 'n cridh' air a fiaradh,
Chor 's nach iarradh iad tionndadh.
Ho ro 's fada, &c.

Marbhrann do dh' AONGHUS og MOIR-FHEAR Ghlinne-garaidh; Le Iain Lom.

'S BEAG an t-iongnadh mi liathadh,
'S i so bhliadhna bhuail brog orm.
'S beag an t-iongnadh, &c.

'N diugh 's mi gabhail an rathaid,
'S trom a thathaich do bhron orm.
'N diugh 's mi, &c.

Gu 'n do chaochail mi cular,
M' fhalt mo spionna 's mo threòireachd.
Gu 'n do dhaochail, &c.

Gur h-i dìliob na dunaidh,
Tha mi buntainn a m' phocaid.
Gur h-i, &c.

Ghrabhat bha mu d' mhuineal,
'S tric i cruinneachadh dheoir orm.
Ghrabhat bha, &c.

[TD 96]

Dh' fhag mi taisgte 'n Duneidionn,
Na scar o cheile mo mhorchùis.
Dh' fhag mi, &c.

'N ciste chumhainn na 'n slios-bhord,
Fo lic na 'n stol reota.
'N ciste, &c.

Fo chasan luchd bhrigis,
Gur a mis th' air mo leonadh.
Fo chasan, &c.

'S ann a thog thu 'n tur dealbhach,
Goirid gearr o Loch Lochai.
'S ann a thog, &c.

Chunnaic mis Ionmhur gharaidh,
Muirneach aidh' reach ceolar.
Chunnaic, &c.

Bhiodh an cup ann do chearr-laimh,
'S e dearr-lan gu dortadh.
Bhiodh an cup, &c.

Nuair a chuirte 'n lan strachd air,
B'e sin am fath chumail comhnard.
Nuair a, &c.

'Sa nis do thalla mor greadhnach,
Gun solus coinle gun cheol ann.
'Sa nis do thalla, &c.

'S do sheomraichean geala,
Gun smuid, guu deathach, gun cheo dhiu.
'S do sheomraichean, &c.

[TD 97]

Mabhrann do 'n Mhoir-fhear cheudna; Le Iain Lom.

CHA b'e bas mo cheann cinnidh,
So chuir mi fein gu trom iomairt,
Ach gun t-oighre bhi t-fhine nuair dh'eug thu.
Cha b' e bas, &c.

Fear mor curanta laidir,
Bh' aig gach duine mur sgathan,
Ged a tha e gun chainnt an Duneidionn.
Fear mor, &c.

Gu 'n do chaireadh e 's talamh,
Fear a chonnsach Mhic Caillein,
Co b' urrainn an casadh na sreìn riut.
Gu 'n do chàireadh, &c.

Thug thu Cnoideart dheth 's tuille,
'S lagh an Rìgh air do mhuineal,
Cha do chonnsaich e Muil' ach gu 'n d' éug thu.
Thug thu, &c.

Rinn Mac Coinnich Cheanntaile,
'S Mac Shimidh na h-Airde,
Garbh choinne gu sàthadh le cheil ort.
Rinn Mac Coinnich, &c.

Nuair a chunnaic an cairdean,
Nach deanadh iad stath dheth,
'S e gu mor a b' fhearr leo bhi réidh riut.
Nuair a chunnaic, &c.

[TD 98]

Cumha Aonghuis Mhic Raoghnuil oig, chuaidh a mharbhadh latha blair Stron-
chlachain, nuair a thog Clann Iain Ghlinne Comhunn creach Bhraidealbunn;
Le Iain Lom.

RIGH gur mor mo chuid mulaid!
Ged is fheudar dhomh fhulang,
Ge b' e dh' eisdeadh ri m' uireasbhuidh àireamh.
Righ gur mor, &c.

O 'n a chaill mi na gaodhair,
'Sa 'n t-eug ga 'n sìor thaoghal,
'S beag mo thoirt gar an toaghail mi 'm bràighe.
O 'n a chaill, &c.

'S eun bochd mi gun daoine,
Air mo lot air gach taobh dhiom,
'S tric rosad an aoig air mo chairdean.
'S eun bochd mi, &c.

Gur mi 'n giadh air a spìonadh,
Gun iteach gun linnidh,
'S mi mur Oisein fo bhinn an tigh Phadruig.
Gur mi 'n giadh, &c.

Gur mi a chraobh air a rusgadh,
Gun chnodhan gun ubhlan,
'Sa snodhach 'sa rusg air a fàgail.
Gur mi a, &c.

Ruaig sin Cheann Lochatatha,
'S i chuir mis ann mo dhabhaich;

[TD 99]

Dh' fhag mi Aonghus na luidhe 'sa 'n araich.
Ruaig sin, &c.

Mu 'n do dhirich sibh 'm brughach,
'S ann n' ar deaghaidh bha 'n ulaidh,
Bha giomanach gunn' air dhroch caradh.
Mu 'n do dhirich, &c.

Ged a dh' fhag mi ann m' athair,
Cha 'n ann air tha mi labhairt;
Ach an druthadh rinn an claidhe mu t-airnean.
Ged a dh' fhag, &c.

Gur h-e dhrùith air mo leacainn,

'M buille mor bha 'd leith-taobh,
'S thu ad luidhe 'n tigh beag Choire-charmaig.
Gur h-e dhrùith, &c.

B' i mo ghradh do ghnùis aobhach,
Dheanadh dath le t-fhuil chraobhaich,
'S nach robh seachnach air aodann do nàmhaid.
B' i mo ghradh, &c.

ORAN do Mhoir-fhear Hunndaigh, nuair a ghlacadh e la Crùnair Mèinn ann am baile Strath-bhalgaidh; Le Iain Lom.

GUR a trom leam a ta mi,
Leis gach sgeul tha mi claistinn,
'S mi tearnadh stigh braigh uisge Dhé*.
Gur a trom, &c.

<eng>* The river Dee.<gai>

[TD 100]

Mi tearnadh air m' aineol,
Gu braighe Obairpheallaidh,
Gun aon luaidh air fear fharaid mo sgéul.
Mi tearnadh &c.

Cha b' e gaoir ban a Chlachain,
So bha mise ag acain,
Gar 'n tigeadh gin as do 'n choig céud.
Cha b' e gaoir, &c.

Ach ma ghlacadh am Marcus,
Leis a Mheinnearach thachrais,
B' e mo dhiùbhail na bh' aca 's mo bhéud.
Ach ma ghlacadh, &c.

'S mor an nuaidheachd e 'n Albuinn,
Bog na-gaoidhe 'n Strath-bhalgaidh,
Bhi ga chlaoidh le armailtean sréin.
'S mor an nuaidheachd, &c.

Ceann uighe na 'n Gaidheal,
Far an suidheadh mid saibhir,
'S tu gu 'n taghadh gach aite dhuinn réidh.
Ceann uighe, &c.

'S ann a b' abhaist dhuit suidhe,
Ann an gàradh na 'n ubhal,
Fo fhaile na 'n luidhean 's na 'm peur.
'S ann a b' abhaist, &c.

[TD 101]

ORAN do MHAC MHIC RAOGHNUILL na Ceapaich; Le Iain Lom.

MI am shuidh air bhruaich torrain,
Mu 'n cuairt do Choire na Cléibhe.
Mi am shuidh, &c.

Gar nach eil mo chas crubach,
Tha lot na 's mù orm fo m' leinidh.
Gar nach eil mo chas, &c.

Gar nach eil mo bhian srachte,
Tha fo m' aisne mo chreuchdan.
Gar nsch eil, &c.

'S cha n' e curam na h-imrich,
Na iomaguin na spréidhe.
'S cha n' e curam,

Na bhi ga 'm chur do Cheanntaile,
'S gun fhios cia 'n t-aite da 'n teid mi.
Na bhi ga m', &c.

Ach bhi nochd gun cheann cinnidh,
'S tric 's gur minig leam fhein sud.
Ach bhi nochd, &c.

Ceann cinnidh na 'm Bràighdeach,
Chuireadh sgath air luchd beurla.
Ceann cinnidh, &c.

[TD 102]

Cha b' e fuaim do ghreidh lodain,
Gheibhte sodraich gu feilltean.
Cha b'e fuaim, &c.

Na geim do bha tomain,
Dhol an coinneadh a ceud laoigh.
Na geim, &c.

Na uisge na 'n sluasaid,
Far druabras na féithe.
Na uisge, &c.

'S beag an t-iongnadh leam t-uaisle,
Thighin an uachdar air t-fhéudail.
'S beag an t-iongnadh, &c.

'Sa liuthad sruth uaibhreach,
As 'n do bhuaineadh thu 'n céud la.
'Sa liuthad, &c.

Ceist na 'm fear thu o 'n Earsaid,
'S o Cheapach na 'm péuran,
Ceist na 'm fear, &c.

'S o cheann-Dail na mine,
Gu Sron na h-Iolaire léithe.
'S o cheann, &c.

'S e bu mhiann le d' luchd tighe,
Bhi ga 'n tathaich le béusan.
S e bu mhiann, &c.

Mu dha thaobh Garbh a Chonnaidh,

Far 'm biodh na sonnanaich glé mhor.
Mu dha thaobh, &c.

[TD 103]

Le 'm morbha geur sgaiteach,
Fridh bhacach garbh léimneach.
Le 'm morbha, &c.

Tha mo choill air a maoladh,
Nith shaoil leam nach éireadh.
Tha mo choill, &c.

Tha mo chnothan air faoisgneadh,
'S cha bu chaoch iad ri 'm féuchainn.
Tha mo chnothan, &c.

'S nach eil agam dhiu tuaileas,
Dh' fhuirich iad uam am barr gheugan.
'S nach eil agam, &c.

ORAN do THIGHEARNA CHLUAINIDH; Le Pàl Mac a Phearsain am Baideineach.

DEOCH slainte Thighearna Chluainidh,
Cuir mu 'n cuairt anns a chùp i;
Ged a chostadh i ginidh,
'S mi fhin nach biodh diùmbach:
Tha na dh' olas do shlainte,
Chrùintean spainnteach am phuidse;
'N deigh am màl a thoirt seachad,
Do dh' ath-chorc a Phrionnsa.

Ach tha bagar air t-fhearunn,
Tha toirt gal air mo shùilean;
Mi air ùilleagan leapa,

[TD 104]

Cha n'e 'n cadal tha shurd orm;
Tha bruidle inntinn,
Orm sa 'n tim so le curam;
Mu na bharanta sharaidh,
Tha tighin an aird oirnn o'n Diùca.

A cheanna feadhnaidh Chlainne Mhuirich,
Leam is duilich ged chualadh,
Gu 'n do bhuannaich thu 'n Fhraing oirnn,
'S tu thighin slan as gach cruadal:
Oig aigiontaich rioghail,
'S mor pris aig na h-uaislean;
Fhir a chaisg oirnn gach trioblaid,
'S mor is miste sinn uainn thu.

'N am thogail do bhrataich,
Ann an caismeachd uaire;
Gheibhte mìle laoch gasda,
Mu gheatachan Chluainidh;
Luchd na 'n osana' gearra,
Thairngneadh lannan mu d' ghuaillan;

'N diugh 's faoin a tha 'm misneach,
Gun do thiotal an uachdar.

Ach Eoghain 'Ic Mhuirich,
'S fada t-fhuireach 'sa 'n fhasach;
'S e dh' fhag smal air mo leirsinn,
Thu bhi 'g éiridh 'sna carnaibh;
Gur lionar bean bheildearg,
Tha a breid air dhroch caradh;
Ged a dhean iad oirnn eucoir,
Cha teid thu ga 'n rèidhteach.

Fhuair na Gaidheil an logairt,
'N Cuilleodair 's cha chrion e;

[TD 105]

Air an iathadh le buidseachd,
Sìol na muice fhuair cis diu;
Chluinnte farum an lamhaich,
Mur thairneineach fridhe;
Fuaim na 'n canan ga 'n leigeadh,
Cia mur sheasadh na saoithean.

Bhuaidh tha 'n iondraichinn chatha,
Tha mi labhairt 'sa 'n tim so;
Ma sa cuimhne leibh fhathasd,
An latha bha 'm Pìorat;
'N am dhol sìos anns a bhatailt
'S mairg a chasadh do mhio-thlachd,
Leat a dh' éireadh na gallain,
Nach cuireadh carraid gu mìghean.

Bu lionar do chairdean,
'S cha bu ghann iad ri léughadh;
'Nuair a chluinnte do chaismeachd,
Thigeadh feachd dhiu a Eirinn;
Thigeadh streang dhiu a Uithisd,
Air siubhal fo bhreid leat,
Le reubadh cuain 's le seoil mhara,
Na seoid bharrail nach geilleadh.

Cha b'e gadachd na h-oidhche,
Na traiteireachd naduir,
Chuir mo dhislean gu taice,
Eidear Chaiptein a's Chádai;
Ach ma chuaidh sibh 'sna bruachan,
Cha 'n e ur cruadal a dh' fhailing;
Leibh a dh' eireadh am baiteal,
'S b' e ur cleachda buaidh larach.

Tha meirg air nighin Tearlaich,
'S cha tar mi ga gleusadh;

[TD 106]

Cha chluinnear a lamhach,
Tha i ghnà ann am féithe;
Tha gruaim air na Gaidheil,
'S tha pairt orm fhein deth;

O 'n chuaidh ar n' uachdaran cliùiteach,
Fo churam luchd béurla.

ORAN do RIGH SEUMUS nuair bha e anns an Fhraing; Le Sileas Nighean Mhic
Raoghnuill na Ceapaich.

S' BINN an sgeul so tha iad ag radhainn,
Mo Mhalai bheag o,
Ma sheasas e gun fhaillinn,
Mo nighean ruin o;
Rìgh Seumus bhi air sàile,
'Sa tighin a steach gun dail oirnn,
Chur misneach ann na chairdean.
Mo Mhalai, &c.

Na 'n tigeadh oirne Seumus,
Mo Mhalai, &c.
Le chabhlaich laidir treunmhor,
Mo nighean, &c.
Ged 's fada sinn n'ar n' eiginn,
Fo ainneart cuigse 's cléire,
'S e sud a dheanadh feum dhuinn,
Mo Mhalai, &c.

'S e sud a thogadh sunnd orm,
Mo Mhalai, &c.

[TD 107]

Mas fìor na tha mi cluinntinn,
Mo nighean, &c.
Do loingeas bhi fo breidibh,
'Sa 'n cuan a bhi ga reubadh,
'S do naimhdean duit a' geilleadh,
Mo Mhalai, &c.

Tha do chathair aig Hanòbhar,
Mo Mhalai, &c.
Do chrùn 's do chlaidhe còrach,
Mo nighean, &c.
Tha 'n sean-fhacal cho chinnteach,
'S gur barail leam gur fìor e,
Nach marcaich muc an diollaid,
Mo Mhalai, &c.

Ach Alba eiribh comhla,
Mo Mhalai, &c.
Mu 'n gearr Sasunnaich 'ur sgornain,
Mo nighean, &c.
'Nuair thug iad air son oir uaibh,
'Ur creideas a's ur stòras,
Nach eil e 'n diugh n' ur poca,
Mo Mhalai, &c.

Gur goirt leam thug iad sgrìob oirbh,
Mo Mhalai, &c.
'Nuair dheasaich iad ur dinneir,
Mo nighean, &c.
'Nuair chuir iad uinnein puinsein,

Ga ghearradh air gach truinnseir,
Ma 's fhiach sibh bidh e cuimhnicht,
Mo Mhalai, &c.

Chaill Sasunnaich an naire,
Mo Mhalai, &c.

[TD 108]

Ruith air beart mi-ghnathaicht,
Mo nighean, &c.
Tha mo dhochas anns an ard Rìgh,
'N Rìgh a thighin thair sail oirnn,
'S gu 'n reitich sibh WHITE HALL da,
Mo Mhalai bheag o.

ORAN do SHIR EACHUNN, MAC ILLEAIN DHUBHAIRT, 'nuair a chualas gu 'n robh
e ri fuireach anns an Fhraing.

Le Iain Mac Ailein 'Ic Iain 'Ic Ailein 'Ic Illeain.

Fonn. Fhir a bhata na ho ro éile, &c.

SEISD.
FAILL ill ho ro, tha sinn fo mhulad,
Tha ar crìdh mur luaidh air truimead;
Fath ar call 's ar campair uile,
An stads' tha thall air ceann na 'm Muileach.

Tha mi 'm chadal 's gur tim dhomh dusgadh,
Mu Shir Eachunn na 'n lann 's na 'n luireach;
Gu bheil do chairdean fo mhoran curam,
Nach faic iad sabhailt air lar do dhuthch thu.
Faill ill ho ro, &c.

'S truagh na sgeoil so tha daoine 'g radhainn,
'Sa teachd a nall air pheann 's air phaipeir,
Gu 'n d' thainig finid air gnìomh ro airid,
Air cinneach rioghail, fìor ghlic statail.
Faill ill ho ro, &c.

[TD 109]

Chlann Ghilleoin gu 'n robh sibh ainmeil,
Fìne rioghail na 'm piosan airgid,
A liuthad du-ghall nach b' fhiu a sheanchas,
Chuaidh gu h-uir le luths 'ur geala-ghlac,
Faill ill ho ro, &c.

Craobh ar sinnsreachd 's cha chrìn o 'n d' thainig,
Bha fhios an sgeil sin aig geur luchd seanchais,
Gu 'm bu shliochd Rìgh sibh o chrìch na Spainnte,
'S do shliochd Gaitheulus fhuair geill 'sa 'n Eiphit.
Faill ill ho ro, &c.

Ghin dibh uaislean fo chruadal einmein,
B' ann diu Mac Milidh na 'n gnìomh ro chalma;
Chog iad Eirinn le 'n treun lamhan,
'S do bhuin iad puic do thriuir Mhic Eirmein.

Faill ill ho ro, &c.

Cha n' iongnadh baothachd no draoidheachd sheana-chleas,
Ga 'n cuir air chul, cha b' fhiu leo 'n dealbh sin;
Ach cogadh dian gun sith gun tearmud,
Gu onair gnìomh neo dith an anma.
Faill ill ho ro, &c.

Air sliochd Eiribhin euchdaich ainmeil,
Bha 'ur 'n uaislean fein, fir threuna chalma,
B' ionunn duibh 's do 'n linn tha 'n seanachas,
'S lean ruibh da 'n dualchas bhi cruaidh air armachd.
Faill ill ho ro, &c.

Air teachd na dheigh dhuibh niar do dh' Alba,
Bu mhor 'ur foirneart le doidibh garbha,
Gus 'n d' thug Mac Dhonuill duibh coir bu daingne,
Air Rìoghachd na Dreolluinn, 's mor ni dh' anabharr.
Faill ill ho ro, &c.

[TD 110]

Bu Sheanalair buadhach, uasal, ainmeil,
Eachunn ruaineach, ruagh na 'n garbh chath,
Air son a ghluasaid bha fuath na 'n Gall ris,
'S gu 'n d' thug e àr orra 'm blar chath Gairbheach.
Faill ill ho ro, &c.

Aig Iarla Mar bha freimh an 'sgeoil sin,
Am mac a dh' fhag e, bha ghnas mur leoghunn;
Thug e comhail dàsan air lar Strathlòchai,
'S e nis 'sa Ghreige gun eideadh comhruig.
Faill ill ho ro, &c.

Lean ruibh beus 's gur h-e chuir sios duibh,
'Ur faigsein cruin 's gach cuis g'ar diobradh,
Thuit Eachunn ruagh an Ionmhur-Cheitein;
Le sheachd ciad deug d'a threin fhuil dhirich,
Faill ill ho ro, &c.

Ge bu chraiteach le cach na sgeoil sin,
Cha n' e an drasd is àobhar bhròin duinn;
Ach an ti so dh' fhag sinn 'sa chuaidh air fògradh,
As leith Rìgh Sheimis a threig an Dreolluinn.
Faill ill ho ro, &c.

Rug froiseadh garbh le gailbhinn shìon oirnn,
Aig meud a chall duinn cha b' arbhar sil e;
Ach cruineachd gun fhotus, por sgiamhach,
Ar cuirm, ar sogh, ar ceol 's ar fion e.
Faill ill ho ro, &c.

'S tric do threud fo thearmunn mìghleidht,
Gun neach fo 'n ghrein mur sgeith g'ar dìonadh,
Ach mur ealta 'n t-sleibhe fo mhein an fhìreoin,
'S nach d' fhuirich té dhiu air ceud fear spionaidh.
Faill ill ho ro, &c.

[TD 111]

'S truagh a ta ar cas ri innse,
Mur bhall arcain air traigh ga shior-ruith,
Gun neach thoirt baigh dha, 'n aird no 'n iosal,
Ach buille barach o laimh gach aon fhir.
Faill ill ho ro, &c.

A Righ na 'n dul, tha gun tùs gun fhinid,
A ni reir t-ailleas neach ard a's iosal,
'S clann neo umhal sinn o thus ar linne,
Na leag do lamh oirnn le strachd na 's diana.
Faill ill ho ro, &c.

Mur choill ged tha sinn, 'sa barr air crionadh,
Gun mheas gun bhath oirnn, ach tair a's diobradh,
Thoir caochla' beus duinn fo sheul do shiochai',
'S na sgath dhiot fein sinn mur gheugan criona.
Faill ill ho ro, &c.

Le tuigse maithreil da 'n gnath bhi fìorlag,
Cha duth do Ghall ard bheann a dhireadh;
'S ma 's i so fein ar teirme finid,
Gur truagh an sgeul e do fhreimh ar linne;
Faill ill ho ro, &c.

IORRAM le EACHUNN BACHDACH.

BIODH an uigheam so triall,
Gu ceann uighe na 'n cliar,
Far 'm bu shubhach 's bu mhiaghail seoid.
Biodh an uigheam, &c.

[TD 112]

Gu tur meadhrach nach crion,
Na 'n cinn fheadhna 's glan fiamh,
Cuir ghreadhnach o 'n rioghail stoirm.
Gu tur, &c.

Gu Aros mo ruin,
'N cluinnte clarsaichean ciuil,
Iomairt thaileasg air chruintean oir.
Gu Aros, &c.

Bhiodh mnai aillidh 'n fhuilt reidh,
Gabhail dhana' le téud,
Sior chur seachad na seisdeachd leo.
Bhiodh mnai, &c.

Bheir mi 'n ruathar so null,
Shealltainn oighre Dhuntuilm,
Gu meal thu 'n staoile o thùs ri d' bheo.
Bheir mi, &c.

Iuchair gliocais nach bath,
Chuireadh adharc thair chach,
'S tu mo raoghainns do 'n als' tha beo.
Iuchair, &c.

Mach o Mhoir-fhear na 'n steud,

Leise 'n cluinnte orgainn na 'n teud,
'S tu b' fhoirmeile beus tra nòin.
Mach o, &c.

'S leat Sir Donull o 'n chaol,
'S Clann Donuill na laoich,
Sud a bhuidheann nach maom 'sa n toir.
'S leat Sir, &c.

[TD 113]

'S thig Aonghus ardanach treun,
O Ghleanngaraidh na 'n geug,
'S na fir ghasda nach geill fo sgod.
'S thig Aonghus, &c.

Thig Clainn Chamashroin a nall,
Ort o bhraighe na 'n gleann,
'S iad cur fhiudhaidh le deann am feoil.
Thig Clainn, &c.

'S leat Mac 'Ic Ailein o 'n chuan,
Le a loingeas daraich lom luath,
Luchd na 'n leadan o 'm buailte stroichd.
'S leat Mac, &c.

'S leat fir Eirinn a ris,
Chuir thu fhein air do thith,
'S iad gu 'n eireadh le strith mu d' dhorn.
'S leat fir Eirinn, &c.

Gur leat urram gach seilg,
Le d' cheol drumma ga sheinn,
Roimh d' gheard Muileach nach meirbh sa 'n toir.
Gur leat, &c.

Macant', maighdeannail, ur,
Faicheil, faidhreachail, ciuin,
Marcaich greadhnach na 'n cruiddh-each gorm.
Macant', &c.

Bhiodh eich sheanga na 'n leum,
'S iad na 'n deanna' cur reis,
'S fir a sreamadh an sreinn mu 'm beoil.
Bhiodh eich, &c.

[TD 114]

Chuir mi ceannard an t-sluaigh,
Le dha leanabh 'sa 'n uaigh,
Fath mo theannaidh 's mi fuasgladh dheoir,
Chuir mi ceannard, &c.

Fuireach Raoghuill a ris,
Chuis is miste mi 'm dhith,
Chuir sud m' aigne sios tra noin.
Fuireach, &c.

ORAN do SHIR IAIN MAC'ILLEAIN DHUBHAIRT, 'nuair a chualas e bhi 'n Sasunn. Le Iain Mac Ailein.

SEISD.

Ho na 'n tigeadh, na 'n tigeadh do sgeul,
'S gu 'm faodainn bhi cinnteach as na dh innseadh dhomh 'n dé,
Gu'n tilginn as m' fhochar an cochull gun fheum,
'S gu 'm faicte mi fhathasd air atharach gleus.

Na 'n tigeadh Sir Jain, mo chridhe 's mo chleibh,
'S ann b' eibhinn bhiodh m' aigne, mur bhradan a leum,
Thogadh cridhe do mhuinntir, tha 'n cuntart dol eug,
'S gu'n tigeadh do m'ionnsaidhs, mo shugradh beag fein.
Ho na 'n tigeadh, &c.

Tha do chinne 's do dhualchas, 'n robh cruadal le chéil,'

[TD 115]

Bu mhath an Raon Ruairidh, mu d' ghuaillibh' sa 'n fheum,
Iad a nis na 'm fath truaighe, mur chuagair gun fheum;
Ged gheibh iad am bualadh, cha ghluais iad am beul.
Ho na 'n tigeadh, &c.

Ged tha sinn fo dhochair, Mur mholta mu chrò,
Aig gach aon neach fo bhaoaghal, toirt duinn aobhar ar leoin,
Tha luchd spùillidh cur an drasd oirnn, mur thraill no Spain-bhrog,
Cha 'n aithnear 'n teas la sinn, aig airdead ar croc.
Ho na 'n tigeadh, &c.

'N ealta ro ghleusta, 'n robh eufachd gu leoir,
Bhuidhneadh geall air gach tulaich, far an cruinnicheadh eoin,
Thug an ite chùrr sgeuraidh, le 'n trein as an t-sròin,
'S nach fearr iad air coinne, na cromana lòin.
Ho na 'n tigeadh, &c.

Na 'm pilleadh a chuibhle, far iomrull a seoil,
'S gu 'n tionndadh i deiseal 'n taobh deas mur bu choir,
'S ioma neach tha ga mhùchadh, sa cheann lubte na sgroib,
Chuireadh bailc air a chasan, ann an taiseachadh shròn.
Ho na 'n tigeadh, &c.

Na 'm biodh e dhomh fagas, no goirid o laimh,
Sir Iain na 'n caisteal, agus bachdach a bhlaire,
'N neach da 'n d' fhuiling mi faobhach, mur chaoire mhaoil bhain,
Thionndainn air mur an leoghunn, agus m' ordag f'a shail.
Ho na 'n tigeadh, &c.

[TD 116]

'S leoir truimead 'ur cadail, ma thachair sibh slan,
Mu 'n suidhich sibh cairtean, a ghlacas duibh cach,
Tha sinn fo léir-sgrios, le féileadh a chlaire,
Mur faic thu fo dhion sinn, gur tinn sinn fo ghad.
Ho na 'n tigeadh, &c.

Tha sinn tamull an iarguin, le fiabhras ro rard,
'S faide la leinn g' ar pianadh, na bliadhna 's sinn slan,
Ann am brудар an fhaochaidh, tha daoine ag radh,
Gur tearc leigh ni aithn' air, seach teannadh a bhais.

Ho na 'n tigeadh, &c.

'S mor am farmud a th' agams, ri t-ad a's ri d' chleoc,
'S iad air grianan na maise, ri glacadh an soigh,
Na 'm b' e m' fhortansa tuiteam, 'n roic bucla' do bhrog,
'S e b' fhearr mur shogh inntinn, na bhi 'n crìochan Rìgh mor.
Ho na 'n tigeadh, &c.

Tha mi guidhe le m' rùn, 's le m' dhùrachd do ghnath,
Air 'n Ti chruthaich o thùs thu 'sa thug dhuinn thu mur bhlath,
Tha m' earbsa 's mo dhochas, na throcair ro ard,
Nach d' fhuair sinn uaith leasan, thun ar teagaisg a b' fhearr.
Ho na 'n tigeadh, &c.

[TD 117]

ORAN air blar na h-Eaglaise-brice, am bliadhna 1745.

Le Donnacha Bàn Mac an t-Saoir.

Fonn.-Alasdair dubh Ghlinne Garaidh.

GED a tha mi 'n so am chruban,
Ann an seann-tigh udlaidh uaigneach;
Bha mi roimhe marr-ri cuideachd,
Ged a thuit doibh ma chuir uapa,
'S tric mi 'g amharc ris an aonach,
'M faic mi t-aogas Iain 'Ic Ruairidh;
'S na 'm faicinn t-aogas a tighin,
Dh' eireadh mo chridhe o smuairein.

Dh' eireadh m' inntinnse o smalan,
'Mi bhi marr-riut Iain 'Ic Ruairidh,
Dh' innsinn duit na bhiodh air m' aire,
'S bhithinn farraid na bhiodh uam dheth;
'N la sin thug iad na buillean,
'S mise chunnaic bhi ga 'm bualadh;
Chaidh 'n teiche air taobh Rìgh Deorsa,
'S ann oirne thainig sgeul an fhuathais.

B' e sgeul an fhuathais ri innse,
Gu 'n do theich an Rìgh 'sa mhuinntir;
Ghabh iad eagal roimh na buillean,
'Nuair a chunnaic iad am Prionnsa,
Cha d' fhan duine dhiu ri cheile,
Eidear Duneidionn a's Sruidhleadh:

[TD 118]

'S ioma baile 'sa 'n robh pairt diu,
Gabhail tamh air thigh'n na h-oidhche.

Bha sinne gu misneachail dàna,
Dol naird a dh' ionnsaidh an t-sleibhe,
'S mu 'n deachaidh sinn ceart an ordugh,
Thainig iad oirne na réubail;
Cha b' fhad a mheal sinn an àrach,
'Nuair a sganr' sinn as a cheile;
'S ann an sin a bha 'n droch càradh,
Air na bha luchd aodaich dheirg ann.

Rinn e cuideacha' d' ar naimhdean,
Gu 'n robh dìth comann da oirne,
Cha d' fhuair sinn ordugh gu lamhach,
'N am do chach bhi tigh'n n' ar comhail;
'S ann a theichimid n' ar deannadh,
'S cha 'n fhanadh-mid ri bhi comhla;
Cha 'n fhacas roimhe a leithid,
O 'n thugadh la Ionmhur Lochai.

Bha mise 's Calum Mac Pharuig,
Siubhal càthair agus mointich;
'S mur a teichimid 'sa 'n am ud,
'S cinnt gu 'm biodh an calltach oirne;
Ghabh na bh' againn do luchd beurla,
An raitreuta roimh Chlann Donuill;
B' e sud a ghiorraicheadh an saoghal,
Bhi dol air aodann na 'm fear mora.

B' e sud a ghiorraicheadh an saoghal,
Bhi dol air aodann na 'm fear mora;
Thainig a chonnsachadh na Rioghachd,
As leith an Rìgh a's na corach,
'S ioma laoch gun atha laimhe,

[TD 119]

Eidear Ceanntaile 's Strathlochai,
Chuireadh an guailibh ri cheile,
'S bu mhor am feum anns a chomhrùig.

Bu mhor am feum ann 'sa chomhrùig,
Na fir mhora bha neo sgathach;
Eidear Chamshronaich 's Chlann Donuill,
'S na bha chomlain ann am pairt riu;
'S na 'm faigheadh iad cothrom na Feinne,
Eidear iad fein a's an naimhdean,
Dh' aindeoin na bh' ann 'sa 'n Roinn Eorpa,
Chuireadh iad Rìgh Deors as àite.

Chuireadh iad Rìgh Deors as àite,
Na bha Ghaidheil ann an Albuinn;
Na 'm biodh iad uile mur bha iad,
Bhliadhna thainig an armailt;
Na 'm biodh iad uile ri cheile,
Gu 'm b' iad fhein na trein fhir chalma;
Gu 'm b' iad fhein na trein fhir mhòra,
Bha chomhnaidh measg na 'n Garbh-chrìoch.

'N la sin thug iad Cuileodair,
Cha robh fhòrtan sud ach searbh dhuinn;
Choisinn Diuc Uilleam 'sa n droch-uair,
'S gur mor an rosad e d' ar cairdean;
Choisinn Diuc Uilleam 'sa 'n droch-uair,
'S gur mor an rosad e do dh' Alba;
'S cha bhi oirnn ach ad a's casag,
'N aite na 'm breacana dearga.

Cha bhi oirnn ach ad a's casag,
'N aite na 'm breacana ura;

Stocain agus brigis ghlasa,
'S iad g' ar glasadh mu na glùinean;

[TD 120]

'Nuair a chailleas sinn ar 'n airm 's ar n' aodach,
Cia mur dh' fhaodas sinn bhi sunndach?
Le ar casagan leobhar liath-ghlas,
Nach robh roimhe riamh n' ar duthaich.

Cha robh roimhe riamh n' ar duthaich,
Ach aodaichean ùra riomhach;
'Sa choidhch cha b' eiginn duinn am muthadh,
Gus 'n do chaill sinn cliùth na Rioghachd,
Chaill sinn ris ar cuid do 'n t-saoghal,
Chaill sinn ar daoine 's ar nith ris;
Chaill sinn ar n' aidhear 's ar n' eibhneas,
'S goirt an sgeul duinn bhi ga innse.

'S goirt an sgeula bhi ga innse,
Na chaidhe dhith oirnn do na daoine;
Na thuit diu latha Chuileodair,
'Sa fhuair an dochunn ann 'sa chaonnaig;
Thainig an trup orr' o 'n cula,
Triuir mu 'n aon duin air an aodann;
'S na m faigheadh iad cothrom cuise,
Rinn iad diubhail mu 'n do sgaoil iad.

Cha robh meas do chlanna Ghaidheal,
O 'n dh' fhalbh Tearlach uainn air fogradh;
Dh' fhag e sinn mur uain gun mhathair,
Gun aobhar ghaire guu sòlas;
Sinn a geilleadh do Shasunn,
'Sa 'g eiridh am feachd Rìgh Deorsa;
Gur h-ann d' ar n' iartas a's d' ar n' athchuing,
E dhol dachaidh do Hanobhar.

Bidh sinne fhathasd ann an dochas,
Gu 'n tig Tearlach og do 'n Rioghachd;
'S na 'n tigeadh e oirne chlisgeadh,

[TD 121]

Dh' eireadh ar misneach 's ar n' inntinn;
Dh' eireadh leat a h-uile duine,
'S bhiodh mid uile dhuit cho dileas;
An aobhar blair na 'n lathair cumasg,
Cha bhiodh cuntart oirnn gu 'n diobradh.

Choidhch cha diobradh mid gu brath thu,
'S i n' athchuingidh a b' fhearr leinn fhaotainn;
Gu n' tigeadh iad oirne na Frangaich,
'S Tearlach bhi air ceann na 'n daoine;
Dh' eireadh Camshronaich o Lochai,
Donullaich a's Clann an t-Saoir leat;
'S cha robh a leithid anns na crìochan,
O 'n a chrìochnaich Clanna-Baoisgne.

Dh' eireadh leat Clann-an-Aba
Gu laidir, neartor, feachdail, rioghail,

Gu targaideach, armailteach, tartrach,
Luchd na 'n bratach 's na 'n cuillibhair,
Ri am rusgadh na 'n lann glasa,
Na 'm faobhar sgaiteach 's na 'm picean;
Builleach, guineach, beumnach, buidhneach,
Bu laidir cliuiteach 'sa 'n dol sìos iad.

Griogaraich gun fhailing cruadail,
Bha iad riamh gu h-uasal rioghail;
'N am cogaidh, troid, no tuasaid,
C' ait an cualas bonn d'a 'm mì-chliuth;
Dhol an aghaidh teine 's luaidhe,
'N am na ruaig cha b' iad a strìochdadh?
'S fhad 'sa leanas sibh r' ar dualchas,
Cha toir iad buaidh oirbh luchd ar mìoruin.

Eiridh gach fine o thuath leat,
Eidear uaislean agus islean;

[TD 122]

Le toil an cridhe 'sa 'n durachd,
O 'n a chuir thu uigh 'sa 'n fhirinn;
Bidh sinn uile 'sa 'n aon run duit,
O 'n is ionunn cuis mu 'm bi sinn;
Ann a t-aobhar Thearlaich Stiubhairt,
O 'n 's e do chrùn bheir dhuinn toilinntinn.

Cumha do fhear CHILLE MOIRE; le Alasdair Mac Calum bh' ann an Laudail 'sa Mhorairne.

DH' fhalbh mi 'n dé gu sunndach, sunndach,
Ghabhail cunntas Chille Moire;
'S cha do chuimhnich mi air bas,
An fhir gun sgath a chite soilleir:
'Nuair a rainig mi an larach,
Sa 'n t-aite b' abhaist duinn coinneadh;
Cha deachaidh mi steach do d' sheomar,
Cha d' leig m' fheoil dhomh dhol ad sheallamh.

Chunnaic mi gur bron bu cheol doibh,
Ghabh mi seol a's rinn mi pilleadh;
'S thug mi 'n sgrìob ud do 'n tigh osda,
Ghabhail oran do na gillean;
Gar a bheil mi pailt do stòras,
'S cridheil dh' olainn cupall ghinidh,
Air chumhnanta 's gu 'm faicinn beo thu,
Seach am bron tha air do chinne.

Fear mor rioghail, 's e do 'n fhìor-fhuil,
'S mor d' ar dìth thu 'n am bhì togail,

[TD 123]

Am feachd do dhuthcha dh aithnìcht air thus thu,
'Sa choisneadh cliuth aig na fhuair thu sheallamh;
'S math thigeadh cota 's dag air oradh,
'S breacan boidheach an cuaich loinneil;
Cha do chuir e uigh am botainn,

Fear garbh comhnard 's e gun choir' air.

'S mor an iondrain as a dhuthaich,
Am fear mor chiuiteach dh' fhas gu maiseach;
Dhearbh thu chuis ud 's cha bu chubair,
Bheireadh cuis diot ri am glacaidh;
Bha thu siobhalta ri maighdinn,
'S bha thu 'd shaighdeir ri uchd gaisgidh;
'S cha bu chearbach thu fo t-armachd,
'N am bhi bhi seanchas ri luchd chasag.

Nis o 'n thainig feachd na truaighe,
'S olc a bhuidh tha air ar cinneach;
'S tric an sgrìob so a bheul uaighe,
Air ar 'n uaislean, tha iad diomain;
Bu cheannard tuath thu, 's dhaoine truagha,
Cho math 'sa bha 'n taobh tuath do 'n lingidh;
An Ti thug uainn thu, cha bu chruaidh air,
Oighre buan a chuir a t-ionad.

Mo thruaighe do mhathair 's fad a laithean,
Guidhe a bhais a thigh'n da sireadh,
Chaill i a sugradh 'sa ceol gaire,
Gu la bhrath cha dean e pilleadh;
Cuis a chraidh i, laogh a h-ara,
Bhi ga charadh aig na gillean;
'N ciste dhionaich, fo bhrat sìoda,
Beul na firinn fear gun choire.

Mur biodh tu baidheil, iochdar, cairdeil,
Theireadh cach gu 'n robh sud coireach;

[TD 124]

'Sa 'n fhuil uasal as 'n do ghluais thu,
'S ga 'm bu dualchas a bhi soilleir;
'S mo is luath leam, dh' fhalaich uaigh thu,
Fhir bha suairce ri daoine eile;
Do cheile bhroin na banntaich oig,
'S i cumail seol air do chuid cloinne.

B' fhiach dh' i fhein sud, b' ur a ceile,
Ceann na ceille 'sa 'n robh 'n gliocas;
Bu ghuala threun thu ri am feuma,
'S goirt an t-eug thug uainn a nis thu;
O 'n dh' fhalbh bata, leat thair saile,
Tha i craiteach 's bidh i 'm feasd ann;
Ga d' chuir air tir an Leitir Shiuna,
Far 'n robh do dhuthchas 's b' ur na fleasgaich.

Na fir ura bha neo sgathach,
B' e 'ur n' abhaist 'n am an fheasgair;
Gillean lamh ruibh, aobhar ghaire,
Greis air thaileasg ga chur seachad:
Sior ol fiona as na piosan,
Aig fir ur na 'm piob 's na 'm bratach;
Do 'n fhuil uasail, sioghail, rhuairce,
D'a 'm bu dual bhi ann 'sa 'n Apuinn.

An saoghal breugach, cha n' eil feum ann,

'S mairg nach leughadh e le gliocas,
Ma bhios sibh steidheil, na tugabh geill da
Leigibh leic ann 's na biodh meas deth;
Nith no feudail na gabhadh speis deth,
'Ur coinneas fein na biodh g' ar 'n ithe;
Gluaiseadh mid o cheim gu ceim,
'S ni e feum ged threig e nis sinn.

[TD 125]

Cumha do IAIN MAC DHONUILL fear Dhruim-na 'n Torran an Suaineart. Le
Alasdair Mac Calum ceudna.

Fonn-Murt Ghlinne Comhunn.

THUG Clan Donuill an latha,
Gar am b' ann leis a chlaidhe a truaill;
Ach le ordugh o 'n Chathair,
Tigh'n gach oidhche 's gach lath' oirnn a nuas;
Gur a truagh leam 'ur 'n athair,
'S e gun sugradh gun aidhear gun snuagh;
Tha 'n aois air a luidhe,
'S e g' ur caradh le a lamhan 'sa 'n uaigh.

Bu bhoidheach do ghillean,
Fir oga bha inealta luath,
Chaidh pairt diu thair linge,
Dheanadh feum na n tilleadh iad buan;
Tha ar saoghalne diomain
'S cha 'n fhaodar ar tilleadh o 'n uair,
'Nuair a ghlaodhar as sinne,
Chi sinn saoghal na 'n spiorad tha buan.

'N t-aon fhear dhiu rinn posadh,
Gu 'n deanadh e Coirneal air sluagh,
Ga 'n robh nadur an Tighearn,
Anns gach ait ann an suidhe e suas;
Gu 'm b' e cridhe na feil e,
'S e a luidhe 'sa 'g eiridh a suain,
'S beag an t-iongnadh do cheile,
Bean na h-aonar air feill a bhi truagh.

[TD 126]

'S i do phiuthar ur aluinn,
Rinn cinntinn an garadh na 'm buadh,
'S i ur mathair bha àghar,
'Nuair a rinn i ur fagail cho luath,
Mu 'm fac i ach pairt dibh,
G' ur ruitheadh 's g' ur càradh 'sa 'n uaigh,
Sibh an diugh air gach laimh dh' i,
Ann an Rioghachd na 'n gras a cur suas.

'S gar an d' fhuasgail thu fearunn,
Gu 'n robh firinn gun mhearachd fo d' chleoc,
Fhir a dh' ionnsaich an ceanal,
Mu 'n d' fhag thu bhi 'd leanabh ro og;
Bu mhath do chuid ghearran,
'S do chapuill le 'n searraich air lon,
'S dh' fhag thu tigh an deagh uigheam,

'S tha gach duine ro bhuidheach ad sheol.

Mu 'n taca so n uiridh,
'S mi dh' fhalbhadh air thuras gun sgath,
'S tu gu 'n d' thugadh dhomh cuireadh,
Ged a chumadh tu fuireach air cach,
Dhol a sheomar na 'n uinneag,
A rinneadh a chuma' dh' Iain bàn;
A Rìgh! gur mis tha fo mhulad,
Nach d' fhaodar do chumail o 'n bhas.

'S math dh' aithnich thu 'n saoghal,
Cha d' rinn thu riamh caonnag mu 'n ol,
'S cha mho rinn thu riamh éucoir,
Air neach fo 'n ghrein a ta beo,
'S ann a bhiodh tu ga 'n réiteach,
Anns gach ait anns an éisdeadh do ghloir,
'Sa nuair thigeadh diol déirce,
Bhiodh do sporan gun éur ann ad dhorn.

[TD 127]

Leam bu duilich a Bheatai,
Gu 'n d' thainig a chreach ort cho og,
Nighin Aonghuis o 'n Achai'*,
O Ghleann uaine na 'm mart 'sa 'm bi ceo,
Tha thu caoineadh 'sa 'g acain,
Do cheile math leapa nach beò,
'S e an ciste choail chumhainn,
Air a charadh fo dhubhar na 'm bord.

'S iad Clann Donuill na 'n geur lann,
Rinn amus ri ceile gle og,
'Nuair a phos iad ri cheil sibh,
Sibh a luidhe 'sa 'g eiridh 'sa choir;
Cum cuimhn' air do gheallamh,
Thug thu uait e le barantas mor,
Gabh curam d'a leanabh,
'S cha bhi thu gun earras ri d' bheo.

Ged a ni mi mo dhichioll,
Air innse na firinn tha buan,
Tha 'n aois ga m' shior dhiteadh,
Dh' fhag i mise gu diblidh bochd truagh;
'S mi an t-Oisein mur chi sibh,
Ag osnaich 'sa caoidh na dh' fhalbh uainn,
Tho mo chridh air 'ur deaghaidh,
Mur gu 'm buaileadh an gobhainn a chruaidh.

Le cridheachan laga,
Bidh ar suilean a leagadh na 'n deoir,
Ged a theid sinn d' ar leabaidh,
Cha 'n fhaigh sinn an cadal ach fòill;
Tha ar 'n inntinn cho luaimhneach,
Ri gaoth deas, na gaoth tuath, na ri ceo,
Sior chaoidh na dh' fhalbh uainne,
'M fear a dh' fhanas 'se dhuais bhi ri bròn.

* Achaitriochadan.

[TD 128]

Cumha do SHIR TORMAID MAC LEOID; Le Mairi Nighean Alasdair Ruaigh Mhic Leod.

Mo chradh-ghal bochd,
Mur a tha mi nochd,
'S mi gun tamh, gun fhois, gun sùnd.
Ma tha ghal, &c.

Gun surd ri stath,
Gun duil ri bhi slan,
Chaidh mo shugradh gu brath air chùl.
Gun surd, &c.

Chaill mo shusbaint a cail,
Fàth mo thursaidh gach la,
'S mi sior uirsgeul air gnaths mo rùin.
Chaill mo, &c.

Mu dheagh Mhac Ruairidh na 'n long,
Lamh liobhraigeadh bhonn,
'S bha measail air fonn luchd ciùil.
Mu dheagh, &c.

'S e bhi smuainteachadh ort,
A chràidh mi m chorp,
'Sa chnamh na roisg fo m' shùil.
'S e bhi, &c.

Mi ri smuaintean bochd truagh,
'S ri iomradh baoth buan,
'S mi ga t-iondrainse uam 's tu b' fhiu.
Mi ri, &c.

[TD 129]

'G iondrain Leodach mo ghaoil,
Bhi 'sa 'n t-srol anard chaol,
Gun chomhdach ri thaobh ach bùird.
'G iondrain, &c.

O 'n la ghlasadh da bheul,
Gu 'n deach' airc air luchd théud,
'Nuair sgapadh tu fhein na crùin.
O 'n la, &c.

Thog na filidh ort sgeul,
Fhad 'sa dh' imich an ceim,
Nach fhac iad na b' fhéile gnùis.
Thog na, &c.

Gu 'n robh mais ann a t-fhiamh,
'Sin a's tlachd ort measg chiad,
Rud nach cuala' mi riamh air triùir.
Gu n robh, &c.

Tha Mac Leoids' air ar ceann,
'S e fo thursadh nach gann,

'S beag an t-iongnadh 's e chaill a sdiùir.
Tha Mac Leoids', &c.

Chaill e maothar a threud,
'Sa 'n robh fradharc na 'n ceud,
A's tagha do dheagh chairt iùil.
Chaill e, &c.

Deagh shealgair am fridh,
Bha gun cheilg do thigh Rìgh,
Agus seirbheiseach dileas crùin.
Deagh shealgair, &c.

[TD 130]

Tha do chinne fo ghruaim,
'S gach aon fhine mu 'n cuairt,
O 'n làtha ghrinnicheadh t-uaigh sa chrùist.
Tha do, &c.

Mu 'n t-sar ghaisgeach dheas threun,
Ann am batal na 'n ceud,
Cha bu lapach 'sa 'n leum ud thu.
Mu 'n t-sar, &c.

Lamh churanta chruaidh,
Ann an iomairt 's gach buaidh,
Cha 'n urrainn domh t-uaisl'a ruin.
Lamh, &c.

Do thigh talla fo ghruaim,
'S e gun aidhear gun uail,
Far 'm bu mhinig an d' fhuair sinn cuirm.
Do thigh talla, &c.

Marbhrann do SHIR SEUMUS MAC DHONUILL; Le Gilleasbuig a bhrathair.

B' FHEARR am mor olc a chluinntinn,
Bhrìgh iomra' na fhaicinn;
Dhomhsa b' fhurasd' sud innse,
Rug air 'm inntinn trom sachd dheth;
O 'n is mi bha 'sa 'n fhulang,
Bu chruaidh duilich ri fhaicinn;

[TD 131]

Rainig croma-sgìan o 'n aog orm,
Cha do shaor i bun aisne.

'S e dh' fhag fodha dhomh 'n coite,
Aon a mhoichead a dhuisg mi,
'S mi gun fhear air barr agam,
Thogadh 'm aigne a dùsal;
'Nuair a bheum an sruth traigh orm,
Rug muir baitht' air a chul sin,
Cha d' fhiosraich mi 'm bas duit,
Gus an d' fhag mi thu 'n crùiste.

Fath m' acuin 's mo thùrsa,

Nach duisgear le teud thu,
Na le torgan na file,
Mo dhiobhail 's mo leir-chreach;
Fhir a chumadh i dìonach,
Dh' aindeoin siontain ga geiread,
Thu 'n diugh fo leacan na h-ùrach,
Gun mo dhuil ri thu dh' eiridh.

'S bochd an ealtainns' thug sgrìob orm,
Thug i dhìom m' earr a's m' fhéusag,
'S geur 's gur goirt spuir an ràsair,
Thrusas cnamhan a's féithean;
Dh' fhag sud mise dheth craiteach,
Dh' aindeoin dàil gu ro chreuchdach;
Cha dean ballan no sabh dheth,
Mise slan gu la m' euga.

Ge b' e chuireadh dhomh 'n umhail,
Do mhor chumha ga m' leonadh,
Na mo dhosan a liathadh,
Coig bliadhna roimh' 'n ordugh;
Tha mi 'n diugh a toirt paigheadh

[TD 132]

Ann meud m' àilleas as m' oige,
O 'n rug deireadh do bhais orm,
Os cionn chaich cha b'e m' ordugh.

'S fhad tha mi 'm Oisein gun mheadhail,
As do dheaghaidh bochd dòlum,
Osnachail farbairneach, frithir,
Tha m' fheith-chridh air a leonadh;
Leigean fios thun a bhreithe,
Nach iarr slighe gu dòibheart,
Gur h-e port Raoghuill uidhir,
Mur nach bu dligheach is ceol domh.

'S bochd mo nuaidheachd ra innse;
Ge b' e sgrìobhadh e 'n tàbhuinn;
O 'n la rinn thu feum duine,
Gus 'n do chuireadh 'sa 'n lar thu;
Bha mo dheas-lamh dol sìos leat,
An clachan crìche mo chradh-shlat;
'S mor na b' fheudar dhomh fhulang,
Mo bhuan fhuireach o m' brathair.

'S bochd an ruinnigil fhuathais,
Rug air uaislean do chairdean,
'S goirt a bhannag a fhuair iad,
'N latha ghluaiseadh gu tamh leat;
Ge b'e neach is mo buannachd,
'N lorg luaithre a bhais so,
'S mise pearsa 's mo tuairgne,
'Sa 'nuair so th' air màruinn.

Cha chuis fharmaid mo leithid,
'S ann tha mi 'n deaghaidh mo spùillidh;
Bhuin an t-eug dhìom gu buileach,
Barr a's iomull mo chùirte;

[TD 133]

'S feudar tamailte fhulang,
Gun dion buill' air mo chùla',
Stad mo chlaidhe na dhuille,
'S bath dhomh fuireach r'a rusgadh.

Bhuin an t-eug creach gun toir dhìom
Dh' aindeoin oigridh do dhùthcha;
Dh' fhag e m' aigne fo dhòruinn,
'S bhuaill e brog air mo chuinne;
'S trom a dh' fhuasgail e deoir dhomh,
Bu mhor mo choir air an dubladh;
Mu cheann uighe na 'n deoiribh,
Bhi fo bhord ann an dunadh.

Bu deas dile mo shior-ruith,
'S gu 'm bu dionach mo chlaraidh;
Bha mo chala gun diobradh,
Ga mo dhion as gach saradh;
Riamh gus 'n d' thainig an dìl orm,
Dh' fhag fo mhighean gu brath mi;
'S ard a dh' éirich an stailcs' orm,
Chuir i as domh mu m' airnean.

Call gun bhuinig gun bhuannachd,
Bha ga m' ruagadh' o 'n trath sin;
Cha b' i 'n iomairt gun fhuathas,
Leis 'n do ghluais mi mur chearrach;
'N cluich a shaoil mi bhi 'm buannachd,
Dh' fhaoite ghluasad air taileasg;
Thainig goin a's cur suas orm,
'S tha fear fuar orm a' t-aite.

O 'n chaidh maill' air mo fhradharc,
'S nach taoghail mi 'n ard bheann;
Chuir mi cul ris an fhiadhach,

[TD 134]

Pong cha n' iarr mi air clarsaich;
Mo cheol luidhe a's eiridh,
M' osnadh gheur air bheag tabhachd;
Fad mo re bidh mi 'g acain,
Mheud 'sa chleachd mi dheth t-ailleas.

Ach dleasaidh faighidinn furtachd,
Nach faic thu chuisle ga luaithead;
Air fear na teasaich 'sa 'n fhiabhruis,
'S gearr mu shioladh a bhruaidlein;
Muir a dh' eireas ga braisead,
Ni fear math beairte dh' i suanach;
Ach e dh' iomairt gu tapaidh,
Ceann da shlait thuig a's uaithe.

'Nuair a bha mi am ghille,
'S mi 'n ciad iomairt Shir Seumus,
Marr ri comhlan dheth m' chinne,
Seoladh air spinneig a dh' Eirinn;

'S ann aig I Chalum Chille,
Ghabh mi giorrag mu d' dheighinn;
Chaill thu lan mèise feodair,
Air do shroin do 'n fhuil ghlè dhearg.

Luchd a chaitheadh na 'n cuantaibh,
'S moch a ghluaiseadh gu surdail,
Le 'n alach chalpanna' cruaidhe,
Bu hheag roimh' 'n fhuaradh an curam;
Bu choma co do na h-uaislean,
Ghlacadh gluasad na sdiuradh;
'S fear math beart air a gualainn,
B' urrainn am fuasgladh gach cuise.

'N am gluasad o thir dhuinn,
Bu neo mhiodhar ar loistean,

[TD 135]

Cornach, cupanach, fionach,
Glaineachan lionta a stopaibh;
Gu cairteach, tailisgeach distneach,
'Stailc air uigh na 'm foirnibh;
Dhomhsa b' fhurasd' sud innse
Bu chuid do m' gnìomh o aois m' oig e.

Bu neo eimneach mo leabaidh,
'S bha mo chadal gle chomhnard,
Fhad 'sa dh' fhuirich thu agam,
An caoin chadal gun fhotus;
Bu tu mo sgiath laidir dhileas,
Ga mo dhion o gach dòruinn,
'S e cuid a dh' aohhar mo leith-trom,
Bhi 'n diugh a seasadh do chorach.

ORAN air latha Sliabh an t-Siorram.

Le Sileas Nighean Mhic Raognuill.

THA mulad, tha gruaim orm, tha bron,
O 'n dh' imich mo chairdean air falbh;
O 'n chaidh iad air asdar gun chinnt mu 'n teachd dhachaidh,
Tha m' inntinn fo airtneal na leoir.

Gus an cluinn mi nuaidheachd is binn,
Air gach duine a dh' imich o 'n tìr,
Gu 'm pilleadh sibh dhachaidh, le cruadal a's gaisgeadh,
'S gu n cruinte an Sasun leibh 'n Rìgh.

[TD 136]

Beir soraidh gu Donull o 'n Dun,
Gu h-Uilleam 's gu Seumus na 'n triuir,
'Nuair chruinnicheas uaislean,
Do d' chinneach mu n' cuairt duit,
Glac an t-urram a fhuair thu le cliuth.

Beir soraidh gu h-Alasdair liath,
As do chruadal gu 'n earbainn deagh ghnìomh,

'Nuair a theid thu gu buillean,
'S do naimhdean a dh' fhuireach,
Gu cinnteach bidh fuil air am bian.

Beir soraidh gu h-Ailein o 'n chuan,
Bha greis ann 'sa 'n Fhraing uainn air chuairt,
'S e ro mheud do ghaisgidh,
Chum gun oighr' air do phearsa,
Craobh chosgairt air feachd na 'n arm cruaidh.

Beir soraidh an déigh na 'n laoch,
Gus a bhuidheann ga 'n suaithcheantas fraoch,
Gu ceannard a Bhraghad,
'Sa chuid eile do 'm chairdean,
Buaidh shithne 's buaidh larach leibh a choidhch.

Tha uracha' buidheann tigh'n oirnn,
Mac Coinnich, Mac Shimidh, 's Mac Leoid,
Mac Ionmhuinn Strath-chuailte,
'Sa 'n Siosalach suairce,
'S e mo bharail gu 'm buailear leo stroichd.

Gigig thuirt au coileach* 's e 'n sàs,
Tha mo sgoileirean ullamh gu blar,
Am fuidse nach coisinn,

<eng>* The Cock of the North, the Duke of Gordon.<gai>

[TD 137]

Cuiribh a cheann ann 'sa phoca,
'S cha 'n fhiu dhuinn bhi 'g osnaich m'a bhas

Crath do chirein, do choileir, 's do chluas,
Cuir sgairt ort gu feachd an taobh an tuath,
Cuir spuir ort 's bi gleusda,
Gu d' naimhdean a reubadh,
'S cuir Mac Cailein fo gheill mur bu duall.

Thighearna Struthain o Ghiusaich na m' beann,
Thug thu tamull a feitheadh 'sa 'n Fhraing,
Tog do phiob a's do bhratach,
So 'n t-am dhuit bhi sgairteil,
'S cuir na Caimbeulaich dhachaidh na 'n deann.

A Righ! 's buidheach mi Mhoir-fhear sin Marr,
Leis a dh' eireadh a bhuidheann gun fheall,
A liuthad Foirbeiseach gasda,
Tha 'g iathadh m'a bhrataich,
B' fhiach do Sheumus an glacadh air laimh.

Tha mo ghruaim ris a bhuidheann ud thall,
A luaithead 'sa mhuth iad an t-sreang,
Tha mi cinnteach am aigne,
Gu 'm bu mhiann leo bhi againn,
Mur bhithe Chuigse bhi aca mur cheann.

Far an robh sibh ri peidseachas riamh,
'S cha b' ann 'g osnaich air mullach na 'n sliabh;

A liuthead cùbaid tha 'n drasda,
Fo churam na graisge,
Agus easbuig fo ailleas na 'm biasd.

A dhonnachai* ma dh' imich thu null,
Tha do chiabhan air glasadh fo chliuth;

<eng>* MacPhearson.<gai>

[TD 138]

Gu 'n cluinneam 's gu 'm faiceam,
Do philleadhsa dhachaidh,
'S do chinneach cha stad air do chul.

'Nuair a ruigeas sibh cuide-ri cach,
Cia mur chumas a chuigse ruibh blar?
C' aite bheil e fein aca?
An Albuinn na 'n Sasunn,
Nach gearradh sibh as mur an cal.

'Nuair a ruigeas sibh Lunnainn na 'n cleoc,
Sa bheir sibh an fhaistinneachd beo;
Bidh tomhas an t-sioda,
Le 'ur boghannan riomhach,
Air an drochaid as miltean f' ur sgod.

Am brúadar le IAIN DUBH MAC IAIN 'IC AILEIN mu chor na Rioghachd,
bhliadhna 1715.

SEISD.
Hei ho, tha mulad air m inntinn,
Cho trom ri cloich mhuilinn,
Air lunna' na sineadh,
O nach eil a h-uile-rud
Chunnaic mi sgrìbhte,
Cha bheo air a chruinne
Na 's urrainn da innse.
Hei ho,*

<eng>* Hei ho, is to be pronounced after the chorus as well as at the
beginning.<gai>

[TD 139]

Chunnaic mise 's mi 'm chadal,
Gne aisling do bhruadar,
Gu 'n do ghabh mi do dh' eagal,
Nach do theap mi tigh'n uaithe;
Thug mi seallamh 's na speuran,
'S ghlac maoin mi le fuathas,
Bha Mar ann 'sa 'n leum sin,
Na eideadh geal cruadhach.
Hei ho, &c.

'N toiseach a cho'strith,
Chaidh Beulona a ghluasad,

Gu 'n do nochd sinn ar bratach,
Gu caismeachd thoirt uainne;
Sluagh cois agus marcachd,
Dol seachad mu 'n cuairt duinn,
Run feirg air gach gaisgeach,
A lasadh gu cruadal.
Hei ro, &c.

Thug mi suil air 'an fhairge,
'S cha bu dearmadach fiamh dhomh,
'Nuair a chunnaic mi gharbh-luaidh,
Chaidh mo mheanmna an islead;
Thainig smuaintean am eanchuinn,
Na 'm bu sheanchas bha fìor e,
Gu 'm buailte an t-arm sin,
Ann an targnaich na Rìoghachd.
Hei ho, &c.

'Nuair a chruinnich iad uile,
Sluagh mara a's tire,
Bu lionar na 'm measgsan,
Amunisein 's probhisein,
Iad gu namhadach fuileach,

[TD 140]

Gu buntainn gach cìs diu;
O linn Fhinn cha do chruinnich,
An uiread do mhiltean.
Hei ho, &c.

Bu lionar na 'n campa,
Gu galltrom a's pìoba,
Fairgne na druma
Cuir an curaid am fiacha';
'Nuair fhuair gach comanndair,
Ordugh teann thun a ghnìomha,
O 'n theann iad ri màrsadh,
'S tùs blair e 's cha sith e.
Hei ho, &c.

Thuirt an guth rium am briathraibh,
Ged 's fiamhach na chi thu,
Cha dean iad bonn lochd ort,
Mur coisinn thu mìorun,
An neach tha thu 'g iarraidh,
Na fiaraich os 'n ìosal;
Gus am faic thu mhuc iasaid,
Ga stialladh aig miolchoin.
Hei ho, &c.

Chunnaic mise 's mi 'm chadal,
Gu leoir fada na tim sin,
Leigeadh leigheart mu 'r bailtean,
G' ar glacadh os 'n ìosal,
Lamhach a chanain,
Bristeadh bhallaibh m' ar fìaclan,
Gaoir phaistean a's mhnathan,
'Sa 'm fearaibh am prìosan.
Hei ho, &c.

[TD 141]

ORAN air latha RAON RUAIRIDH; Le Mac do dh' Iain Lom.

Fonn. Call huill i rin ó, call o chall hui ri ho hì, &c.
Tha lionn dubh mòr, call och i rin ó air mo chlaoidh.

'N RAON RUAIRIDH so bh'ann,
'S lionar ceann agus colunn ri lar,
Moran Ghaidheal a's Ghall,
Air chall 'sa 'n uileann ri blar,
'Nuair thainig a chlann
'N ar ceann an deireadh an là,
Cha bu tilleadh gun chall,
So shanntaich gillean mo ghraidh.

Bha 'n t-Alasdair ciar,
Gu dian le bhrataichean fein,
An am dol a sios,
Cha bu mhiann leis fuireach na 'n deigh;
Cha bu chlaoidhe no sgiath,
A bha mur dhion da fein,
Co chumadh ris strith?
'Sa 'n Rìgh mur spionnadh da sgeith.

Bha Donull na 'n Dun,
Gu dluth air uilinn a bhlaire,
Bha ghillean r'a chùl,
'S cha seachnadh iad cuis gun dail,
Fir ghasda mo ruin,
G' ar leanailt gu dluth m' ar sail,

[TD 142]

Fir ghasda mor ruin,
Ga 'n casgairt le luths na 'n lann.

Bha Leathanaich ann,
An dream bha fuileachdach riamh,
Leam is duilich an call,
Bha iad ann o cheann fhada na 'n cian,
Ged tha iad gun cheann,
Bidh e ann 'nuair is toileach le Dia;
'S thig Muile na dheann,
A nall o luchd na 'm beul fiar.

Chlann Raoghnuill Ghlinn-Ruaigh,
Gu 'n d' fhuair sibh leagadh gu leoir,
Na 'n eireadh sibh suas,
Le ar sluagh gun laigse gun leon;
Ged tha sibh fo ghruaim,
A's gearasdan fuar m' ar sroin,
Nuair thig Ailein o 'n chuan,
Bidh gach sguab d' ar fearunn f' ur sgòd.

Tha fear an Gleann Ruaigh*,
Nach d' fhuair a dh' fhearunn an coir,
Ach beagan do shluagh,
Theid suas le fead chinn a mheoir;

Thainig feachd o 'n taobh tuath,
Chuir gearasdan fuar mu 'n sroin;
Ach 's e fhuair iad mur dhuais,
Dol dachaidh 'sa 'n ruaig mu 'n tòin.

<eng>* MacDonell, Keppoch, a Chieftain, although a tenant to MacIntoch of Moyhall, keeping his rents unpaid with the strong hand, MacIntoch, with his men came to take MacDonell's means by force, but was beat back with great loss; see the following song on the battle of Mulroy, being the last of the conflicts between the clans.<gai>

[TD 143]

Thug thu latha 'sa mhaoil,
'Nuair bha thu gu h-aotrom og,
Le do bhrataichean fraoich,
'S bu lion'ar laoch ann ad lorg;
Tha mo ghuidhe air an Rìgh,
Gun an t-aog a thighin ad choir,
Gus am faigh thu a' dh aois,
A Cheapach bhi saor fo d' chòir.

ORAN air latha blair na Maoile-ruaighe, Eidear Clann-an Toisich na Maighe agus Clann Raoghnuaill na Ceapaich. Le Donnacha Duileach.

Fonn.—'Se latha Raon Ruairidh, &c.

Ho fairigean o ho,
Ho ro na co leatha,
Gur h-e Colla 'n ceann-feadhnaidh,
Gleachd mu 'n tom mu 'n robh athair,
'S ioma spealp do dhuin' uasal
Bha mu 'n cuairt duit an lath' ud,
B fhearr 'na clogaide cruadhach,
Mu d' ghuaillibh gu t-amhuich.

Chulas nuaidheachd o t-armailt,
Na 'm b' aill leibh a labhairt;
Gach 'neach ga bheil fuath dha,
Cuir na chluasan geur shaighead;
'S ioma cumha le storas

[TD 144]

Gheibheadh tu o Thoiseach na Maighe;
Ach mur bha 'n donus ad ghòirseid,
'S ann a chord e le claidhe.

Sud an cordugh gun ghliocas,
Rinn thu nis ann a t-an-toil,
Fhuair Colla fo chis thu,
Cho min ris an lamhuinn,
'S ioma cradh-leabaidh 's litir,
Chaidh dh' Ionmhur-nis fo d' chairdibh,
'S olc nach d' fhuair e disearsadh,
Bhliadhna phaigh e am mal duit.

Bha thusa Cholla ro thapaidh,

Mhic 'Lasbuig na mòr-chuis,
Leig thu thuc' na coin thapaidh,
Cha robh cadal air doigh ac';
Ged a b' iongnach na cait iad,
Cha robh chead ac do sgrobadh;
'Nuair a sgaoil thu do lionan,
Thug thu mhiaghail a 'n srònan.

'S ioma musgaid 's pic iùbhair,
Bha 'n cuideachd a mhi-raith,
Ga 'n tilgeadh cho fada
Ri cairteal a mhìle;
Cha do smuaintich sibh teicheadh,
O luchd na 'm feadana' cinnteach;
Ach am bathadh na 'm broilleach,
Sud an cothrom a mhill iad.

Cha b'e sgobadh an t-seangain,
Na mur gu 'm beanadh dhuit deargunn,
Ach na claidhnean tana,
Bh' aig na fearaibh mur armachd,

[TD 145]

Leigeadh an smior ris,
Far am beanadh gu 'n craoineadh,
Bhiodh eanchainn am mullaich,
Mu 'muineal ga 'n salachadh.

Dh' innsinn cuid d' ar beusan,
Bhi treun ann an torachd,
Bha bhuil air Clann Chatain,
Gu 'm b'e sud fasan Chlann Donuill,
Dhol treun air chois claidhe,
'Nuair a chaitheadh iad lod orr;
Eidear fhearaibh a's ghillibh,
Bhi le 'n sgianan na 'n sgornain.

'Nuair a rainig thu 'n larach,
An robh abhaist do shean'ar,
Bha Clann Chatan 'sa bhèucaich,
'G iarruidh fabhair da 'n anam;
Sin nuair gheibheadh tu t-ailleas,
Chuir am paipeir an ceangal,
'S ged tha Cheapach na fasach,
Tha i paighte le ceannaibh.

Ged a ghlaodh iad ruibh 'n ionaghlais,
Mu anmoch an fheasgair,
Chuir sibh sgapadh a mheanmh-chruidh,
An luchd a mhàm thair a pheice;
Ga 'n ruith feadh an aonaich,
'S ga 'n cuartachadh dhachaidh;
'S ga 'm paigheadh na 'm fiachan,
Ach dh' iondrain iad Lachunn*.

Thig Mac Coinnich dhion' t-armailt,
'S bu mhor m' earbs' as a mhathas,

<eng>* Maicntosh.<gai>

[TD 146]

Le shaighdeirean faoghluimt;
'S le 'n aodaichean daithte;
'Nuair bha dag air a searsadh,
Sheall e geur anns an amharc,
Sin nuair phaigh e 'n t-eudach,
Bha mu earbull a mhnatha.

Thoir mo shoraidh le dùrachd,
Gus an triùir th' ann 'sa bhraighe,
Gu Colla na laimh threine,
E fhein 'sa dha bhrathair;
Gu 'n do sheas mac De leibh,
Ann 'sa 'n leum so an drasda,
'S gu 'n d' fhuair sibh an toiseach,
Ann an toiteal na 'n claidhean.

Na 'm bu mhise b' fhear seolaidh,
Air na h-oigeara' 'n drasda,
Bhiodh fear air gach uilinn,
Chor 's nach leagte 'n aon bhlar iad;
Cha robh eagal na giorrag,
Air na gillean 'n robh 'n tabhachd;
Bha fear anns' gach uilinn,
Mur sgiath chuntairt roimh' chairdean.

Bhuaidh sin mur mo dhurachd,
Tha e 'm run gu e thachairt,
Thu bhi 'd thighearna duthcha,
Eidear an Dunan 'sa Cheapach,
Eidear Ruthain a's Spithein,
'S Cill mo-nìobhaig a chladaich,
Ann am paighneachas sgribhte,
'S lamh an Rìgh ris a chairt ud.

C' uim' nach cuirinnse 'n cuartach?
Muigh Gleann Ruaigh an robh 'm baiteal,

[TD 147]

Eidear monadh Dhruim-uachdair,
Cnoc a Chuailte 'sa 'n Teagail;
Gun mhir a bhi uait deth,
Ach cnuac Torra-an-easa;
Fearunn duthchas Mhic Mhairtein,
Bu neo nadur' a bheagadh.

ORAN air latha Chuileodair agus air cor na 'n Gaidheal. Le Iain Ruagh Stiubhart*. Chinne-chairdin an Strathspéidh.

Fonn.—Murt Ghlinne Comhann.

GUR a mor mo chuis mhulaid,
Bhi 'g amharc na guin a ta 'm thir,
A Rìgh! bi laidir 's tu 's urrainn,
Chasg na 'n naimhdean tha dhuinne 's gach taobh

Oirne 's laidir Diuc Uilleam,
'N rag mhearlach tha guin aige dhuinn;
B'e sud salchar na 'n steallag,
Tighin an uachdar air chruineachd an fhuinn.

<eng>* This is the John Roy Stewart, the true and trusty friend of Prince Charles, one of his chief colonels, and the famous warrior very much spoken of in the history of the rebellion, and equally as good a poet as he was a swordsman in the field.<gai>

[TD 148]

Mo chreach Tearlach Ruagh boidheach,
Bhi ga dhiteadh aig Deorsa na 'm biasd;
B'e sud dìteadh na còrach,
An fhirinn 'sa beoil foipe sìos;
Ach a Rìgh mas a deoin leat,
Cuir an Rìoghachd air seol a chaidh dhinn,
Cuir Rìgh dligheach na còrach,
Ri linn na tha beo os ar cinn.

Mo chreach armailt na 'm breacan,
Air an sgaoileadh 's air an sgapadh 's gach ait,
Aig fìor bhalgairèan Shasunn,
Nach no ghnathuich bonn ceartas na 'n dail;
Ged a bhuannaich iad baiteal,
Cha b'ann da 'n cruadal na 'n tapadh a bha,
Ach gaodh niar agus frasachd,
Thigh'n a niar oirnn bhar machair na 'n Gall.

'S truagh nach robh sinn an Sasunn,
Gun bhi cho teann air ar dachaidh sa bha,
'S cha do sgaoil sinn cho aith-ghearr,
Bhiodh ar dichìoll ri seasamh na b' fhearr;
Ach 's droch dhraoidheachd a's dhrachdan,
Rinneadh dhuinn mu 'n deachas na 'n dail,
Air na fridhean eolach do sgap sinn,
'S bu mhi-chomhail gu 'n d' fhairtlich iad oirnn.

Mo chreach mhor na cuirp ghlé-gheal,
Tha na 'n sìneadh air na sleibhtean ud thall,
Gun chiste gun leintean,
Ga 'n adhlacadh fhein anns na tuill;
Chuid tha beo dhiu 'n deigh sgaoileadh,
'S iad a bruiche a chéil' air na luing;
Ehuair a Chuigs' a toil fein dinn,
'S cha chan iad ach réubaltaich ruinn.

[TD 149]

Fhuair na Gaill sinn fo 'n casan,
'S mor a naire 'sa masladh sud leinn,
'N deigh ar duthcha 's ar 'n aite,
A spùilleadh 's gun bhlaths againn ann;
Caisteal Dhuinidh 'n deigh a losgaidh,
'S e na laraich thursach gun mhiagh;
Gu 'm b'e 'n caochla' goirt e,
Gu 'n do chaill sinn gach sochair a b' fhiach.

Cha do shaoil le mo shùilean,
Gu 'm biodh gach cùis mur a tha,
Mur sputadh na 'm faoilleach,
'N am na 'n luidhean a sgaoileadh air blar;
Thug a chuibhle car tionndaidh,
'S tha ioma fear aime-cheart an càs;
A Rìgh seall le do chaoimhneas,
Air na fir th' aig na naimhdean an sàs.

'S mor eucoir 'n luchd orduigh,
An fhuil ud a dhortadh le foill;
Mo sheachd mallachd a Mhoir-fhear Deorsa,
Fhuair e 'n lath' ud air ordugh dha fein;
Bha 'n da chuid air a mheoiribh,
Moran gìogan gun trocair le foill;
Mheall e sinne le chomhra',
'S gu 'n robh ar barail ro mhor air r'a linn.

Ach fhad 'sa 's beo sinn r'ar latha,
Bidh sinn caoidh na ceathairn chaidh dhinn,
Na fir threubhach bha sgairteil,
Dheanadh feum le claidhe 's le sgiath;
Mur biodh siontain n' ar n' aghai,
Bha sinn shios air ar n' aghairt gu dian,
'S bhiodh luchd beurla na 'n luidhe,
Ton thair cheann, b'e sud m' aidhear 's mo mhiann.

[TD 150]

Och na 'n och! 's mi fo sprochd,
'S mi 'n so ag osnaich leam fein,
'G amharc reismaid an Rosaich,
'G ithe fèur agus cruineachd an fhuinn;
Reothaich iargalt a's Cataich,
Tighin a nall oirnn le luchd chasag a's lonn,
Iad mur mhiolchoin air acras,
Siubhal chrìoch, charn chlach, agus tholl.

Mo chreach duthaich air an d' thainig,
Rinn sibh nis clar reidh dh'i cho lom,
Gun choirce gun ghnaiseach,
Gun siol taght' ann am fasach na 'm fonn,
Prìs na circ air an spardan,
Gu ruig a's na spàinean thoirt uainn,
Ach sgrìos na craoibhe f'a blath oirbh,
Air a crìonadh f'a barr gu a bonn.

Tha ar cinn fo 'n choill,
'S eiginn beanntain a's gleanntain thoirt oirnn,
Sinn gun sugradh gun mhacnus,
Gun eisdeachd ri binneas no ceol,
Air bheag bìdh no teine,
Air na stucan air am bi an ceo,
Mur chomhachaig eile,
Ag eisdeachd ri deireas gach lò.

[TD 151]

ORAN leis a bhard cheudna, no mur their cuid a dhaoine, urnaigh Iain Ruaigh, agus e air siachadh a chois, nuair bha e air fogradh an deigh latha Chuileodair.

AIG toabh sruthain na shuidhe 's e sgìth,
Tha 'n Criosdaidh bochd Iain Ruagh,
Na cheatharnach fhathasd gun sìth,
'Sa chas air tuisleadh sa 'n tim gu truagh.

Ma thig Guimhnich no Cataich ad dhail,
Mu 'n slanaich air do lùithinean truagh,
Ged thig iad cho tric a's a b' aill,
Cha chuir iad ort lamh le 'n luath's.

Ni mi 'n ubaidh rinn Peadair do Phàl,
'Sa lùithean air fas leum bruaich,
Seachd paidir 'n ainm Sagairt a's Pàp,
Ga chur ris na phlasd mu 'n cuairt.

Ubaidh eil' as leith Mhuire na 'n gràs,
'S urrainn creideach dheanadh slan ri h-uair;
Tha mis' am chreidimh gun teagamh, gun dail,
Gu 'n toir sinn air ar naimhdean buaidh.

Sgeul eile 's gur h-oil leam gur fìor,
Tha 'n drasd anns gach tir mu 'n cuairt,
Gach fear gleusda bha feumail do 'n Rìgh,
Bhi ga 'n ruith feadh gach crìoch air ruaig.

Bodaich dhona gun onair gun bhrìgh,
Ach gionach beag nith air son duais,

[TD 152]

Gabhail fath oirnn anns gach ait ann 'sa 'm bi;
Cuir a chuibhle so Chrìosd mu 'n cuairt.

Ma thionndas i seannsail an drasd,
'S gu 'm faigh am Frangach am Flandurs buaidh;
Tha mi earbsach as an tairgneadh a bha,
Gu 'n tig armailt ni stath thair chuan.

Gu 'n tugadh fortan da diodunn le gras,
Mur fhuair Maois le fàbhar mhuir ruagh;
'S gu 'm bi Deorsa le a dhrealainibh baitht,
Mur bha 'n t-amadan Phara 'sa shluagh.

'Nuair bha Israel sgìth 'sa 'n staid ghrais,
Thagh e beusan Shàil mur Rìgh;
Thug e sgiùrsadh le miosguinn a's plaigh,
Orra fhein, air an àl 's air an linn.

Samhuil sud 's mur tha Breatunn fo bhròn,
O 'n a reic iad an coir do 'n Rìgh;
Rinn e 'n cronach' le corruich ro mhor,
Crom an donais chaidh an seorsa 'n iasd.

A Rìgh shocraich Mhuire na 'n gràs,
Thoir dhomhsa le buaidh do chluas;
'S mi 'g umhladh le m' ghlùn air an lar,

Gabh athchuinge airid uam.

Ma tha sinn a sireadh ach ar coir,
Thug a Chuigs agus Deorsa uainn;
A reir do cheartais thoir neart dhuinn a's treoir,
'S cuir ar naimhdean air fogradh uainn.

[TD 153]

<eng>JOHN ROY STEWART's Psalm.

THE Lord's my targe, I will be stout,
With durk and trusty blade,
Though Campbells come in flocks about,
I will not be afraid.

The Lord's the same as heretofore,
He's always good to me,
Though red-coats come a thousand more,
Afraid I will not be.

Though they the woods do cut and burn,
And drain the lochs all dry;
Though they the rocks do overturn,
And change the course of Spey:

Though they mow down both corn and grass,
Nay, seek me under ground;
Though hundreds guard each road and pass,
John Roy will not be found.

The Lord is just, lo! here's a mark,
He's gracious and kind,
When they like fools hunt in the dark,
Like moles, he struck them blind.

Though lately straight before their face,
They saw not where I stood,
The Lord's my shade and hiding-place,
He's to me always good.

[TD 154]

Let me proclaim, both far and near,
Through land, and air, and sea,
That all with wonder plain, may hear,
How good the Lord's to me.

Upon the pipe i'll sound his praise,
And dance upon my stumps*,
A fine new tune to it i'll raise,
And play it on my trumps.<gai>

ORAN le duin uasal mhuiuntir, Apuinn Mhic Iain Stiùbhairt, a bha na Oifigeach leis a Phrionnsa, agus an t-arm dearg air a ghlacail na phrìosanach, 's air a mhionnachadh gu bhi leotha fhein na shaighdeir ghiulan gunna.

Fonn.—

Shiubhail mi Cinntire,
A's Ile o cheann gu ceann.

GHEIBH gach duin' a thuiteamas,
'Sa chuid 'sa h-uile céim,
'S ionunn sin 's mur thachair domh,
O 'n taic so latha 'n dé;
'S beag a shaoil leam dhol air seacharan,

<eng>* Having strained his ankle when under hiding, after the battle of Culloden; and while resting himself aside a cataract, keeping his foot in the spout, he composed the preceding song for a prayer, and these verses for a psalm.<gai>

[TD 155]

O thaic mo mhuinntir fein,
Na gu b' ann le Deors' a rachaimid,
Ged fhaicimid e 'm feum.

Marbhaisg air an t-saoghal,
Tha e caochlaideach 's gach gleus,
Bha mise roimhe 'm Oifigeach,
'S gu 'm b' onarach an ceim,
'S mi 'n diugh air na coig sgillinnean,
'S gach iomartas na 'n deigh,
'S ioma te bheir crioman asd,
'Sa their gu 'n imir i cuid fhein.

Ma 's e Portmohon is aite dhuinn,
Bidh a mhuir na clara reidh,
Bidh gach duine sabhailt,
Ach fear a ghearr a reis;
Ma sa fortan domhs' e,
Gu dearbh tha mi na fheum,
Ciod fhios nach bi mi 'm Ghobhairneir,
Fo laimh Righ Deorsa fein.

Thoir soraidh uam le durachd,
Do 'n duthaich 'n robh mi greis,
Sios gu Leitir Shiuna,
'S ann leamsa nach bu bheag;
Agus innis do Rob Stiubhart,
Gu bheil mis air muthadh cleas,
Gur beag a shaoil leis m' fhaicinn,
'Sa mhusgaid ghlas ri m' leis.

'S na biodh sud mur iongnadh ort,
Cha n' eil ann ach muthadh beag,
'Sa liuthad fasan th' ann 'sa 'n Rioghachd,
Nach fiach a bhi tigh'n air;

[TD 156]

Bha mise uair 's cha n' aicheam,
Ged 's ann leosan 'n drasd is treis,
Gu 'm bu docha leam thu t-ònar,
Na Deorsa 's na bheil leis.

Am fear a bhios a lathair,
'S feudar clann a charadh ris,
'S ionunn sin 's mur tharladh,
Do 'n tha Deorsa 'g arach leis,
Aithneidh e neo statail iad,
'Nuair thig neart o 'n airde deas;
'Nuair thig Seumus 'sa 'n camp Gaidhealach,
Bheir fear na dha as cleas.

Bidh mise measg na 'n daoine sin,
Ma dh' fhaodas bidh mi ann,
'S bliadhna leam gach seachduin,
Gus am faic mi iad air falbh;
Theid gach eun g' a thraigh,
Ged ghabhadh cach ris fearg,
'S b' e sud a bheart bu duineala,
Na fuireach 'sa 'n arm dhearg.

O! 's muladach a ta mi,
'S gu brath cha tog mi fonn,
Cha mho ni mi cridhealas,
'S ann tha mo chridhe trom,
O 'n chaidh na mionnan aindeoin,
Tharruing as mo chom;
Aig iarruidh orm bhi dileas,
Do 'n Righ 's nach d' theid e leom.

[TD 157]

ORAN le Sileas Nighean Mhic Raoghnuill do dh' arm Righ Sheimis.

GUR diombach mi 'n iomairt,
Chuir gach fine air fogradh;
Tha mi am chadal 's na duisgibh mi
Gun aidhear gun eibhneas,
'S gun reiteach o Dheorsa;
Tha mi am chadal, &c.
Gur h-ioma bean uasal,
Tha gu h-uaigneach na seomar,
Gun aidhear gun eibhneas,
'S i 'g eiridh na h-onar,
Sior chaoidh na 'n uaislean,
A fhuair iad ri phosadh;
Tha mi am, &c.

Mo thruaigh a chlann,
Nach robh gann na 'n curaidse;
Tha mi am, &c.
'N am bualadh na 'n lann,
An am na 'm buillinean;
Tha mi, &c.
Ged tha sibh 'sa 'n am,
Feadh ghleann a's mhunainnean,
Gu nochd sibh 'ur ceann
'N am teanndachd mur churainean,
'Nuair thig Seumus a nall,
'Si 'ur lann bhios fuileachdach.
Tha mi, &c.

[TD 158]

'S e Rìgh na muice
'S na Cuigse Rìgh Deorsa;
Tha mi am, &c.
Mu 'n d' thig oirnn an t-samhuin,
Bidh amhuch 's na cordaibh;
Tha mi am, &c.
Na 'n eireadh sibh suas,
Le cruadal a's duinealachd,
Eidear islean a's uaislean,
Thuath agus chumanta,
Do sgiurseadh sibh uaibh e,
'N Rìgh fuadain nach buineadh dhuinn;
A's dheanainn an cadal gu sunndach leibh.

ORAN le ban-Stiubhartach mhuinntir Strathspeidh, ann an aobhar
Thearlaich.

So an tim tha cuir as domh,
Lan tuchain a's cnatain,
Mo dhiubhail 's mo chreach cha b'e dh' fheumainn.
So an tim, &c.

Ach bhi guidhe gu laidir,
Le Rìgh dligheach na 'n Gaidheal,
Theid a Lunnainn gun daill uainn le ceuta.
Ach bhi, &c.

An t-og teannsgalach gasda,
Prionnsa Tearlach na 'm baiteal,
Theid mearlach Rìgh Shasunn a gheilleadh.
An t-og, &c.

[TD 159]

'S ioma leoghunn deas statail,
Dheth mo chinne mor laidir,
Bhios fo d' bhrataichean bana ag eiridh.
'S ioma leoghunn, &c.

Na Stiubhartaich ghasda,
Fior chuirteil mu d' bhrataich,
Bidh Iarla Bhoid 's fir na h Apunn gu leir leat.
Na Stiubhartaich, &c.

Coirneal Ruagh Chinne-Chairdin,
'S clann uasal a brathar,
Thog iad bratach 's cha 'n fhailing iad gleus lea.
Coirneal Ruagh, &c.

'S gur h-e 'n duine a Maidseir*,
Mac oighre a mhathar,
'N Rìgh ga neartach' an aird ann an céuta.
'S gur h-e, &c.

'S beag an t-iongnadh an t-ardan,
Dhol ad bhathais cho laidir,
'Sa liuthad sruth ard as 'n do leum thu
'S beag an t-iongnadh, &c.

Dh' fhuil Rìgh agus bharan,
Do 'm bu dligheach am fearunn,
Do 'n fhuil phriseil bha fearail ag eiridh.
Dh' fhnìl Rìgh, &c.

Thaobh eile do mhathar,
Tha thu bhrollach na 'n Granntach,
'N aon teaghlach is fearr tha 'n Strathspeidh dhiu.
Thaobh eile, &c.

* Gillios Mor Mac Bheathain fear Chinne-choille.

[TD 160]

Dh' eireadh sud a's Iarl' Anndrum,
Mar ri Tearlach an Teannsgail,
'N Rìgh ga 'n greasad a nall dhuinn a Erinn.
Dh' eireadh sud, &c.

Na 'm biodh amhuch Rìgh Deorsa,
Ann an lamhan Chlann Donuill,
Gheibheadh i togha maith corcaich no stéinne.
Na 'm biodh, &c.

Na 'm biodh lamh an fhir ruaigh ort,
Bha mo raoghainnse 'n uachdar,
Gun aon duin' bhi mu 'n cuairt duibh le cheile.
Na 'm biodh, &c.

Am blar Chop fhuair thu 'n t-urram,
Bu cheann feadhn' thair gach duin' thu,
'S ann a shamlaich iad uil' thu ri Cléibhir.
Am blar Chop, &c.

'S tu gu 'n cuireadh droch sheol,
Fo champa Rìgh Deorsa,
'N ceann 's na casan 's na botainn gu leir diu.
'S tu gu 'n cuiradh, &c.

Bidh e laidir g' ar congnadh,
Duntuilm le Chlann Donuill,
Thig Sir Alasdair mor oirnn a Sleibhte.
Bidh e laidir, &c.

Thig Mac Mhic Ailein a Muideart,
Mac Mhic Alasdair Chnòideart,
'S Mac Mhic Raoghnuill cha soradh leis eiridh.
Thig Mac Mhic Ailein, &c.

[TD 161]

Agus Tighearna Struthain,
Thig e nuas oirnn o 'n ghiùsaich,
Bidh e fein 'sa chuid cuirte gu leir ann.
Agus Tighearna, &c.

Agus Tighearn og Chluainidh,
Leis an t-srol bhrataich uaine,

'S Clann Mhuirich mu 'n cuairt da gu leir ann.
Agus Tighearn og, &c.

Bidh Clann Donuill na 'n uidheam,
Cuir na ruaig ris a bhruthach,
Le 'n arma' 's glan uidheam aig Seurlus.
Bidh Clann Donuill, &c.

Bidh Clann Donuill 's Clann Chamashroin,
Sud na seoid a tha ainmeil,
Am fìor thoiseach na h-armailt ag eiridh.
Bidh Clann, &c.

'S mas a beo mi coig bliadhna,
Chi mi fhathasd droch dhiol,
Air luchd sgathaidh na 'm bian bhar na spréidhe.
'S mas a beo, &c.

Air luchd chasaga' dearga,
'S Mailisidh Earraghàidheal,
Chi sibh fhathasd droch àird air na beisdean.
Air luchd, &c.

Gar 'm faic mis' e le m' shuilean,
Gu 'm bi Dia leibh 's mo dhurachd,
'S cha dean luaidhe no fudar bonn beud duibh.
Gar 'm faic, &c.

[TD 162]

Gar am faic mis' a choidhch e,
Ma thionndas a chuibhle,
Bidh Sasunnaich 's Guimhnich na 'n eiginn.
Gar am faic, &c.

Bidh luaidhe ri earbull,
Luchd chasaga' dearga,
Aig Friseilich ainmeil na 'n geurlann.
Bidh luaidhe, &c.

'S mi air thuras 'sa bhraighe,
Cian fada o m' chairdean,
Far nach cluinn mi ach rànuil an fheidh ann.
'S mi air, &c.

Tha mi sgith 's mi lan airtneil,
Naile fhin theid mi dhachaidh,
Gu duthaich an fhasgaidh 's na geige.
Tha mi sgith, &c.

Gu tir na 'm fear ura,
Luchd sgapaidh an fhudair,
'S nach diùltadh an crun do Rìgh Seurlus.
Gu tir na, &c.

'Sa Thearlaich oig Stiùbhairt,
Chi sinne an crun ort,
'S bidh tu fhathasd a sgiùrsadh na 'm beisdean.
'Sa Thearlaich, &c.

Tha Seumus og uasal,
Leis an Rìgh mur bu dual da,
Sar cheannard air sluagh an t-og treubhach.
Tha Seumus, &c.

[TD 163]

Agus Uilleam oig Ghart,
Mo dhurachd dhuit thachairt,
An Rìgh sin ga d' sheachnadh o bheisdean.
Agus Uilleam, &c.

Sar cheannard an t-saighdeir,
'S cridhe soilleir gun fhoill doibh,
'S gu meal sibh ur 'n oighreachd le cheile.
Sar cheannard, &c.

ORAN do dh' ALASDAIR dubh GHLINNE GARaidh agus d'a bhraithrean.

Mo run an t-Alasdair og,
Beul meachair tana na m' pog,
Gorm shuil an sgathan mor,
'S amadan a thuirte mur ghloir,
Gu 'n robh mo ghilleasa corr,
'S comhnard o uilinn gu broig thu,
'S deas thig a chosag sa 'n cleoc dhuit,
He ho, i u ho, ho hi u ho,
Ho i hu o, ho i aig ho.

Mhoire 's iad mo run na gillean,
Clann na mna nach d' fhas binneach,
Preas ùr na 'm boineidean bileach,
Thogadh a mach ris an fhireach,
Choisneadh cliu le h-airm 's le h-inneal,
Bheireadh air mac na h-eilde pilleadh,
'S nach cumadh ri namhaid slinnein.
He ho, i u ho, &c.

[TD 164]

Mo run ceim eutrom air siubhal,
'S ioma og a thig fo t-uidheam,
Luchd osan ghearr a's bhrogan dubha,
Saighdean le 'm bonnaibh iubhair,
Air nach biodh an naimhdean buidheach,
Dh' eireadh le fear ghruaige duibhe.
He ho, &c.

M' anam a's m' eibhneas a's m' aiteas,
Oighre 'n fhir thu thog an Caisteal,
Thig gairm an Rìgh ort a Sasunn,
Their easan nach aill leis gun t-fhaicinn,
Ghlac an t-og na shroin a bheachd ud,
Aig a mheud sa tha na choir do 'n phailteas,
Lamh dh' iomairt an oir le coir aite.
He ho, &c.

'Nuair a sgaoileadh tu an cleoca,
Gur lionar og bhiodh an deigh ort,

Clann Iain, Siol Ailein,
Sann ad bharraiche fein iad,
Mur sud 's Iarla Bhrathain,
An latha bhios feum air,
Ma 's fìor luchd mo sheanchais;
Gheibh thu manran na maighdinn,
Thig an t-eun Abrach,
'S cha chaidil e 'n oidhche.
He ho, &c.

Mo run an t-og uasal,
Uachdar na féile;
Dh' fhas gu furanach urranta treubhach,
Lamh bhualadh na 'm buillean,
'N cumasg na 'n geurlann,

[TD 165]

'Nuair a thogadh tu 'n deaslamh,
'S ann leats gu 'n éireadh.
He ho, &c.

M' anam m' fheudail a's m' aiteas,
Seobhag sulghorm na 'n ciabh bachlach,
Tha mo ghuidhse dhuit gu 'n tachair,
Freagraidh 'n taobh tuath do t-fhacal,
Fhrisealaich, Granntaich, a's Cataich,
Reothaich na 'n cleoc 's doigh gur leat iad.
He ho, &c.

M' fheudail dh' fheara na greine,
Thog iad ort mur aithris bhreige,
Gu 'n deanadh Mac Cailein eiridh,
Air an latha chum sibh fein e,
Gus 'n d' rinn sibh cleas na spreidhe,
Bualadh chlaighe, scapadh béurla,
Tuiteam an ùillibh a cheile.

ORAN le saighdeir.

SEISD.

Ho m' fhaidhreìn, he m' fhaidhreìn,
Ho m' fhaidhreìn ho ro,
Ho m' fhaidhreìn, he m' fhaidhreìn,
Ho m' fhaidhreìn ho ro,
Ho m' fhaidhreìn, he m' fhaidhreìn,
Ho m' fhaidhreìn, ho ro,
'S e goirteas mo choise,
Dh' fhag mise cho trom.

[TD 166]

BHA mi uair do mo shaoghal,
Cheart cho aotrom ri eoin,
'S cha robh mi 'm barail no saoil sinn,
Tigh 'n an taobh so ri m' bheo,
Mi bhi 'n seirbheis na 'n Stataich,
'S e bu phaighe dhomh gròt,
Bhi 'm sheasamh air seantraidh,

'S na Frangaich am choir.
Ho m' fhaidhreìn, &c.

'S mi bhi 'm sheasamh air seantraidh,
Ri oidhche gheamhraidh fhliuch fhuar,
'S luaidhe dhu-ghorm na 'm Frangach,
Mu m' cheann a's mu m' chluais,
Ged a thigeadh an reothadh,
Cur a's cathadh a tuath,
O! cha n' fhaod mi dol dachaidh,
Gus am pas an da uair.
Ho m' fhaidhreìn, &c.

Ach na 'm faodainn dol dachaidh,
'Nuair a phasadh 'n da uair,
Dhol a shealltainn na 'n cairdean,
Tha uile tamh 'sa 'n taobh tuath,
'S mor gu 'm b' annsa na oighreachd,
Bhi ri straoilich le tuaigh,
Na bhi uair sa 'n da bhliadhna,
Faotainn biasd cota ruaigh.
Ho m' fhaidhreìn, &c.

'Sin nuair labhair mo Chaiptein,
O 'n 's e fhacal bu mhù,
'B' fhearr dhuit leathchrùn 'sa 'n t-seachduin,

[TD 167]

"Chasg acrais do bhrù,
"Sa bhi 'n aodach sa 'n anard,
"Cheart cho chionalt ri Diuc,
"S tha mi meallt ann am bharail,
"Mur coisinn t-onair dhuit cliù."
Ho m' fhaidhreìn, &c.

Dith bidh air do shroinse,
O 'n tha do phoca fein lan,
'S dona 'm paighe an gròta,
Ga thilgeadh ormsa gach la,
Na 'n tarlainn 's tigh leanna,
'S eigheach air drama na dha,
'N donas bonn a bhiodh agam,
Chuir seachad na 'n trath.
Ho m' fhaidhreìn, &c.

'Na 'n tarladh dhomh bhi air mhisg,
Gun aon bhonn gliocais am cheann,
Bhiodh an geard ga mo fhreasdal,
'S ga mo ghlasadh gu teann,
Na 'm biodh duin' idir 'sa ghàbhadh,
'S e Mac a Ghaidhil bhiodh ann,
'Sa nuair a thigeadh mo Mhaidseir,
"Bhùgair ghraind tha thu ann."
Ho m' fhaidhreìn, &c.

Gu 'n neartaich an Rìgh Clanna' Ghaidheal,
Anns' gach aite mu 'n cuairt,
Eidear Eaglaisean Lunnuinn,
'S ard bheannan 'n taobh tuath,

Tha 'n Rìgh air a Chathair,
Seoladh a chatha mu 'n cuairt,

[TD 168]

'S dh' fhaoit gu 'm faighimid bàta,
G' ar toirt air saile 'n taobh tuath.
Ho 'm fhaidhrean, &c.

Marbhrann do DHONULL MAC RAOGHNUILL mhoir, fear Thir-na-drìs; Le Alasdair
Camshron Dhoch-an-asaidh 'n Lochabar.

Se mheudaich m' airtneal gu geur,
'S campar caisteil mo chleibh,
Chainnt a bh' aca an dé ag ol.
Se mheudaich, &c.

Mu 'n fhiuran sgiobalta gharg,
Bu mhor misneach a's dealbh,
Bu neo ghliogach fo t-arm thu sheoid.
Mu 'n fhiuran, &c.

Mu 'n leoghunn chlisgeant gun sgath,
Bha 'n Tirnadris sin na thamh,
'S mor am briste do bhas thigh'n oirnn.
Mu 'n leoghunn, &c.

Bu tu 'n curaidh gun sgath,
Dhol an cuntart na 'm blàr,
Bhiodh airm ghuineach ad laimh fhir oig.
Bu tu 'n, &c.

[TD 169]

Bhiodh sgiath bhreac na 'm ball dluth,
Air gairdein gaisgieil mo ruin,
'S paidhir dhag ort nach duilt ri h-ord.
Bhiodh, &c.

Bhiodh lann thana gheur ùr,
'S i gun smal oirr' o'n bhùth,
Gearradh chlaighe a's smuis a's feoil.
Bhiodh, &c.

Cha b'e 'n t-iasaid a bh' ann,
Ach siol na 'n Rìghrean o 'n Spainnt,
Ga 'm bu lionar sgiath 's ceann-bheart oir.
Cha b' e &c.

'S e mheudaich m' airtneal's mo ghruaim,
Na cinn fheachd ud dh' fhalbh uainn,
Na fir ghasda bu chruaidh 's an toir,
'S e mheudaich, &c.

B' ann diu 'n t-Alasduir treun,
O Cheapaich na 'm peur,
'S bha e barraicht air cheudaibh sloigh.
B' ann diu, &c.

Siol na 'n Colla bha treun,
Sdiuradh loingear fo bhreid,
'S ard a shloinninn thu 'n ceim na dho.
Siol na 'n &c.

Lean thu 'n duthchas bu dual,
Dhol gu dluth anns an ruaig,
O 'n t-sliochd chluiteach da 'n gluaiste strol.
Lean thu, &c.

[TD 170]

'S ann ad theaghlach nach crion,
Chluinntea gleadhraich na 'm pios,
Bhiodh fir mhor ann comh stri ag ol.
'S ann ad, &c.

'G eisdeachd eachdraidh na m bard,
Agus caismeachd luchd dain,
'S e bu chleachda bhi d' laimh an t-or.
'G eisdeachd, &c.

DAN GAOIL.

BHRUADAIR mi 'n raoir 's mi 'm chadal,
Mi fhin a's mo ghaol bhi 'n leabaidh,
'Sa nuair a dhuisg mi anns a mhaduinn,
Ochoin! gur brúadar a bh' agam.

Cadal cha 'n fhaigh mi no suain,
Cha ghluais mi aidhear no ceol,
Mo leigheas cha 'n eil e aig leigh,
Ach agad fhein a mhaighdionn og.

Mhaighdionn og gur tu mo léigh,
Amhairc ort fhein a's dean a choir,
'S na leig dhomhsa bhi dol eug,
Is furtachd dhomh fhein do phog.

Mu 's ann gu mis' a chuir eug,
Rinneadh do bheul corcair ciùin,

[TD 171]

Mu 's ann gu mis' a chuir bas,
Rinneadh do lamh 's do dhreach ùr.

Da shuil ghorm fo d' chaoin rosg,
Da chos gheal nach dochainn brog,
Molaidh mi thu a reir mo bheachd,
Eibhinn duit a mhaighdinn oig.

Eibhinn duit a mhaighdinn oig,
Is millse pog sa 's gile deud,
Cha 'n fhacas le fradharc mo shul,
Bean nach tu am flur thair cheud.

Nach tusa am flur thair cheud,
Rugadh 'sa Ghreig na 's an Roimh,

Mur tusa nighean Rìgh Greig,
Cha 'n idir mi fhein co thu.

CUMEA Aonghuis oig, Moir-fhear Ghlinne Garaidh, agus e bhi air a mharbhadh le urchair thuitimis, a mach air uinneig anns an Eaglais-bhric, le fear do na saighdeirean aca fein agus e glanadh a ghunna 'n deigh a bhlaire sin, am bliadhna 1745. Le bean Achadh-uaine.

Fonn.—Gaoir na 'm ban Muileach.

O! gur muladach oirnne,
Ri am cuimhneach' a Choirneil,

[TD 172]

Ceannafeadhna Chlann Donuill,
Ri am catha no comhrui,
'S mairg a chitheadh t-fhuil bhoidheach,
A bhi taosgadh mu d' bhrogan,
'S i bhi taomadh gun ordugh air causair.
'S i bhi taomadh, &c.

Aonghuis oig a chuil dualaich,
'S ro mhath dh' eireadh gach buaidh leat,
Gus na chuir iad 'sa 'n uaigh thu,
Gu 'n robh Tearlach an uachdar,
Bha do bhuillean cho cruaidh leis,
'S nach robh pilleadh da uair ac',
Air mo laimh gur tu bhuaileadh 'n adbhansa.
Air mo laimh, &c.

Aonghuis oig a chuil channaich,
'S na 'n calpannan geala,
Tha do shlios mur an eala,
Mur la greine gun smalan,
Tha do cheile 'n deigh sgaraidh,
O 'n la chuir iad thu 's talamh,
O 'n la dh' eug thu, Rìgh! b' ainneamh a gaire.
O 'n la, &c.

Sinne dh' fhaodadh a radhainn,
Na 'm faigheadh tu laithean,
C' ait an robh e Mac mathar
Ris nach seasadh tu aite,
Dhol a dh' iarruidh na h-àraich,
Na bhualadh do namhaid,
Bhiodh luchd chotacha maduir dheth cailte.
Bhiodh luchd, &c.

'Nuair a rachadh tu t-eideadh,
Fo bhreacan am feile,

[TD 173]

Thigeadh claidhe fo d' sgeith ort,
Cuilbheir caol air dheagh ghleusadh,
Air mo laimh bu mhor t-fheum leis,
Dhol a bhualadh na 'n ceudan,
Bhiodh fir Shasunn ag eigheach na h-ainneart.

Bhiodh fir, &c.

Nuair a thogte leat bratach,
Bhiodh lamh dhearg leat a's bradan,
Fraoch dughorm na ghagain,
Aig fir ura gun taise,
Nach gabh curam na gealtachd,
As na trupairean fhaicinn,
Gheibhte cunradh do chlaighe gearrte.
Gheibhte cunradh, &c.

Cuis bu mhath le Rìgh Deorsa,
O 'n la dh' inntrig an tos thu,
Thu bhi dhith air do sheorsa,
Dh' fhalbh iad uile mur cheo uait,
O 'n la chuir iad fo n' fhoid thu,
Nach d' fhan dithisd diu 'n ordugh,
Och mo chreach! nach bu bheo thu an la sin.
Och mo chreach! &c.

Cha bhiodh Diuc Uilleam,
Cho trom oirnn' 's cha b' urrainn,
O 's tu sheasadh gach cuntart,
'Sa bhuaileadh na builleam,
Na 'm fuireadh an gunna,
Gun do bhualadh o'n uinneig,
Gu 'n robh Tearlach an Lunnainn roimh 'n ama so.
Gu 'n robh Tearlach, &c.

Dhomhsa b' ainneamh ri fhaotainn,
Fear a dh' innseadh dhomh t-aogas,

[TD 174]

Da ghruaidh dhearg mur an caorann,
O thus barraich gu fraoch ort,
Suil chorrach a t-aodann,
Beul tairis 's e faoilidh,
Och na 'n och! tha do dhaoine dheth cailhte.
Och na 'n och! &c.

Chraobh a b' aird' bha fo 'n adhar,
'S i fo bhlath 'n deigh a crathaidh,
Mur bha 'n luaidh 'n deigh do sgathaidh,
Thug sud uaitse do labhairt,
Beart bu chruaidh 's ann le t-Athair,
Thu bhi uaithe gun t-fhaighinn,
Och mo thruaigh! tha do cheathairn a t-iondrain.
Och mo, &c.

Dheagh Mhic Alasdair Mhor-thir,
Ghlinne Garaidh a's Chnoideart,
Fhuair thu 'n staoil' ud as t-oige,
'S b' airidh air ri do bheo thu,
Olc air mhath le Rìgh Deorsa,
'S le Uilleam mur chomhluath.
Thig t-oighre dhachaidh le solas o bhealltuinn.
Thig t-oighre, &c.

Cha 'n fhaod sinne bhi 'g acain,

Mu thig Alasdair dhachaidh,
As a phrìosan tha 'n Sasunn,
O 'n Tur-uaine as na glasaibh,
O 'n tha 'n saoghal so cleachdadh na h-ainneart.
O 'n tha 'n, &c.

'S ioma duine bha bronach,
'Nuair a chual iad an Coirneil,
Bhi na shineadh gun chomhradh,

[TD 175]

'S fhuil chraobhach a dortadh,
'S i a sileadh m'a bhrogan,
Bha daoine uaisle dheth bronach sa 'n am sin.
Bha daoine, &c.

ORAN air Coirneil Dhuinidh.

BEIR mo shoraidh thair a bhealach,
Dh' fhios an oigeir ullamh ealamh,
Foinnidh fearail sugach.
Beir mo, &c.

'S tu 'm fear buidhe bachalach,
Na 'n ciabh casbhuidhe,
'S math thig ad os cionn do chasaig,
Beul o 'm blasd thig sugradh.
'S tu 'm fear, &c.

'S tu ogha 'n armuinn,
Uasail, statail,
Theireadh cach riut,
Ogha 'n Fhrangaich,
Aghaidh thlath gun smuirnein.
'S tu ogha, &c.

'S tu mac an Athar,
As glan caitheadh,
'Sa bha fialaidh ri luchd tathaich,
Deagh fhear tighe 's duthcha.
'S tu mac, &c.

[TD 176]

'Se sud a b' fhasan,
Duibh sa mhaduinn,
Piob ga spreigeadh mu na geataibh,
Toirt dhuibh caismeachd dùsgaidh.
'S e sud, &c.

'Sa 'n am ar braicfeast,
Fion ga scapadh,
'G ol deoch slaint a piosaibh glasa,
'S fìdhlean daitht toirt ciuil duibh.
'Sa 'n am, &c.

'S co an duine chuireadh mulad,
Air an leoghan thapaidh ghuineach,

Nach biodh tuille 's diumbach.
'S co an duine, &c.

Bidh Clanna Chamshroin,
Leat 's gu 'n earbainn,
Luchd na 'n cuilibheirean 's na 'n targaid,
Teachd fo 'n armaibh dubailt.
Bidh Clanna, &c.

Thig deagh Mhac Shimidh,
Leat 'sa chinneach,
Na fir gharga, bhorba, ghuineach,
Gheur na 'm buillean dlutha.
Thig deagh, &c.

Thig Mac Antoisich,
Leat sa 'n t-ogra,
'S teaghlach Aonghuis mur bu choir doibh,
'S Leathanaich choire chuirteil.
Thig Mac Antoisich, &c.

[TD 177]

Thig fear Dhungalain,
Leat 'sa charraid,
'S deagh Mhac Dhonuill duibh o 'n daraig,
Cairiseach le dùrachd.
Thig fear, &c.

Thig Mac 'Ic Iain Ghlinne Comhunn,
Tighearna Ghearrloch agus Ghrathaich,
'N am do chlaidhe rusgadh.
Thig Mac 'Ic Iain, &c.

Na 'm biodh mo neartsa,
Mur tha m' aigne,
Bhiodh an Coirneileir na chadal,
A nochd an Caisteal Duinidh.
Na 'm biodh, &c.

Ach o nach can mi,
Na bheil air m' aire,
'S o nach bard mi no fear ealaidh,
Soraidh leibh 's mo dhurachd.
Ach o nach, &c.

ORAN le fear d' a leannan, agus i air posadh fir eile nuair a bha e air falbh as an aite.

Fonn.—
Tha mulad orm fein,
Mu 'n sgeul nach d' fhaod mi a chleith.

FHIR dh' imicheas mu 'n cuairt,
Beir an t-soraidh so uam os 'n aird,

[TD 178]

Dh' fhios na h-ighin so fhuair mi,

Cairdeil 's mi 'm bhuachuille bà;
Thug ise geallamh as ùr,
Chaidh an comunn air chul a bha,
'S ann tacan roimh 'n uair,
A mhealladar uam mo ghradh.

A nighean, ciod am fath,
Mu 'n do chuir thu mo ghradh air chul?
Gun chuimhn' air mur bha,
O 'n ghlac thu air laimh 'm fear ùr,
Mar thaisbein thu 'n gaol,
Thug sinne mar aon an tus;
Cha chreidinn choidhch beul,
'N deaghaidh mar dh' eirich dhùinn.

Beir an t-soraidh so uam,
Thair bharruibh, thair stuagh, thair chaol,
Gu bean og a chuil duinn,
Cha robh ise dhuinn mar shaoil,
Thug mise dh' i gradh,
Measg cuideachd gu brath nach sgaoil,
'S Bidh mo naimhdeas gu buan,
Do 'n fhear a chum uam mo ghaol.

Ma ghlac thu e 'd dhòigh,
'S nach d' fhaod thu bhi beo gun fhear,
Gu'n do chuir thu fo d' bhonn,
'N gaol a thug sinn gu trom o shean,
Gu 'n do thagh thu dhuit fein,
'M baolastair treun mur fhear;
Na 'm falbhadh tu leom,
Gu 'n orduichinn saoi ad char.

O! 's mise bha 'n geall,
Air do phearsa 's cha n' ann air spreidh,

[TD 179]

Air do chuideachda chaomh,
Cha d' thug sibh riamh gradh do 'n bhreig,
Chaidh mise gle og,
N-ur caidribh 's bu choir sibh fein;
B' e m' aidhear 's mo mhiann,
Bhi 'n tasgaidh n-ur lion gu m' eug.

A chiall na'n ciall,
Gu 'n d' fhiosraich mi riamh do ghnè,
B' e m' aidhear 's mo mhiann,
Bhi 'n acraichean dion do chleibh,
Sugradh do bheoil,
Na 'm faighinn gu m' ordugh fhein,
Na 'm faighinn gu m' mhiann,
B' e m' aidhear bhi 'n riaghailt do laimh.

Mur chraobh as teallaich,
Tha 'n ainnir a 's aille suidh,
Blas meal' air do phoig,
Beul meachair nach d' fhoghlum breug,
'S e mheudaich do chliu,
'S a shlanuich co dluth do dheud,

Shlanuighear na 'm buadh,
Cha 'n aicheinn nach tu mo leigh.

O 'n tharladh mi 's tu,
Thoir thairis co dhiu is fearr,
Tha thus air dol réidh,
'S tha mis air an fheill mar bha,
Gheibh mise dhomh fein,
Mo raoghainn do the no dhà,
'S bidh tusa gun speis,
Aig balach gun fheum gu brath.

[TD 180]

O 'n tharladh mi 's tu,
Bu lughaide leom an cas,
Na 'n cluinninn deagh chliù,
Air an fhear thain' as ur am àit;
Na 'm b' oganach treun,
Bhuaileadh speic ann am blar,
Ach sugradh mo ghaoil,
Bhi aig umaidh mar chaoirich bhain.

Cumha Ceann-cinnidh na 'n Granntach, agus e bhi gu tinn ann an Sasunn,

Fonn.
O! gur muladach oirnne,
Ri am cuimhneach' a Choirneil, &c.

'S mor bhron 's mo thruime-lighe,
Chuir mo shuilean gu snithe,
Dh' fhag sud toll ann mo chridhe,
Nach leighis aon lighich,
'N sgeul a chualas air Tighearna Ghrannta.
'N sgeul a, &c.

Toiseach dligheach na 'n Spèitheach,
Uasal aìgionntach treubhach,
Glic misneachail ceutach,
Da 'n robh misneach thair cheudaibh,
'S tigh lagha, 's gu 'm b' fheumail an camp thu.
'S tigh lagha, &c.

Tha mac Cailein 's Iarl Einne,
Lan truime mu d' dheighinn,

[TD 181]

'S beag an t-iongnadh dhoibh fein sud,
Ursainn chatha nach geilleadh,
Dh' fhag do chinne mor fhein ann an campar.
Dh' fhag, &c.

Mo bheud thu bhi 'n Sasunn,
Fo thiamhachd na h-easlaint,
'S do thur bhaile caisteil,
Bha na dhuthchas aig t-aiteam,
Bhi as aogais do phearsa na bhantraich.
Bhi as aogais, &c.

A laoich chosgara, ghargail,
Bu nòs leat bhi armail,
'S tric m' osnaich o 'n dh' fhalbh thu,
A Rìgh! prosnuich a dh' d' Alba le shlaint thu.
A Rìgh! &c.

Chunnaic mise ge b' og mi,
Ioma cuilm a stigh mhor sin,
Damhsail, urramach, ceolar,
Mnaithean 's fleasgaichean oga,
'S iad gu furanach ceolmhor a damhsa.
'S iad gu, &c.

'Nuair a sgaoileadh tu bratach,
Mu thimchioll do gheata,
'S ioma sonn agus gaisgeach,
Ghrad fhreagradh a chaismeachd,
'Nuair dh' aithneadh iad lasann na 'n ceannard.
'Nuair, &c.

Luchd na 'm flasgaichean fùdair,
'S na 'n cùibheirean dùghorm,
Na 'n claidhnean cùile,

[TD 182]

Na 'n dag air ghleus ùra,
Bhiodh sgiath na m'-ball dluth ar gach aon fhear.
Bhiodh, &c.

'S ioma oganach treubhach,
Bu mhaiseach fo fheile,
Lubadh deas air chul sgeithe,
Ghrad fhreagradh an eighe,
Tha fo mhulad mu d' dheighinn 'sa 'n am so.
Tha fo, &c.

Sud am bosd as 'n do ghin iad,
Dol le ordugh 'n Ceann cinnidh,
Ann an dóruinn na 'n iomairt,
Gun ghoruich gun ghiorrag,
Cha bu dochas doibh pilleadh gun ainneart.
Cha bu, &c.

Ach a Rìgh a shuidhich an garadh,
Dh' orduich meas agus blàth ann,
O 'n a chinnich na h-armuinn,
Cuir le h-ìochd na 'n càs orr an ceannard.
Cuir le h-ìochd, &c.

ORAN air teachd PHRIONNSA THEARLAICH.

Le te mhuinntir Lochabar.

Fonn-'S e latha Raon-Ruairidh, &c.

'N ULaidh phriseil bha uainne,
'S ann a fhuair sinn an drasd i,

B' i sud an leig bhuadhach,

[TD 183]

'Ga ceangal suas leis na grasan;
Ged leig Dia greis air aghairt,
Do 'n mhuic bhi claothach a t-aite,
Nis o 'n thionndaidh a chuibhle,
Theid gach traiteir f' ar sailtean.

Slan do 'n t-saor rinn am bàta,
Thug sabhailt air tir thu,
Slan do 'n iùldfhear neo chearbach,
Thug do dh' Albuinn a ris thu,
B' e sud am preas toraidh,
Thug an sonas do 'n Rioghachd,
'S lionar laoch thig fo d' chaismeachd,
Bheir air Sasunnaich strìochdadh.

Slan do 'n uachdran ghasda,
Dh' fhalbh bhar na Ceapaich di-haoine,
Rinn an cruinneacha' rioghail,
Chuir fo fhiamh iad le muigheadh,
Bha da Dhonull ri d' shlinnein,
'S do chuid gillean cha b' fhaoin iad,
H-uile aon mar bu luaithe,
'S cha robh uath' ach an saothair.

Ursainn chatha a chruadail,
Thug thu dhualchas o t-Athair,
Dia g' ur cumail an uachdar,
Chosnadh buaidh anns gach latha,
H-uile fear theid g' ur congnadh,
Ged b' ann le comhrug a chlaidhe,
Gu 'n robh Criosd agus coir leis,
Chur Rìgh Deors' as a Chathair.

Thighearna oig o bhun Airceig,
Ceannard feachd thu nach geilleadh,

[TD 184]

Sibh fein 's fir a Bhraghad,
Chuir ur nadur ri cheile,
Dà chraoibh chosgar a chruadail,
Air thoiseach sluaigh a rinn eiridh,
Aig a bhaile agus uaithe,
Ur neart an guaillibh a cheile.

Thig dream foghainteach fearail,
A Gleanngaradh 's a Cnoideart,
Na cinn-fheadhna nach pilleadh,
Nach gabhadh giorrag roimh chomhrug,
Gu borb, armailteach, lionar,
Rachadh sios ann ad chomhail,
'S mairg a tharladh fo 'r buillibh,
Shìol na 'n curainean coire.

Shir Alasdair uasail,
Nach gluais thu air t-aghaidh,

Leam 's fada tha t-fhuireach,
Gun bhi air thuras na 'n deighidh,
Le d' bhrataichean lionar,
'S ioma ciad a th' ann a t-fhaodhaid,
O 'n bu dual duit bhi fuileach,
Leig do chuilein air aghairt.

Tha do chinneach fo mhulad,
Fath t-fhuireach 'sa 'n uair so,
O 'n 's ann uilinn ri uilinn,
Bu mhath gach spionnadh gu cruadal,
Ciod a chuis tha fo 'n chruinne,
Ris an cuireadh sibh gualainn,
Nach biodh sibh 'n ur 'n urrainn,
A chlacha' mullaich na buannachd.

Chlann Ghriogair a chruadail,
O 'n bu dual duibh bhi tapaidh,

[TD 185]

Fhuair sibh roimhe ur diteadh,
O luchd ur mioruin gun cheartas,
So an t-am dhuibh bhi dusgadh,
Thoirt ur duchar fein dachaidh,
'S ged 's fhad o 'n tha chuing oirbh,
Theid na Guimhnich f' ur casaibh.

'Nuair theid gach cinne ri cheile,
Eidear Sleibhte 'sa Cheapach,
Eidear Uithist a's Muideart,
'S Mac Iain Stuairt na h-Apunn,
Bidh a Ghaidhealtachd uile,
Gu treun fuileach 'sa bhaiteal,
'S ged nach tigeadh na Guimhnich,
'S beag ar suim do 'n phachd ud.

Sgrios le claidhe gun dearmud,
Air gach cealgair breige,
Tha o dhuine gu duine,
Cuir bun anns an eucoir;
Nis o 'n thainig an Rionnag,
Teannaibh uile ri cheile,
'S leibh clach mhullach a chausair,
Anns gach aite g' a 'n d' theid sibh.

Bha 'n Sleanaileir gòrach,
Tigh'n a chomhrug na 'r n' aghaidh,
'S teann nach islich e shron,
Ged thig e sporsail air aghairt,
Ach na 'n cumadh e chomhail,
Mur bha ordugh a claothair,
Bu lionar fear casaig,
Gun cheann, gun chasan, gun fhradharc.

Deanaibh cruadal a's misneach,
'S ann a nis a tha 'n t-am ann,

[TD 186]

O 'n thainig an solus,
Thogas onoir na h-Alba,
Fhir a sgaoil a mhuir ruagh,
'Sa thug fuasgladh do dh' Abram,
Bi mur gheard air a Phrionnsa,
Air a chuir 's air a phairtidh.

ORAN do dh' ALASDAIR MAC COLLA;—Le Diorforguill N' 'Ic a-Bhriuthain
bh'ann an Luinn an Lathurn-ìochdrach.

ALASDAIR a laoigh mo cheille,
Co chunnaic no dh' fhag thu 'n Eirinn,
Dh' fhag thu na miltean 's na ceudan,
'S cha d' fhag thu t-aon leithid fhein ann,
Calpa cruinn an t-siubhail eutruim,
Cas chruinneacha' 'n t-sluaigh ri cheile,
Cha deanar cogadh as t-éugais,
'S cha deanar sith gun do reite,
'S gar am bi na Guimhnich reidh riut,
Gu 'n robh an rìgh mur tha mi fhein duit.

E ho, hi u ho, ro ho eile,
E ho, hi u ho, 's i ri ri u,
Ho hi u o, ro ho o eile,
Mo dhiobhail dith na 'n cinn fheadhnaidh.

Mo chruit, mo chlarsach, a's m' fhithioll,
Mo theud ciuil 's gach ait am bithinn,
'Nuair a bha mi og 's mi 'm nighin,

[TD 187]

'S e thogadh m' inntinn thu thighin,
Gheibheadh tu mo phog gun bhruithinn,
'S mar tha mi 'n diu 's math do dh'ligh' oirr'.
E ho i u ho, &c.

Mhoire 's e mo run am firein,
Cha bhuachaille bho 'sa 'n innis,
Ceann feadhna greadhnach gun ghiorrag,
Marcaich na 'n steud 's leoir a mhìre,
Bhuidhneadh na cruintean d'a ghillean,
'S nach seachnadh an toir iomairt,
Ghaolaich na 'n deanadh tu pilleadh,
Gheibheadh tu na bhiodh tu sireadh,
Ged a chaillinn ris mo chinneach,
Pog o ghruagach dhuinn an fhirich.
E ho i u ho, &c.

'S truagh nach eil mi mur a b' ait leam,
Ceann Mhic Cailein ann am achlais,
Cailein liath 'n deigh a chasgairt,
'S a 'n Crunair an deigh a ghlacail,
Bu shunnach a gheibhinn cadal,
Ged a b' i a chreag mo leaba.
E ho i u ho, &c.

M' fheadail thu dh' fheara' na dìle,
'S math 's aithne dhomh do shloinne innse,

'S cha b' ann an cagar fo 's 'n iosal,
Tha do dhreach mar dh' orduich Righ e,
Falt am boineid tha sinteach,
Sar mhusg ort no cuilibhair,
Dh'eighte geard an cuirt an Righ leat,
Ceist na 'm ban o 'n Chaisteal Ileadh,
Dorn geal mu 'n dean an t-or sniamhan.
E ho i u ho, &c.

[TD 188]

Donullach gasda mo ghaoil thu,
'S cha b' e Mac Dhonnchai Ghlinne faochann,
Na duine bha beo dheth dhaoine,
Mhic an fhir o thùr na faoileachd,
Far an tig an long fo h-aodach,
Far an oilte fion gu greadhnach,
'S mo dhiobhail dith na 'n Cinn fheadhna.
E ho i u ho, &c.

Mhoire 's e mo run an t-oigeir,
Fiughantach aigionntach sporsail,
Ceannard na ceathairne moire,
'S mise nach diultadh do chòradh,
Marr-ri cuideachd no am onar,
Mhic an fhir o 'n innis cheolar,
O 'n tir am faighte na geoidh-ghlas,
'S far am faigheadh fir fhalamh storas.
He ho i u ho, &c.

Bhuailte creach a's speach mhor leat,
'S cha bhiodh chridhe tigh'n a t-fheoraich,
Aig a liuthad Iarla a's Mòr-fhear,
Thigeadh a thoirt mach do chòrach,
Thig Mac Shimidh, thig Mac Leod ann,
Thig Mac Dhonuill duibh o Lochaidh,
Bidh Sir Seumus ann le mhor fhir,
Bidh na b' annsa Aonghus og ann,
'S t-fhuil ghreadhnach fein bhi ga dortadh,
'S deas tarruing na 'n geur lannaibh gorma.
E ho i u ho, &c.

'S na 'n saoilleadh cinne t-athar,
Gu 'n deanadh Granntaich do ghleidheadh,
'S ioma fear gunna agus claidhe,
Chotainn uaine 's bhreacan dathail,

[TD 189]

Dh' eireadh leat da thaobh na h-amhunn,
Cho lionar ri ibhte an draighin.
E ho i u ho, &c.

Ged tha mis' am phaiste suarach,
Thall sa bhos mu uisge Chuain so,
Na 'm biodh mo chrobh air na buailtean,
Mo ghreigh a taoghal na 'm fuaran,
'S mo chaoirich gheala ga 'n cuartach,
Ruibeinean ceangal mo ghruaige,
Gur lionar fear a bhithte luaith rium.

E ho i u ho, &c.

Mhoire 's iad mo run an comunn,
Luchd na 'n cul buidhe a's donna,
Dheanadh an t-iubhar a chromadh,
Dh' oladh fion dearg na thonnadh,
Thigeadh steach air mointich thollaidh,
'Sa thogadh creach o mhuinntir Thomaigh.
E ho i u ho, &c.

Cumha do SHEUMUS MAC-A-PHEARSAIN*, fear Ràt am Baideineach; Le Donnacha
Mac Aoidh, no mur chomh ainm, Donnacha Gobha.

CIA sibh a luchd aobhair?
Nach caoin sibh ur bochdainn,

<eng>* The translator of Osian's Poems.<gai>

[TD 190]

Cha do dhealaich an t-aog ruibh,
Gun fhiach a shaoithreach a chosgairt;
'S mor dosgainn na dùthcha,
Dh' easbhui' cliùth agus fortain,
'S mor is miste mi fhein e,
Tha mi leughadh dheth rosad.

Shalaich an sannt ud ur cridhe,
Cha dean cuibheas na 's leoir duibh,
O nach tigeadh Elias,
G' ur nigheadh an Iòrdan,
Bheir sinn aite dh' Iehàbha*,
Gus an naraich e beo sibh;
Leanaidh an luireach ur fardach,
Mur grad thionndaidh sibh dochas.

'S aobhar mulaid d'a thuath e,
Bhi mu 'n cuairt da na luidhe;
Ach cha 'n aithnich iad muthadh,
Gus an turlaing an t-ath-fhear;
Math dh' fhaoite nach diu leis,
Aon suil thoirt g'a 'n amharc,
Ach an orduch' air faontradh,
'S fear na daorsainn a ghabhail.

'S aobhar mulaid do t-uaislean,
Bhi mu 'n cuairt do d' chorp flathail,
Ged a ghabhadh tu gruaim,
A nithe suarach gun chathadh†,
'Nuair a lasadh an curam,
Fad a null thair an amhuinn,
Bu mhath ann air an cul thu,
Chuir an cùisean gu tabhuill.

<eng>* Jehovah.

† Frivolous affairs.<gai>

[TD 191]

Bu tusa athair na 'n àsran,
A dh' àrach na 'n dileachd,
'Sa thogadh an aird iad,
Do chairdean na 'm b' fhiach iad,
'Sa ghleithheadh dhoibh an rathad,
Gu fraigheadh na Criosdachd,
'Sa ghleithheadh am franc dhoibh,
Cho fada ri 'n sgriobhadh.

Chuir e or ann 'sa 'n talamh,
Nach caraich fear feumach,
'S nach urrainn fear rapach,
A sgapadh o cheile,
Tha e sgrìbht' aig Mac Mhuirich,
Ga chumail ri cheile,
Thun an t sìolaig a b' isle,
Bha e dileas da Iarlach.

'S math dh' aithnich e 'n saoghal,
Gu 'm bu mhaorach neo ghlan e,
Mur cheo anns a ghaoidh e,
A chaochlais mur fhaileas,
Bha thuigs' ann an réusan,
Ri diol deirc agus aithridh,
B' e chuibrinn a b' fhear dheth,
Nach b' urra 'm bas thoirt o anam.

Chuir e chridhe 'sa chomus,
An co-chomunn ri cheile,
Sgrios e iomhaidh na h-airce,
Sios o rampair a phélis,
Rinn e cuilm ann na * luicheirt,

* Lùchairt.

[TD 192]

Thug e trusadh gu leir dhoibh,
Bha e mur shéula 'n am sìothchai',
Bhi ri iobairt na reite.

A Rìgh gur bochd a tha mhuinntir,
'Nuair a dh ionnsaich e riamh dhoibh,
Bhi cluith air na h-urlair,
Bha sgùirte le siabunn,
'N diugh coimhead a phèilis,
Mur sheann duine liath i,
'S nach faic iad ri 'n saoghal,
Fear aogais g'a riaghladh.

B' e urla na maise e,
Ri fhaicinn na eideadh,
B' e rionnag a ghliocais,
Anns gach cuideachd an eight' e,
B' e ciobair a chinne,
'S e lan giorrag mu 'n deighinn,
'Sa 'n tim shuidhe na Parlmaid,

'S mor an call doibh gu 'n d' eug e.

'Nuair bhiodh e air faiche,
Ann an coidse na 'n séusa,
B' e ordugh na botail,
A chost agus eigheach,
Ach 's e 'n togail mu dheireadh,
A fradharc 's na céisean*,
Bhios mur chuimhne do 'n t-seana-chloinn,
Gu bhí ga sheanchas ri cheile.

<eng>* That he was covered with three different coffins,—a coffin of the fir of Glenfessy next his corpse, and that covered with a lead coffin, and a coffin of mahogany above all; which were his orders before his death.<gai>

[TD 193]

Ged a gheibhinn e sgrìbhte,
Na miorbhuilean rinn e,
'S na chost e dheth nith,
Cur malailì air an oighreachd,
Do na h-ailleagain phriseil,
Nach robh diomhain gun fhoinn doibh;
'S dubh a bhoile dhomh innseadh,
'S nith diomhain duibh fhaighneachd.

Bha mise ga bheachdach,
Na 'm b' aithne dhomh innseadh,
O latha a bhaistidh,
Gu latha a chriche,
Ann an Albuinn na 'n Sasunn,
Mur saltair mi 'n fhirinn,
Cha b' aithne dhomh leithid,
G'a chaitheadh 's ga dhianadh.

'Nuair mhiannaich sinn airgiod,
Thainig meall oirnn gun fhios duinn,
Lamh an t-sonais ga sgaoileadh,
Nach do chaoin ann n' ar measg e,
Ach tha moran dhiu 'g radh,
'S beag is fearda na 's miste,
Sud mur mholar an t-armunn,
Chuireadh plàst r' ar bristeadh.

Ged shirinnse deonach,
Leis an eolais a rinn mi,
Eidear caolas King-horn,
Agus crò Ionmhuraora,
Eidear geat' Ionmhurlochaid,
Agus Deo* uisge-speith so,

<eng>* Deo, Inver, or where water runs into the sea.<gai>

[TD 194]

Cha 'n fhaighinn a leithid,
Dh' fhear tighe ann am féileachd.

B' e thioma ri mnaitibh,
Na bh' air a dh' athais no dh' éucoir,
No na b' urrainn siol Adhamh,
A charadh ri chreubhaig,
Ach rinn trocair sin dha-san,
Nach d' fhailling 's nach steinneadh,
'S mar thruailleachd an fhasaich,
Gu 'n d' fhag e na dheigh e.

'S lionar baintighearna ghasda,
Mar shneachda na h-aon-oidhch',
Bhios ag iondrain a thlachda,
Aiteas, 'sa chainnte,
Bhios a deoiribh a frasadh,
'S iad a tachairt air adhlaic,
Ach 's e aobhar an rachdaidh,
Nach glac iad air laimh e.

Gur a h-eiginn dhomh stad dheth,
Tha laigs' ann mo chuimhne,
Cha leir dhomh na 's faide,
Mu fhasan an oighre,
Ach ma thig e g'a dhuthaich,
Le a chuir ann an caoimhneas,
Bheir mise car fhathasd,
Air ratha na cuibhle.

Aon mhile, seachd ciad,
Siath diag a's trificheud,
Air feasgar diciadain,
Do 'n ath-mhios thainig bristeadh,
Fhuair e 'n-suman' a Ràta,

[TD 195]

O 'n bhas le comisein,
Dhol a Lunnainn do 'n àraich,
Gu la bhrath as nach d' thig e.

Bu mhor a mheas a's ard urram,
Air clach mhullaich a chausair,
Le sholusa' ceire,
Ann na choinnleirean airgid,
Ann an Abailt na 'n Rìghrean,
Na sheasadh dileas na 'n rancan,
'S gu latha na criche,
Gheibh sibh sgrìbhte fearr ainm ann.

Ma tha coigreach 'sa 'n lathair so,
A dh' fhairdeas m'a dhéighinn,
Na stuic as an d' fhas e,
'Nuair a thar e cho speiseil,
Mac Muirich a b' aille,
Chuir fa shailtean na ciadan,
B' ann gu 'n sonas a bha e,
Na 'm bu dail gu bhi liath dha.

Bha beannachd a mhathar,
A slanugh' a chreuchdan,

Agus beannachd luchd cearde,
Bha iad craiteach mu dheighinn,
Beannachd bhochd agus tuatha,
Aig an uan so chaidhe cheusadh,
'S tha leighich am Pharais,
'S thug e slainte do Sheumus.

[TD 196]

ORAN do DHONULL bàn MACDHONUILL duibh, Tighearna Lochiall; Le Alasdair
Camashron Dhochanasai' 'n Lochabar.

So deoch-slaiente mo ghaisgich,
'S coir a faicinn ga lionadh,
'Sa cumail an cleachdadh,
Mur fhasan a-rireadh;
H-uile fear leis nach ait i,
Fagam easan an iota,
Bhi ga h-ol gur h-e b' annsa,
Mas a branndaidh no fion i.

Mas a branndaidh math cruaidh i,
Druid a nuas i ga feuchainn,
'S gu 'n cuirinn lan cuaich dh' i,
A suas fo chlar m' éudainn,
'S olc an obair do chairdean,
Bhi mi-ghradhach mu cheile,
'Sa h-uile fear leis an aill i,
So deoch slainte na'n réubal.

'Sa Dhonuill oig Abraich,
Do shlaint' gu 'm faic mi mu 'n cuairt i,
'N t-og firinneach smachdail,
Nach robh tais an am cruadail,
'S beag iongnadh an t-ardan,
Bhi gu h-ard ann ad ghruaidhean;
'Sa liuthad fuil rioghail,
Tha sioladh mu d' ghuaillibh.

[TD 197]

Gur lionar fuil fhrasach,
Th' air a pasgadh fo d' leinidh,
O shliochd Mhànuis Mhic Cairbridh,
Bha gu h-armailteach treubhach,
Le sgiathaibh breac dubailt,
'S le 'n lùiricheann treuna,
'N am dhoibh dol anns' an iomairt,
Cha b' e tilleadh bu bheus doibh.

Gur lionar do chairdean,
Ann an Albuinn ri 'm feuchainn,
'S car' thu dh' oighre na Dreòllainn,
'S do Shir Donull a Sleibhte,
Do Mhac Shimidh na 'm bratach,
Nach robh tais an am féuma,
Dh' eireadh Eoghun og Chluainidh,
'Sa shluagh leat gun éuradh.

Gu 'n eireadh Diuc Pheairt leat,

'S ard Mharcus na h-Einne,
Mur sud as Clann Chatan,
Le 'n glas lanna' geura,
Mac Mhic Raoghnuill na Ceapaich,
Le phrasgan glan treubhach,
'S Mac Iain Stiubhairt o 'n Apuinn,
Ceannard feachd e nach geilleadh.

'S tha thu cinnteach ad chinne,
Anns gach ionad an d' theid thu,
'S mairg dh' fheuchadh an ascaoin,
Cha bu tais an am feum iad,
Gu h-armach, acfuinneach, rioghail,
'S cha n' e striochdadh bu bheus doibh,
'S le farum an lamhaich,
Gu 'm biodh an naimhdean gun éiridh.

[TD 198]

'S dearbhadh air sin, Sliabh Chlamhain,
Gu 'n d' fhuair sibh barrachd an cruadal,
Thug thu 'n duthchas o d' shean'air,
B' ard cheannard air sluagh e;
Tha mo dhuil ann 'sa 'n Trianaid,
Mas a nith thig gu buaidh e,
Gu 'm faic mi thu 'd Dhiuca,
'N deigh an crun ud a bhuannachd.

Là na h-Eaglais bh' aig Hàlaidh,
Thug sibh barr air a bhuidhinn,
Nuair a thionndaidh na naimhdean,
Na 'n siath rancan 'sa bhruthach,
Dhuit cha b' iomurla 'n cruadal,
Ghlac thu 'n dualchas bu chuibhe,
'Nuair theann do chinne ri cheile,
Ghabh na beisdean mu shiubhal.

Cha b' e siubhal na slainte,
Bh' aig a ghraisg ud a teicheadh,
'S ioma cota ruagh maduir,
Bh' ann 'sa 'n araich gun leith-cheann,
Agus slinnein o 'n ghluualainn,
Agus cnuac chaidh a leagail,
Le luths na 'm fear laidir,
Ghabh an t-ardan gun eagal.

'S mairg a tharladh riu crosgach,
'N am dhoibh tachairt ri namhaid,
'S mo ghaols' air an toiseach,
Craobh chosgairt a bhlaire thu;
'Nuair a thogte do bhratach,
Le fir ghasda neo sgàthach,
'S ann le luths 'ur gaoirdein,
Bhiodh luchd beurl' ann 'sa 'n araich.

[TD 199]

ORAN do 'n fhreiceadan dubh Ghaidhealach; Le Alasdair Mac Griogair
Maigh'stir-sgoil an Dul, Apuinn a Mheinnearaich.

Air fonn an siubhail fein.

FAIGHEADH cliuth o gach rann-fhear,
Gu ceolar 's gu binn,
An dubh fhreiceadan Gaidhealach,
Dh' araicheadh 's na Glinn;
Cuimir' fuasgailte' finealta,
Slainteil 'sa chom,
Fearail, ceansgalach, cruadalach,
Treun agus trom.

SEISD.

'S gu robh buaidh leis na seoid,
Ghuinneach gharg agus bheo,
Chaidh do bhuillsgein na 'm Frangach,
Mur dhaimh dol 'sa cheo,
'S nach d' fheuch fhathas cul,
Do 'n dream nach robh leo,
Oir cha striochd sliochd na 'n Garbh-chrìoch,
A's annt-san an deo.

'S math thig breacan an fheilidh,
Gu leir do no suinn,
Osain ghearr air an calpanna',
Domhail, geal, cruinn,
Iteagan dorcha, air slios gorm uigheam cheann,

[TD 200]

Sud i éideadh na 'm blar,
'S cha b' i 'n té fhada theann.
'S gu robh buaidh, &c.

'S ceart a labhras iad canmhuin
Na h-Alba o chian,
Mur a bha i aig Fionn,
Agus Oisein gu dian,
Cha do ghluais thun na tuasaid,
'Sa choidhch iad cha ghluais,
Gun am bolg-fheadan meur-thollach,
Fhuaimneach na 'n cluais.
'S gu robh buaidh, &c.

Cha tearc gabhadh a's àit
As an d' thainig le buaidh,
Gaisgich chalma na co'ruig,
'Sna 'n dluth bhuillean cruaidh,
Roimh diomhanas saobh,
Aidhear, 's aoibhneas a thaobh;
Bhi deanadh an saorsa,
An duthchas 'sa 'n lagh
'S gu 'n robh buaidh, &c.

'S ioma deuchainn a fhuair,
Na fir ardanach bhras,
O nach geilleadh dhiu lamh,
'S nach tionndadh dhiu cas,
O nach faodadh gu 'n caochladh,
An dualchas na 'n cleachd,
Leis an d' fhagadh gun samhla;

An sinnsreadh 'sa ghleachd.
'S gu robh, &c.

Mur bhlath mhaduinn shamhraidh,
Iad ciùin ann an sith,

[TD 201]

Ach mur gheamhradh na 'm beann aca,
Geur ann an strìth,
Sgaiteach, gruamach, a luaithreadh,
Na 'n naimhdean le feirg,
Ga 'n cas ruagadh 's ga 'n sguabadh,
A àraichean dearg.
'S gu robh buaidh, &c.

Cha 'n eil iongnadh ni 's mo,
Ruith dhàsan nach geill,
Bhi mur dhearb corp marbh,
Gu 'm bu ghann e da cheil;
Seach an Ti leis nach b' fhearr,
Gun an eignì bhi slan,
Casadh riusan a suas,
A ta millteach a's dòn.
'S gu robh, &c.

Mur is gairge an namh,
Mur is cruaidhe an cath,
'S ann is airde 'n sin inntinn,
Luchd trusgan na 'n dath;
Tha 'sa 'n doruinn a fàs,
Ainm mor dhoibh air fad,
Leis an reub, leis am mill,
Leis an claidh iad gun stad.
'S gu robh, &c.

'S i so 'n fhirinn gu dearbh,
Air gach seoil agus doigh,
'S ga comh-dhaingneach gu dìlinn,
Bidh la Fontanòi;
Sud an la a thug ainm,
Dhoibh an tùs anns an fheachd,

[TD 202]

Bha an run uile dìleas,
Do 'n Rìgh 's do gach reachd.
'S gu robh, &c.

Chaidh an sàrach' 'sa 'n leon,
A bha 'n ceud charraid teith,
Aig Tecanteròca,
Ged a chaill iad an leith,
Na sheas, bhuannaich leo congnadh,
Na dh' aom gu ro threun,
Rinn a cho' strìth so rioghail iad,
Nuas feadh gach linn.
S gu robh, &c.

Rinneadh gnìomhradh leo,

Anns' gach tìr chum an deach',
Bhios na 'n iongnadh, 's na 'm mìorbhuile,
Gu brath do gach neach;
Cha leig an saoghal air dearmad
An treubhantas gu sìor,
'M feadh bhios speis agus mor-mheas,
Do shaighdeireachd fhìor.
'S gu robh, &c.

Ach co cheolraidh na 'n teangair,
Is oirdheirce th' ann?
'S urrainn innse mur bhuannaich,
'Sa 'n Eiphit a chlann,
Luaidh neo-ghann, gathan lann,
Sleaghan chrann chaidh gu luath,
Am fìr do bh-cheannasach do chàch,
O na h-armuinn o thuath.
'S gu robh, &c.

As na gairdeana' lùth-chleasach,
Feitheach, ghrad leum,

[TD 203]

Goimh a's bas a chuir miltean,
O chainnt a's o fheum,
Ghabh na saoithean 'sa 'n am,
Mìre 'n t-searbh-chath a's conn,
Dol troimh dhuintean a's àr-chlosach
Naimhdean le fonn.
'S gu robh, &c.

'S glan a dh' éirich am buaireas,
Air comhlan an àigh,
Le léir-sgrìos chaidh Frangaich,
A bhualadh gun bhàidh;
Thuit gach aon air an lar dhiu,
Na sheimh chadal buan,
'S thug na Gaidheil leo an stròl aca,
Nall thair a chuan.
'S gu robh, &c.

Mur so buaidh leis gach seoid,
Ghuineach, gharg, agus bheò,
Theid do bhuillsgein na 'm Frangach,
Mur dhaimh dol 'sa cheò,
'S nar fheuch iad an cul taobh,
Do 'n dream nach bi leo;
O nar strìochd iad gu sìorruidh,
A's annt-san an deo.
'S gu robh, &c.

[TD 204]

ORAN le AILEIN MAC DHUGHAILL, no mur cho' ainm, Ailein buidhe na 'n oran,
tuathanach bha ann an Gleann-domhain Taobh-lochotha, agus e ag iomadan an
deigh na 'n companoch, a bha posadh agus a falbh anns 'sa 'n arm, ri linn
Phrionnsa Thearlaich.

Fonn. Ged a tha mi 'n so am chruban; le D. Ban.

'S mi am shuidhe air deisir a ghlinne,
Gun tuille ann do ghillean oga,
'S beag an t-iongnadh mi bhi fo mhulad,
Dh' fhag am mifhortan mi 'm onrachd,
Ciod an stath dhomh bhi ga bhruidhinn,
Bu chompanach ro chridheil coir thu,
'S cia b' e thig a' t-aite ridhisd,
'S clach an ionad uighe dhomhs' e.

'N diugh 's ann leam gur a duilich,
'S gnothach muladach am posadh,
Chaill mi mo chompanach tuille,
'S cha 'n fhaigh duine rùn mo chòraidh,
Mire cha dean mi ri cruinneig,
'S cha toir maighdeann chuimir pog dhomh,
Chaidh a ghlas ghuib air mo mhuineal,
Cha seinn mi luinneag no oran.

Cha tog m' inntinn ri fidhill,
Thuit mo chridhe fo dholas,
Dh' fhas mi ceann-riabhach mur chuileig,
Chuir am mulud culaidh bhroin orm,

[TD 205]

Cuimhneachadh mur bhimid cuideachd,
'Sa chuicheineachd am bimid comhl'a,
Leiginn riut 's cha chluinneadh duin' e,
'S gheibhinn t-fhuran gus 'n do phos thu.

Gur bochd an reachd a tha n' ar duthaich,
Bhi toirt dhiu na 'n gillean oga,
'S coimhdheis fear coibe leo no suisde,
Na fear nach do chuir ùidh ann am posadh,
Eidear siath-deug a's tri fichead,
'S coimhdheis leo miotailt no fleodar,
Le corr 's tri chairt a dh' iarunn sgriosaidh,
'S i leannan na misnich nighean Deorsa.

Cha do chuir mi ùidh 'sa 'n leannan,
Ga 'm biodh an anail gun seal sroine,
Chuireadh luaidhe ghlas na deanna',
'Nuair lubte mu 'n taruing an ordag;
Gur mor a b' annsa leam an cailein,
Cho chaol mala 's ibht' an lòin-duibh,
Ga 'm biodh an stiom air son anaird,
'Sa lamhannan geala mu dornaibh.

Ach ghlac mi 'n sin smuaintin aithghearr,
'S chuimhnich mi sean fhacal neonach,
Gu 'n cuir duine snaoim le theangaidh,
Nach fuasgail ionga no ordag,
'S rud eile ga 'n tug mi 'n aire,
Nach gille-mirein am posadh,
'S nach leighis aithreachas breamas,
Ma ni fear dhiu gnothuch gorach.

D' fhag iad sinn mur choin air fuighlich,
O 'n a chaidh na cuibhrich oirnne,

Brigis ga druideadh m' ar cuinseir,

[TD 206]

'S iall ga dunadh mu chul ar toine,
B' annsa luidhe mach 'sa 'n oidhche,
Na gu 'n cuirte cruinn an crò sinn,
'S e achd is measa bh' ann r' ar cuimhne,
Bhi g' ar cuir air luing do 'n Tòlainn.

Chuala' mi eachdraidh mur sheanchas,
Gu 'n robh aig an Rìgh seana-dhall eolach,
'S rainig mi e dh' iarruidh comhairl';
Cionnus thaghainn mnathan oga,
Nochd mi dha m' aodann a's m' aghaidh,
'S thagh mi dha raogha mo chòraidh,
O 'n fhuair e gliocas an domhain,
Chuir a ghnothaichean an ordugh.

Bha 'm bodach gu samhach tosdach,
'S e 'g osnaich air feadh a sheomair,
Smuainteachadh air fear mo choltais,
Choisich an t-asdar mor sin,
Gu 'n robh mi cho ladurna dhana,
'S thigh'n an lathair fear a chota,
'S na 'n innseadh e bharail saor dhomh,
Gu 'n sgaoilinn e air an oigridh.

'S rud beag eile bha ormsa 'n daille,
Nach robh soilleir dhomh as m' oige;
Co dhiu b' fhearr dhomh luaths no maille,
Na 'n robh coire dhomh sa phosadh,
Sin 'nuair a labhair Giollasbuig,
Cha chron duitse smachd na h-òige,
'Sa 'nuair nach gabh iad ann 'sa 'n fheachd thu,
Gu 'n seasadh do mhac an seorsa.

Gur a tric mi ann an iomaguin,
Agus cuir-iomachuir orm an comhnuidh,

[TD 207]

Bhi giùlan gunna agus urachair,
Nach deachaidh riamh ri cuimse sheoladh;
Ach na 'm faighinns' air a mhaoisleach fuireach,
Am fasach 's nach cluinninn ri m' bheo e,
Co dhiu bhiodh innte brais no giorrag,
Chostainn dusan buill' an ord r'i.

'S e chum mi cho fad air an rathad,
Eagal meathaidh 's gun bhi eolach,
'Nuair thig am dhomh dol a luidhe,
'S beag mo shunnd ri mnathan oga,
Fasaidh mo cheann trom le cadal,
O 'n chleachd mi bhi luidhe 'm onrachd,
'Sa 'nuair nach deanainn cleas fo 'n phlaididh,
Gu 'm biodh ise 'sa mhaduinn sròn-ard.

Ach ni giullan feum le dhurachd,
'Sa chùis so gar 'n d' fhuair e fhoghlum,

Obair gu dian air a ghlùinean,
Aois agus tùr ga sheoladh,
Ise air a druim gu h-umhal,
'S easan air an sdiuir na onrachd,
Ionnairidh mhor, luath as fuchdadh,
Séitil agus ùinich mhor orr.

Latha dhomh 's mi siubhal romham,
'Sa 'n rathad nach robh mi eolach,
Chunnaic mi cama-chraos a bhothain,
'S e gach latha 'm feum a chomhdach;
Chuala' mi glaodh aig a bhochdainn,
Sgal-chuill aig docair ri dòlum,
Clann ag caoidh, mnaith ag osnaich,
Gur h-e 'n tigheadas chost an stròas.

Bidh ise gu cuibeineach odhar,
'S bidh esan na ghobhainn duhh dòithte,

[TD 208]

Am paist' cha 'n fhear e na 'n oibhisg,
'N urra 's foghainntich do 'n t-seorsa;
'N te sin bha gu ruibeineach dreiste,
Gu h-urar, fasanta, lomhar,
Shruth i mur shobhrach ri fras sneachda,
Shuidh a's sheachd i leis a phosadh.

Nuair chunnaic mi meud na trioblaid,
Cheannaich mi brigis mhath chloithlein,
Agus putain laidir mhiotailt,
Amhchunnan gu 'n diochdadh cord romp;
'S thug mi mionnan ard ri m phiostal,
Na 'm bristeadh e gin do 'n t-seors ud,
Gu 'n ceannchainn mogan glaise thiotadh,
'S nach biodh e cho tric co shron-ard.

ORAN toirt comhairl do ghillean oga na tuatha, tobhsainn ri 'n coimpirean
fein, agus diomoladh na 'm ban uaisle. Le Ailein Buidhe.

Fonn.—'Se latha Raon Ruairidh, &c.

BHEIRINN comhairl air gach fleasgach,
Tha 'n airde teas agus tuath dhìom,
Iad thoirt lamh air an seise,
'S gun bhi streap ri mnaoi uasail,
O 'n tha sinn chomhnuidh 's na gleanna',
'S gach earrach tigh'n cruaidh oirnn,

[TD 209]

Ge math gréus chuir air anard,
B' fhearr dhuinn banarach buaile na te dhiu sin.

Gur h-ioma gille tha luidhe,
Gun bhean tighe gun triallachd,
Gun trom inntinn ach aidhear,
H-uile latha 'sa bhliadhna,
Aig ro mheud an amhairc,

'Mac 'sa 'n t-athair cho chiatach,
'N te gheibhear cha ghabhar,
'Sa 'n te nach fhaighear 's i dh' iarrar mur eil e glic.

Gur h-ioma gille ro fhalamh,
Is aithne dhomh 'm eolas,
Thagh diasanach caileig,
'N teas a fala 'sa feola;
'S ma tha e gun airgiod am bannaibh,
Gun chrodh ballach gun storas,
'S lamh chuir an toiseach na h-aimirt,
Dhol ga cheangal ri leoideig le ruibein breac.

Mas a fleasgach lan boch thu,
Tagh do stochd 's do nith gluasaid,
Tagh da reir sin do leannan,
Mu 'n d' theid i tharad an uabhar,
Mas aill leat bhi socair,
Thoir bean a toiseach na tuatha,
Gur h-ioma fear chaidh a mhealladh,
Le dol an lann-fhuil na 'n uaislean 's le ara-mach.

Tagh aobhrach mna tighe,
Bhios gu mathasach suairce,
Thogas laogh agus gamhuin,
'S ni crodh a's aighean a chuallach;
Ma bhios 'n da cheaird air a lamhan,

[TD 210]

Nar a lughaid ort uair i,
Mu ni i gu ro mhath,
Nigheadh, dreasadh, a's fuaitheal, a's grinneas bhan.

Faigh deas i na pearsa,
Air a cleachdainn ri fuaradh,
'Sa bhios eolach air deisir,
'Sa sheasas air tuathair;
'S mu ni i gu ro mhath,
Greidheadh cartadh a's buain duit,
Bidh tochar do mhnatha,
Tigh 'n gach lath' air do bhuailidh le cinneas math.

Gluais gu siobhalta farasd,
'S dean do mhalairt measg tuatha,
'S bi geur-shuileach ad sheallamh,
Air gach caileig mu 'n cuairt duit,
'S feuch an dean thu deagh aithne,
Mu 'n tarruing thu suas r' i,
Gur h-eunag ur ghlan i,
Nach tilgear breamas na tuaileas ort as a leith.

Na tugadh tàir do na focail,
Air son an stochd as 'n do bhuaibh iad,
Ged tha goraich na chlaigeann,
Agus aigne so ghluasaid;
Ge b'e bheireadh geur bharail,
Air carachd an t-sluaigh ud,
'S tric bha comhairlean ro mhath,
'N ceann an amadain ghuaich bu don' air bith.

[TD 211]

ORAN a moladh na 'm ban uasal, agus a diomaladh na 'n cailean; Le Ailein Buidhe ceudna.

Air fonn oran na h-aoise.

'S MOR mo mhulad gu bràth,
Cha chluinnear mo dhàn,
Tha aithreachas a ghnà ga m' théumadh;
Bhi cuir chailean an àird,
Ann an urram thair chàch,
'S gun ach burrainnean làidir bréun annt;
Tha mise fo phnàmh,
'S gu 'm fuiling mi 'm bàs,
Aig ro mheud mo nàir mu 'n déighinn;
Mur gabhar gun dàil,
Mo leith-sgeul ri càch,
Gur breisleach bha 'n àite céill orm.

B' annsa maolanach og,
Bhiodh staoigheas ga coir,
Chumadh suidheacha comhnard cleibh oirr';
Le gùn a's le cleoc,
'S dreas do dheanas a meoir,
A's ruibein ga chomhdach glé theann;
Gar 'm faighinn lea stor,
Cha bhithinn ga bhron,
'S gu 'n tigeadh air da sheol ri chéile;
'S i 'm falachd cho mor,
Gur taic i ri m' bheo,
Ga m' sheasadh an coir 'sa 'n éucoir.

[TD 212]

Bidh ise gu cruinn,
Air cuibhill na still,
Cuir uigheam ro ghrinn air éudach;
Fuaim roithean na 'n deann,
A's piurna le srann,
Cuir cadal am cheann ga 'n eisdeachd;
Greis eil' air Jack reel,
Cuir chutaichean cruinn,
A bhuidhinn a ghill le gleusdachd;
Le h-orain cho grinn,
'S gu 'm bu bhinne guth cinn,
Na fithioll cuir fonn le teudan.

'S chumainn caile f'a laimh,
Thuigeadh gach ceàird,
Anns gach srath agus ard da 'n d' theid i;
Chuireadh fodar air aird,
'N co' uigheam ri cach,
'Sa dheanadh am barr a ghreidheadh;
Sheasadh sabhal a's amh,
As ruideal na laimh,
Dheanadh gabhail a's caramh na spreidhe;
Ghlacadh bara a's gràp,
'Sa chuireadh dùnan air aird,

'S dheanadh ùbraid laidir treun duinn.

Ach mas bean leat nigh'n bodaich,
Bh' aig doimeag ga togail,
Gun fhaoileachd gun fhosgladh ri tréun fhear;
'Nuair thigeadh do charaid,
Bhiodh gruaim air a malaidh,
'Sa da shuil dol an ceannaibh a cheile;
'Nuair thigeadh chuideachd a thograinn,
'S gu 'm bu spurt cuid d' ar n' obair,
'Sa bhimid lan sodain le cheile,

[TD 213]

Dheanadh a chaile gu h-obainn,
Cleas na caoracha dodaich,
Breab a bhualadh 'sa ghogan le breine.

Bhiodh mo chridhe fo bhron,
Aig an dubh-chaile mhoir,
Nach tuigeadh a chòir seach éucoir;
Ged bheireadh i stroic,
Air obair na 'n dorn,
Fhad sa chumainnse seol air breineig;
'Nuair thigeadh tra nòin,
Bhiodh a tigh-sa na fhroig,
Le dorchadas mor gun leirsinn;
Bhiodh a chaile na steoc,
'Sa da laimh m'a glun mor,
'G amharc eidear dha fhoid air éi'leig.

Cha bhiodh tuille ri fhaicinn,
Dreach duin' air do phearsa,
'Nuair gheibheadh i glas leis a chleir ort;
Bhiodh a chaile na cadal,
Gun chuibheall bhi aice,
Gun mhoch-eiridh mhaduinn 'n am éiridh;
Gun chota gun bhreacan,
A b' fhiù do dhuin' fhaicinn,
Latha math clachain no féille;
'N ait' bhi 'sa 'n fhasan,
Le anarda' dreisde,
Gu 'm bu duibhe na 'n fhasair do léine.

Ach na 'm faighinns' bean ùr,
A thuigeadh mo rùn,
Ged bhiodh cuid-thruim na cùise bu trein orm;
'Nuair thigeadh fear ùr,
'N am dheanadh an iùl,

[TD 214]

Gu 'm foghnadh dhomh 'n t-suil a chéugadh;
'Nuair dh' eireadh i suas,
'Sa chithinn a surd,
Gu 'n eireadh mo shunnd r'a beusan;
Bhiodh ise 's b' e 'cliùth,
Gu freasdalach dhùinn,
Olc mhath ga 'm biodh a chuis da reir sin.

Gluais lea o aois t-òig,
Gu faicilleach còir,
Gun mhionnan, gun bhòsd, gun bhréugan;
Cum na faithntean mur 's còir,
'S thoir gu daingean do mhoid,
Nach brist thu le d' dheoin aon te dhiu,
'Nuair thig sumana' oirnn,
A dh' ionnsaidh a mhoid,
Gu 'm bath an cuan mor ar 'n éucoir;
'S ged tha failling n' ar feoil,
Gu 'n d' rinn sinn do 'n choir,
Na choisneas gloir da reir dhuinn.

ORAN molaidh Cruaich Narachain, le Ailein Buidhe.

AN t-urram do Chruaich Narachain,
Seach fearunn tha fo 'n ghrein,
'M bi earbaichean le meannaibh,
An glaic annasaich leo fein;
'S tric bha aobhar ghaire,
Na 'n ruith roimh fhasach reidh,

[TD 215]

Gaodhar bus-dubh mairt,
A's bochd laidir ceann dearg treun.

Gur tric ad ghlaican uaine,
Damh eangach 's luaithe ceim,
Gu cabrach, ceannard, guanach,
Croiceach, 's uallaich ceim,
'S gur h-ioma fleasgach uasal,
Theid do 'n Chruaich na 'n deigh,
Le ghunna air a ghualainn,
'S le chuilein uain air eill.

Gheibhte sud a' t-àrd bheanna',
Na tàrmuchain 's na féidh,
An gleannaibh caol a fàsaich,
'S iad àilleasach air féur;
Am fridh na 'n eilid cràdh-dhonn,
Bhiodh an àl na 'n déigh,
An damh a dol 'sa 'n dàmhair,
Le a langan ard a leum.

'S bidh air gach tom, blar cathachaidh,
Gach cearc le h aidhear fein,
'S gur h-ioma fear gun chlaidhe,
Bheir crathadh air a sgeith;
'S aig meud an spurt bhi 'ga 'n amharc,
Cha 'n fhaighear chuir an ceill,
Bhiodh ciad luchd ceileir aidhearach,
Roimh' latha seinn am beus.

'S 'nuair dhireadh sealgair sunndach,
'Sa mhaduinn chùraidh chéit;
Thogail ris na stùcan,
Far 'm biodh fear ciùil gun téud,
Gur moch a ni e urnaigh,

[TD 216]

A sior thoirt cliuth do 'n ghrein,
'Sa leannan air a chùla,
'S cha lub i glùn g'a ghéard.

Tha loch ad mhullach còmhnard,
Le a chladach bòidheach réidh,
'S am bradan lannach geòbach,
A' snamh le steòirn gu treun,
Tarr buidhe mur òr air,
A's giùran neonach reidh,
'S e gu h-iteach seolta,
Ri cuileig mhoir a leum.

'S i sud a Chruach bha ainmeil,
'N tighe foirmeil bh' aig an Fheinn,
Le 'n teaghlach mor bha aincheartach,
'S le 'n gillean meamnach treun,
Bha dusan tigh 'sa 'n talla ud;
Anns gach rum da aingeal deug,
'S b' e 'n cunntas 'n am an garaidh,
Mu gach aingeal fear a's ceud.

Latha dhomh 's mi cuartachadh,
Na cruaidh ud 's mi leam fein,
B' iongnadh leam 'nuair chuala' mi,
Inneall mur fhuaim theud;
Ceol iollagach 's deagh fhuaim aig,
Bu bhinneas cluas domh fein,
Mur chluig chiùil a bualadh,
No fithioll 's nuallan béus.

A's chunnacas cuideachd uallach,
Dol suas r' a fear breig;
Ciad smeorach le fead chuaiche,
Ciad druid bu luaithe beul,

[TD 217]

'S gach eun le 'n ceileir guanach,
Cuir suas air gach teud,
'S gu ma fearunn buan i,
Do Dhonnacha Ruagh na feil.

ORAN bo dhaoin uaisle dh' fhag an duthaich air chuairt; Le Ailein Buidhe.

MAOLACHADH a's Cailein Chruachain,
dh' fhalbh uainn comhla',
'S tric mi farraid ciod is gluasad
do 'n da oigeir,
Cha d' fhag iad an leithid mu 'n cuairt
do ghillean oga,
Ach iad bhi amaideach gu gruagaichean
a phogadh.

An treasa fear cha 'n fhag mi diochuimhn,
Màistir Cailein*,

Chaidh e 'm falach an Loch-fine,
's shluig muc mhar e,
Liubhradh air traigh Lit' e
gu bhi na mharaich,

<eng>* This gentleman was a young student; but preferring the occupation of a sailor to that of a minister, he put off his clothes on the shore of Lochfine, to make his friends believe that he had drowned himself, and went off to Leith, where he engaged himself to go to sea.<gai>

[TD 218]

'S raoighnich e claidhe chinn Ilich
air a chrannaig.

So beannachd o Sheumus Rudail,
la run slainte,
Le eibhneas thu thigh'n a rithisd,
do dh' Earraghaidheal,
Seas air t-ais le teistneas ceart,
o neart do namhaid,
Breab a ghealtachd air eagal maslaidh,
thoirt do t-àite.

'S gabhaidh theich e gun aobhar eagail,
le theann ruathar,
Thug e freiteach ris an eaglais,
ghabh e fuath oirr';
Gur truagh sgreadail luchd teagaisg,
mu na bruachan,
Glaodhaich air-san, e ga 'm freagairt
as na cuantain.

Mur thug a mhuc mhar a Ninibhi,
'm faigh Ionas,
Ghlac long bhuineadh do Shasunn,
stigh air bord e,
Feitheadh ri fulangas Iob,
'n am a dhoruinn,
Mur thain' e ruisgte thun an t-saoghail,
d' fhalbh an t-oigeir.

Cha do thuig Seanadh Earraghaidheal,
aobhar fhuadaich,
Sgeul a thainig da ionnsaidh,
bha ro chruaidh leis,

[TD 219]

Gu 'n do reubadh leis na Frangaich,
Cailein Chruachain,
'S nach robh coltas air a choluinn,
tighin uaithe.

Sin 'nuair dh' fhalbh Maistir Cailein,
le aon ruathar,
Na oighre air an fhaidh, Elija,
thoirt o uaighean,
'N tanam a leum as a choluinn,

fad choig uairean,
Fhuair an duine so le aon athchuing,
Air ais a nuas e.

'Nuair a dh' eirich iad le h-aidhear,
na tri Ghuimhnich,
'Sa chaidh Cailein a leigheas,
o 'n chneadh phuinnsein,
Mas a fìor do dh' fhear mo nuaidheachd,
bhrìgh mo chuimhne,
Gu bheil iad a damhsa fhathasd,
an teas ruidhlidh.

Beannachd Sheimis an Druim-daraich,
a null d'a 'n ionnsaidh,
'S e cuimhneachadh a mhor fhalachd,
do Rìgh na Frainge,
'Nuair chuir e Tearlach thairis,
air bheagan campa,
Ar daoine fhein bha sinn a' gearradh,
measg ar naimhdean.

Mheud 'sa dh' fhalbh uainne thairis,
leis a Phrionnsa,

[TD 220]

Iochd a's trocair da 'n anam,
thugaibh dhoibhsean,
Geallaibh dhoibh fein an cuid fearuinn,
gu ro thaingeil,
Còir o laimh an Rìgh 's Mhic Cailein,
do gach aon-fhear.

Ma thig Diuc sin Pheairt n'ur caraibh,
Moir-fhear Drumad,
Lochiall mor 'sa ghillean geala,
's na dh' fhalbh leis uile,
Cuiribh tonn bhaitht' air gach falachd,
o linn Sliabh 'n t-Siorram,
'S gu 'm b' fheard Alba ri am cabhaig,
an da churaidh.

'S ma thainig bas orr' gu h-aithghearr,
thug uainn uil iad,
Tha againn fheinn d'a 'n cairdean mairionn,
daoine duineil,
Na chuireas Rìgh Deors' gu h-ealamh,
na sheilbh ullamh,
Olaidh iad deoch slaint' a ghallain,
na Rìgh an Lunnainn.

'S teaghlach rioghail Mhic 'Ic Ailein,
na 'n arm guineach,
Gheibhte n' ur còt arm air a ghearradh,
lamh dhearg fhuileach,
'S ioma laoch bu gharg an carraid,
nach iarradh gunna,
Lann chlaiseach dhughorm g'a tarruing,
toirt buaidh urram.

Agus failtichibh Mac Lachuinn,
o 'n Fhraing churta,

[TD 221]

Fear Innis Chonuill an Caiptein
Mur do thuit e,
Ge math leibh Tearlach na 'm bratach
thoirt duibh furtachd,
Papanaich is fearr leibh agaibh,
ach 's annsa Cuigse.

Ma bhios fear air bith a farraid,
mu fhear m' ainm-sa;
'S mise Seumus an Druim-daraich*,
thuirt an seanchas;
Mi shliochd dhireach Ghlinne Garaidh,
o thus m' aimsir;
'S nar a slan do dh' fhear na fanaid,
thuirt ruinn Cama-bheul.

ORAN suireadh, le Ailein Buidhe.

THA mi ga m' phianadh,
'S mi 'g iarruidh chaileagan,
Cha 'n fhaigh mi 'm bliadhn' iad,
Ma 's fhiach mo bharaill-sa,
Cha toir iad domhsa,
Geallamh posaidh,
Le gainne storais,
'S mi gorach aimideach.

<eng>* This poet very often charged others with composing the songs which he had composed himself.<gai>

[TD 222]

Na m' biodh mo chòraichean,
Air an deanadh daingeann domh,
Le tuille storais
A's seol air fearunn doibh,
Da dhusan bò,
Barr coirce 's eòrna,
Da ghearran òga,
Làir mhòr a's searach aic.

Cha n' eil gill' og,
Gheibh greim do 'n earras ud,
Nach aill leis posadh,
Ri maighdeann fharumaich;
Cha chuirinn geall ruibh,
Ge mor 'ur mangnus,
Nach eil sibh 'n samhradh,
An t-saoghail shalaich so.

Ach 's duilich ciall,
Chuir ann 's na h-amadain,

Tuigse 's riaghailt,
Cha 'n fhiach leo leanailt ris,
Ach bhi leigeil sriantain,
Le 'n ana-miannaibh,
'S gu bheil trian diubh,
Aig toirt an aire dhoibh.

Tha sinne gorach,
Ro cheolar amaideach,
Air feill na 'n coisridh,
Bhios moran bannail ann,
Ma chi sinn sgòdag,
Le ceap a's cloca,
Ma tha i boidheach,
"S i sud mo leannan-sa.

[TD 223]

Gur té 'sa chiad,
Bhios ciallach banail diu,
Mur easgunn liathghlas,
An cliabh lan nathraichean,
Thoir lamh g'a h-iarruidh,
Ad dha dhusan bliadhna,
'S le sdiùradh ciallach,
Gu 'n dean thu aithn' oirre.

Na tagh leoideag,
Bhios mor mur mhaireist ort,
Air bheagan storais,
Ach seorsa falachd innt',
Ma bhios i sonruichte,
Dh' ionnsuidh sgròbaidh,
Gu 'n toir i 'n roibein,
'N taobh eile 'n teallaich dhiot.

Gur mor a b' annsa,
Te narach bhanail diubh,
Nach cumadh canran,
No drandan teallaich rium;
Bheireadh gradh dhomh,
Le gean 's le gàire,
'S gu 'm b' iad mo chairdean,
A b' fhèarr lea thoileachadh.

Cha 'n iongnadh failing,
Bhi anns na boinionnaich,
'N nuair thig iad cèrr oirnn,
Bu choir an cronachadh,
Mur rinn ar Slan'ear,
Chiad bhean 'sa gharadh,
Gu 'n d' aom i Adhmh,
'Nuair bhuaire an donus i.

[TD 224]

ORAN le Ailein Buidhe; 'nuair chaidh e cheannach an tombaca.

TURAS chaidh mi sìos an gleann,
'Sa 'n tombac bhi gann oirnn' shuas;

Rainig mi 'n tigh an robh 'n leann,
'S ghlaodh mi air dram gu luath.

'S e sin thuir Deorsa Chuil-Phail,
Thainig an traigh 's cha b' i 'nuair,
Cha n' eil againn do stuth blath,
Na chuireas dhiot grain an fhuachd.

Ach tha nigh'n dubh na 'n srad air dàir,
'N aon bhò 's fearr tha mu 'n cuairt,
'S cha 'n fhada dhuit feitheadh r' a h-àl,
Mas a bard thu sheinneas duan.

Bha ann Tearlach Bhealach na 'n sachd,
Duin' eil' air nach fhacas gruaim,
Duine deas dìreach gun mheang,
Mur digte air cam a bruaich.

Shuidh sinne 'n sin n' ar triùir,
Air inneal ciùil bu bhinne fuaim,
'S mu 'n do theirig binneas duinn,
Leig i air a glun an ruagh.

Bhuaill oirre tinneas an laoigh,
Gnusgaich agus geimnich chruaidh,
'Sa 'n aon sine bha as a tarr,
Bha seachd cairt na dhol mu 'n cuairt.

[TD 225]

Dheirich bean a chridhe mhoir,
'S rug i air stop a's air cuaich,
Ghlac i 'n t-sine ud na dorn,
'S fhuair sinn deoch ri ol mu 'n cuairt.

Bha ainm faoileachd na Feinne,
Do Dhonnacha na feile 's taobh tuath,
Ach coimeas do Dheorsa Chuil-Phàil,
Cha 'n eil e 'sa 'n àls' r'a luaidh.

ORAN le DONULL MAC DHONUILL, bard Ionmhuirneise, d'a leannan, agus sgeul
bhi air a thogail gu 'n robh i torrach aige, 's e 'g innseadh cho math
'sa bhiodh e dh' i ged a b' fhior mur chaidh a radh.

FHUAIR mi sgéula moch an dé,
'S cha deach' mi 'n éis ri chluinntinn,
'S cha d' thug mi geill nach deanainn feum,
Le gaol do 'n te mu 'n d' innseadh,
'S cha toir mi fuath dh' i, 's beag mo luaidh air,
Ged a fhuair mi cinnt air,
'Sa dh' aindeoin cruadail gu 'n toir cuairt sinn,
Gheibh sinn uainn ri tim e.

A ghruagach dhonn, ma dh' fhas thu trom,
Tha mis, air bhonn nach diobair,
Gu 'n seas mi thu, air bheula cuirt,
'S cha 'n ann an duil do dhìteadh,

[TD 226]

Tha mi air bheachd gu 'n seas mi ceart,
Ged bheir am parson cis diom,
'S gu 'm paighinn daor air ràdh do ghaoil,
Na 'm fàrainn saor 'sa 'n tì so.

Gu 'm paighinn daor gu t-fhagail saor,
Mu 'n leiginn t-fhaodann' nàrach',
Air beula cuirt mur fhasan ùr,
'S nach robh e 'n rùn do naduir,
Cha n' eil mi 'n dùigh thu dhol na 'n luib,
Mur d' thig a chuibhle cearr oirnn,
'S ma chumas airgiod thù o chis,
Gu 'n seas mi fhìn a' t-aite.

Gur fad a rachainn ann ad leithsgeul,
Gu do sheasadh cliùiteach,
'S ghabhainn uile orm an seisein,
Gu d' leith-trom a ghiùlan,
'S ged chumadh iad mi ann gun lasadh,
Gus 'n atadh mo shuilean,
Mur diobair ceartas mi, cha 'n fhaicear,
Choidhch thu ac' fo mhuisig.

A Rìgh na 'n dul! nach mi bha 's tu,
Dol fo na siùil a dh' Eirinn,
Na thir eile 's faide uainn,
Nach d' ruig air suaimhneas fheutainn,
'S truagh nach fhaicinnse bhi seoladh,
A's sinn air bord le chéile,
Gun duil a choidhch thigh'n air ar 'n eolas,
Gus 'n Roinn Eorp na dheigh sin.

Ach cia mur 's urrainn domh bhi beo,
'S cho mor sa thug mi spéis duit?
Na cia mur dh' fhaodas mi bhi stoilte

[TD 227]

'S mi gun choir air t-fheutainn?
Ged fhaighinn airgiod na Roinn Eorpa,
Agus òr na h-Euphaid,
Cha chumadh e suas mi mionaid uaire,
'S tu bhi uam gun sgeul ort.

Ach cuis mo chruadail, 's fhaide uam,
An diugh da uair na 'n dé thu,
'S ma leanas tu mar sin air luaths,
Gu 'm bi sinn cuairt o chéile,
Ach ma thionndaidh thu do shlios rium,
'S fiosrach mi mur dh' eireas,
Gur gearr an ùine thamhas tu,
'Nuair thig do chùl na dheigh sin.

Mas e gun chuir thu rium do chùl
Ann an duil mo threigsinn,
Gus an cuir iad mi 'sa 'n uir,
Cha dean mi turn ad dheighse;
Cia mur dh' fhaodas mi bhi saor,
'S nach dean an saoghal feum dhomh?

Mo chridh air fhalach fo do ghaol,
Gun duil a choidhch ri fheutainn.

Tha gaol na 'm boinnionnach o 'n oige,
Mur an ceo 'sa cheitein,
Luidhe e ri maduinn dhriùchd,
Mhain cho dluth 's nach leir dhuinn,
Chi mi 'n t-adhar agus beanntaibh,
Dol an ceann a cheile,
Ach sgaoilidh e ri ùin ro ghearr,
Gun fhios cia 'n t-àit' an d'theid e.

Gur mor a bh' agam ort do mheas,
Nach d' thug mi fios do chach air,
'S o 'n is beairt e tha gun fhios,

[TD 228]

Cha 'n innis mis gu brath e,
Gu bheil an sean-fhacal o shinnsear',
Tighin gu cinnt an drasda,
Gur faide uam an diugh na 'n dé,
A bhean nach dteid mi thaladh.

Cha n' eil mo chadal domh ach ciùirt,
'S cha n' eil mo dhuisc ach cianail,
Cha n' eil an obair dhomh ach cradh,
'S cha n' fhearde mi bhi diamhain,
Cha dean luidhe dhomh ach creuchdan,
'S cha toir eiridh dhìom iad,
Cha toir asdar mi gu slainte,
'S cha 'n fhasa tamh no gnìomh dhomh.

Ged a tha mi 'n so 'sa ghleann*,
Cha b' e bhi ann a b' fharr leam,
'S mur b' e cruaidhead mo chomannd,
Bu luath mo dheann ri fhagail,
Gur fada 'n aimsir tha o 'n uair,
A chualas bhi ag radhainn,
Gur cruaidh an reachd a bhi fo smachd,
'S bidh mise nochd mur tha mi.

Cha b' e chùis bhi nochd an glais,
Na 'n tiginn aisde a maireach,
Ach bhi 's na fiabhrais fad sheachd bliadhna,
Gun la riamh dhiu tearuint;

<eng>* Strathconnan, where the poet then resided, and where he composed a number of excellent songs; it is the general opinion of all those who know his talents, that, if premiums were given to the best poets, he should be entitled to a first prize among the competitors on the present stage in the north.<gai>

[TD 229]

Cha robh uair gun chuartach ur dhomh,
Gur ciuirte rinn iad m' fhagail,
Nis o 'n lagaich iad mo phearsa,
Tha mo sgairt air m' fhagail.

ORAN do DHONNACHA MAC AONGHUIS, da 'm bu cho' ainm Donncha na beurla*; Le Iain Mac Thearlaich oig, duin' uasal bh' ann am Muile.

Fonn.—'Se latha Raon Ruairidh, &c.

CHA n' e goirteas mo shròine,
Ged tha dòruinn na mullach,
Chuir m' aigne cho brònach,
Na mo chòradh fo mhulad;
Ach sar oigeir na béurla,
Air gach feill a fhuaire urram,
'N deigh a bhristeadh le beisdeant,
'S tric bha 'n geimnich am Muile.

Ruigidh bristeadh a Chaiptein,
Cluasan claisteachd a Phrionnsa,
Fear a fhreasdail na airc e,

<eng>* This hero proposing to have the Prince crowned after the battle of Culloden with the assistance of three men, blaming those who were at that battle for not doing so when so many of them were together.

† Being formerly a drover, but failed.<gai>

[TD 230]

'S cha bu tais e mór dhiùnlaoch;
'Nuair a theich na bha aige,
'Sa sgap iad gach aon-taobh,
Sin 'nuair mhearsail an gaisgeach,
Le chomhlan ghasda g' a ionnsaidh.

Tha thu shliochd na 'm fear gasda,
Bha 'm baiteal Chath Gairbheach,
Rinn tiomna gun taise,
Agus gaisgeadh le 'n armaibh,
'Nuair thog iad corp Eachuinn,
O chasan an naimhdean,
Air an tuaghannaibh sgaiteach,
G'a ghiùlan dachaidh roimh 'n Ghalldachd.

'Nuair a spreigte piob mhor leat,
'S thu cuir an ordugh do bhrataich,
'S thu togradh gu comhruig,
Dhol an còmhail na 'm marcach,
'Nuair a ruisgeadh tu spòlta,
Nach robh lodail ri fhaicinn,
Cha bu shlachdan aig oinnsich,
Claidhe mor thoirt do 'n ghaisgeach.

'S math thig boineid le fabhar,
Air cul fainneach donn socair,
Dol an coinneadh do namhaid,
Air falair ard na sàr choiseachd,
Cha b' e fuath Mhic a Mhàili,
Fear do ghnath na do choltais,
'N am suidhe 's tigh thairne,
'S tu gu 'm paigheadh na botail.

'S na 'm biodh Uilleam* a's tù,

<eng>* Duke of Brunswick.<gai>

[TD 231]

Ann an tùs an totail,
Deanadh casgairt le 'r lùth-chleas,
'S tusa bhuidhneadh an trod ud;
Na 'n leigt' thu da ionnsaidh,
Le d' chlaidhe cùil an ceann socair,
Gu 'n robh Uilleam le d' shùgradh,
Call a mhùin an Cuileodair.

Sud na h-airm dhuit a thaghainn,
'S thu dol air t-aghaidh gu meamnach,
Gunna, sgiath, agus clogaid,
'S claidhe socrach an ceanna-bheart,
Agus ciad do luchd brochain,
'S na 'n droch chosaga' dearga,
Chuir a' t-aghaidh gu cogadh,
'Sa 'n deomhan gog dhiu nach marbh thu.

Cumha Mhaighistir Choinnich 'Ic Coinnich fear, a Chnocain Ruaigh, lamh-ri
Ionmhuir-feorain, duin uasal deth ard fhuil, agus a choisinn cliuth thair
moran eile, agus is mò ionndrainn anns an aite sin deth na chaochail
beatha o chionn ioma linn; Le fear airid, mur gu 'm b' ann le Coinneach
Dingeil, gille bh' aige fhein ré ioma bliadhna roimhe bhas.

Fonn; Cumha Huistean 'Ic Aoidh, le Rob Donn.

RIGH gur muladach tha mi,
Ri bhi 'g aireadh ar truaighe,

[TD 232]

Mu 'n uasal so dh' fhag sinn,
Rinn am bas a thoirt uainne,
Gur a lionar iad cràiteach
Nach robh an cairdeas riut fuaighte,
'S e sud aobhar mo chlisgidh,
Do chur an citse na h-uaighe.

Tha 'n Cnocan-ruagh so na fhasach,
O 'n a chaireadh sa 'n uaigh thu,
'S ged tha sinne dheth craiteach,
'S goirte caradh na h uasail,
Do bhantrach o 'n dh' eug thu,
'S tric deur air a gruaidhean,
'S cha 'n iongnadh dh' i fhein sin,
As do dheigh gur a truagh i.

'S e fath m' acain 's mo dhiobhuil,
Bhi 'g innseadh do bhuidhean,
'S cha chuir mi uile an ceill iad,
Ged bhiodh cleireach ri m' ghualainn,
'S e ro mheud an eolais,

Gu bheil e dhomhsa na chruaidh-chas,
Agus barrachd a mhulaid,
'Sa 'n tuil air mo ghruaidhean.

Bha thu uasal 's bu choir dhuit,
Gun bhi spòrsail no uaibhreach,
Cridhe glan mur an doimean,
Gun fhoill na gun fhuath ann,
Bu tu sheasadh ar coir dhuinn,
Ann am mod na an cruaidhchas;
Anns na chaidhe riut earbsa,
Cha bu chearbach a fhuaradh.

Bha thu iochdar ri feumach,
Bha thu deirceach ro thruacant',

[TD 233]

Bha thu 'd charaid 'n am feuma,
Gu ar eiginn duinn fhuasgladh,
A' t-aobhar eagail do d' namhaid,
Sa 'nuair a thàraidh tu buaidh air,
Ach easan bhi 'n iochdar,
Sin nuair bhìodh tu ris suairce.

Bha thu 'n urram sa 'm prìs,
Aig gach iosal a's uasal,
Ad cheann feadhna math tìghe,
Agus ro mhath do 'n tuaithearn,
'S nach feileadh sa mhal iad,
Ach bheireadh dail doibh a's fuasgladh,
'S ged bhìodh iad air deireadh,
Nach cuireadh orr' fuadan.

B' e sud an ceann teaghlaich,
Bha gu meadhrachail uasal,
Ann ad thighse cha 'n fhaicte,
An t-airceas no ghruaimein,
Bu tu cridhe na faoileachd,
Bha gu daontachail suairce,
Bu tu fhein am Mac Coinnich,
Bha gu loinneil 's bu dual duit.

Leat bu toil a chainnt Ghailic,
Anns gach abhachd a's duanag,
Sa 'nuair a sheinneadh tu luinneag,
Guth bu bhinne cha chualas;
Bu toigh leat bardan a's pìobrain,
'S i do chis nach biodh suarach;
'S ged tha do leaba 'n diugh iosal,
Cha 'n eil e air diochuimhn do shuairceas.

'S anna' uasal tha 'n drasd ann,
Sheasas t-aite 'n am cruadail,

[TD 234]

Cha robh idir air sloinne,
Chloinn Choinnich na b' uaisle;
Ge mor againne Sìophort,

Cha strìochdadh tu uair dha;
'Nuair bhiodh bochdan 'na 'n éiginn,
B' ann riutsa leughadh iad an cruaidh-chas.

Ach an t-Alasdair og ud,
Tha fiachan mor air a ghuailibh,
Mu 'n lion e do chota,
'N am bhi foirneadh na tuaithchearn;
Ach tha mo dhuilse ann fathasd,
Mac an athar bha suairce,
Air chionn deireadh a bheatha,
Nach bi na 's lugha ri luaidh ris.

Ged is iomadaidh bliadhna,
Bha mi fo 'd riaghailt 's fo dhuais leat,
Cha do mhothaich mi riamh uait,
Droch bhriathran no bruidleir,
'S a nis o 'n a thriall thu,
Chaidh mo riaghailt air ghluasad;
Ach fhad sa bha thusa mairrionn,
Bho mo charaid ri m' ghualainn.

B' e sud latha ar creiche,
Thain' an teachdaire cruaidh ort,
'N siath latha de 'n chéitein,
Rinn an t-eug do thoirt uainne,
'M bliadhn' ochd ciad deug sa h-aon deug dhiu,
Bliadhn' ar leiridh 's ar cruadail;
'S gur h-ioma neach dheth tha bronach,
Mu Ionmhuirfeorain o 'nuair sin.

[TD 235]

ORAN do Mhoir-fhear Mac Shimidh, leis a bhard Mac Mhathan, air dha gunna fhaotainn uaithe.

GUR h-usal am macan,
A ghluais uainn air asdar di-mairt,
Gheibhte iasgach mu d' bhaile,
Agus fiadhach ad bheannaibh gu h-ard;
Guidheam bliadhna mhath ur dhuit,
Mhic Shimidh 'o Dhuinidh na 'n carn,
Gu ma buaghail do 'n aiteam,
Togail suas a chuid bhrataichean ard.

Thriath na Mòr-fhaich gu 'm b' ait leam,
Bhi triall gu do gheataibh gach lo,
Dh' amharc tighe na 'n steuda,
Gu 'm b'e 'n t-aighear leam fhein dol na còir;
Rioghainn ùr na 'n ciabh clannach,
Air am faicte fiamh ghlan anns an lò,
Sud an ceile tha marr-riut
'S tric a dh' eisd mi ri farrum a ceoil.

B' ann deth d' chleachdain-sa 'n comhnuidh,
Dheagh Mhic Shimidh na 'n cornn a's na 'm pìos.
Gach feasgar 'n deigh nòine,
'G ol gu frasach air beoir a's air fion;
Bhiodh do mhaighdionnan grinne;
Cuir an caoimhneas am binnid le gnìomh,

Le ceol agus àhhachd,
Ann an talla na 'n clàrsach 's na 'n cliar.

Bidh do mhaighdionnan riomhach,
Air an earradh an sìoda 's an sròl,

[TD 236]

N' 'Ic Illeain a Muile,
'S Ni' Mhic Dhonuill o chular na 'n seol,
Agus steud an fhuilt riomhaich,
O Thuiteirean dìleas na 'n corn,
'S tha do chairdeas gun teaga,
Ri oighre Dhuinbheagain Mhic Leoid.

Dheagh Mhic Shimidh na 'n luth-chleas,
'S na 'm brataichean cùraidh deth 'n t srol,
O Dhuinidh na 'n seang-each,
Far 'm bu mhuirneach luchd tighe ri ol;
Mus a triall duit air asdar,
A nunn uainn do Shasunn na 'n cleoc,
Gu ma slan thig thu dhachaidh,
Gu do thir am bi farrum a cheoil.

Seobhag shuairc' thu fo iteach,
Leis an eireadh na Friseilich og,
Sud am boinne deas dìreach,
Deth 'n chinne cho dìleas 's tha beo,
Ge b'e chuireadh ort gruaman,
N' am tarruing na bualadh na 'n stroc,
Gu 'm biodh spéic na 'n lann geala,
Tarruing t-eirig a dh' aindeoin no dheoin.

Thoir soraidh na dhà uam,
Gu fearaibh Cheanntaile so shuas,
Far an cinnteach a tha mi,
Am bheil' do dheoch slainnte ga luaidh;
Bidh mac na cléithe na shiubhal,
Air an fheil mur bu chuibhe 's bu dual,
'S mo mhile beannachd leibh uile,
'S bidh mi falbh le mo ghunna fhéin uaibh.

Gluaisidh mis le mo chuiliobhair
Thilgeas fada, caol cuimseach, le fuaim,

[TD 237]

'S cluinnear sgeul air an armachd,
Aig fir a's aig seanchaidh 'n taobh tuath;
Gluaisidh mise mar 's eol domh,
O Mhac Shimidh na 'n ròiseal o 'n d' fhuair,
'S na 'm biodh a gheals' air a chuspair,
Bhiodh mo lamhsa g'a druideadh ri 'm chluais.

Cumha le AONGHUS MAC LAOMUINN, ann an I. Chalum Chille do leanabh leis fein.

GUR a mis tha fo mhulad,
Air m' uilinn 's mi m' onrachd,

'S mi caoineadh an lurain,
Tha mi uime ro bhronach,
O 'n a chaidh thu sa 'n tulaich,
'Am bheil tuille do d' sheorsa,
Gur h-e sgeula mo dhunaidh,
Nach d' fhuirich thu Dhomhuill.

'S gur h-oil leom a thachair,
Gun do ghlacadh cho og thu,
Leis an teacaire dhàna,
Gun chairdeas do m' dhoruinn,
Thug a broilleach do mhathar
Thu a ghraidh gun chead còraidh;
Oir is mis th' air mo chràdh-shlad,
O 'n la chaireadh foi 'n fhoid thu.

Ormsa rug an fhras ghàbhaidh,
'Nuair a chaireadh air bord thu,

[TD 238]

Ann ad bhradan geal lamh rium,
Gun chail ann ad choradh,
Gur h-i nollaig mo ghreadaidh,
A leag mi le doruinn,
O 'n la chuir iad thu sinte,
Anns a chill fo na bordan.

Bha mo chion air an leanabh,
Dh' fhas gu ceanalta modhar,
Riut a thogadh mo chridhe,
Thu bhi tighin am chomhail,
'S tric a rinn mi riut mireag,
Gu h-iollagach ceolar;
Leam, a luaidh gu 'm bu mhilis,
Bhi gu minig ga d' phogadh.

'S gu m' b'i sud an t-suil aluinn,
Bh' aig mo phràpanach boidheach,
Beul bu mheachaire gair thu,
Pog mur fhaile na 'n rosan,
O d' shailtean gu d' mhullach,
Bu leat urram na h-ògraidh,
'S na 'm faigheadh tu saoghal,
Bu tu gaol na 'm ban òga.

Bu tu m' abhull a's m' ubhlan,
'S bu tu m' ùr ros an garadh,
Bu tu mo chaineal 's mo shiucar,
Mo chruit ciùil 's m' aobhar ghaire,
Bu tu m' aidhear 's mo shugradh,
'S bu tu 'n ur ghibht a chraidh mi,
O 'n la chuir mi fo 'n uir thu,
Tha mi bruite fo 'm airnean.

'S gur tric tigh'n am aire,
A liuthad car a bha d' lamhan,

[TD 239]

[Taobh-duilleig 249 san leabhar fhèin]

Do luth-chleasan beadrach,
Ri cleasachd a's abhachd,
'Nuair a dheanainn do ghlacadh,
Ga t-altrum o d' mhathair,
Bhiodh mo chridhe lan aiteas,
Bhi macnus rim' ghradhsa.

'S cha n' e t-fholachd na t-uaisle,
So ghluais thun na dàin mi,
Na soileas bhi 'g innseadh,
Do dhisleau 's do chairdean,
Ach a thoileachadh m' inntinn,
Mur chuimhneachan bais ort,
Los gu 'm faicinn a ruin-ghil,
Do ghnuis mur an sgathan.

'S c'uime tha mi cho gorach,
'Sa bhi bronach ga t-aireadh,
O 'n 's e 'n Ti is fearr coir ort,
Thug dhuit ordugh ar fàgail,
Dh' fhios na h-urach ga 'm buin thu,
'Sa 'n duslach o 'n d' thainig,
'Sa 'n t-anam gu rioghachd,
Na Ti a thug fas dha.

'S ged tha mise 'n so lathair,
Ann an sgaile na feola,
Agus tusa gu sabhailt,
Cò-ri Abram 's r'a choisridh,
Tha mo dhuill anns an t-Slanear,
Gu 'n tar e sinn comhla,
Chum cliu thoirt do 'n Ard-Rìgh,
Ann am Pharais na gloire.

'S tha mi nis an tim sgur diot,
O 'n a chuir mi thu comh'ri,

[TD 240]

Do pheathraichean àluinn,
'S do bhrathair bha boidheach,
Ach na 'm faighinn-sa m' àilleas,
O ghrasan na trocair,
B'e mo mhiann bhi riut sinte,
'Nuair a chrionadh am foid mi.

ORAN le Iain Mac Codrum, agus e bhi diombach air son an eididh
Ghaidhealaich thoirt uaithe, 'n deigh bliadhna Thearlach.

Fonn.—Marbhrann na h-aigionnaich.

THA mi craiteach tinn, 's tha mi sgith lan dochair,
Ceangal air mo bhuill, cha dean mi ceum coiseachd,
Mallachd air an Rìgh, thug na breachdain dhinn,
Guidheam air beul sios on a shin e 'n t-osan,
Ged tha 'n stocaidh fada 's i na cochull farsuing,
B' annsa 'n t-osan gearr nach biodh réis o 'n t-sàil an gartan.

Luthaig thu ar cota na sgeol fharsuing,
'S luthaig thu ar brogan na 's leoir phailte;
Mheudaich thu ar cis, 's laoghdaich thu ar ni,
'S dh' fhag thu sinn gun phrìs, cha 'n eil dìreadh againn,
Thug thu dhuinn a bhrìgis, theannaich thu ar 'n easgoid,
B' annsa 'm breachdan sgaoilte, 'n t-aodach aotrom sgiobalt.

[TD 241]

'S olc a chulaidh oidhche, bhi 'n luib na casaig,
Cha 'n fhaigh mi cas a shineadh, cha 'n fhaigh mi cadal,
B' fhearr an sòlas inntinn, na deich slatan singilte,
Chuirinn anns an fheile, 'n am eiridh sa mhaduinn,
Sud an t-aodach dreach'or, chumadh gaoth a's fras uam,
Mallachd an da shaoghail air aon fhear chuir as e.

Cha 'n eil culaidh shamhraidh is fearr na 'm breachdan,
Tha e eutrom fonn'or an am an t-sneachda,
Bha e cleacht' r'a 'n cùmhdach, aig na gaisgich lùth'or,
'S acad air an giùlan nach eil e aca;
Chulaidh bha cur fàsghaidh, air na Gaidheil ghasda,
Rìgh gur mor am beud, le pléid a chuir a fasan.

Cha 'n fhaca' tu mac mathar, air sraid no faiche,
Is deise na Mac Gaidheil, le shàr phearsuinn,
Breachdan air am feile, sa chlàidhe air cul sgéithe,
Le dhagaichean cho ghleusda, nach eisd iad sradaig,
Sgiath air gual' a ghaisgich, claidhe caol na achlais,
Cha 'n eil Gall sa 'n t-saoghal, nach caochladh roimh fhaicinn.

'S math thig boineid ghorm, air chul borb an cocadh,
Cota gearr a's feile, air sleisdean nochte,
Dhol an lathair cruadail, gu fuilteach neimhe buailteach,
A leadairt na 'm fear ruagha, bhiodh smuais ga fhosgladh,
Neart treun na 'n curaidh, cuir na 'n lann ga 'm fulang,

[TD 242]

Bhiodh luchd na 'n casag millte, sa 'n cinn dhith a' muineil.

'Nuair chruinnicheas na Gaidheil, an lathair troda,
Le 'n geur lannan spainnteach 'sa 'n dearsadh chlogaid,
Paighidh iad gu daor, ann am fuil sa 'n gaor,
'S cha bhi bonn gun diol do bhlar Chuileodair,
Cha 'n eil urra chaidh a chreachadh, na urra chaidh a ghlacadh,
Nach fhaigh iad luchd am mioruin, gu 'n raogha diol thoirt asda.

'Nuair chluinneas fir na h-Alba, do dhearbh chais meachd,
Theid iad gu neo chearbach, fo d' dhealbh bhrataich,
Donullaich bu dual, 's dàine theid sa 'n ruaig,
Tailleirean cloth ruaigh, gar nach fuaigh ach strachdadh,
Le 'n cruaidh lannan sgaiteach, snaitheadh chluas a's chlaigeann,
'S gu 'm bi àireamh cheann air a h-uile ball 'sa bhreachdan.

Gur h-oil leam ar 'n eideadh, bhi air chaochla cuma,
Ach chi mi bhi ga dhioladh mu gheata lunnainn,
Leis na fleasgaich bhiodheach, chluicheas mur na leoghuinn,
Chuireas geillt air Deorsa, 's nach faod e fuireach,
Theid Rìgh Deorsa dhachaidh, sa 'm Prionns' og a ghlacadh,

'S bidh Tearlach na Rìgh, 's fearda pris na 'm breachdan.

[TD 243]

'S ionunn 'sa bhi 'm prìosan, bhi dhith a bhreachdain,
Deanmaid urnaigh dhìchiollach, a's gheibh sinn taice,
'Nuair thig iad a nall oirnn, coig ceud mìle Frangach,
Bidh Tearlach air an ceann, bidh am ball fo 'n casan,
Sud an sluagh beachdail, chuireas an gleo reachd'or,
Armailteach gu leoir, a luaitheas an cloth Catach,
'S nuair theid a mhuc a dhathadh, 'sa cuid uircein fhaileadh,
Air claidhe na air breachdan, cha bhi tuille bachdaidh.

Cumha fhir Shìormhoin agus a mhic; Le Iain Caimbeul maor.

Fonn.—

So deoch slainte Thighearna Chluainidh,
Cuir mu 'n cuairt anns a chùp i, &c.

THA mo cheim dol an truimead,
Tha mo mhulad fàs dùbailt,
Bhi cuimhneach' na 'n armunn,
Chaidh an tamh anns an ùir uainn;
Ged a fhuair sinn ar losgadh,
Mun ghabh 'n toiseach air thus uainn,
'S e 'n sgeul so uile a chraidh sinn,
Bhi ga d' charadh-sa Dhughaill.

O 'n taice so 'n uiridh,
'S trom am buill' thug am bàs duinn,

[TD 244]

Ar n-oighreachean fearuinn,
Gun aon duine dhiu' làthair;
Far am faighte cuirt ghreadhnach,
'S gu faoileachd fìon Spàinnteach,
'S uisge-beatha na 'm feadan,
Gun easbhui' gun tràghadh.

Ach Alasdair chliùitich,
'S mor mo dhiùbhail nach beò thu;
Bu tu cridhe na feile,
Lan sheudan do 'n mhòrchuis,
Inntinn sgaoileadh a phailtis,
Lamh a sgapadh an òir thu,
'S bha thu shìol na 'm fear ceutach,
Chur nan ceudan an ordugh.

'S fad o 'n chuala' mi seachas,
Gu 'm b' ainmeil 's an uair ud,
'Nuair thug Dughall na 'n Allta',
Adbhans 's an taobh tuath orr',
Ciosnach Chatach a's Ghranntach,
Gun taing 's Tighearna Rùthain,
Mar sin a's Diùc Gordan,
Thug e comhail d'a shluagh-san.

Ionmhur-Atha 's an Triath sin,

Mu 'n iathadh na gaisgich,
Gheibhte sibh anns a chogadh,
Air thoiseach 'n tùs brataich,
Sud na teaghlaichean làidir,
Chaidh mu làr ann an gradaig;
Mar dhaoin' òg nach do liathadh,
'S caol ur n-iarmud ri fhaicinn.

Tha Siormhoin na fàsach,
Sgeul ro àirid so chreach sinn,

[TD 245]

O 'n chuir sinn ar daoine,
Taobh ri taobh fo na leacan;
B' iad nach féileadh 'sa mhàl sinn,
Ach bheireadh dàil duinn a's meachuinn,
'S ioma teaghlach 'n d' theid sgaoileadh,
O 'n ghlaodhadh sibh dhachaidh.

'S ioma rusgadh th' air t-fhearunn,
O 'n a dh' fhalaich am fòid thu,
Agus factairean lionar,
Chuir gach cis ann am mòid oirnn;
Ach na 'm biodh tu mairionn,
'S gu mealadh tu chòir ud,
Dh' aindeoin islean a's uaislean,
Cha ghluaiste ri m' bheò mi.

'S trom an sachd so th'air m' aigne,
Mu mharcaich deas nan each gleusda,
O 'n chuireadh thu 'n tasgaidh,
An cistidh ghlaist' fo na céudan,
Fear t-euguis cha n' fhaic mi,
Là clachain no féille,
Bu ghuala threun thu measg mhiltean,
'S thu cho shìobhalt ri maighdinn.

Bu bhlath an ceann tuath' thu,
Ged bu chruaidh thu 'n tir nàmhaid,
Ach a Dhe gabh truas dinn,
Sinn mar uain bhiodh gun mhathair,
'Nuair a dh' eireadh tu suas leinn,
Co bhuaileadh le tair sinn,
T-aon leithid cha leir dhomh,
Nis gu léir am measg Ghaidheal.

Ach 's e sgeula na dunaidh,
Dhuinne ullachd 'sa thriall thu,

[TD 246]

'Sa thainig an teachdair,
O Iosa g'a t-iarruidh,
Chaill sinn' ar cul-taice,
Chumadh 'reachd ruinn a's riaghailt;
Ach na 'n cinneadh do mhac leinn,
Bha sinn ceart o laimh Dhia leis.

Ad dheigh-sa chunnaic mi 'm brудар,

Dhuisg le fuathas gun dàil mi,
An còta bh'air m' uachdar,
Bhi tigh'n a nuas na smàl diom;
Do thigh mor ga shìor sguabadh,
'S craobh ga buain ann ad ghàradh,
Ghrad bhuaile sud am inntinn,
Gu 'n do chuimhnich am bàs ort.

Gu 'n do chuimhnich am bàs ort,
A ghraidh do na fearaibh,
'S tha do mhathair mu d' dheighinn,
Gun leirsinn gun seallamh,
Cha b' iongnadh dh' i fein sud,
B' ùr gleusd thu mur leanabh,
'S dh' fhag thu uile fo bhròn sinn,
'S cha duisgear ceòl ann ad thalla.

Cha duisgear ceoil ann ad chùirt-sa,
O 'n a rùisgeadh an uaigh dhuit,
'Sa thain' an teachdaire dàna,
Mar bha 'm bàs a thug buaidh ort,
Sud am propanach aluinn,
Chaidh anns a chàs chrùaidh leis;
'S ó na bitheams' ri m' shaoghal!
Ann an teaghlach bu truaighe.

'S lom a chì mi do làrach,
O 'n chaill sinn ar n-uachdrain;

[TD 247]

Ach a Thi a tha làidir,
Cuir na 'n àite ceann tuatha,
Bhios gu h-iorasal bàidheil,
Cruaidh dàna 'n am cruadail,
Ann an aite nan daoine,
Nach robh 'sa 'n t-saoghal na b' uaisle.

Tha mo chiabhan air glasadh,
Cha n' fhaic mi, 's cha léir dhomh,
O 'n thriall iad na gaisgich,
Fo bhrataich mhic De uainn,
Mhic an Rìgh ga bheil feartan,
Dean an rathad sin réidh dhomh,
'S gur h e m' aidhear 's mo mhiann-sa,
Bhi triall as an deigh-san.

Cumha Thighearna Bharrachalltainn a bh' ann mu dheireadh; Le Seumus Mac Ghille-sheathanaich, bard Loch-na 'n-eala.

Fonn.—Murt Ghlinne Comhunn.

MOCH 'sa mhaduinn 's mi 'g éiridh,
'S mor mo mhulad a's m' éislein 's mo sprochd,
Fhuair mi nuaidheachd an dé,
'S chuir e maill agus éis air mo thoirt;
Thainig oirnn a Dunéidionn,
Litir bhais leag déuraibh na 'm bochd,
'S beag an t-iongnadh leam fhein sin,

'S iad mur spréidh gun fhear gleidht' air an cnoc.

[TD 248]

Fhir Bharra-challtainn na 'n tuireid,
Tha do chairdean fo mhulad 's an am;
Cha n' eil sin leam na iongnadh,
'S iuchair ghliocais an cuise air chall;
Bha thu mathasach cliuiteach,
Bha thu seirceil ri d' dhuthaich 's gach am,
'S tu nis ga d' chàradh fo 'n fhuar-lic,
'N leabaidh chumhainn 's an uaigh gun smid chainnt.

Bha thu iorasal bàidheil,
'S bha thu faighidneach tlath ri luchd feum,
Ach 'n uair a ghabhadh tu àrdan,
'S gheibheadh aithghearra nàduir ort teum;
Na 'n leigte seachad e 'n tràth sin,
'S tigh'n le gearan fo fhàbhair do sgéith,
'S ioma neach dhiu' tha statail,
Tha tigh'n beo air do sgath le d' chuid fein.

'S lionar beannachd na 'm bochd,
'N dorrus fardaich gun ghort nach robh crìon,
'S cha b' e bonn an da fhairdein,
Gheibhte ann ach an t-sath-lan bidh;
Bha do chomhairlean laidir,
Thoirt ordugh do chach bhi ga dhìol,
'Sa reir geallamh an ard-Rìgh,
Tha fios agad-sa 'n drasd gur a fìor.

Cha n-ann an Galltachd na 'n Sasunn,
Chuir thu duil a bhi sgapadh do mhail,
Na bhi ga chluich air na cairtean,
Na cuir gheall le fìor bhrais anns na bàil;
Ach bhi gu stéitheil aig baile,
Deanadh feum 'sa toirt arain do chach;
'S goirt leam osnaich do thuath-chearn,
O 'n diordaoìn air an cualas do bhàs.

[TD 249]

Bhiodh an gearan r'a ghabhail,
H-uile latha bha Alasdair beo,
Chionn gu 'n tuigeadh tu fhein iad,
'S gu 'n sgoilteadh 's gu 'n leughadh tu choir;
Cha robh thu trom air fear falamh,
Mur a tuiteadh e am mearachd d'a dheoin,
'S thu dol a nis a dh' Airdchatan,
An leabaidh uaigneach ad chadal gun deo.

Cha leir gaineamh an fhìor-uisg,
Gu la bhràth gus an islich an tuil;
Ach 's math thuigeas fear lombair,
Cìod am feum th'anns an tonn ri la fliuch;
Gheibhear fàsgadh ri fuachd ann,
Le bhi daonnan mu 'n cuairt air a bhun;
Ach chi iad fhathasd le 'n leirsinn,
Nach b' ionunn do 'n dé 's do 'n la diugh.

Cha do chuir thu ùigh ann an armachd,
'S cho mho chleachd thu bhi falbh ann am feachd,
Na bhi trusadh do thuaith-chearn,
Le smachd a toirt uatha 'n cuid mac;
B' fhearr leat seisreach mhath ghearran,
Obair fogharaidh 's earraich mu seach,
Bhi 'n lathair cur agus buana,
Laoigh a's bairn' agus buaile mhath mhart.

Ach thoill am peaca' am bas duinn,
O 'n dh' ith a bhean anns a gharadh am meas,
Cha d' thainig oirnne o 'n am sin,
Na rinn suas sinn 'sa chall a bha 'n sin;
Thuit sinn uil' ann am fàiling,
Mur dean sinn aithreachas làidir a nis,
Gun fhios aig aon-neach do 'n t-sluagh,
Cia i mhionaid na 'n uair air an d' thig.

[TD 250]

Nis na 'n leigimid dinn,
An saoghal salach 's gach ni do na th' ann,
'Sa bhi toirt oidhreap le dichìoll,
Ghleidheadh coir air an Rìoghachd tha thall;
Fhuair sinn fios leis a Bhìobull,
Dearbhadh soilleir gur firinn tha ann;
Air sgath fulangais Chrìosda,
Dean ri ar n-anam sith roimhe 'n am.

An duine 's pailte do stòras,
'Sa neach is bochda tigh'n beò tha fo 'n ghréin,
So i 'n duais tha d'a leanailt,
'S nach faodar a ceannach le spréidh,
Rinn an saoghal ar mealladh,
Laigse nàduir g' ar tarruing ris féin,
A Rìgh glan duinn ar cridhe,
Ann an dochas ar slighe bhi reidh.

Tha mo dhuil anns an Trianaid,
Dh' orduich gealach a's grian air an spéur,
Gu 'n seas do mhac ann a t-àite,
Ghabhail curam do 'n àl th' as do dhéigh,
Thoirt toilinntinn d'a mhàthair,
Ghleidheadh onair da chàirdean 's da fhein,
'S do 'n chuid eile do d' shliochd,
Saoghal buan ann an gliocas 's an ceill.

[TD 251]

ORAN do SHIR IAIN CAIMBEUL, Tighearn na 'n Ard so th' ann; Leis a bhard cheudna.

Fonn.—
Mo nighean donn na buaile,
Gun bhuaire thu mi gun amhrus, &c.

SEISD.
DEOCH slainte Chaiptein Chaimbeil,
Thoir dhuinn a nall gu h-ealamh i,
Ga glaothaich le toilinntinn,

'S ga lionadh as na searragan,
Ged chost i ginidh òir domh,
Ga cuir mu 'n cuairt mu 'n bhord so,
Fear 's am bith nach òl i,
Cha suidh e 'n seòmar maille-ruinn.

Co air bith a dh' fhàirdeas,
Co dhà a rinn mi 'n ealaidh so,
Do Thighearn og na 'n Ard,
Tha mi 'g radh a's thugaibh 'n aire dhomh;
Duin aoidheil, cridheil, suairce,
Deth 'n fhion-fhuil tha gun truailleadh,
Slat deth 'n iudhar uasal,
A bhuaineadh a tigh Chaladair.
Deoch slainte, &c.

'N taobh eile o 'n do chinn thu,
Air m' fhìrinn b' fhiach dhomh tarruing orr',
Na fir o Ionmhur-Aora,
Na laoich, cha b' fhaoin 'sa charraid iad;
Gur mairg a bhiodh roimh' 'n angar,

[TD 252]

'Nuair ghluaiseadh iad le ceannsgal,
Bu shoilleir anns gach camp iad,
'S cha tugte geall le cearraig dhiu'.
Deoch slainte, &c.

B' iad sin a bhuidheann shùrdail,
Fhuair moran cliù 'sa b' airidh air,
'N am suidhe 'n tigh na cùirte,
Cha tugte cùis d'a 'n aindeoin diù',
Air fhad 's ga 'n d' fhuair mi dearbhadh,
Air m' inntinn o luchd seanchais,
Bha onair aig na h-Earraghalaich,
'S dhearbhadh iad e 's gach carraid diu'.
Deoch slainte, &c.

Mo dhurachd-sa do 'n Ghàidheal,
'S gach là gu 'm bi mo bheannachd leis,
'Nuair theid thu 'n lathair cruadail,
Bu dual duit bhì fearachail,
Bhì ealamh, clis, grad, luath-lamhach,
Gu clach a's ord a bhualadh,
Chuir tein' am fudar cluaise,
Chum luaidhé chuir a bairille.
Deoch slainte, &c.

Tha eireachdas na dhà ort,
Aig càch ri thoirt an aire dha,
Cho socair 's tha do nadur,
'S thu ciallach lan do dh' fhaighidinn,
Gur maighister math tuath thu,
Cho socair 's tha mu 'n cuairt duinn,
Gur h-og a ghabh thu 'n t-uallach,
Mu d' ghuaillibh, 's thug thu 'n aire dha.
Deoch slainte, &c.

[TD 253]

Thig suaithcheantas nan Gàidheal,
'Nuair chàirear e ort gu ro mhath dhuit,
Boneid ghorm 's coc-ard innt,
Lann Spàinnteach a's i 'n tarruing ort,
Cha mheas' thig cota sgàrlaid,
Ort ùr o laimh an tàilleir,
Gu 'n gleidh ni math thu 'd chairdean,
Chionn 's maighistir math fearuinn thu.
Deoch slainte, &c.

Gur gasd thig osan gearr ort,
Bròg Ghaidhealach a's barr-iall innt,
Gartain ùr bhundàidh,
'S iad ur o làmh na ban'iche,
Mu d' chalpanna' geal liontach,
Air chuma bhradain fhior-uisg,
Troigh chruinn a dhol roimh' 'n ridhleadh,
'S ceol file toirt ort carachadh.
Deoch slainte, &c.

Gur buidhe dhaoin' tha falbh leat,
'S gu dearbh cha ghabh iad aithreachas,
Cha till thu orra cùis
Deth na cumhnantan tha 'n gealla' dhoibh,
Tha mulad air an cairdean,
An oigridh bhi 'ga 'm fagail,
Cha 'n eagal doibh gu brath,
'S Tighearn og nan ard toirt air' orra.
Deoch slainte, &c.

Gur h-eireachdail do chòmhlán,
'S gur bòidheach an am tarruing iad,
'S gun annt ach gilleán oga,
Cho seocail a's is aithne dhomh,
'Nuair ghlaodhar gu rebhiù iad,

[TD 254]

'Sa sheasas iad ri d' chùla',
Gu cinnteach cha bhi diu,
Ann aon fhear do 'n ghabh agad.
Deoch slainte, &c.

'Nuair a ruisgear piob dhuit,
'S toilinntinneach ad leanailt iad,
'S ullamh iad fo 'n armaibh,
'S neo chearbach an am cabhaig iad,
H-uile fear dhiu' 'n òrdugh,
Na sheasamh far 'm bu chòir dha,
'S gur freagrach do t-ordugh,
'N oigridh dh' fhalbh o 'n bhaile leat.
Deoch slainte, &c.

Air fhad 's 'ga 'n lean mi 'n t-òran,
Trian do d' sheòl cha 'n aithne dhomh,
A chuir a mach le m' inntinn,
Gach buaidh le sith tha 'n ceangal riut;
Ach nar mheal mi 'n còta,
Na 'm biodh a chùis gu m' ordugh,

Iain oig 'Ic Iain 'Ic Dhonuill,
Mur d' orduich mi thu 'd sheanalair.
Deoch slainte, &c.

[TD 255]

ORAN leis a bhard cheudna, deanadh a ghearain ris an tuathanach,
bhliadhna thainig càin air na h-eich.

SEISD.

Ho ro ho, laill ho ho,
Lailh ho ho, ro hì
Ho ro ho, laill ho ho,
Lailh ho ho, ro hì,
Ho ro ho, laill ho ho,
Lailh ho ho, ro hì,
Bu toilichte sinne,
Na 'n dtigeadh an t-sìth.

Gu 'n innsinn duit sgéula,
Nan éisdeadh tu riùm,
Tha e soilleir dhuit fhéin,
Ann an leirsinn do shùl,
Mur paigh thu gach deacha',
Theid a leagail as ùr,
Tha thu 'g àicheadh an Rìgh,
'S theid do dhiteadh 'sa chuirt.
Ho ro ho, &c.

Tha mise fo mhulad,
Agus 's duilich e leom,
Tha thu charaid 'ga m' aicheadh,
'N uair a tharlas tu rium;
Ged a ni thu rium tachairt,
An clachan na 'n cùirt,

[TD 256]

'S ann bhios mi an ag,
Gur a Sasunnach thu.
Ho ro ho, &c.

Tha spòrs agus ainmhein,
Ri anabarr d'ar call,
Dol an aodaichean fada,
Ann am fasan na 'n Gall,
Chaidh an t-'eile a meas,
O 'n 's i bhrìgis tha ann,
Tha ar reachd air a bhrìsteadh,
'S tha mhisneach air chall.
Ho ro ho, &c.

Ma leanas an riaghailt so,
Bliadhna na dhà,
Ged a chi thu do charaid,
Ann an cabhaig no 'n càs,
Ma tha e gun bhéurla,
Cha 'n eil speis agad dà,
'S do nadur air tionndadh,
Mur bhruid as an tràigh.

Ho ro ho, &c.

'S nach gòrach an seann-duin'
Th' ann an geamhradh a là,
Tha e 'n deireadh a thim,
'S tha e 'n liontaibh a bhàis,
Tha gliogaich na chasan,
'S tha 'm bata na laimh,
Leig e bhoineid a fasan,
'S gheibh e ad mur th'aig càch.
Ho ro ho, &c.

'N uair chunntas tu 'n toiseach,
Gach costas gu t-fheum,

[TD 257]

Gur beag do thoil-inntinn,
Do gach ni th' agad fein,
'Nuair a phaigheas tu deacha',
Air son t-each anns an éill,
Gur daoire na 'm màl,
H-uile càin th' ann ad dhéigh.
Ho ro ho, &c.

Tha sannt agus farmud,
Ri anabarr d' ar call,
Mar gu 'm biodh fear fradhairc,
A bruidhinn ri dall,
'N sgeul a dheanar le barail,
Tha e anabarr meallt,
Tha e duilich rì chunntas,
Co dhiu bhios ann.
Ho ro ho, &c.

'Nuair a ghineadh ar nàisinn,
O Adhamh a's o Eubh,
Bha sinn uile n-ar braithrean,
'S n-ar cairdean d'a chéil',
Rinn an saoghal ar buaireadh,
'S ioma truaigh tha n-ar déigh,
Rinn am peacadh ar mealladh,
'S tha e leanailt an tréud.
Ho ro ho, &c.

Nach bòidheach am fiamh,
Tha air ianlaidh nan speur,
Ni 'n leaba 's an fhasgath,
'S an ceann taisgte fo 'n sgéith,
Tha iad toilicht na 'n nadur,
Le 'n talanta' fhein;

[TD 258]

Gur son' iad seach sinne,
'S ioma diomaidh n-ar deigh.
Ho ro ho, &c.

'S ioma oganach tapaidh,
Chaidh thairis do 'n Fhraing,

Thainig deireadh a shaoghail,
'S nach d' fhaod tigh'n a nall
Ach chi sinn le ar sùilean,
A chùis a bhios ann,
Cheann deireadh na h-iomairt,
Gu 'm bi sinne 'sa chall.
Ho ro ho, &c.

ORAN do BHOINIPART; Leis a bhard cheudna.

SEISD.
A Rìgh gur h-aotrom leinn an t-asdar,
Bimid sunndach air bheag airtneil,
Dhol an comhail Bhoiniparti,,
Chionn bhi bagairt air Rìgh Deòrs.

'Illean cridhe bimid sunndach,
Seasamaid onair ar duthcha,
Fhad sa mhaireas luaidhe 's fùdar,
Ciod a chuireas curam oirnn.
A Rìgh gur, &c.

Thoisich thu oirnn o cheann fada,
Le bòsd, le bòilich, 's le bagradh,

[TD 259]

'S ged thig thu air tìr an Sasunn,
Cha d' theid thu dhachaidh ri d' bheo.
A Rìgh gur, &c.

Ged theannadh tu fhein 's na Frangaich,
Ri tigh'n a Bhreatunn le d' chabhlach,
Cuiridh sinn a null gun taing thu,
'S b' fhearr dhuit fuireach thall ad dheoin.
A Rìgh gur, &c.

'Nuair chuir thu 'n Fhraing thair a cheile,
Dh' fhalbh thu mur shloightir do 'n Eiphte,
'Nuair a chaill thu 'n coig ciad deug,
Gun theich thu fhein air eiginn beò.
A Rìgh, &c.

Bha luchd nan adaichean croma,
Na 'n luidhe air blar g'a 'n lomairt,
'S e mo dhiùbhail bh' anns a choinne,
Nach d' fhan Ebarcromai beò.
A Rìgh gur, &c.

An t-seann Reisimeid dubh mheasail,
An dara te sa 'n da fhichead,
'Nuair fhuair i suas riut a chlisgeadh,
Chuir i bristeadh ann ad chrò.
A Rìgh gur, &c.

Nis dh' eirich na Bholuntians,
'N onair an Rìgh 's mhoir-fhear Iain,
Chur na 'm Frangach gu 'n cridhe,
Chionn bhi bruidhinn tigh'n d' ar coir.

A Rìgh gur, &c.

O 'n fhuair sinn deise nan Gaidheal,
Boineidean 's cotaichean sgarlaid,

[TD 260]

Suaithcheantas an Rìgh mar fhabhar,
Le coc-ard a dh' ite 'n eoin.
A Rìgh gur, &c.

'S na 'm biodh againn mur bu dual duinn,
Lann chinn Ilich air ar cruachainn,
Sgoltadh nan ceann g'a 'n guallibh,
Ga 'm bualadh le smuais nan dorn.
A Rìgh gur, &c.

Gu bheil Albainn agus Sasunn,
A guallibh a cheil' an ceart-uair,
Tha iad aig fuaime an aon fhacail,
Mar shrad eidear clach a's òrd.
A Rìgh gur, &c.

Dh' fhalbh thu mar shloightir air chuan,
Mu 'n d' amhairc sinne mu 'n cuairt oirnn,
'S ged thug thu Hanobhar uainn,
Ge b' oil leat cha d' fhuair thu 'n t-òr.
A Rìgh gur, &c.

Ach ma gheibh sinn ann an sàs thu,
'N dearbh cha 'n fhaigh thu moran dàlach,
Do chrochadh an la 'r na mhàireach,
Le fiach cota-bhàin a ròp.
A Rìgh gur &c.

Ged thig thu air tìr an Albainn,
'N dochas losgaidh agus marbhaidh,
Tha againne suas do dh' armailt,
Na shrachdas t-eanchainn agus t-fheoil.
A Rìgh gur, &c.

Tha saighdeirean Earraghaidheal,
Fearachail, foghainteach, daicheil,

[TD 261]

'S chuireadh iad eagal a bhais,
Air h-uile namhaid a ta beo.
A Rìgh gur, &c.

ORAN do dh' Fhiunnla Marsanta, air son e a chuir as a cheile, thogail
tighe dha fhein, sean chuirnn agus clachaibh iobairt, aite bha na aon do
dh' iongadais mhor na h-Alba.—Le Seumus Mac 'Ille-sheathancich.

Fonn.—Alasdair dubh Ghlinne Garaidh.

CHUNNAIC mi brúadar air Fiùnnla,
'S chuir e iongnadh orm ri fhaicinn,
'S ghabh mi iongadas ro mhor dheth,

Gu sonruicht o 'n bha mi 'm chadal;
Thuirte an guth rium dol da ionnsaidh,
Dh' innse nach e cùis a b' fhasa,
Dol a rusgadh carn na 'n Druidhneach,
Na 'n car a thoirt a muinntir Ghlaschai.

Ach dh' fharraid mi co as a dh' fhalbh e,
'S fhreagair e le seachas grad mi,
Thuirte e gu 'n robh a chairdean dileas,
Eidear a Chill 's Allt-na-dacha;
Bha cuid air an Dun so shuas diu,
'S bha uair a bha iad na bu phailt ann;
'S cha 'n eil mi buidheach a dh' Fhiunnla,
Dhol ga 'n dusgadh as an cadal.

[TD 262]

'S chi thusa fhathasd le d' shuilean,
Ma bhios tu 's duthaich ri fhaicinn,
Gu 'n d' theid an gnothuch so dhiùladh,
Cho chinnteach 'sa bha 'n crun an Sasunn,
'S goilt e 'n steith bh' ann an uachdar,
Chlaothaich e 'n uaigh fo na leacan;
E gun fhios co dhiu bha innte,
Mac an Rìgh na sliochd a bhaigeir.

'N saoil thu fhein nach robh e dàna,
Marsanta maileid no paca,
Dhol a rusgadh an ait iobairt,
'S ioma linn a chuir e seachad;
'N t-aite 'n robh cnaimhean an t-seannduin,
'N tiolacadh ann o chionn fada;
Mu 'n d' theid an gnothach gu crìch,
Gur duilghe dha e na fiach a bhlastaidh.

Ma dh' eireas mise 's mo luchd leanmhuinn,
Gu 'm bi gnothuch garbh as duthaich,
Theid Mac Ille-dhuibh a mharbhadh,
'S cha dion a chuid airgid Fiunla,
Leagar an tigh air sa 'n sabhal,
Sgriosar am bathar sa 'm bùth air,
'S theid Gilleasbuig ri posta,
Agus crochar mac a chùbair.

Eiridh an tubaist do 'n chiobair,
'S luidhe binn air Mac na Cearda,
'S ma dh' orduicheas e gu h-olc e,
'S gnothuch neo-chiontach sud dàsan,
E na sheirbheiseach aig Fiunnla,
Tuille a null gu feillmartuinn,
'S ma chuireas e nall na leacan,
Ma bhios meachainn ann sann dàsan.

[TD 263]

Bhi cuir fudair anns na creagan,
Chuireadh e eagal air bocain,
Bhi ga 'n tolladh leis an tora,
'S bhi ga 'n sparradh leis na h-ordan,
Daoine marbhadh bhi ga 'n gluasad,

'S gnothuch uamhraidh gu leoir e,
'S na 'n leanainn e gu grund an t-seanchais,
B' ainmeil e na arm Rìgh Deòrsa.

'S cha d' theid a chorp fhein gu dilinn,
Thiolacadh an aite gràs mhor,
'S ann theid a losgadh mur iobairt,
Air a dhiteadh leis na faidhean,
Theid a luath chuir le abhuinn,
'N aite nach fhaighear gu brath i,
'S cha 'n fhaigh e ach rud a thoill e,
Chionn gu 'n d' rinn e gnothuch graineil.

Ach dh' fhalbh an guth 's thug e chul rium,
Agus thionndaidh e gu h-ealamh,
Thuirt e rium gu 'n d' rinn e diochuimhn,
'S e ga innse dhomh mur charaid,
Fios a thoirt dh' ionnsaidh Dhughaill,
Gu 'n robh a ghual a's uird ro ealamh,
Dheanadh torachan a Dh' Fhìunnla,
Chuir fùdair an Dail a charra.

Smaointich mi so ann am inntinn,
Nach bithinn a diteadh Dhughaill,
Thuirt mi ris gur duine grinn e,
Do dh' fhuil na 'n Rìghrin na 'n Stiùbhart,
Tha e fhein na dhuine toileil,
Dheanadh gnothuch do dh' fhear duthcha;
'S on bha Fhìunnla na chabhaig,
Cha bu mhath leis bhi ga dhiultadh.

[TD 264]

'Nuair a dhuisg mi ghabh mi eagal,
'S e na sheasadh air an ùrlar,
Dh' fheuch am faighinn reidh air falbh e,
Los nach coisninn na lorg diùmba;
Tha Dughall trom air an Tombaca,
'S tha pailteas deth sin aig Fhìunnla;
'S o 'n a labhair mi cho deas ris,
Ghabh e pairt do leith-sgeul Dhughaill.

'S ann a tha 'n nuaidheachd so cinnteach,
Ged shaoileadh sibhse gur bosd e,
Cha 'n innis mi a neach gu brath e,
Ach do chuideachd araid eolach;
Cha robh a leithid riamh ri innse,
Eidear an Sithein 's Lag Chòthain,
Co dhiu th' ann breug no firinn,
Sin agaibh mur dh' innse dhomhs e.

Cumha do Shìom og, MAC MHIC DHUGHAILL MHOR-THIR, a mhilleadh ann am bliadhna 1812, le urchair thubaisteach o ghunna fhein; Le Iain Mac Ghillebhrà, piobaire fir Ghlinn Aladail.

'S TRIC mi tionndadh am leabaidh,
'S gun mo dhuil ris a chadal,
'S beag an t-iongnadh sud 's m' aigne cho chraiteach
'S tric mi, &c.

[TD 265]

Fhuair mi sgeula sa mhaduinn,
Thromaich eislein fo m' aisnean,
'S cha tuig leigh na fear m' fhaicinn mur tha mi.
Fhuair mi, &c.

Gu 'n do chiuradh am faillein,
Bh' air friamh dhuthchais na 'm meangan,
Craobh a b' ùire measg dharag a gharaidh.
Gun do, &c.

Mile marbhaisg air an t-saoghal,
'S mairg a bheireadh ro ghaol da,
'S nach eil ann do na daoine ach an sgàile.
Mile marbhaisg, &c.

'S tric ar n' uaighean ga 'n claothach,
'S uainn ar n' uaislean ga 'n taghadh,
'S grad a bhuaineadh oirnn raogha na 'n agan.
'S tric, &c.

Mhic 'Ic Dhughaill o 'n Ghainmhin,
O bhun stuc beinn an t-sealgaich,
'S goirt a chunntadh an aimsir so 'd chairdean.
Mhic 'Ic Dhughaill,

Ghnuis a b' aillidh r' a sireadh,
'N t-sùil bu bhlaithes gun tioma,
'S deacair aireadh aon ghin a thug barr ort.
Ghnuis a, &c.

Alach prionnsail a chruadail,
Sgathan sambuill na h-uaisle,
'S goirt ri chluinntinn gun sguabadh ar larach.
Alach, &c.

[TD 266]

'S beag an t-iongnadh do dhislean,
A bhi tursach na 'n inntinn,
'S gu 'm bu mhuirneach a chis thug am bàs diu',
'S beag, &c.

Chraobh is faide fo fhriamhaich,
Gur h i 's aith-ghearra chrionas,
'S tric tha tobraichean fìor-uisg a tràghadh.
Chraobh is faide, &c.

'S ioma latha mor meadhnach,
Air bharr aidhear a's greadhnais,
Thug na maithibh an teaghlach na Tragh ud.
'S ioma latha, &c.

Mo chreach leir Clann Mhic Dhughaill,
'S iad mur choill air a rusgadh,
Co nis sheasas an cùis an am gabhaidh.
Mo chreach, &c.

O 'n a dh' fhalbh an sgiath dhiodainn,
Bha na dion aig an sinnsribh,
Iuchair ghleidhte nach diobradh na 'n càs iad.
O 'n a dh' fhalbh, &c.

Na 'm b' e iomairt no eucoir,
Leis an rachadh do chreuchdadh,
Air mo laimh nach biodh t-eirig gun phaigheadh.
Na 'm b' e, &c.

'S lionar curaidh deas dealbhach,
Rachadh ullamh g' a dhearbhadh,
Sheasadh duineal fo airm an am tairnge.
'S lionar, &c.

[TD 267]

'S ann diu fìor shliochd do thighe,
Rachadh sìos leat gun athadh,
Dheanadh gnìomh an am crathadh na stailinn.
'S ann diu, &c.

Sin 'sa 'm Moir-fheara Sléibhteach,
Air bharr corra-ghleus 'nuair dh' fheumadh,
Le laoch fhoirmeil nach geilleadh 'n am gabhaidh.
Sin 'sa 'm, &c.

'S laidir gaisgich Chlann Raoghnuill,
Mur bharr lasrach a't-aobhar,
'S cha b' e b' fhasan doibh claonadh sna blaraibh.
'S laidir gaisgich, &c.

Oighre Chnoideart a bharraich,
Da 'm bu choir a bhi fearail,
'S cian a sheorsa 'm Bun Gharaidh an tamhachd.
Oighre, &c.

Sin a's foirnidh* na choinneadh,
Sliochd Iain oig as na Ghleannaibh†,
Bhiodh ad chongnadh le barrantas laidir.
Sin a's foirnidh, &c.

Mur choin shealgaich air lomhainn,
No barr gailbhinn a's reoghairt,
Comhlan borb Ghlinne Comhunn 'sa Bhraghad.
Mur choin, &c.

Cìod am fath dhomh bhi sireadh,
Na bha deurach mu d' mhilleadh,
'S nach till trein fhir a chruinne gu brath thu.
Cìod am fath, &c.

<eng>* Brigade.

† Glenaladale.<gai>

[TD 268]

'S trom na 's feudar a ghiùlan,
'S goirt gach creuchd mar is ùire,

Ged 's e 'n t-eug is ceann iùil do shliochd adhamh.
'S trom na 's, &c.

Ach 's e 's cuibhe dhuinn striochdadh,
Leis gach nith bheir a chrìoch dhuinn,
O 'n 's ceann uighe dhuinn sìoruichd gun aireamh.
Ach 's e 's cuibhe, &c.

Fhir thug Pòl as na h-iaruinn,
'Sa thug Iob as a phiantaibh,
Nochd dhoibh sòlas gun chrìoch ann am Pharais.
Fhir thug Pol, &c.

ORAN do dh' EOGHUN MAC-A-PHEARSAIN, Tighearna Chluainidh; Le Donnacha Gobha.

A CHUIDEACHDA' na 'n eisdeadh sibh,
Ri pairt do m' sgeula chlaistinneachd,
Gu 'n innsinn mur a dh' eirich dhuibh,
O leir thogail na Gaidhealtachd;
O 'n theann a chlann ri mìothlachd ruibh,
'S nach d' rinneadh Rìgh do Thearlach dhuibh,
Deanaimid urnaigh dhìchiollach,
Gu 'n gleitheadh Crìosd an t-aite dhuit.

Slan iomra' dha n' ur 'n uachdaran,
Gur cinnte buaidh 's gach arachdh dha,

[TD 269]

'Nuair thogte 'n srol a b' uaine leis,
Sa 'm fraoch 'sa chnuaic a b' aird agailbh;
'N am dhol sìos bu rioghail sibh,
O 'n t-sreang a b' isle thairngneadh sibh,
'Nuair chluinnte fuaim 'ur lamhaich,
Air 'ur naimhdean bu neo sgathach sibh.

Mu chùis an leoghuinn bheuchdaich so,
Bu cheannard treud bha foirmeil e;
Bu lionar crìoch a dh' eireadh leis,
A rachadh air ghleus gu colgara;
Cha b' urrainn dhomh trian dheth d' threubhantas,
A leughadh ged a thoisichinn,
Gur lionar cuirp bhiodh ciuirte
Aig luchd spuillidh 'n taobh a sheoladh sibh.

Ach c'uime 'n leiginn mighean ort,
'S gur h-e so Rìgh a bhuannaicheas;
'S gur h-i so bliadhna dhìreas,
Gach ti a chaidh 's na bruachan uainn;
Gu 'n gleidheadh Dia gu 'n Rìoghachd iad,
Chaidh dh' fhaighinn sìth thair chuantaibh uainn,
Sgrios air do luchd mìoruin-sa
'S do shith thoirt le neart chruaidh lanna'.

Gur a lionar cairdean duit,
Cia b' e thairngneadh eucoir ort;
Bu lionar as gach aite iad,
Gach sar-bhratach ag eiridh leat;

Bidh thaobh do mhathar pairt diu ann,
Na Camshronaich nuair dh' eireadh iad,
'S iad gun sgraing gun tuchan,
Bu neo bhrùite 'n am an fheuma iad.

Bidh t-ite fhein ga d' threorachd,
Na Toisich nuair a dh' eireas iad;

[TD 270]

'Sa 'n tuasaid air a h-airde,
Gu 'm bu bu gharg a dol le chéile sibh,
Gur lionar marcach stranna-mhor sin,
Thug adbhans le ceuta dhuibh;
'Sa dh' aindeoin Rìgh a's Parlamaid,
Gu 'n crunar Tearlach treubhach leibh.

'Sa 'n ealta' so tha sinte riut,
Nach diobradh 'n am an fhuathais thu;
'N t-ard Fhrisealach gu dileas leat,
Nach cumadh sìd air fuairlead uait;
Preas dosrach 's cha bu chrionach iad,
Dhearbh an gnìomh air chruadalachd;
Fir dheas ro bhras am fìor chleasan,
Bhuidhneadh cis an tuasaidean.

Streang eile c' uime 'n diochuimhninn,
Nach fagadh shìos le eucoir thu;
Gu dualach, cuachach, sniomhanach,
Gur borb ro rioghail treubhach iad;
Gu lannach, dughorm, targaideach,
'Sa 'n argumaid 'nuair a dh' eireadh i,
Clann Donuill gu treun gailbheach leat,
Ge garbh an tìr o 'n eighear iad.

'Nuair thainig spairn 'sa 'n Rìoghachds' oirn,
Am Piorat co rinn tearnadh dhuinn;
Gu bheil sibh fhein cho chinnteach dheth,
'S ged bhiodh e sgrìbht' air phaipeirean;
Gu 'n d' thug e 'n ionnsaidh dhìchiollach,
Mu 'm buinteachd cis aig namhaid oirbh;
'S gu 'n chuir e 'n ruaig gu fìor-chleasach,
An tìd dhol sìos 's na h eidseachan.

'Nuair chrom na laòich 'sa 'n anamoch,
Bu neo chearbach sìos gu foirmeil iad;

[TD 271]

Bu bheo na 'm feoil 's na 'm mail'ean iad,
Bu gharg an gnìomh air chòlgarachd;
'N am rusgadh lann a's fhaobhar duibh,
Bha sgaoileadh an luchd chotachan;
Bha maòim am fiamh ur namhaid,
Leis na bh' air an sail 'ga 'n lorgaireachd.

Cha labhair mise tabhachd ort,
Ach Dia mur gheard ann t-eireadh leat;
Gu 'n deachaidh t-ainm air shabhalachd,
Cha fada thall a's Eirinn uainn;

Gur gaisgeill, smachdail, laidir thu,
Gu'n caisgte mearla 's eucoir leat;
Shir Eoighin oig a Cluainidh,
Righ! gu 'n cluinninn buaidh le céuta ort.

ORAN air a chall mhor thachair ann an Gadhaig, fridh na 'm fiadh aig Diuc
GORDAN, am Baideineach, ann am bliadhna, 1800.

AN nollaig mu dheireadh do'n chiad,
Cha chuir sinn i 'n cunntas na 'm mìos,
Gu ma h-anamoch thig i ris,
Bù ghriomach a bhean tighe i.

Cha d'fhag i subhaltach sinn,
Cha d'fhuair i beannachd 'sa 'n tìr,
Cha d' thainig sonas r'a linn,
Ach mi thoilinntinn s an-schocair.

[TD 272]

Sheid a ghaoth am fridh na 'm fiadh,
Nach cualas a leithid riamh,
Chuir i breitheanas an gnìomh,
A bha gun chiall gun fhathamas.

Dalladh a bhreitheanais chruaidh,
Mhurt e fhein 's na bh' ann a shluagh,
Bha Prionns' an athar mu'n cuairt,
'S gu 'n d'fhuair e buaidh an latha sin.

Duisgibh mu 'm fas sibh liath,
'S dluitheadh ur cas air an t-sliabh,
Feuchaibh 'm bi air fasga' deant',
Mu 'n d'theid a ghrian a luidhe uaibh.

Rinn sinn an cruinneacha fann,
'S cha b'ann gu cluich air a bhall,
Spionadh na 'n corp as an fhang,
'N gnìomh a bh'ann bu sgrathail e.

'S duilich leam ni eile th'ann,
Air am bi moran a cainnt,
Bha eirir na 'n corp air a cheann,
Na dh' iompaich ann an plathadh iad.

Fhuair a cholunn a ceusadh cruaidh,
'Sa ghleann dorcha 's nach robh truas,
Mu 'n do thog na spioraid suas,
Gu sonas buan na 'm flaithibh iad.

Mur shaighdibh teine 'n cridhe 'n t-sluaigh,
O 'n thog e chreach 'sa 'n an-uair,
Ach cuiribh ur doigh am fuil an uain.
'S gu 'm faigh sibh 'n suaimhneas roimhìh biad.

[TD 273]

Bha cruaidh fhortan dha 'sa 'n dan,
Thionail e fear dheth gach sràid,

Gu bothan nach do choisrig iad,
Mu thoiseach snaoim na 'n clachairean.

Bu chruaidh an cath 'sa 'n seideadh garbh,
As nach b' urrainn aon fhear falbh,
Dh' innseadh cia mur chaidh do 'n t-sealg,
Dheth 'n laraich mharbh thoirt nuaidheachd dhuinn.

'S coma cia mur thig am bas,
Co dhiu 'sa mhùir na 'sa charn,
Moladh sibhse Ti na 'n gràs,
Gu bheil fear tearnaidh feitheadh ruinn.

Na tugaibhse breth lochdach luath,
Air cia mur thainig an uair,
'S ann o'n bhreithe mhor tha shuas,
Gheibh sinn duais 'n ar n' abhagais.

Recruitigeadh dubh gun àgh,
Cha robh e riamh leis ach na spairn,
'S chuir e saltraigeadh dheth ainm,
Bhios luchd ainigidh 'g aithris air.

A chasg mìoruin a's droch sgeul,
Tha trian m' orain-sa gu leir,
'S tha teaghlach Baile-chrothain fhéin,
Cuir mo speis an amhuras.

Gur h'-e 'n t-Oicheir dubh so bh' ann,
Chuir e cul r'a thigh 's r'a chlann,
Na'n tuiteadh e 'n cath na Fraing,
Cha bhiodh a bhàs cho farranach.

[TD 274]

Domhull MacFhiunnlaidh na 'm beann,
Domhull na Tulaich a bh'ann,
Le a lothainn ghasda gun fheall,
A's Seumus Grannt a feitheadh air.

'S mor an iondrainn duibh è,
An tim faothaid chuir 's gach beann,
Eidear machair shios na 'n Gall,
A's suas gu ceann Strath-haragaig,

Bu ghill' e bheireadh spors do Rìgh,
Le choin 's le ghunna gun chlith,
Bha e conspuinneach 'sa 'n srith,
'S bu mhìn 'sa ghabhail rathaid e.

Donnacha MacPharlain gun fheall,
B'e deagh fhear an tighe bh'ann,
Lamh fhoghainteach an srath sa'n gleann,
Nach faiceadh call an atharaich.

Bu mhath leis pailteas m'a laimh,
'S cha b' ann gu fhalach air cach,
Air a sporan cha bhiodh snaoim,
'Nuair thigeadh am a chaitheadh dha.

B' fhear spòrs e, comuinn a's graidh,
Ged thug e seal uainn air chall,
Mu 'n d' fhas e odhar, anard chaich,
Thug pailteas lamh gu cairidh e.

Bha Iain og a Fatharais ann,
An geard a bhaile rinn e bearn,
Ged fhagadh e athair dall,
Cha b' innisg ann 'sa bheathas' e.

[TD 275]

Bha e og gu tighin m'a chainnt,
Cha robh m'eolas air ach gann,
Tha mi cluinntinn aig luchd daimh,
Gu 'm b' iondrain ann 'sa 'n talamhs' e.

Sguiridh mi thuireadh nach fhiach,
Cha 'n urrainn mi tuilleadh chuir sios,
'S don' an ceol do 'n nollaig i,
Aig a mheud 'sa sgar i sinn.

'S lòn d'ar 'n anamaibh ar sìth,
'S na h-ainmeannan fhaighinn sgrìbht;
'N oighreachd is gile na ghrian,
Choisinn Rìgh na 'n aingeal duinn.

Gach neach tha 'g imeachd fo an spéur,
Their gur h-e a neo-chiont fhein,
Tha ga shaoradh o dhroch theum,
Tha spiorad breig a labhairt ris.

Ach bruidhnidh 'n linn a thig a naird,
Am mìle bliadhna so slàn,
Air a bhreitheanas so bh' ann,
'Sa 'n sgrios a bh' ann 'sa chathadh ud.

A cheathrar a fhuair pronnadh chnamh,
Tha 'n làtha tighin gun dàil,
'Nuair dh' fhosglair leabhar na 'n gràs,
Gu 'm faighear sabhailt fhathasd iad.

Gàdhaig dhubh na 'm feadan fiar,
Nach robh ach na striopaich riamh,
Na bana-bhuidsich ga 'n toirt 'sa 'n lion,
Gach fear leis 'm bu mhiannach luidhe lea.

[TD 276]

ORAN LE BARBRA FRIOSAL, Dhùinidh, an uair chaidh a cuir air imrich a
Dùinidh, do dh' Achanaclaidhe, am braighe Aird Mhic Shimidh, an deigh bàs
a fir agus a mic bu shine.

GU bheil mise gun tamh,
Gach aon oidhch agus là,
O'n chuir iad gu braighe bealaich mi.
Gu bheil mise, &c.

'S ged a ghoideadh mo nìth,
Cha dean mi riu strìth,

O'n chuir mi 'sa chill na leanadh iad.
'S ged a ghoideadh, &c.

Na fir ghasda gun ghruaim,
Nach bu tais am beart chruaidh,
Ge b' e bheireadh rud uath' gu 'm b'aithreach dha.
Na fir ghasd, &c.

'Nuair a ruitheadh tu air falbh,
Cha bu ghealtach do cholg,
Gur tu bheireadh an lorg air bhealaichean.
'Nuair a ruitheadh, &c.

'Sa nuair a ghabhadh tu mu thamh,
Cha bu sgrubaire clair,
Gu 'n gleidheadh do chairdeas caraid duit.
'Sa nuair, &c.

'S bu tu 'm biataiche bùird,
Bhiodh gu math ri luchd dùthch,
'S nach gabhadh a mhùig ri aithnichean.
'S bu tu 'm biataiche, &c.

[TD 277]

Bu tu m' aidhear 's mo mhiann,
Dheth na chunnaic mi riamh,
Fhir a chridhe 's e b' ainm dhuit Alasdair.
Bu tu m' aidhear, &c.

Gu 'n d'fhuair mi thu og,
As a chlachan rium poist,
'S na 'm biodh tu beo cha b'aithreach leam.
Gu 'n d'fhuair, &c.

Ach an samhradh na dhéigh,
Fhuair mi buille ro ghéur,
Chuir air m'uilinn mi' fhein 's gu'n d'fhan mi ann.
Ach an samhradh, &c.

Gu 'n do chaill mi mo sdiùir,
'S mo chrann taic' anns gach cùis,
Fear dheanadh mo thurnn gu'n do ghearradh uam.
Gu 'n do chaill, &c.

Bu tu 'n saighdeir bha garg,
Ort a luidhe na h-airm,
Bha do chlaidhe 's thu marbh an tarruing ort.
Bu tu 'n saighdeir, &c.

'N iongnadh mise bhi liath.
'S ged a ghlasadh mo chiabh,
'Nuair chuir mi 'n aon bhliadhn 'sa 'n talamh sibh.
'Niongnadh mise, &c.

Ach a Chrìosd ud tha shuas,
Gabh ri mo leithid-sa truas,
O'n is bean mi a fhuair a carachadh,
Ach a Chrìosd, &c.

[TD 278]

Ma 'sa teann rium am bàs,
Gabh ri m' anam-sa tlaths,
'S cuir mo pheacaine 'n aite falaich uam.
Ma sa teann, &c.

ORAN do fhear DHUNGALAIN, 's e bhi dol as an Rioghachd.

GUR cràiteach a mheadhail,
Tha 'n dràsda a tigh'n fodhainn,
Ann an trath an fhoghair 's na buana.
Gur cràiteach, &c.

Fhuair mi sgeula mo sgaraidh,
'S cha bu spreidh bha mi gearan,
Ach do thoirt fhir Dhungalain air chuan uainn.
Fhuair mi sgeula, &c.

Marcaich sunndach na 'n seang-each,
Mor, cruideach, gorm strannach,
Thug thu 'n duthchas o d' shean'air an cruadal.
Marcaich sunndach, &c.

'Nuair a bhiodh tu 'n Dunéidionn,
B'ann do t-fhasan 's do d' bhéusan,
Bhi cuir bhòd a's geall réis ri daoine uaisle.
'Nuair a bhiodh, &c.

'Nuair a thigeadh tu dhachaidh,
Gu Tur meadhrach a phailtis,

[TD 279]

Bhiodh do ghillean na 'n draip air an luaithead.
'Nuair a thigeadh, &c.

Ach cha b' uileir dhuit dithisd,
Dhol a riarachadh dibhe,
Anns an t-seomar an suidheadh na h-uaislean.
Ach cha b' uileir, &c.

Gheibhte ceol as gach feadan,
Ann ad sheomar mu fheasgar,
A dheagh mhic 'Illeasbuig so ghluais uainn.
Gheibhte ceol, &c.

'Nuair bhiodh fang air na h-eachaibh,
Gheibhte branndaigh ga sgapadh,
Anns a ghleann 'n tric a leag thu damh cluas-dearg.
'Nuair bhiodh, &c.

Dh' òilte fion leat gu frasach.
'S tu gu 'n dioladh e farsuing,
Leis an lionadh bha pailt mu do ghuaillibh.
Dh' òilte fion, &c.

'S mi air taobh an Tom bhuidhe,
'S goirt 's gur deurach mo shuidhe,

'S tric na deoir a sruthadh le m' ghruaidhibh.
'S mi air taobh, &c.

Cumhadh an Alasdair phrìseil,
Dh' fhalbh uainn as an Rìoghachd;
'Se comisein a mhì-raith a fhuair e.
Cumhadh an Alasdair, &c.

'S truagh nach mise a dh' fhalbh leat,
Ged nach pillinn do dh' Alba,

[TD 280]

Mhic an fhir 's mor a dhearbh a bhi uasal.
'S truagh nach mise, &c.

'S ann a b' iosal am beachd leam,
Do dh' fhear t-fhiamh agus t-fhasain,
'Nuair a strìochd thu bhi 'd Chaiptein air sluagh dhoibh.
'S ann a b' iosal, &c.

'S na 'm biodh fios aig fir Shasunn,
Am beachd meamnach bha t-aighe,
'S ann a dheanadh iad Admaral cuain diot.
'S na 'm biodh, &c.

'S ioma Diùc a ghabh beachd ort,
Agus Baintighearn og thlachdmhor,
Leis 'm bu mhiann thu bhi aic air a gualainn.
'S ioma Diùc, &c.

'Nuair a rachadh tu t-éideadh,
Fo bhreacan am féile,
Gu 'm bu cheannard roimh chéud mìle sluaigh thu.
'Nuair a rachadh, &c.

Ged bu chruaidh 's ged bu chràiteach,
Leinne goirteachadh Thearlaich,
'S ann an diugh tha ar làraichean sguabte.
Ged bu chruaidh, &c.

[TD 281]

ORAN le fear Ionmhurchadain ann an Raineach.

Fonn.—
Mìle marbhaisg air an t-saoghal,
'S carach baoghalach a dhail, &c.

ACH na 'n d' thigeadh Tearlach Stiùbhart,
Leis gu sunndach bhimid falbh;
Dh' eireadh ar cridhe 's ar tiunnsgal,
Mar 'sa bhurn am bradan ban;
Cha 'n eil gearasdan 'sa 'n dùthaich,
Nach biodh ciùirte dheth gun dail;
'S bhimid paighte anns a phlunndrainn
'S anns an rusgadh rinn na Caim*.

Tha choir air leaghadh anns na crìochan,
'S tha i iosal uile 'n drasd;

Sinn g' ar leònadh aig na biasdan,
Leis 'm bu mhiann ar slugadh slan;
Ach 'nuair ruisgear riu na h-iaruinn,
Tha fo 's 'n iosal feadh na 'n carn,
Bidh ar cornaibh air an lionadh,
'S bidh iadsan sianail thun a bhais.

Ach 's leir a léus air Clanna' Ghaidheal,
A Pharlamaid so tha g'a 'n cradh;
Gun airm, gun eideadh, gunn earrlaid;
Gun a chearbag theid mu 'm màs;
Ged rinn dioghaltas ar tearbadh,
'S earbasach mi gu bheil e 'n dan;
Gu 'm bi sinn an uachdar le 'r feara-ghnìomh,
'S dearganaich fo chis na 'n cnamh.

<eng>* The Campbells burnt his dwelling-house.<gai>

[TD 282]

Mosglaibh uile gach treun-laoch,
'S bithibh gleusda mar a b' àbhaist;
Mur thràillean na deanaibh geilleadh,
Fhad 's bhios fuil n-ur féithean blàth;
Chuala' mi a bhi leughadh,
Bharr air Reumair, ioma fàigh,
Gu bheil curainean aig Séumus,
Ni treubhantas an deigh bhi marbh.

Mosglaibh uile, gach duine,
Anns a chumasg bithibh garg;
Deòrs a's Uilleam rinn ar guineadh,
Sud na cuileinean gun dealbh;
Choidhch cha toir a chràin na 'n cullach,
Am feasd buinig as ur n-arm;
'S fuadaichibh a mhuc le gusgal,
Marr-ri h-uirceinean th' air fairg.

'N Rìgh ga dhiodainn a's a dhislean,
Air an fhìor-fhuil gu 'n robh sealbh;
Air crun Alba o linn Raibeart,
A reir na 'n eachdrain is fearr;
Bidh cinn-fheadhnaidh 's iad gu greadhnach,
Feadh do theaghlaich 'sa White-Hall,
Mur bhalla praise mu 'n cuairt duit,
Cabhlach cruadalach air sail.

'Nuair a theid an crun mu 'n òigeir,
'S lionmhor Mor-fhear bhios mu d' shàil;
Seanalairan le 'n campa 'n ordugh,
'S iad gun sgur ag ol do shlaint;
Gloineachean ga 'n lionadh 's bòlaibh,
Le fion or-chostach na spainnt,
'S iad ga 'n aiseag sìos air bordaibh,
Measg an t-sloigh o laimh gu laimh.

[TD 283]

ORAN do CHLANN GHRIOGAIR 'n uair a bha 'n ruaig orra, agus na coin dubha as an déigh; an tòir air tighin teann air pairt diubh gu tigh far an do stad iad ghabhail trath beidh, ach leum bean an tighe a mach gu ro thapaidh, agus shuidh i aig taobh an rathaid, gabhail nuaidheachd na toir, a deanadh an orain so, gu maille chuir orra, gus an d' fhuair Clann Ghriogair a mach air taobh cùil an tighe.

Fonn.—

Mo nighean donn bhoidheach,
Bha buain an fheor an de marr-rium, &c.

'S MI am shuidhe 'n so 'm ònar,
Air comhnard an rathaid;
'S mi am, &c.

Dh' fheuch am faic mi fear fuadain,
Tighin o Chruachan a cheathaich.
Dh' fheuch am, &c.

Bheir dhomh sgeul air Clann Ghriogair,
No fios cion a ghabh iad.
Bheir dhomh, &c.

Cha d' fhuair mi da 'n sgeula,
Ach iad bhi 'n de air na Sraithibh.
Cha d' fhuair, &c.

Thall sa bhos mu Lochfine,
Mas a fìor mo luchd bratha.
Thall sa bhos, &c.

[TD 284]

Ann an Clachan an Dìseart,
'G òl fion air na maithibh.
Ann an, &c.

Bha Griogair mor ruagh ann,
Lamh chruaidh air chul claidhe.
Bha Griogair, &c.

Agus Griogair mor meadhnach,
Ceanna feadhn' air luchd tighe.
Agus Griogair, &c.

Mhic an fhir a Straith-hardail,
Bhiodh na baird ort a tathaich.
Mhic an fhir, &c.

'Sa bheireadh greis air a chlarsaich,
'S air an taileasg gu h-aidhear.
'Sa bheireadh, &c.

'Sa sheinneadh an fhithioll,
Chuireadh fiughair fo mhnathan.
'Sa sheinneadh, &c.

'Sann a rinn sibh 'n t-sitheann anamoch,
Anns a ghleann an bi 'n ceathach.
'S ann a rinn, &c.

Dh' fhag sibh an t-Eoin boidheach,
Air a mhointich na luidhe.
Dh' fhag sibh, &c.

Na starsnaich air féithe,
'N déigh a reubadh le claidhe.
Na 'n starsnaich, &c.

[TD 285]

'S ann a thog sibh ghreigh dhùghorm,
O luban na h-abhunn.
'S ann a thog, &c.

Ann am bothan na dige,
Ghabh sibh dion air an rathad.
Ann am bothan, &c.

Far an d' fhag sibh mo bhiodag,
Agus crios mo bhuilg shaighead.
Far an d' fhag, &c.

Gur i saighead na h-araich,
So tharmaich am leathar.
Gur i saighead, &c.

Chaidh saighead am shliasaid,
Crann fiar air dhroch shnaitheadh.
Chaidh saighead, &c.

Gu 'n seachnadh Rìgh na 'n dul sibh,
O fhùdar caol neimhe.
Gu 'n seachnadh, &c.

O shradagan teine,
O pheileir 's o shaighead.
O shradagan, &c.

O sgian na roinn caoile,
'S o fhaobhar geur claidhe.
O sgian na 'n, &c.

'S ann bha bhuidheann gun chòradh,
Di-domhnaich 'm braigh bhaile.
'S ann bha, &c.

[TD 286]

'S cha dean mi gàir éibhinn,
'N am éiridh no luidhe.
'S cha dean mi, &c.

'S beag an t-iongnadh dhomh féin sud,
'S mi bhi 'n deigh mo luchd tighe.
'S beag an t-iongnadh, &c.

CUMHA le nighean do Dhonnacha dubh, Moir-fhear Bhraigh-dealbunn, an uair a thug a h-athair, agus a brathair an ceann deth a fear, Griogair Mac Griogair, agus a ciad leanabh air a glùn.

MOCH maduinn air la lunasd',
Bha mi sugradh marr-ri m' ghradh;
Ach mu 'n d' thainig meadhon latha,
Bha mo chridhe air a chradh.

Ochain, ochain, ochain uiridh,
'S goirt mo chridhe laoigh,
Ochain, ochain, ochain uiridh,
Cha chluinn t-athair ar caoidh.

Mallachd aig maithibh 's aig cairdean,
Rinn mo chradh air an doigh;
Thainig gun fhios air mo ghradh-sa,
'Sa thug fo smachd e le foill.
Ochain, ochain, &c.

[TD 287]

Na 'm biodh da fhear-dheug deth chinneach,
'S mo Ghriogair air an ceann;
Cha bhiodh mo shuil a sileadh dheur,
No mo leanabh fein gun daimh.
Ochain, ochain, &c.

Chuir iad a cheann air ploc daraich,
'S dhoirt iad fhuil mu lar;
Na 'm biodh agam-sa 'n sin cupan,
Dh' olainn d'i mo shadh.
Ochain, ochain, &c.

'S truagh nach robh m' athair an galar,
Agus Cailein ann am plaigh;
Ged bhiodh nighean* an Ruthainaich,
Suathadh bas a's lamh.
Ochain, &c.

Chuirinn Cailein liath fo Ghlasaibh,
'S Donnacha dubh an laimh;
'S gach Caimbeulach th'ann am Bealach,
Gu giulan na 'n glas lamh.
Ochain, &c.

Rainig mise réidhleoin Bhealaich,
'S cha d' fhuair mi ann tamh;
Cha d' fhag mi ròinn do m' fhalt gun tarruing,
No craiceann air mo laimh.
Ochain, &c.

'S truagh nach robh mi 'n riochd na h-uisseig,
Spionnaidh Ghriogair ann mo laimh;

<eng>* Her mother.<gai>

[TD 288]

'S i chlach a b'airde anns a chaisteal,
Chlach a b' fhaisg do 'n bhlar.
Ochain, &c.

'S truagh nach robh Fionnlairg na lasair,
A's Bealach mor na smal,
'S Griogair ban na 'm basa' geala,
Bhi eidear mo dha laimh.
Ochain, &c.

'S ged tha mi gun ubhlan agam,
'S ubhlan uil' aig cach;
'S ann tha m' ubhal cùraidh grinn,
A's cul a chinn ri lar.
Ochain, &c.

Ged tha mnaithibh chaich aig baile,
Na 'n luidhe 's na 'n cadal seimh;
'S ann bhios mis' aig bruaich mo leapa,
A' bualadh mo dha laimh.
Ochain, &c.

'S mor a b' annsa bhi aig aig Griogair,
Air feadh coille 's fraoich;
Na bhi aig Baran crìon na dalach,
Ann tigh cloich a's aoil.
Ochain, &c.

'S mor a b' annsa bhi aig Griogair,
Cuir a chruidh do 'n ghleann;
Na bhi aig Baran crìon na dalach,
'G ol air fion 's air leann.
Ochain, &c.

'S mor a b' annsa bhi aig Griogair,
Fo bhrata ruibeach ròinn;

[TD 289]

Na bhi aig Baran crìon na Dalach,
Giùlan sìod a's sròil.
Ochain, &c.

Ged bhiodh cur a's cathadh ann,
A's latha nan seachd sion;
Gheibheadh Griogair domh-sa cnagan,
'Sa 'n caidlimid fo dhion.

Ba hu, ba bu, asrain bhig,
Cha n' eil thu fhathasd ach tlath,
'S eagal leam nach tig an latha,
Gu 'n diol thu t-athair gu brath.

ORAN gaoil, le duin' uasal araid.

Fonn.—<eng>"Neil Gow's Strathspey."<gai>

LUINNEAG.

Mo chaileag bhian-gheal, mheall-shuileach,

A dh' fhas gu fallain, fuasgailt',
Gur trom mo cheim o 'n dhealaich sinn,
Aig Clachan Ghlinndarua'il.

Di-donaich rinn mo cho' lachadh,
Bean og is mòthair gluasad,
Tha 'guth mar cheol na smeòraiche,
'S mar bhile 'n ròis a gruaidhean.
Mo chaileag, &e.

[TD 290]

'N uair b' fhileant' bhriathra' mhinisteir,
A fiosrachadh mu 'r truailleachd;
Bha mise coimhead durachdach,
Na seirc tha d' shùil neo-luainach.
Mo chaileag, &c.

Cha suaimhneas oidhch' air leabaidh dhomh,
Ga t-fhaicinn ann am brúadar;
'S am Biobull fein cha laimhsich mi,
Gun t-ìomha' ghraidh ga 'm bhuaireadh.
Mo chaileag, &c.

Ged shuidheas Cléir na tire leam,
'S mi sgrìobhadh dhoibh le luath-laimh;
'S ann bhios mo smuainte dìomhaireach,
Air Sìne dhonn a chuach-fhuilt.
Mo chaileag, &c.

'S caoin a seang slìos furanach,
Neo-churi* a ceim uallach;
Tha 'gairdean ban gle chumachdail;
'S deud lurach n' a beul guamach.
Mo chaileag, &c.

'S ro fhaicilleach 'n a comhradh i,
Gun sgilm, gun sgleo, na tuaileas;
Gur flathail coiseachd sraide i,
Air bheagan stàit na guaineis.
Mo chaileag, &c.

Ged bheireadh DEORSA aite dhomh,
Cho ard 's a tha measg uaislean;

* Neo-churi'—<eng>Gentle.<gai>

[TD 291]

Air m' fhacal 's mor a b' fhearra' leam,
Bhi 'n Coir-chnaimh ri buach'leachd.
Mo chaileag. &c.

O 's truagh nach robh mi 's m' ailleagan
Air Airi cois na 'n 'm fuar-bheann!
Bu shocair, seimh a chaidilinn,
'S i m' achlais, air an luachair.
Mo chaileag, &c.

Ach 's eagal leam le m' cheileireachd,
Gu 'n gabh an seisein gruaim rium:
Ged fhog'ras iad do 'n Tolaint mi,
Ri m' bheo cha toir mi fuath dhuit.

ORAN le gille bha aig duin' uasal, agus e air fogaradh, an deigh nighean
a mhaistir fhaotainn torrach, agus bag'radh bhi air, gu a thilgeadh.

OCH na 'n och mar a ta mi,
'S mi gu brath aig a mhulad
Mur a furtaich thu trath orm,
Gu 'n d' fhag thu mi 'n cunntart
Aig a mheud 'sa thug mi ghaol duit,
'S nach d' fhaodar a chumail
'S truagh a Rìgh nach b' e 'm bas domh,
Air na traighibh gun fhuireach.

'S truagh a Rìgh nach bu bhas domh,
'N uair bu phaistein beag og mi,

[TD 292]

Mu 'm facas bean t-aogais,
Nach d' fhaodar a phosadh,
Troigh chruinn am broig chumhainn,
Ga 'm bu chuibhe bhi sporsail,
Fo d' chalpanna' mìn-gheal,
Nach islich am feòirnein.

'S mairg nach seallamh roimhe,
Air na mnathan ga 'm boidhchead,
Mu 'n gabhadh iad a pheacadh,
An cuir seachad le goraich,
Tha bhuaidh sin air fad orr',
Bhi gu socharach gorach,
'S e fhuair mi mar thochar,
"A chroich no gabh fog'radh."

Tha mo mhaistir priseil,
Fo mhi-ghean 's an uair so,
Cha d' theid mi 'n a sheallamh,
Ma 'n rughaich a ghruaidhean,
Gur h-e sgeula na dunaidh,
Fhuair sinn uile 's an uair so,
'S ann a dh' iarr e le gradaig,
Mo spadadh le luaithe.

'S mairg nach giùlain' an copan,
Gle shoc'rach 's e dearr-lan,
'S ionunn sin 's mar rinn mise,
Gus 'n do bhris mi fhein bearn as,
Gur h-e ro-mheud an uaigneas,
Thug do 'n ionragan mearladh,
Bhi mu bhruachan do leapa,
Chuir mi fada o m' chairdean.

Cha d' theid mi do 'n chaisteal,
Na 'n taice ri 'm failteachd,

[TD 293]

Bidh piob ann, bidh fithioll,
Bidh damhs ann, bidh clarsach,
Cha 'n eil ceol tha fo 'n adhar,
Nach bi feitheadh mo ghradh-sa,
'S truagh a Rìgh gun bhi marr-riut,
Gheug na 'm meall-shuilean tlatha.

Thig an samhradh 'sa bhruthainn,
Thig a chubhag 'sa chéitein,
Thig gach eun bhar na mach'rach,
'S iad an taice ri cheile,
Gheibhte ceol ac' air chrannaibh,
'S air bharruibh na 'n geugan,
Ach tha mo ghruaidhean-s' air seachdadh,
'S nach faic mi bean t-eugais.

ORAN allabain suireadh; Le Piopaire fìor Ghlinn-Alladail.

SEISD.

Thug mi 'n oidhche raoir sa 'n àiridh,
Thug mi 'n oidhche raoir 'sa 'n àiridh,
Thug mi 'n oidhche raoir gu caoineil,
Marr-ri maighidionnn na h-àiridh.

Mìle marbhaisg air an t-suireadh,
'S bochd le neach da 'n d'theid i iomrull,
Bidh inntinn fo lan iomaguin,
Glusad cho simblidh ri mearlach.
Thug mi 'n, &c.

[TD 294]

Oidhche dhomh 's mi 'm bun na tire,
'S mi goirid o bheagan nionag,
'Smaointich mi glusad os 'n iosal,
Nochdadh mo bhriodail le gradh dhoibh.
Thug mi 'n, &c.

Nuair rainig mi tigh an Dunain,
Bha chomhla ac' air a deagh dhunadh,
'Sa dh' aindeoin m' eolais a's mo thuir,
Gun thoisich na goid chuil ri rànaich.
Thug mi, &c.

Labhair mo chompanach runach,
Dean stad 's feuchaidh sinn cleas ur dh' i,
Faigh thusa boiseag dheth 'n bhurn,
'S gu 'n cum sinn na lùdagan samhach.
Thig mi, &s.

Fhuair sinn stigh gun dad uamhainn,
'S bha sinn farasda n' ar glusad,
Rainig sinn leaba na 'n gruagach,
'S chuir mi fhin le stuaim mo lamh orr'.
Thug mi, &c.

Thuirte i rium, na tig ni 's faide,

'S leanabh te eile am achlais,
Cha 'n eil rum agad fo 'n phlaide,
'S bi tilleadh dhachaidh mur thainig.
Thug mi, &c.

Thuirte mise, na bi cho doichiollach,
Fuirich gu siobhalta socrach,
Dad a mhìo-mhodh dhuit cha nochd mi,
Gus 'n eirich thu moch a maireach.
Thug mi, &c.

[TD 295]

Thuirte i, ma ta cuir dhiot t-aodach,
Bheir mise nochd mo leith-taobh dhuit,
Air eagal 's gu 'n dean thu m' aoireadh,
'S cha 'n ann air son gaol do mhanrain.
Thug mi, &c.

Mu n' d' fhuair mi mi fhin gu socrach,
Ciod a rinn am paist ach mosgladh,
'Sa nuair a ghrios mi e bhi tosdach,
'S ann theann e 's droch-uair air ranaich.
Thug mi, &c.

Thuirte bean an tighe le dearras,
A chlann a chum mi am chaithris,
Ar leam gu 'm feumadh sibh anail,
Gur siùbhlach ur teanga le Gailic.
Thug mi, &c.

Chuir a briathran mi o thapadh,
Eidear seorsa naire 's gealtachd,
'S cha robh driuchd a bha roimh 'm chraicinn,
Nach cuireadh cnag air an lar dheth.
Thug mi, &c.

Dh' eirich i ionunn 'sa bhi ruisgte,
'S theann i ri lasadh a chrùisgein,
'S mu 'n d' fhosgail i ceart a suilean,
Bha mis air taobh cuil na fardaich.
Thug mi, &c.

Ach fhir tha fuireach 'sa bhaile,
Giùlain mo shoraidh gu Anna,
'S innis d' i gu 'n d' d' rinneadh ealaidh,
Do 'n luchd faire bh' air an àiridh.
Thug mi, &c.

[TD 296]

ORAN a tabhairt comhairl' air na h-igh'nean òga; Le Sileas nighean Mhic Raoghnuil.

Fonn.—Mi shuidhe 'm ònar, air tulaich bhoidheach, &c.

'S mi 'n toiseach m' aimsir, 's m' uigh ri bargan,
Gu 'n robh mi 'n earbsa nach cealgte orm;
Cha chomhradh cearbach, air ro bheag tairbhe,
O thus mo leanbaidh so chunntadh orm,

Nis o 'n chi mi cor na 'n daoine,
Le 'n comunn gaoil 's gur faoin an gloir;
Cha chreid an saoghal aig meud an saoiread,
Nach eil gach aon diu air aon chainnt beoil.

Le teangaidh leacaich, na 'm briathran tearca,
'S e goraich fhacal thug sachd dom leon;
Gu bheil mi 'g altrum, fo m' thaobh na tacaid,
Rinn mo ghlacadh, 's mo ghreas' fo 'n fhoid;
Mar shamhla dha sud, mar ghaoidh a mhairt ud,
O thraigh gu traigh, 's nach taobh i seor;
'Nuaire gheibh e mhiann d' i, gun toir e bhriathran,
Nach fhac e riamh i, 's car fiar na shroin.

Gach fear dhiubh thriallas a dhol a dh' iarruidh,
Na mnatha 's miann leis a bhi da reir;
Gur cailin suairc i, nach leig a stuamachd,
Dhol an uaigneas le fear fo 'n ghrein,
Mur shamhla bhà sud, a bhrigh a nàire,
Dhol na 's daine na manran beul;
Bheir fear gun riaghailt, 'n sin a bhriathran,
Gu 'n robh i fialaidh 's nach b' fhiach a beus.

[TD 297]

Ach fheara' oga, cia mor ur boilich,
Gu 'm b' aithne dhomhsa cus mor da 'r gnas;
Gu barrail boidheach a tigh 'n am chomhail,
Le 'r teangaidh leomaich 's le 'r comhradh bath;
Ach ceanglar geall leibh an aodann goraig,
'S mur bi i eolach gu 'n gabh i e;
'Nuaire bhios e stoilte, 'sa gheibh e coir dh' i,
Gu 'm bi ochòin aic an lorg bhi bàth.

A mhairi dheud-gheal an fhuilt theud bhuidh,
Gleidh do cheutfai fo d' cheud bharr ur;
Na creid breugan no deacair sgeula,
Ged thig fear ceum air do dheigh sa chùil;
A dh' aindeoin uaignis 's raspars uasal,
Na leig e 'n uachdar air cruas a ghluin
Ach cum e 'n iochdar ge b' oil le fhiacaill,
Mur toir e bhriathran gur fiach leis thu.

Bha mi uair 'nuair bha mi 'm ghruagaich,
Gu 'm faighinn uaigneas gun fhios do chach;
Mur shamhla brudair a bhi g'a luaidh rium,
Gun fhios cia a bhuannachd ach buaidh mur ghna;
An gealla' gle-mhor a gheibhinn fhein uapa,
Chor 's nach treigeadh iad mi gu brath;
Nis is leir domh na rinn mi dh' éucoir,
'N deigh na dh' eisd mi da 'm breugan bath.

A nighean cheillidh na creid fhein,
'N car fo 'n sgeith bhios ann na 'n gradh;
Cha n' eil e 's t-saoghal nach creid an saoiread
Ach neach a dh' fhaodadh a chaochla' ràdh;
Iarr an intinn mur is cinnte,
A's eirig aotrom na ghaol thoir dà;
Sa dh' aindeoin fhocail, sa bhreugan brosguill,
Na dean do luchd leis an t-sochair bhath.

[TD 298]

Nach faic thu oigeir na 'm meall shuil boidhch,
Le theangaidh leomaich, 's e labhairt rium;
Mur mhill a phògan air sgath an reota,
Le chorra-cheann spòrsail an or fhuilt duinn;
Chlann na eisdibh, ri 'n gloir gun eufachd,
'S na tugabh geill d' a 'n sméadadadh sul;
'S gur h-aobhar reusain choidhch an treigsinn,
'S ann aca fhein tha gne na 'n lub.

ORAN GAOIL.

A CHUACHAG na 'n craobh, nach truagh leat mo chaoidh,
'G osnaich ri oidhch cheothar;
Shiubhlainn le m' ghaol, gu urlar na' n craobh,
Gun duin, air an t-saoghal fheoraich;
Thogainn mo ghaol ri monadh an fhraoich,
Mo leaba ri taobh dòruinn,
Do chrutha geal caomh sinnte ri m' thaobh,
'S mise ga d' chaoin phogadh.

Chunnaic mi fein, aisling 's cha bhreug,
Dh' fhag e mo chridh bronach;
Fear marr-ri te a pògadh a beul,
Briandail an deigh posaidh,
Dh' uraich mo mhiann, dh' atharaich mo chiall,
Ghuil mi gu dian deonach;
Cha robh cuisle no féith, 'n uachdar mo chleibh,
Nach do bhrosnaich gu leum comhluath.

[TD 299]

Ort tha mi 'n geall, chaill mi mo chonn,
Maille ri àm aosaid;
Thogainn ort fonn, gu soimhe, 'gheal donn,
A's ghabhainn ort am eiginn;
Thiginn ad dhail, ghleidhinn ort fath,
Bhithinn a ghraidh reidh 's tu;
Mulad gach la, sior thigh'n am dhail,
'S mis th' air mo chradh mu d' dheighinn.

Thuit mi le d' ghath, mhill sud mo rath,
Striochd mi le neart dòruinn;
Saighdean do ghaoil, saitht' anns gach taobh,
'Sa thug dhìom gach caoin còmhluath,
Mhill diom mo dhreach, striochd dhìom mo neart,
S mheudaich e gal bròin domh;
'S mur fuasgail e tràth, le t-fhuran 's le t-fhàilt,
'S cùideacha' bàis dòmhs' e.

Mallachd an tus, aig a mhnaoi ghlùn,
Nach do mhuch anns a chuil og mi;
Mu 'n do ghabh mi ort iùl, ainnir dheas ur,
'S nach dùraichd thu 'n tus pòg dhomh;
Tinn gun bhì slàn, dusg' as mo phramh,
Cuimhneachadh dàn posaidh;
Mo bheannachd ad dheigh, cheannaich thu fein,

Le d' leannanach gle og mi.

Cairibh gu geur, clach agus creith,
Mu m' leabaidh-sa bhrìgh uaisle,
'S fad tha mi fein a feitheadh ort fein,
'S nach togair thu gheug suas leam;
Na m' bu tusa bhiodh 'n teinn, ainnir dheas threun,
Rachainn-sa gheug suas leat;
Ach 's goirid an dail, gus am faic sibh an la,
'M bi prasgan mu bheul 'm uaigh-sa.

[TD 300]

'S tu 's cama-lubaich falt, fanna-bhuidh na 'n cleachd,
'S fabhradh na 'n rosg àluinn;
Sùil chorrach ghorm chaoin, broilleach mur aol,
Mhill diom gach caoin shlainte,
Gus an cuir iad mi steach, an ciste fo lic,
Bidh mi fo neart cràidh dheth,
Le smuaintean do chleas, 's do shugraidh mu seach,
Fo dhuilleach na 'm preas blàthmhor.

'S tu 'n ainnir ghlan reidh, is craobhaich fo bhreid,
Suil air dhreach airneag,
Ghiulaineadh breid, uallach gu feill,
'S uasal an reul aluinn,
Ach 'struagh gun an teud, tha 'n uachdar mo chleibh,
Gad bhualadh-sa 'n ceud aite;
Na 'm faighinn thu fein puiste o 'n chleir,
B' fhasa dhomh fhein tearnadh.

'S tu 'n ainnir tha grinn, fileanta binn,
Le d' cheileire binn oran;
Ged fhaighinn ort fath cha rachainn ort dàn,
'S ann agad tha ghnuis aluinn,
Gur gile do bhian, na 'n sneachd air an t-sliabh,
Do mhulad a lion trath mi;
Tha saighead do ghaoil annam 's gach taobh,
'S cha labhair mi choidhch dàn duit.

'S tric mi gun dail, cuimhneach' a ghraidh,
Car tamull mar bha do dheigh orm;
Glac misneach sa nuair, 's tu fhein tha mi luaith,
A choidhch gus an gluais eug mi;

[TD 301]

Caol mhala gun ghruaim, cha 'n fhaigheadh tu 'm fhuath,
Do mhulad chuir an luaths aois orm;
Do phearsa dheas ùr, cha chuirinn air chùl,
Ged fhaighinn ri phùsadh Iarla.

Cas a dhireadh na 'n stùc leis a ghunna nach diult,
Bhiodh fuil air an driuc mu 'n eirinn;
Le d' mhiolchona seang, air lothainn ad laimh,
Bhiodh phuthar air eoin 's air feidh ann,
Gheibhte sud aig mo ghaol, coileach bhar geig,
Mu 'm biodh air fear eile a leine;
'S e thaghainn dhomh fein, deagh shealgair an fheidh,
'S cha 'n fhaicinn e choidhch na eiginn.

Cul buidh' ort mur or, blas meal air do phoig,
Cha ghabhainn ort òr no feudail;
'S tu ceist na 'm ban ur, nach caidleadh sa 'n smur,
'Sa mhaidinn 'n am tus eiridh;
Gur guirme do shuil, 's maiseach do ghnuis,
'S tlachdmhor air tus daoin thu;
Le d' bhreacan deas ur, paisgte mu d' ghlun,
Cha 'n fhaca mo shuil t-éugus.

T-eugas ri luaidh, m' eudail do 'n t-sluagh,
Cha d' thugainn duit fuath na 'm feudainn;
Cha luidhe orm aois na 'm faighinn mo ghaol,
Poiste le deoin cleire;
M' ulaidh 's mo mhiann, m' aidhear 's mo chiall,
Caol mhala o 'm fèidh 'n tig gaire;
Cha 'n eil e fo 'n ghrein, na thaghainn ad dheigh,
Na 'm bithinn an deigh t-fhagail.

[TD 302]

ORAN air latha Sliabh an t-Siorram; Le Sileas Nighean Mhic Raoghnuill.

DH' innsinn sgeula dhuibh le réusan,
A b' fhiach dhuibh eisdeachd anns an am;
Bhi murt a cheile a leith Rig Shéimis,
Agus e fhein bhi anns an Fhraing;
Mu dheighinn Dheorsa, cha n' eil ann ach bocan,
Ged chuir an storas an crun m'a cheann;
Mu 'n d' thig an lunasdal, lagaidh chuis air,
'S theid a sgiursadh a null do 'n Spainnt.

Moch di-sathuirn, air uachdar Ardacha',
Gu 'n robh ar bragadaibh a tigh'n n' ar coir,
Fhuair sinn sgeula mu bheul an anamoich,
Gu 'n robh ar naimhdean ceart lamh r' ar laimh;
Sinn dhol air aghairt, a ghabhail fradhairc,
Gu baile laoghach a thachair oirnn;
Far 'n d' rinn Clann Donuill an greadan dòithte,
Air 'n arbhar bhoidheach bh' anns an lainn.

Moch di-domhnaich a dol an ordugh,
Bu lionar srol bha 'ga 'n cuir ri crann;
Fhuair sinn ordugh na breacain fhagail,
'S cha b' ann do 'n t-searmain a ghluais a chlann;
Gach fear bu luaithe a's fhuil na ghruaidhibh,
'S iad na 'n cruaidh cheim suas an carn;
Co thachair oirne a tighin n' ar comhail,
Ach luchd na 'n goirseid 's nan cota dearg.

[TD 303]

Chaidh Clann Dònuill 'n sin an òrdugh,
'S Clann 'Illeain nan ròiseol ard;
Sgiob' Bhraidealbunn, a bhratach bhallabhuidh;
Bu bhuidheann ainmeil sud aig Marr;
'Nuair a ruisg iad na lannan dùghorm,
Bha fuil 'ga sputadh ar feadh a bhclair,
Bu lionar spainnteach 'sa cheart am sin,
Ga cuir an sàs ann an cota dearg.

Theich Moir-fhear Hunndaidh, nan each cruidheach,
'N coinne a rumbuill as a ranc;
Iarla Sìophort nan each prìseil,
Bu nàr ri innse mur dh' eirich dhà;
Lochiall 'sa mhuinntir a's Mac Iain Stiùbhart,
'S Tighearna Struthain o 'n t-Slios gharbh;
Cho cheart 'sa 's beo mi 'sa 'n ath chomhail,
Dh' aindeoin Dheorsa gu 'n gearr iad cnaimh.

Mhic 'Ic Alasdair na feileachd,
Bu lamh fheum thu anns gach cas;
Leat bu taitneach bhi 'sa 'n t-seorsa,
Leat bu deonach bhi dol na 'n dail;
Chaill thu iteag chul na sgéithe,
'N t-seobhag treun nach d' éur adbhans;
Mac Mhic Ailein, oighre Mhuideart,
Marcaich sunndach nan each seang.

Dh' fhalbh a choir a's thain' an eucoir,
'S amhairc fhein a deigh an t-sluaigh,
Tha Tomas ag innse ann na fhaistinn,
Gur Clanna Gaidheal a bhuidhneas buaidh,
Bidh fallas fala air gach mala,
Cur a chatha thall aig aig Cluaith;

[TD 304]

Ni Sasunn strìochdadh ge mor an inntleachd,
Dh' iarruidh sith air an Rìgh tha uainn.

Bha mi miomhail, a's rinn mi diochuimhn,
'S bu choir domh innse anns an am,
Na 'm biodh Iain Bhraidealbunn, na leith-chiad bliadhna,
'S na bha Fhrangaich aige fhein,
'Nuair a rinn sibh an seasamh suarach,
A's moran fuachd oirbh air an fheur;
Cha deachaidh muinntir Dheorsa, g'a 'n aite comhnuidh,
Gun an toireachd bhi air an déigh.

ORAN air latha Chuileodair; Le Coirneil Ruagh Stiubhart Chinne-Chairdein.

O! gur mis' th' air mo chràdh,
Thuit mo chridhe gu làr,
'S tric snithe gu m' shàil o m' leirsinn.
O! gur mis', &c.

Dh' fhalbh mo chlaistinneachd uam,
Cha chluinn mi 'sa 'n uair,
Gu mall na gu luath ni 's eibhinn.
Dh' fhalbh mo, &c.

Mu Thearlach mo ruin,
Oighre airid a chruin,

[TD 305]

'S e gun fhios ciod an tùbh gu 'n d' theid e.
Mu Thearlach, &c.

Fuil rioghail na 'm buadh,
Bhi 'ga diobairt 's an uair,
'S mac diolain le a shluagh ag éiridh,
Fuil rioghail, &c.

Siol na 'n cuilein a bha,
Ga 'n ro mhath chinnich an t-al,
Chuir iad sinn' ann an cas na h-éiginn.
Siol na 'n cuilein, &c.

Ged a bhuannaich sibh blar,
Cha b' ann d' ur cruadal a bha,
Ach gun ar shluaghainn bhi 'n dail a cheile.
Ged a bhuannaich, &c.

Bha iad iomadai' uainn,
Do gach fine mu thuath,
'S bu mhiste sinn' e ri uair ar féuma.
Bha iad, &c.

Coig brataichean sròil,
Bu ro mhath chuireadh an lò,
Gun duine dhiubh chòir a chéile.
Coig brataichean, &c.

Iarla Chrombaidh le shlòigh,
Agus Barasdal òg,
'S Mac Mhic Ailein le sheoid nach geilleadh.
Iarla Chrombaidh, &c.

Clann Ghriogair na 'n Gleann
Buidheann ghiobach nan lann

[TD 306]

'S iad a thigeadh a nall na 'n eight' iad.
Clann Ghriogair, &c.

Clann Mhuirich na 'm buadh,
Iad-san uile hhi uainn,
Gur h-e sud m' iomadan truagh r'a leughadh.
Clann Mhuirich, &c.

A Chlann Donuill mo ghaoil,
'Ga 'm bu shuaithcheantas fraoch,
Mo chreach uile nach d' fhaod sibh eiridh.
A Chlann, &c.

An fhuil uaibhreach gun mheang,
Bha buan cruadalach ann,
Ged chaidh ur bualadh an am na téugbhail.
An fhuil, &c.

Dream eile mo chreach,
Fhuair an laimhseacha' goirt,
Gu 'n cinn am Frisealach gasda treubhach.
Dream eile, &c.

Clann Fhiunnlaidh Bhraidh-Mharr,

Buidheann theannsgalach gharg,
'Nuair a ghlaoidhte adbhans' 's iad dh' eireadh.
Chlann Fhiunnlaidh, &c.

Mo chreach uile 's mo bhron,
Na fir ghasd' tha fo leon,
Clann Chatain an t-sroil bhi dhéi-laimh.
Mo chreach uile, &c.

Chaill sinn Donull donn suairc,
O Dhùn Chrombaidh so shuas,

[TD 307]

Marr-ri Alasdair ruagh na feile.
Chaill sinn, &c.

Chaill sinn Raibeart an aigh,
'S cha bu sgrubaire e,
Measg chagnadh lann, a's bhéigneid.
Chaill sinn, &c.

'S ann thuit na rionnagan gasd;
Bu mhath aluinn an dreach,
Cha bu phaigheadh leinn mairt na 'n éirig.
'S ann thuit, &c.

Air thus an latha dol sìos,
Bha gaodh a cathadh nan sìon,
As an adhar bha trian na réidhte.
Air thus, &c.

Dh' fhàs an talamh cho trom,
Gach fraoch fearunn a's fonn,
'S nach bu chothrom dhuinn lom an t-sleibhe.
Dh' fhas an talamh, &c.

Lasair theine na 'n Gall,
Frasadh pheileir mu 'r ceann,
Mhill sud eireachdas lann 's bu bheud e.
Lasair, &c.

Mas fìor an dana g'a cheann,
Gu 'n robh Achan 'sa champ,
Dearg mhearlach nan raud 's na 'm breugan.
Mas fìor, &c.

'S e sin an Seanalair mor,
Gràin a's mallachd an t-sloigh,

[TD 308]

Chreic e onoir 'sa chleochd air eucoir.
'S e sin an, &c.

Thionndaidh e choileir 'sa chleoc,
Air son an sporain bu mhò,
Rinn sud dolaidh do sheoid Rìgh Sheimis.
Thionndaidh, &c.

Ach thig cuibheall an fhortain mu 'n cuairt,
Car o dheas na o thuath,
'S gheibh ar 'n eas-caraid duais na h-eucoir.
Ach thig, &c.

'S gu 'm bi Uilleam Mac Dheòrs',
Mur chraoibh gun duilleach fo leon,
Gun mheur, gun mheangan, gun mheoran géige.
'S gu 'm bi, &c.

Gu ma lom bhios do leachd,
Gun bhean, gun bhrathair gan mhac,
Gun fhuaim clarsaich gun lasair chéire.
Gu ma lom, &c.

Gun sòlas, sonas, no seanns,
Ach dòlas dona mu d' cheann,
Mur bha air ginealach clann na h-Eiphit.
Gun solas, &c.

A's chi sinn fhathasd do cheann,
Dol sa 'n adhar ri crann,
'S eoin an adhair ga theann réubadh.
A's chi sinn,

'S bidh sinn uile fa-dheòidh,
Araon sean agus og,
Do 'n Rìgh dhligheach 'ga 'n coir a' géilleadh.
'S bidh sinn, &c.

[TD 309]

ORAN a bhranndaidh; Le Coirneal Ruagh Stiùbhart Chinne-chairdin.

Fonn.—

<eng>Wha wad na' be in love
Wi' bonie Maggy Lauder, &c.<gai>

MILE marbhaisg air a ghoraich,
'S mairg a dh' oladh branndaidh,
Lionaidh e lan gaoidh a's bosd sinn,
'S mor a bhios do chainnt uime;
'S ionunn sin 's mur dh' eirich dhomhsa,
Rinn mi ol 'sa ghleann so;
'S ann a leig e air mo bhuaireadh,
'S bhuaile e anns a cheann mi.

Ciod sa 'm bith a mhathas mise,
Do dhaoine glìce coire;
Cha mhathainn bheag idir do bhalach,
Ged bhiodh earras mor aige;
Cha mhathainn mhac bodaich mo bhualadh,
Ged bhiodh buaile bho aige;
Gloir do 'n Rìgh tha air a Chathair,
Gu 'n d' thug e paidhir dhorn domh.

Cia mar dh' fhaodainn gun dol thairis,
Lion a chaile ghorach;
Tri dramachan gun fharruid,
Thairis air a choir domh;

'S cha bhuidheach tha mi do na balaich,
Lion iad lan an stoip dhomh;

[TD 310]

Fhuair mi sud gu m' chuir am chabhaig,
Agus glaine beorach.

Shaoil iad nach b' urrainn mi ceartach',
Carachadh no tionndadh;
Ach gur math thug mise an aire,
Do 'n chainnt bh' aig balla 'n teampuill;
Chunnaic mi ann na mnathan,
'S tharruing mi gle theann orra;
'S e theireadh gach te dhiu ag radh,
'S mairg ait am bi an t-antlachd.

'S mairg a rachadh dh' iarruidh cairdeas,
Paighe no gealltnas;
Air cuid do mhnathan Chinnichairdin,
'S nàr leam bhi cainnt orra;
'Nuair is mo bheir mi ghradh dhoibh,
'B' fhearr leo gu 'm biodh àm aca;
Air scian bhi reiteacha' mo mhionaich,
Ge milis ni iad cainnt rium.

'S diombach tha mi do na mearlaich
Mu 'n phairt thug iad domhsa;
Mu 'n iom thainig air an truinnseir,
'Sa 'n fheoil shailte roiste;
O 'n bha mi fhein am ghiullan narach,
Cha d' fhuair mi lan mo bheoil d' i;
Bha iadsan chuide na 'n lonaibh.
Mar gu 'm bu chonaibh mor iad.

C' uime an deanainn fhein an cealach,
'S ro mhath b' aithne dhomhs' iad;
Iain Ruagh Stiubhart mo charaid,
Ceannaich Muileann an Loine;
'S barail leam nach do ghabh e 'n deideadh,

[TD 311]

'S ro mhath 'n deudach bheoil th' aige;
Dh' fhag mi iad turamanaich le cheile,
Aig Seumus Mac antoisich.

Ho! gur diombach a tha mise,
Do na daoine bh' air an adhlacadh,
Nach do rinn iad mis a cheangal,
'S mo sparradh ann an alldan,
No nach d' fhag iad mi 's tigh sheinnse,
Glaiste ann am panntraidh;
Mu 'n do leig iad anns a ghaoidh mi,
'Sa mheud s' bha chaothach cainnt orm.

Ach ged bhithinns 'n deigh caithris,
Teas a's fallas damhsa;
A dhaoine bheil sibhse am barail,
Ged dh' olainn galan brandaidh;

Gu bheil do dhaoine anns a bhaile,
Na chuireadh thairis mi do m' antoil;
Ach 's eiginn domh aideacha' a nis,
Gu 'n robh misg orm aon-uair.

ORAN connsachaidh eidear fear agus bean mu'n ol; Le Barbra Friseil, bean uasal bha ann an Dùinidh, an Aird Mhic Shimidh.

Fonn.—
'S mise th'air mo bhodh'radh
Le solas na h-obair nogha, &c.

Ise.—'S tric ag amharc sìos mi,
Lan mìothlachd mu fhear mo thighe,

[TD 312]

Ach mu chaidh thu'm fiadh orm,
Mo bhriathar cha mhath an nuaidheachd;
Dh'fhalbh thu di-ciadain,
Dh'ol fiona do Bhaile na h-amhunn;
'S dh'fhaodadh tu bhi riaracht,
Mo bhriathar air miad do phaithidh.

Mas tu bha cumail feill ann
Gu'm b' fheumaile dhuit a thigh'n dachaidh;
Mas tu bha ga h-eigheach,
Bha feum ort ann o chionn seachduin;
Ga'n cumail r'a cheile,
'S na na ceudan deanadh am marcaid;
'Nam dhoibh bhi sgaoileadh,
Bu shaoithreachail thu toirt pas doibh.

Esan.—Fire faire a Bharbra,
Cha'n earbainn gu'm biodh tu fanoid;
'S mi 'g ol do dheoch slainte,
Anns gach ait' an deanainn a ceannach;
O'n a dh'fhalbh gach tàbhairn
'S gach pairtidh bh'ann o chionn tamuill;
'S mithich teannadh lamh-riut,
O'n dh'fhas mi am dhuine falamh

Ise.—Cha'n eil mi ga t-iarruidh,
Cha'n fhiach leam do chaithe beatha;
Dh'fhaodainn-sa bi eolach,
Mu'n phoc nach deanadh an gleidheadh;
Gur h-e sud a leon mi,
Mo storas bhi feadh na'n tighean;
Ga chaitheadh gu roipeach,
Ann an stopan an uisge-bheatha.

Esan.—Bhean tog dhìom do d'thuaileas,
Cha chualas gu'n robh mi misgeach;

[TD 313]

'S mis a bheireadh duais duit,
'S na luaidh e ged tha mi nis ann;
'Nuair thachradh orm pairtidh

Bhiodh cridheil, cairdeil rium mu'n liquor;
B'olc am fasan domhsa,
Bhi 'g ol sa gabhail a bhrìstidh.

Ise.—O! Cha d' iarr mi riamh ort,
Bhi crìon ann an aite duine;
Ach mur fhear do'n phairtidh,
Ged bu chàrt bhiodh air gach urra,
O'n 's e t-fhasan-sa paigheadh,
'S gach aite an dean thu fuireach;
'S giorra bu chàra dhuit,
Tamh a mach air do thuras.

Esan.—Bhean tog dhìom ad ghòraich,
'S mi brònach an deigh mo dhibhe;
'S daor an ceannach dhomhsa,
Air an sdoras na nì thu bhruidhinn
Cha n'fhaigh thu fear gun duais,
Theid suas air bealach-an-ruidhe;
Ma chuireas tu sìos e,
Gu'n iarr e ort airgid dìbhe.

Ise.—'S mòr a b'fhasa dhomhsa,
Airgid stoip thoirt do mo sgalaig
Na thusa bhì'n comhnuidh,
An seomraichean 'g ol na'n galan;
O'n is duine poiste thu,
Cha choir dhuit a bhì ri breamas;
Le cuid dhaoine coire,
Cuir còmhròinn mhòr deth anns gach bairill

[TD 314]

Marbhrann do Chaitrìona N' 'Ic a Phearsain, a chaochail na h-ìghin oig,
ann an Sioramachd Pheairt, agus a bha thair cumantas, ann am meas, an
cliuth agus an eireachdas; Le Ministèir airid.

Chualas sgeul tha ro chruaidh,
'S gann is urrainn mi luaith,
Ceit Nic Mhuirich mo thruaigh cha bheo.
Chualas sgeul, &c.

Agus b'e sud an sgeul,
'S goirt a chraidh sinn gu leir,
Uaip gu'n d'thugadh le eug an deo.
Agus b'e sud; &c.

Sluagh ga cuir anns an uir,
A corp aluinn deas ur,
Ghorm gheug na'm blath shùl cha bheo,
Sluagh ga cuir, &c.

Bu bhlath seallamh a sul,
Bha i daonnan caomh ciùin,
'S fiamh ghaire air gnuis na h-oigh,
Bu bhlath, &c.

Aghaidh narach gun ghruaim,
Bu dearg ruthadh a gruaidh,
'S bha a bilibh air snuagh an rois,

Aghaidh narach, &c.

[TD 315]

Bu gheal a deud a's bu dluth,
Bha gach ailleachd na gnùis,
'S bha oirre falt dù-dhonn torr.
Bu gheal, &c.

'S mar gheal eiridh na'n tonn,
Bha a broilleach min trom,
'S mur dheò grein' i gu bonn a brog,
'S mur gheal, &c.

Co's urrainn a luaidh,
Gach sgeimh tlachd bh'oirr' a's buaidh,
Och! 's luath thugadh i uainn, an oigh.
Co 's urrainn, &c.

Ach co dh' innseadh a beus,
Tha e do bh chuir an ceill,
Riamh cha chualas a breug na bosd.
Ach co dh' innseadh, &c.

'S tu ad nadur bha grinn,
Cha robh cron ort ri sheinn,
'N diugh, gur iosal guth binn a cheoil,
'S tu ad nadur, &c.

Bu tu aidhear gach te,
Ghabh eolas ort fein,
'S bha iad uile ad dheigh fo bhron,
Bu tu a dhear, &c.

'S og a fhuair thu deagh chliuth,
Bhi do gach neach an deagh run,
A's riamh cha do mhuth thu seol.
'S og fhuair, &c.

[TD 316]

Cha chuala' caraid no namh,
I ri casaid no càin',
'S riamh cha d'eisd i air càch droch sgeoil.
Cha chuala, &c.

Bha i truacant d'i fein,
Do na bochdan toirt speis,
'S tric a thug i do'n fheumach lon.
Bha i truacant, &c.

'S tha do mhathair ad dheigh,
Mur a mhaidneag 'sa'n speur,
'S gearr a cuairt an deigh reult feadh lo.
'S tha do mhathair, &c.

'S tha t-athair e fein,
Mur an dealt air an fheur,
Theid air tiom' le teas grein' na cheo.
'S tha &c.

Och! do pheathraichean stuam,
'S tric a tha thu na'n smuain,
'S tha do bhrathair gach uair fo leon.
Och! do pheathraichean, &c.

'S tha na ciadan osbarr,
Air an lionadh le cradh,
'S och! tha mise mur chach fo bhron.
'S tha na, &c.

'S mor bha dh'eagal na Tì
Thug air falbh i chum sith,
Gabhail comhnuidh an cridh na h-oigh.
'S mor bha &c.

[TD 317]

B'e a raoghainn gu fìor,
A toil, a tlachd agus miann,
Bhi gluasad gu diaghaidh còir.
B'e a raoghainn, &c.

Nis, thug mor-Rìgh na'm buagh,
Da'n aithne gach sluagh,
'N fhìor mhaighdeann ud uainn gu gloir.
Nis, thug mor-Rìgh &c.

Nis' thug an t-ard Rìgh,
O'n bha i glan ann na crìdh,
I dh'ionnsaidh toil-inntinn mhor.
Nis thug &c.

'S tha oran nuadh binn,
Do 'n Rìgh naomh aic ga sheinn,
'S i nach eil mar tha sinn fo bhron.
'S tha oran, &c.

Ann an sòlas fìor ghrinn,
Marr-ri naomh sluagh gach linn,
Agus cruin air an cinn do ghloir.
Ann an solas, &c.

Marr-ri ainglibh sa'n ait',
'S ri Trianaid na'n gràs,
'S cha bhlaisear lea bas ni 's mo.
Marr-ri, &c.

Ach co riamh ghabh air fein,
Bhi na's glic' na'n Tì threun,
Da n'aithne 's da'n leir gach doigh.
Ach co riamh, &c.

[TD 318]

'N Tì do'n aingidh bheir dàil,
Oir cha tlachd leis a bhas,
Ach na naoimh bheir e trath chum gloir.
'N Tìhl do &c.

Ach na'm faicte mar tha,
Le dochas, creidimh a's gradh,
Bhiodh fadal ga'r cradh's cha bhron.
Ach na 'm faicte, &c.

Gus am bimid na deigh,
Le bhi siubhal do 'n eug,
'S co againn nach d'theid an ròd.
Gus am bimid, &c.

Cha n'eil oirnn aic' ach tùs,
Do 'n bhàs theid sinn gu dluth,
S uaithe cha cheannaichear a h-aon le òr.
Cha n'eil &c.

Na biodh na 'r n'aithreachas dail,
Bimid subhailceach trath,
'S air a mhath gach aon la-an toir.
Na biodh, &c.

'N sin bheirear dhuinn buaidh,
Air gach trioblaid a's truaigh,
S gheibhear flaitheas mar dhuais fa-dheoidh,
'N sin bheirear, &c.

[TD 319]

ORAN eidear oige-fhear agus a leannan, a freagaradh a cheile.

Esan.—MADUINN dhomhs' an coillidh chuaidh,
'S glaine faile shruthain lubach,
Thachair orm ann gruagach chul-donn,
'S rinn mi umhlachd dh'i gu lar.

Run mo cheille air do cheann dubh.
Gorm shuil mhiogach bian mar an gruth,
Beulan siobhalt 's mala gun ghoimh,
'S e do ghuth mo raogha ceoil.

Failt a's furan dhuitse og bhean,
'S deirge beul, a's gruaidh mur rosaibh,
Tha mi toileach air a chomh'ail,
'S le d' chead pogaidh mi do lamh.
Run mo cheille, &c.

Chuir i car na muineal bian-gheal,
Gabhail oirre bhi ro fhiadhaich,
Thog i a ceann a's sheall i fiar orm,
'S thuirte i, shiadair tha thu ann.

Ise.—Tosd; cha 'n fheud mi aideach thoirt duit,
'S mealta t-eudan, 's milis do ghuth,
'S caillt mi choidhch ma fhreag'ras mi dhuit,
Teannsa uam, 's leig uait mo lamh.

Esan.—Thuirte mi r'i, a dheo-ghrein shul-ghorm,
Aobhach, chairdeil, chridheil shugach,
Tha mi 'n tith do phogan curaidh,
'S bas as ur domh bhi da 'n call.
Run mo cheille, &c.

[TD 320]

Ise.—Tha chleire cruaidh, 's tha mathair agam,
Bhios ga m' laimhseach ann am chadal,
'S mu bhios mo chiochan, lan no atar
Dh' aindeoin feachd, tha mise caillt.
Tosd; cha 'n fheud, &c.

Esan.—Na biodh eagal ort a' d' mhathair
Crua's cleir', na aobhar naire,
Ged luidheas mis' am bhreacan lamh-riut,
Air mo laimh nach eagal call.
Run mo cheille, &c.

Ise.—Thuirte i rium tha oig-fhir meallta,
Tarruing bhan le comhradh fallsa,
'N te nach eaglaich roimh sgaltadh,
Tha i caillte bhos a's thall.
Tosd; cha 'n fheud, &c.

Esan.—Dh' fhuilginn bas mu 'n tairginn mio-mhodh,
Chuilein chas duinn, an fhuilt shniomhain,
'S air na chuairticheas a ghrian,
Cha duraichdinn duit giamh no call,
Run mo cheille, &c.

Ise.—'S e thuirte i, cha 'n fhaigh thu aoidheachd,
'S cha leig mi leat do lamh am ruidheachd,
'S fearr bhi sgaoilte o do dhraoidheachd,
Na bhi caoidh mo mhaighd'nis caillt.
Tosd; cha 'n fheud, &c.

Ghuidh a's dh' aithn i gun a masladh,
Gun ach gann a pog a bhlasad,
Mur b' e mo run le cead a Pharsoin,
Ise ghlacadh le cridhe 's lamh.
Tosd; cha 'n fheud, &c.

[TD 321]

Esan.—Na biodh aobhar eagail agad,
Ni sinn banais, posadh 's leabaidh,
Bidh sinn sunndach eibhinn aite,
Sint am ghlacaibh 's lamh fo d' cheann.
Run mo, &c.

Ise.—Na 'n saoilinnse thu bhi rireamh,
Chionn do gheallain bhi cho lion'or,
Cha bhiodh maille ann ad iartas,
'S cha bhiodh miotlachd ann ad chainnt.
Tosd; cha 'n fheud, &c.

Esan.—Sonas dhuitse ainnir ghaolach,
C'aite bheil do luach 'sa 'n t-saoghal,
Tha mi rireamh 's na cuir baothal ann,
'S leig do thaobh ri m' uchd gu teann.
Run mo, &c.

Ise.—Geillidh mi gun strith do 'n oig'ear,

'S leat mo chridh, a ghraidh 's mo chomhra',
Luidhe mi ad bhreacan boidheach,
Fhleasgaich oig 's mo lamh fo d' cheann.

Run mo cheille fear an fhuilt duibh,
Rachainn eug mur deanadh tu guth,
'S leatsa fheudail mise an diugh,
'S deansa rium an so na 's aill.

[TD 322]

ORAN GAOIL.

Fonn.—
'S i so 'n aimsir an dearbhar,
An targanach dhuinn, &c.

THA mo chridhe ciùirte,
'S neo shunndach mi 'n drasd;
Mu dheighinn an fhiùrain,
Dh' fhag an duthaich di-mairt;
Mu dheighinn an oigeir,
Is boidhche no cach;
Gur gile thu fo d' chòta,
Na 'n sneachd og ga chur tlath.

Oganaich threibhich,
'S mor t-fheum anns gach càs;
Gur mor thug mi speis duit,
'S cha bhreug tha mi 'g radh,
Gur mor thug mi ghaol duit,
Ge faontrach mi 'n drasd;
'S gus an dean thu pilltinn,
Bidh m' inntinn gu lar.

Tha mo chridhe mur an luaidhe,
Cha ghluais e ach mur lic;
Ged theid mi measg oigridh,
Ged ol mi 's ged ith;
Tha m' aigne trom fo thùrsadh,
Gar an rùisg mi e ri càch;
Mu dheighinn an fhiùrain,
Dh' fhag an duthaich di-mairt.

Oig ghasda a chuil dualaich,
Marcaich uaibhreach nan srann;

[TD 323]

B' e sud an nì bu deoin leat,
Bhi 'n coisridh nach gann;
Cha b' ann mar bhalach na mar umaidh,
A ruisgeadh leat cainnt;
Beul a labhradh an fhirinn,
Mar gu 'n sgrìbhte i le peann.

Mar ùr-ros an garadh,
Nach d' fhas air mheangan dris;
Ceann tighe na 'm fear ùra,
Mar chraoibh a lubadh le meas;

Gur mise bha ro dheonach,
Air do phosadh gun fhios;
B' fhearr na mar rinn thu m' fhagail,
Mo charadh fo lic.

O 's beag an t-iongnadh dhomh-sa,
Bhi bronach ad dheigh;
'Sa liuthad latha bha sinn,
A manran leinn fein;
A mire a's a cluaineis,
An uaigneas air chàch;
'S ma dh' fhalbh thu uainn air chuantain,
Mo thruaighe mi gu brath.

Esan.—O cha 'n aobhar thruais thu,
Mo ghruagach ghlan og;
Gar an dean mi pilltinn,
Tha thu cinnteach as mo stòr;
'S tric shiubhail mi 'n oidhche
Air caoimhneas do phoig,
'S bu bhalach mi na 'n diochuimhninn,
Briodal do bheoil.

Ise.—'S neo bhalachail a dh' fhàs thu,
'S tu 's aille th' ann mo bheachd,

[TD 324]

Gur guirme do shuilean,
Na 'n driuc air an t-slait,
Gur binne leam do chòradh,
Na smeorach am preas,
Gur milse leam do phogan,
No beoir agus mil.

Ach a Chaiptein oig
Cha 'n e do stòr air bheil mi 'n deigh,
Gu 'm b' annsa na 'n crobh guaill-fhionn,
Bhi gluasad a d' dheigh,
O 'n fhuair thu 'n t-eideadh ùr,
'S tric na deoir a ruith le m' ghruaidh,
'S mor b' annsa thu bhi 's duthaich,
Ann 'sa 'n Dun mar bu dual.

Thug mise ann 'sa 'n Dun ud,
Gle shunndach car seal;
A mire a's a sugradh,
Am muirn a's an cion,
Ach tha mi nis mar chluaran,
Ga 'n dualchas fas ban,
Gus am pill an t-uasal,
A ghluais uainn di-mairt.

ORAN GAOIL.

SEISD.

Gu ma slan a chi mi,
Mo chailin dileas donn,

[TD 325]

Air an d' fhas an cuailein reidh,
'S air an deise dh' eireadh fonn;
'S e cainnt do bheoil bu bhinn leam,
'Nuair bhiodh m' inntinn trom;
'S tu thogadh suas mo chridh,
'Nuair bhiodh tu bruidhinn rium.

Gur muladach a ta mi,
'S mi nochd air aird a chuain;
'S neo shunudach mo chadal domh,
'S mo chaidreadh fada uam;
'S tric mi ort a smaointeach',
As t-aogmhuis tha mi truagh;
'S mur a dean mi t-fhaotainn,
Cha bhi mo shaoghal buan.
Gu ma slan, &c.

Suil chorrach mar an dearcag,
Fo rasg a dh' iadhas dluth;
Gruaidh dhearg mar an caorann,
Fo 'n aodann tha leam ciùin;
Mur d' aithris iad na breugan,
Gu 'n d' thug mi fhein duit rùn;
'S gur bliadhna leam gach la,
O 'n uair a dh' fhag mi thu.
Gu ma slan, &c.

Theireadh iad mu 'n d' fhalbh mi uait,
Gu 'm bu shearbh leam dhol ad chòir;
Gu 'n do chuir mi mo chul riut,
'S gu 'n do dhiult mi dhuit mo phòg;
Na cuireadh sud bonn curam ort,
Tha 'n ùine gearr na leoir;
Tha t-anail leam cho chùraidh,
'S tha 'n driùc air bhar an fheoir.
Gu ma slan, &c.

[TD 326]

Tacan mu 'n do sheol sinn,
'S ann a thoisich càch;
Ag innse do mo chruinneig-sa,
Nach tillinn-sa gu brath;
Na cuireadh sin ort gruaman,
A luaidh ma bhios mi slan,
Cha chum dad idir uait mi,
Ach saighead chruaidh a bhàis.
Gu ma slan, &c.

Tha moran do luchd aimilisg,
'Sa sheanchais an droch sgeoil,
An cridheachan mar phuinnsein,
'S cha chuimhnich iad air gloir;
Ach na creid an sgeul ac',
O 'n fhuair a chleir oirnn coir;
'S na 'm fanamaid o cheile,
'S i 'n eiginn bheireadh oirnn.
Gu ma slan, &c.

Tha Caimbeulaich mar chairdeas,
Ga ardachadh le strith;
'S gu bheil cuid diubh 'g radhainn,
Gur taire mi na i;
Ach mur biodh i deonach,
Cha phosamaid a choidhch;
'S c' ar son a chaill i a fradharc,
'Nuair ghabh i a raoghainn mi.
Gu ma slan, &c.

Ach tha snaoim a nis ceangailte,
Gu daingeann a's gu teann;
'S their luchd na fanoid rium,
Nach eil mo phrobhaid ann;
Am fear air bheil fortan,
Tha crois a tigh'n na cheann,

[TD 327]

'S tha mise taingeil toilichte,
Ged tha mo sporan gann.
Ga mor slan, &c.

ORAN connsachaidh mu 'n t-suireadh, eidear fear agus a mhathair.

BHA mi fhein 's mo mhathair,
Di-mairt anns an t-seomar,
'S bha i rium ag radh,
Gu 'm bu nàr dhomh bhi gòrach;
A luidhe leis na caileagan,
Gu 'm b' amaideach an seol e;
'S nach posadh te gu brath mi,
'Sa ghraisg ud an toir orm.

SEISD.

Hill ù hill in hó ro,
Ho ró hill in h-éile,
Hill ù hill in hó ro,
Ho ró hill in h-éile;
Air faill ill hó ro,
Ho ró hill in h-eile,
A nighean donn an t-sugraidh,
Mo dhurachd bhi reidh riut.

Thuirte mi fhìn gu diblidh,
Gu cinnteach gu 'm b' fhior sud;

[TD 328]

'S nach bu duine fìor-ghlic,
Bhiodh strith ris a ghnìomh ud;
A cost a chuid le mì-chliuth,
'S le mì-cheut' a mhiannaibh;
Ach sguiridh mi ri m' bheo dheth,
Ochòin, 's beag mo mhiann air.
Hill u, &c.

Ise.—Sin 'nuair thuirte mo mhathair,

B' fhear leam gu 'm b' fhior sin;
Gu 'n sguireadh tu gu brath dheth,
'S gu 'm fasadh tu ciallach;
Gur a h-ioma càineadh,
A's fàithn thug mi riamh dhuit;
Ach leigeadh tu mu d' chluais e,
Le buaireadh na 'm biasd ud.
Hill ù, &c.

Esan.—'S ioma fear a b' fhearr na mi,
Dh' fhailing 'sa cheim sin,
Ministirean, pairt diubh,
Air airdead 's gu 'n leugh iad;
A bhean, an cual thu 'm Pàpa
Rinn paisd anns an Eipheid,
Na 'n cual thu mu Rìgh Daibhi',
Chuaidh dàn air Bath-shéba.
Hill ù, &c.

Ise.—Ministear no Pàpa,
Dheth 'n dh' fhailing 'sa ghnìomh sin,
Olc air mhath ga 'n d' rinn iad;
Cha 'n fhaighneachdar diots' e;
'S b' fhearr dhuit bhi ceillidh,
A ceusadh do mhiannaibh;
'S ma rinn iad-san eucoir,
'S iad fhein a bheir diol ann,
Hill ù, &c.

[TD 329]

Bu mhath an duine Daibhi',
Ged dh' fhaling e 'n uair sin,
Bha e cneasda naomha,
'S bha gaol aig an t-sluagh dha,
Cha choimeas thu do 'n Rìgh sin,
Le d' mhi-bheusan truaillidh,
'S thu 'd mhi-loinn anns an t-saoghal,
A ghaolaich le do ghluasad.
Hill ù, &c.

Esan.—A bhean, an cual' thu Sola',
Bha mordhalach fìor-ghlic;
Aig 'n robh urram foghlum,
Eolas a's crìontachd;
'Nuair phos e seachd ceud,
'S ochd fichead deug diolan;
'S their thusa nach fiach e,
Fear dh' iarras a trì dhiubh.
Hill ù, &c.

'Nuair bhios mo chlann-sa laidir,
'Sa dh' fhasas iad crìonta;
Gu 'n d' theid mi null air sàil leo,
Gu sraid Charolina;
Sin an uair a dh' fhaodar,
Gach aon a chuir ri gnìomh dhiubh;
Bidh duin' air ceann gach feuma,
'S mi fhein a bhi diomhain.
Hill ù, &c.

Gu 'n dean Niall an t-aiteach,
'Sa mhart cur an t-sil dhuinn;
'S ni mac N' 'Ic Cathail buachaille,
Chuallaicheas nì dhomh;
Gu 'n dean i banas-tighe dhomh,
'S gur laoghach i Caitriona;

[TD 330]

'S bidh Fionnaghal bheag ruagh ud,
Ri fuaidheal a's ri sniomh dhomh.
Hill ù, &c.

Gur mise bhios gu statail,
A sraideamachd 'sa 'n am sin,
Mu 'n cuairt do mo phlanntachan,
'S mo bhata ann mo laimh agam;
Cha dean mi ach an t-ordugh,
Gu sporsail thabhairt doibh-san;
'S fearr dhomh sin na posadh,
Ochòin 's beag mo thaing ris.
Hill ù, &c.

ORAN na brigis lachduinn.

Le fear Shrathmhaisidh.

'S COMA leam a bhrigis lachdunn,
B' annsa 'm feile beag 'sa m breachdan,
Cha do ghabh mi riamh bonn tlachd,
Do 'n fhasan a th'aig clann na 'n Gall.

Cha mhinisteirean 's cha 'n Easbuigean,
Chum a bhar an t-seisein mi;
Ach a bhrigis leibideach,
Nach deanadh anns na preasan clann.
'S coma leam, &c.

Ged tha bhrigis mìothlachdar,
Gur feumail anns na crìochan i,

[TD 331]

Gach fear a bhios ri diolanas,
Gu 'n d' thoir i strìochdadh air gun taing.
'S coma leam, &c.

Ach cuiribh air na mnathan i,
'S ann orra 's fearr a luidheas i,
Gur sgiobalt' air feadh tighe i,
'S b' e 'n ceol am faighinn innt a damhs'.
'S coma leam, &c.

Gur mise bh' ann 'sa 'n eisdeachd,
'S na mnathan 'g radh ri cheile,
Gu 'm b' fhearr leo orra fhein i,
Na bhi ceusadh an fhir chaim.
'S coma leam, &c.

Cha mhath gu dìreadh bruthaich i,
'S cha 'n fhearr thun an t-siubhail i,
'S cha 'n eil mi idir buidheach,
Do 'n fhear a luthaig i bhi ann.
'S coma leam, &c.

Cha mhath an t-eideadh idir i,
'Nuair theid sinn anns an uisge lea,
'Nuair lubas i m' ar 'n iosgaidean,
Gu 'n d' thoir i niosgaid air gach ball.
'S coma leam, &c.

Brigis dubh gun sianadh,
Chuir as an t-aodach briatha,
Bhiodh fosgailt air ar bialadh,
'S nach iarradh a chumail teann.
'S coma leam, &c.

Chuir i mach do 'Shasunn sinn,
Le surd a bhi sgairteil oirnn,

[TD 332]

'S leig i rithisd dachaidh sinn,
Gun fhiu a Chaiptein air ar ceann.
'S coma leam, &c.

Ged thug iad dhuinn 'sa 'n fhasan i,
Cha 'n eil i idir taitneach leinn,
'S truagh a Rìgh nach robh e tachte,
'M fear a thug an t-achd a nall.
'S coma leam, &c.

ORAN eidear an sealgar 'sa 'm fiadh, agus am fiadh cuir duileachd air an aodach ghallta 'n deigh bliadhna Thearlaich; Le fear Shrathmhaisidh.

Sealgair.—Moch 's mi' 'g eiridh 'sa mhaduinn,
Gu h-airtnealach pramhail,
Togail a mach ris a mhunadh,
'S muladach a ta mi,
Gun bhi sa 'n eideadh a chleachd mi,
Ach mar bhaigeir Gallta;
Cha 'n aithnich uiread na'm fiadh mi,
'S fiadhaich leam a dh'fhas iad,

Fiadh.—Sin nuair labhair damh nan cabar,
Stad air t ais mur tha thu;
Naile bheirinn-sa ort comhairl,
Mur choimhearsnach cairdeil;
B'fhearr dhuit fantail aig a bhaile,
'Sa 'n air' thoirt air do phaisdean,
Na bhi 'n duil gu mealladh tu mise,
Le d' bhrigis, mo naire!

[TD 333]

Sealgair.—Ge blath 'n t-aodach a bhrigis,
Cha b'e sud a b' fhearr leam;

B'annsa leam am feile preasach,
Gu deas air a charadh,
Sin 's mo bhreachdan air m' uachdar,
Cumail fuachd na'm beann diom;
Seach slaodaire dubh do chasaig,
Crochte mu mo mhasan.

Fiadh.—Chunnaic mise sud ort roimhe,
Ge coimheach an drasd thu;
'S tric a thachair sinn air fuaran,
Shuas ann am Beinn Eallair;
Agus a loisg thu rium do luaidhe,
Le fuaim am measg mo chairdean;
Ach ni luchd nan cotan ruagha,
Thusa fhudach as an fhasach.

Sealgair.—'S truagh nach fhaighinns' thus' a's Seorus,
Comhluath fo 'n aon lamhach;
'S gach aon duine mor 'sa 'n Rioghachd,
Tha ri diteadh Thearlaich;
Gar an toimhsinn troigh thair disinn,
Ach mo shith bhi' 'm Pharais;
Naile chostain-sa mo phearsa,
R'ar toirt dachaidh maireach.

Fiadh.—Ach cha'n fhaigh thu sinn le cheile,
'Sa bheinn fo'n aon lamhach;
'S ma chluinnear gu bheil thu fhein ann,
Eighear thu ad mhearlach;
Ach na'm b' aithne dhomh-sa 'n rathad,
Rachainn gu Bruchmari,
Dh' innse gu bheil gunna 's breacadan,
Agads' ann an aite.

[TD 334]

Sealgair. Ach a laimh do chluais a ghealtair,
Stad air t-ais mar tha thu;
Ma leigeas mi riut mo chuilein,
Cha'n urrainn thu ga fhagail;
Thug mi 'n eigh ris a ghille,
Leig an Ibheis bhan ris;
'S cha do mheall i mi am bharail,
Ghràd chuir i gu bas e.

LUIINNEAG.

Thug ho o, laill ho o,
Thug ho o ro 'n aill leibh,
Thug ho o laill ho o,
Seinn ho o ro 'n aill leibh.

Moch 'sa mhaduinn 's mi dusgadh,
'S mor mo shunnd 's mo cheol gaire;
O'n a chuala mi 'm Prionnsa,
Thigh'n do dhuthaich Chlann Ràghnuill.
Thug ho o, &c.

O'n a chuala mi 'm Prionnsa,

Thigh'n do dhuthaich Chlann Ràghnuill;
Grainne mullaich gach Righ thu,
'Slan gu'n till thusa Thearlaich.
Thug ho o, &c.

Grainne mullaich gach Righ thu,
Slan gu'n till thusa Thearlaich;
'S ann tha 'n fhior-fhuil gun truailleadh,
Anns a ghruaidh is mor naire.
Thug ho o, &c.

[TD 335]

'S ann tha 'n fhior-fhuil gun truailleadh,
Anns a ghruaidh is mor naire:
Marr-ri barrachd na h-uaisle,
'G eiridh suas le deagh nadur.
Thug ho o, &c.

Marr-ri barrachd na h-uaisle,
'G eiridh suas le deagh nadur;
'S na 'n d' thigeadh tu rithisd,
Bhiodh gach Tighearn na 'n aite.
Thug ho o, &c.

'S na 'n d' thigeadh tu rithisd,
Bhiodh gach Tighearn na 'n aite;
'S na 'na cairicht' an crun ort,
Bu mhuirneach do chairdean.
Thig ho o, &c.

'S na 'n cairicht a crun ort,
Bu mhuirneach do chairdean;
'S bhiodh Lochiall mar bu choir dha,
Cuir an ordugh nan Gaidheal.
Thug ho, &c.

'S bhiodh Lochiall mar hu choir dha,
Cuir an ordugh nan Gaidheal;
A's Clann Donuill a chruadail,
Choisinn buaidh anns na blaraibh.
Thug ho o, &c.

A's Clann Donuill a chruadail,
Choisinn buaidh anns na blaraibh;
'S iad gu 'n cumadh a chomh-strith,
Ri luchd chotaichean maduir.
Thug ho o, &c.

[TD 336]

'S iad ga 'n cumadh a chomh-strith,
Ri luchd chotaichean maduir;
Sud a chuideachd bhiodh foirmeil,
Le boineid ghorm a's coc-ard innt'.
Thug ho o, &c.

Sud a chuideachd bhiodh foirmeil,
Le boineid ghorm a's coc ard innt;
'S bhiodh am feile 'sa 'n fhasan,

Marr-ri gartana' sgarlaid.
Thug ho o, &c.

'S bhiodh am feile 'sa 'n fhasan;
Marr-ri gartana' sgarlaid;
Feile cuaich air bhachd easgaid,
Paidhir phiostal 's lann Spainnteach,
Thug ho o, &c.

Feile cuaich air bhachd easgaid,
Paidhir phiostal 's lann Spainnteach;
'S na 'm faighinn mo dhurachd,
Bhiodh an Diùc air dhroch caramh.
Thug ho o, &c.

'S na 'm faighinn mo dhurachd,
Bhiodh an Diùc air dhroch earamh;
Gu 'm biodh bùidseir na feola,
Agus a chorcach m'a bhraghad.
Thug ho o, &c.

Gu'm biodh bùidseir na feola,
Agus a chorcach m'a bhraghad;
'S gu'n gibhtinn a mhaighdeann,
Mar oighreachd d'a bhrathair.
Hug ho o, &c.

[TD 337]

'S gu 'n gibhtinn a mhaighdeann,
Mar oighreachd d'a bhrathair;
Ach slan gu'n d'thig thu 's gu 'n ruig thu,
Slan gu'n d' thig thusa Thearlaich.
Hug ho ro, &c.

ORAN do dh' Alasdair Mac Dhonuill, no mar chomh-ainm, Alasdair Ruagh
Mathanach' aig baile Pheairt, air son e bhi mi-mhodhail ri fear araid bha
'n 'sa 'n aite sin air chuairt.

Fonn.—Alasdair dubh Ghlinne Garaidh, &c.

Bu chaoineil riumsa 'm baile Pheairt iad,
Cridheil gun airceas na gun dòlum;
'S toigh leo uile gu leir a Ghaidhlic,
'S tha iad baidheil ri luchd oran:
Choisinn iad gu'n d'thugainn cliuth orr,
Ach ni mi fear nach fiù dhiubh fhogradh;
Le druma o chath-chliabh* Dhunchaillinn,
Fuadaicheam o'n bhaile Mac Dhonuill.

'S olc an t-intleachd rinn sibh thuradh,
Daoine tha cho iular choir ruibh;
A leithid-san do shamhla salach,
Bhi 'm port ur baile n'ur coir ann;
'Sa phort mu dheas tha'n duine suairce,

<eng>* The toll-bar at Perth on the road leading to Dunkeld.<gai>

[TD 338]

Ach 'sann mu thuath tha'n truaghan bronach;
C'air son nach d' fhuair sibh leithid Mhic Griogair,
'N aite bhriogair ud Mhic Dhonuill.

Ged a thuirte iad riut Mac Mhathan,
Cha mhor do 'n mhathas tha riut fuaighte;
Tha thu ann ad phearsa biogach,
'S tha do chridhe spiocach truailidh;
Chuir thu orm fad latha maille,
A chridhe na faille 'sa 'n duaircis;
'S mo mheas a rithisd mar dhiol deirce,
'N ait' mi fhein bhi riut cho uasal.

Cha d'rinn mis' mi fhein a nochdadh,
Mur dhuine bochd riut-sa thruaghain;
'Sann a ghlaodh mi air a bhotal,
'Sa phaigheadh as mo stochd gu h-uasal:
'Sa 'n uair bha thusa 'g ol na deoch ud,
Gheall thu le sodal bhi suairce:
Ach an uair bha t-ainm r'a sgrìobhadh,
Leig thu air dìochuimhn na fhuair thu.

A mhial chartain 'sa phartain spagaich,
'S maing aite dh'araich riamh thu:
Thaoghain ghroid bhrein an òtraich,
Gur th'ann diot tha 'n tòchd ro fhiadhaich:
'S tu mhial-mhoine 'sa 'n dearc-luachrach,
'S tu 's taire 'sa suaraich do na biasdan:
A chorr-losgann ghon an t-saoghail,
'S na 'm faodadh tu gu 'm b'e do mhiann e.

'S tu mhial iongnach 'sa 'n séillein,
'S tu bòguis eitidh an droch fhàilidh.
'S tu a mhuc a's broc na breine,
'S tu 'm fitheach nach d'thug sgeul do'n airce:

[TD 339]

Tha thu lan mìo-loinn agus musgainn,
'S ad bhall cuspaireachd aig bardaibh,
Cha 'n fhad o'n fhuair thu chath-chliabh chuspainn,
'S cha mheal thu thrusdair fad an t-aite.

Bhiodag thubaisteach.

DH' innsinn sgeul mu 'n mhalairt duibh,
Na 'm fanadh sibh gu fòill,
Mur dh' eirich do 'n chall bhreamais domh,
'Nuair chaidh mi do Dhungleòis;
Air bhi thall an Sgalpa dhomh,
Air cuilm aig Lachunn og;
Fhuair mi bhiodag thubaisteach,
Le a caisein-uchda mòr.

Bu mhath a chuilm a bh' ann an sin,
'S mo bheannachd-sa na deigh;
Bha dubhlan duine chunnaic i,

Na diomoladh gu leir;
Ach fhuair mi fhin bloidh biodaig ann
Nach tig an la ni feum,
A's stiiallaire mor feosaig oirr',
Mur fhear d'a seorta fhein.

Mas oil leibh an athais ud,
Gu 'n robh si agabh riamh;
Loinidean a's òghnaichean,
An conuidh dhuibh bu bhiadh;
Ged dheanadh sibh cruinneachadh,
Tuille a's coig ciad;
'S tearc fear gun chaisein-uchd aige,
Cho gharbh ri muice fiadh.

[TD 340]

Chuir an tir so 'n duileachd mi,
'Nuair chunnaic iad mur bhà;
Bha gach neach ga choisrigeadh,
Roimh 'n dos a bha f'a barr;
Bha sgonn do mhaide seilich innt;
Bu gheinneanta rinn fàs;
Thug an saor neo chronail aisd,
Crois do loinid bhàin.

Chuir Mac Ionmhuinn bairlinn,
An trath so mach sa 'n tir,
Chuir e na seachd barranntais,
Gu Donnacha Mac a Phì;
Gabhail gu caol Arcaig leo,
Mu 'n ghabh i tamh sa 'n tir,
'Sa muinntir fein thoirt coinne dh' i,
'S gur soilleir i do m' dhith.

Cha 'n ion-mholaidh ghrabhata sin,
Thug thu steach thair chaol,
An t-arm a bha gun choisrigeadh,
'Sa b' olc leom air mo thaobh;
'S mairg sliasaid air am facas i,
'S i bhiodag phaitheach mhaol;
B' iomlaideach air bhordaibh i,
Sgian dubh a sgornain chaoil.

B' i sud an t-arm gun choisrigeadh,
'Sa b' olc leom air mo chlia'ich,
'S ruagh-mheirg uile 's coltas d' i,
Fo dhos do dh' fhionnadh liath,
Bha maide reamhar geinneach innt'
'S car na h-amhuich fiar
Cha ghearradh i sgiath cuileige,
Le buille no le sgriob.

[TD 341]

Bu mhath sa bhruthainn chaorainn i,
'Sa 'n caonnag na 'm fear mòr;
'S e Fionn thug dh' i an latha sin,
An t-ath-bualadh na dhorn;
Thug i na brath-mhionnan sin,

Nach d' fhag i duine beo;
'S nach robh neach ga 'm beanadh i,
Nach gearradh i' g'a bhròig.

Thuirt mi fhìn nach b' fhior dh' i sud,
Gur h-ann chaill i a ciall le h-aois;
Co i a chuimhne 's faid agad,
Gu 'n stad thu o bhi maol;
Chaidh mi air mo ghlun d' i,
Mu 'n do rùisg i rium a taobh;
'S thug i na seachd sgairtean aisd,
Gus 'n d' thug Mac Talla glaodh.

'Nuair chaidh mi dh' iarruidh breitheanais,
Cha d' fhuair mi a leithid riamh;
Sin nuair thuirt an t-Sàileineach,
Sann chairich e rium biasd;
Duirceach do chuirc Mhor-thirich,
Da bheil an roibein liath;
Duirceall dubh gun fhaobhar,
'N am taobhsainn ris a bhiadh.

Bu cheithir bliadhna-fithchiad d' i,
Bhi 'n citsein Mhoir-fhear Gall;
'S fhuair i urram cocaireachd,
Thair moran do na bh' ann;
Bha Mac Aoidh ga teachdaireachd,
Mu 'n deachaidh 'n chogadh theann,
B' iomlaideach 'sa choradh i,
Sgian dubh an sprogain chaim.

[TD 342]

Ged thigeadh Clann Donuill,
'S na seoid a tha mu thuath,
Mac Aoidh an tus feachda leo,
'S garbh bhratach an taobh tuath;
'Nuair thig a bhratach Cheanntalach,
'Sa thairngnear r'i a suas;
'S tearc fear gun chaisein uchd g'a chiochan air,
Gu ruig gial a chluas.

LAOIDH AN AMADAIN.

'S geul uaigneach chualas gun bhreug,
Air òinid da 'n geill na sloigh.
Laoch meamneach air nach dearg arm,
Da 'n ainm an t-amadan mòr.

Curaidh cha do chuir air fiamh,
'S ni mo strìochd e riamh do shloigh;
Nach d' rinn uaill a sgiath na lann,
Gach neart a bh'ann na dha dhorn.

'S deimhinn leam gu bheil sud fìor,
Mu'n d'fhuair e gach tìr f'a smachd;
'S geul beag gearr air a dheireadh thall,
Tuigear leinn gu bheil sud ceart.

Là do n amadan mhor,
Bhi 'n criochan Lochlainn na'n ceol caoin;
E fhein 's aon mhaca mnà.
'S bu leoir a h-ailleachd mur mhnaoi.

[TD 343]

Tharladh an Gleann diamhair dhoibh,
Nach robh iad ann roimhe riamh,
B'aillle slios, feur a's fonn,
'S fuaim a tonn ri' slios a léig.

Chi mise arsa Gile-bhan og,
Gruagach gun stroth fo bhron bhrot;
Saothach do 'n or dhearg na dhorn,
Cosmhail ri cornn am biodh deoch.

Ni 'n robh mise roimhe riamh,
Aon uair is mò mo thart;
B' ait leam a chosg cia b'e i,
Diolfaidh mi cis air a son.

Aon athchuing do iarrams' ort,
Na h-ol a dheoch 's na h-ith a bhiadh;
Biosa subhach oglaoidh mhoir,
Deansa suidhe 's ol deoch.

'S na comainibh ceudna dhò,
Labhair easan an gloir mhir;
Thug e'n sitheadh baobhaidh borb,
'S cha d'fhag braon sa chornn nach d' ibh.

'N sin dh'imich gruagach a chuirnn,
'S neo bhuaghach a chuilm ra h-ol;
Na cosan fo na gluinean shios,
Do bhi dhith air an fhear mhor.

Labhair an sin an Gile-bhan og,
'S mor an leon so th'air breith ort;
Cha 'n eil do charaid sa 'n domhan mhor,
'S cha n' oil leo thu bhi gun chos.

[TD 344]

Eisd thusa Ghile-bhan og,
Tog do d' bhron 's do d' mhor sprochd;
Cha bhi cosan anns an tìr,
Neo gheibh mi ris mo dha chos.

Dh' imich iad an sin araon,
A bhean sa'n laoch bu truime toirt;
Bu luaithe esan air a dha ghlun,
Na caogad le luths an cos.

Dh-ionnsaidh 'n fhirich do ghluais iad,
Chunncas fiadh air bheanntaibh borb;
Sa 'n gaothar ban air a dheigh,
A tathum gu geur air a lorg.

Chuireadh le neart lamh an laoidh,

An t-sleagh tre da thaobh an fheidh;
Rug e air a ghaothar bhan,
'S chuir se e na laimh air eill.

Rug e air a ghaothar bhan,
Chuir se e na laimh air eill,
Bidh tu agamsa fo chuing,
Gus an tig fear iul ad dheigh,

Chi mise arsa Gile-bhan og,
Gruagach armach earraidh oir;
Lann leadara air a thaobh clith,
'Sa dha shleagh gun sgios na dhorn.

Bheannaich gruagach an earraidh òir,
Do 'n amadan mhor 's da mhnaoi;
Ach dh' fhiosraich iadsan gu glic,
Ciod an t-ait am biodh an saoi.

[TD 345]

Falbhaidh mise nis a shealg,
Do'n uaimh dhearg fo Ghleann Smeoir;
Coimhead thusa charaid ghraidh,
Cabhair mo mhna sa cuid oir.

Air fhaidead 's ga 'm bi mi muigh,
Na coidil 's na crom do cheann;
Na leig duin' idir a steach,
Na neach a mach do na th-ann.

Choidil an sin an t-oglaoch mòr,
As thainig oglaoch eile steach;
Le ceuma cabhaig ghabh e suas,
S do mhnaoi a ghruagich thug se pog.

Dh'eirich Gile-bhain 'n sin a nuas,
Spionadh leis gu cruaidh a cheann;
Eirich as a sin gu luath, luath,
Ma tha thu 'd shuain cha b'e 'n t-am.

Mur bithinnu am shuain gu mòr,
Cha leiginn dhosan teachd a steach;
S ni mo leiginn duine mach,
Gùs 'n tigeadh Gruagach Dhun an òir.

Dh'eirich an sin an t-oglach mor,
'S do chois an doruis gun shuidh se,
Cha d'rinn gobhainn, ceard, no saor,
Comhla bu daingne na'n laoch borb.

Dh'eirich a Ghruagach a ris,
'Sa lann liobhar na dheas laimh fein;
Eirich as a sin oglaich mhoir,
Cha 'n aite coir 'n do shuidh thu fein.

[TD 346]

'S mise gruagach a ghaothair bhain,
Air do laimhsa mhacain mhoir;

Ruidire Corca 'se m' ainm,
Anns gach àit gu'n d' thugainn buaidh.

Bheirinnse dhearbhadh sin duit,
Arsa 'n oineid le mor sprochd;
Nach bi Gruagach a ghaothair bhàin,
Ri ràdh riut as a so.

C'uim' nach foghnadh leat fhir mhoir
Leith-trom na dho bhi sa'n roinn;
An t-sealg uile bhi air do laimh,
'Sa 'n gaothar ban a leigeadh leam.

'S mise fein a rinn an t-sealg,
Arsa 'n t-amadan bu gharg fiamh;
Ge b'e fear is treise lamh,
'S leis an gaothar ban sa 'm fiadh.

O'n a thachair mo ghaothars ort,
'S na cosan a bhi do d' dhith;
Biadh a's eudach air do réir,
Bheirinn sin duit fein 's do d' mhnaoi.

Gabhsa sud, arsa Gile bhain og,
'S thoir an gaothar ban do,
Gheibh e sin sa'n gaothar breac,
'S ged a dh'iarradh ni bu mho.

Dh'imich iad an sin na'n triùir,
Anns an iùl a rinn am fear,
Thog se air a mhuin am fiadh,
An crannagan a sgiath sa bhean.

[TD 347]

An Gleann Sith sa 'n Gleann r'a thaobh,
Lan draoidheachd 'ta se do ghna;
Far nach tearuinn duine beo,
Ach thusa oineid 'sa macan mnà.

Dun an oir 'ta air an Dùn,
Anns am faigh thu muirn a's ceol;
Ach na coidil ann gu brath,
Mu 'n d'thig amhghar ort ni's mo.

Air cromadh dhoibh anns an Dun,
Chunnacas ùr-bhean na'n sùl gorm;
S gile na 'n canach a cneas,
Deud mur chailc a's beul mur ròs.

Dh'fhiosraich am macan mòdhar,
Do 'n ghruagaich le eolas geur
Ciod i 'm macan deud-gheal og
Na 'm fear mor da 'n tug i speis.

S mise fein thug spéis dhò,
Arsa Gill-bhan bheil-dearg og,
Fir an domhain bhi f'a mhèin,
Ni mo gheilleadh e do shloigh.

'S iongnadh leam na tha tu 'g radh,
Arsa 'm macan deud-gheal og;
Ciad, an sluagh a fhuair air neart,
Trid nuair leig e chosan leo.

Bheireamsa dhearbha sin duit,
Arsa Gile-bhan steud gheal og;
Mur bhithe draoidheachd a chuirn chros,
Cha leigeadh e a chosan leo.

[TD 348]

Thug mise briathran na dhò,
Ged thigeadh cach mu do cheann;
Nach d' theid duin' idir a mach,
Na neach a steach ach na th-ann.

Gheibheadh tusa sud fhir mhoir,
Tri lan dabhaich do dh' or glan;
Crobh, a's eich, a's fearunn saor,
'S nighean Rìgh o thir na m 'flath.

Fanaidh tu fhathasd gu fòill,
Ged 's fìor bhosd a ta tu ràdh,
Gus 'n d' thig Gruagach Dhùn an oir,
'S gu'n dioladh e pog a mhnà.

Gheibheadh tusa sud oglaoich mhoir,
Mo chulaidh oir agus m' each,
'S coimh dheas leis fairge no tìr,
S leat mo Rìoghachd 's leig mise mach.

Fanaidh tu fhathasd gu fòill,
Ged 's fìor bhosd na tha thu 'g radh;
Gus 'n d' thig Gruagach Dhùn an oir,
S gu n dioladh e pog a mhna.

Thug mise o Ghruagach a chùirn,
A leith chas a's e dol na luing a steach;
Chuirinn i fothads' i gun leon,
S mo leigeil gus an ròd a mach.

Tha saod agadsa gu pailt,
Air m'asdarsa chumail mall;
Chas eile bheireadh tu uait;
Ge bu chruaidh leat e na do cheann.

[TD 349]

'Nuair bha 'n t-oglach na chas cruaidh,
Leum e suas an uchd a mhna;
Iarram do chomraig a bhean,
Dean a chosg a's glac mo lamh.

O! cha'n eagal duit am bas,
Cha nann an cas a ta thu fein,
Thoir thusa a chasan-sa uait,
A's liubhraidh mis air duais do cheann

Mur chosan feidh luath chum ruith,

Gheibheadh tusa nis na dh'iarr,
Labhair a Ghruagach an sin,
S mithich dhomhsa nis bhi triall.

O'n fhuair thu do chosan fothad
S foghainteach do lamh 's do lann
S thigimid a nis air faich
'S dearbhaidh sinn neart ar cuid arm

Na casan so fhuair mi fotham
Cha leiginn iad leo na leat;
Choidhch cha d'theid do bheo-sa mach,
Gus 'n d' thig Gruagach Dhun an oir.

S mise Gruagach Dhùn an oir,
Agus gruagach a ghaothair bhain;
O na thainig mi ann ad luib,
Dh' fheuchainn do luths a's do mhein.

Bha iad mar sin oidhch as lò,
Mein air mhein a's lamh air laimh;
Pog air phoig a's beul air bheul,
Theirig an sgeul a's an dan.

[TD 350]

ORAN do Sheorus Mac Aoidh, fear Eilein Shannda, turas a sheol e fein agus
sgioaba leis do Steornua agus an t-sìd air éiridh na 'n aghaidh; Le Rob
Donn.

Siubhal marr-ri Seorus dhuinn,
Do Steornua air chuan;
Fad na h-oidhch a seoladh,
Gu Rugha 'n Stòir ud shuas;
Bu bhiadhach, deochach a bhiurlainn ud,
'S i luchdar, dionach, luath,
Gu sdiùrach, crannach, ròpanach,
Rathanach, seòlta, fuaight'.

Air maol gob an Rugha dhuinn,
An dubharachd na h-oidhch,
Suas gu Loch-an-Ionmhuir sin,
'G iomram gun leus soills';
Shìn gaodh a near a séideadh oirnn,
'Nuair dh'éirich là o'n oidhch;
Air port 'sam bith cha lubteadh i,
Eidear Pùitic a's Lochails.

'Sa mhaduinn 's ann a b' eiginn duinn,
Nuair dh'éirich gaodh gu searbh,
Ar cùla thoirt do 'n tir,
'S ar ceart aodann thoirt do'n fhairg,
Fo steallainean 's fo thunnginean,
Nan tonna mora borb,
Chnocach, chopach, shideach,
Ghleannach, ghlutach, shliopach, ghorm.

[TD 351]

'Nuair chaidh i air a h-aghairt,

'Sa h-aghaidh air a h-iùl;
Bu chuimseach, gléusd na Leodaich,
Mu na sgodan aig na siuil;
Bu toigheach cuimhneach làidir,
Bha Padruig air an sdiuir,
'S bha Seorus Ruagh na Tairbeird ann,
Le uiread seirbheis 'sa bha'n triuir.

Bha 'n sgiob ud air an coimeasgeadh,
Le fearalas a's fiamh;
Chìte fiamh ghàire orra,
Ged dh'fhag iad clach a's sliabh;
Le duinealas gun eibeantas,
Cun saidealtas na'n gnìomh,
'S gun neach air bith do 'n choigear ud,
Bhi stigh an Leothus riamh.

Ach sheall an t-iul-fhear tràcaireach,
Oirne 'n sin na thim;
'Nuair nach faoite bosd,
Chuir a seoladair no saor;
O dhruim na mara mor-chleasach,
'Si seoladh stigh na caoir
'S le ruith nan tonna' stròthanach,
Bhuaile i sgailc dheth sròin air tìr.

'Nuair ràinig sinn an t-aite sin,
Bha chuideachd fàilteach ruinn,
Fhuair sinn tagha fàrdaich,
Nach eil àicheadh os a cinn;
Gu ballach, aolach, sglèutach,
Réidhleach, lotach, gleidhteach, grinn,
Aig armunn fial do dh' Iomhairich,
Aig nighean Triath Chillduinn.

[TD 352]

Bha Caiptein oirnn 'san àite sin,
'S ann as do dheanainn bòsd;
Cha tigeadh glain gu clàr ann,
Nach b'i shlaint-sa rachadh òl;
Seana-mhnathan a briathrachas,
Nach fac iad riamh bu bhoidhch,
'S cagar mhaighdeann a fiafrachadh,
O ghiall a bheil e pòist?

'Nuair chuir e aodach aisig dheth,
'Sa dheasaich sè e féin;
Shaoil mi nach bu mhasgull domh,
Radh gu'm bu ghasd a chéum;
'S e cainnt nan daoine' bha eolach air,
'S e falbh f'a 'n còmhair air stréud,
Tha e 'n sud 's gun bhean g'a chòbhrachadh,
'Sa Rìgh bu mhor am beud.

So mo dhùrachd cinnteach dhuit,
'S i 'n fhìrinn tha mi 'g ràdh,
Gu ma cuimhneach air t-iùl-fhear thu,
'S nach faille thu air gu bràth;
Saoghal sona an deagh bheatha dhuit,

'S deagh oighreachan bhi t-àit'
A's uiread eile dh' iondrain ort,
'Sa 'n àm am faigh thu bàs.

[TD 353]

ORAN air each a fhuair am bard mar thabhartas o'n duin' uasal cheudna, 's
air logh a fhuair e o mhaighdinn usail airidh, agus an dithisd air
basacha air le cheile, 'sa 'n aon earrach;
Le Rob Donn.

Gar bheil mi 'm àraidh aig daoine' uaisle,
'S aobhar thruais gu dearbh mi;
Le bean as clann 's nach eil mi saibhir,
'S each gun oighr' air falbh uam;
Tha mis am bliadhn' air seòrs' do rian,
Nach robh mi riamh 's nach earbainn;
Fo chrois 's fo phian, 's mo chroit fo chliabh,
'Sa 'n cnàp ri cliabh ri m'earbull.

Fhuair mis o Sheorus gearran bàn,
'S o Shenidh lair mar fhaoidhe;
Cha d'fhuair mi ach beag d'a 'n stàth,
'Nuair b'iad sud a dhà a chaill mi;
'S e m' athchuing dhichiollach 's gach tìm,
Anns gach urnaigh nì na rinn mi;
An logh is fearr a thoirt dà-san,
'Sa'n stalan slàn do 'n mhaighdinn.

O'n chaill mise an t-each bàn,
Gur tric a làn 'sa chliabh orm;
E bhi bàitht, gun fhiosam c'ait',
Chuir mise tràth gu liathadh;
A cholla-mhàs lan, bhi 'm poll no 'm blàr,
Aig sionnaich charn g'a 'm biadhadh;
Chaidh a thogail òg 'sa 'n sgoil aig Deòrs'*,
'S bu mhath a choir air cliathadh.

Bu ghasd' mo phòinidhs' air an t-sreud,
Gu marcachd speiseil iomachuinn;

[TD 354]

A's b'fhianuis e air tarruing eill,
Nach robh e riamh ag iomradh;
Fear Eilein Shannda air a chrann,
'S b'e 'n t-oirein teannta cuimseach;
Air glasach ghleann, gun bhalc gun cham,
'S gun cheannair ann ach inighin.

Their fear Straithe, sean a's òg,
A's canaidh Donull Feirbeis;
Their fear Mheilinis a rìs,
'S e fhein bi gleusd' 'sa 'n t-seirbheis;
Gur mairg nach d' fhuair nuair bha e òg,
Air son tomhas òir no airgid;
Fear a ghleidheadh a rùn gu brath,
Mar rinn each ban na Tairbeird.

An duine math o 'n d' fhuair mi thu,

'S e fhein an tus fhuair t-fheum-sa;
Cha b' ionunn rian bh'agad 's aig pairt,
Gu iasgach fàt na bheusan;
Na 'm biodh tu beulach, bruidhneach, breugach,
Mar tha cach mu d' dheighinns';
Bhiodh Maistir Falconair ag radh,
Gu m bu mhath an drasd 'sa chleir thu.

MARBHRANN IAIN GHRE, fear Roghard.

Le Rob Donn.

Tha rogairean airtnealach trom,
'N taobh bhos agus thall do 'n Chrasg;
O'n chual iad mu'n cuairt an ceann-cinnidh,

[TD 355]

Gu'n d' eugadh e'n Siorramachd Pheairt;
Dh'aindeoin a drachdan 'sa chiall,
Cha do chreid duine riamh bha ceart;
Aon smid thainig mach air a bheul,
'S ni mò chreid e féin Rìgh na 'm feart.

Cha 'n aithne dhomh aon ni cho làidir,
Air an t-saoghals, ri bàs gu toirt téum;
An strachd thug e 'n drasd oirnn air aghaird,
Gu'n do mharbh e fear Roghaird a leum;
Tha Sàtan ro bhrònach 's cha 'n iongnadh,
Ged fhaigheadh e'n t-aon-sa dha fein;
Chionn nach eil fhathasd air sgèul aig,
Fear a sheasas na àit' as a dheigh.

'S fad o'n chunnacas 's o'n chualas,
Gur teachdaire gruamach am bàs,
Gidheadh, gu bheil cuid diubh an daoich roimh,
Toirt rùd-eiginn gaol dà an drasd;
Tha dùil aca 'n Cata 'sa 'n Galla,
Nach urr' iad a mholadh gu bràth,
Air son gur h-e fhéin thug a chiad-char,
A fear thug coig ciad car a càch.

Sibhse tha mor 'sa tha mion,
Sibhse tha sean 'sa tha òg;
Thugaibh cheart air' air a bhàs,
'Nuair is beartaich' 'sa 's laine ur cròg;
Oir thig e mar mhearlach 'sa 'n oidhche,
Ged robh sibh uile cruinn ann mu'n bhòrd;
'S cha 'n urrainn sibh a mhealladh le foill,
'S gu'n do mheall e ceann-feadhnaidh nan ròg.

Rinn deomhain a's triùcairean talmhaidh,
Raoighneach mu chealgair bhiodh tréun,

[TD 356]

Co bu starich, bu charaich 's bu chlicich,
'Sa b' fhearr chuireadh liobh air a bhréig;
'Se SATAN am breithe bu shine,

Da 'm b'aithne gach fine fo'n ghréin;
'S b'e bharrail nach fhaighte a leithid,
Mur robh e 's na Gredhich iad fein.

Bu mhath leam an cionntach a bhualadh,
'S cha b'aill leam duin' uasal a shealg;
Ged chuireas mi gruaim air a choireach,
Cha ghabh an duin' onarach fearg;
Tha Captein Rob Grè air a dhiultadh,
Le breitheanas prionnsa nan cealg;
Rinn coimeasga Reothach a chumail,
Gu uaisle a's duinealas gharg.

Tha breugan a's cuir air am fagail
Do'n fhear is fearr tàlant g'a 'n inns'
Cha luthaigeadh a chuis sud do Bhàtuir
Bha onair a's ardan na ghrìd
Ge comasach Iain a bhrathair
Cha 'n fhaigh e sin an drasd a chion aois
Ach 'n sin gheibh e obair an t-Satain
Ceart comhluath 'sa 's bàs do dh' fhear Chraoich.

[TD 357]

ORAN do dh' IAIN SUTHARLAN, d'a 'm bu chomhainn IAIN THAPAIDH, ann an eirig oran a rinn easan a pilleadh marbhrann fhir Roghaird, air son duais a fhuair e o fhear Chraoich.—Le Rob Donn.

Air an fhonn cheudna.

CHIAD fhear a shiubhlas do Chata,
Thoir fios gu Iain Thapaidh na'n rann;
Nach boidheach 's nach dealbhach a chaluinn,
'S gur mi-thapaidh an t-anam a th'ann,
Mhol bladaidh nan glog-shuilean miothur,
Bha tur air a lionadh deth 'n t-sannt;
An sgrog-thoineach, cab-phliathach, griomach,
'S bu dearbhte do chiad e bhi meallt.

'S e chanas gach breithe is airde,
Gu 'n robh an fhior bhreug ann do bhus;
'Nuair a shaoil leat a thogail mur chraoibh,
'S ann rinn thu a chrionadh mur lus;
Cluinnear anns gach àite m' ur timchioll,
Ur 'n alla 's ur 'n iomradh aig cus;
Cha chreid duin' ac thus mach o eis',
'S cha mhol duin' ac eis' mach o thus.

Bu bhaoth duit a bhi g'a mo leanntainn,
'S nach robh ann ad chantainn ach craos;
Bha thu 'n toiseach ann ad spleadhaid air cailte,
'Sa nis ad sheann-ghloichd leis an aois;
Eidear na breithibh tha fiùdhail,
'S e chuireas mo chliùths' ann am pris;
Gu 'n robh 'm fear a bheum mi le spealadh,
Cho bhreugach 's gun mhol e fear Chraoich.

[TD 358]

Nis a Rob Grè, ma phos thu,

'S e Iain t-aon oglach 'sa 'n am;
'S urr' e thoirt meas air do bheusan,
Le orain, le théis a's le 'rann;
Ni e Sagairt do dhuine gun chrabhadh,
'S ni e deagh chlàrc do dh' fhear meallt',
Ni e stiùbhard do theaghlach gun iochd,
'S fear faoghlum do 'n t-sliochd nach bi ann.

Shaoil mi gun chronaich mi tric dhuit,
Bhi glacail an sgrìobtuir* ad dhorn;
Ach 's ann a tha 'n t-amad dana,
Sior bhriseadh 'n treas aithne d'a dheòin;
Mur sin 's ann a soilleire chithear,
Gur sailche a chrìdh na thòn;
'S gur h-ann a tha fhaoghlum na theangaidh,
'N dearbh alt am bheil bruidhinn aig eoin.

Ged leig sinn ar pearsannaibh taitneach,
Ann am posadh gu liobasda leibh;
Na saoilleadh 'nuair a thoilleadh sibh masladh,
Gu 'n coisinn sin maiteachas duibh;
'S ni tha cinnt' mu ar càirdne,
Ged rinn ar fagail gu taobh,
Nach d' thig iad a choidhch fo ar cliùth-sa,
'S nach mò ni iad sibhse na 's naoimh.

Rinn sinn do sgiursadh mar throsg,
Mach thair a Chrasg leis a ghaoidh;
Ach do sdiuradh le d' mhaistir fhein thu,
Gu àit' anns an séideadh tu 'n daoibh;
Cha 'n fhaighear fear fileanta facail,
An Cata, na 'n Ros na 'n duthaich 'c Aoidh;
Ach Iain gu moladh Rob Grè,
'S e 's coir dha do ghleidheadh a choidhch.

<eng>* John Sutherland was the Schoolmaster of that parish.<gai>

[TD 359]

Cha 'n fhaicear do leithid a shiomlaich,
Ged amhaircte ceithir timchioll a ghlob;
Ma leanas tu 'n comhnuidh ri t-éucoir,
Masgul a's breugan nach ob;
'Nuair a théid an t-anam gun reusan,
Mach a dh' aon leum air do ghob;
Bidh tus' anns a chuideachd an coir dhuit,
An donus a's Ròghard a's Rob.

ORAN air comh-latha breith PHRIONNSA THEALAICH;—Le Rob Donn.

AN diugh, an diugh is réusantach,
Dhuinn eiridh ann an sanntachas;
An treasa là air crìochnacha',
Do dhara mìos a gheamhraidh so;
Deanamaid comunn failteach riut,
Gu bruidhneach, gàireach, òranach,
Gu botalach, copach, stòpanach,
Le cruit, 's le ceòl, a's damhsaireachd.

Deanamaid comunn failteach,
Ris an là thug thun an t-saoghail thu;
Olamaid deoch slainte,
An t-Seimis oig o 'n d' inntrig thu;
Le taing a thoirt do 'n Ard-Rìgh,
Gu 'n d' fhuair do mhathair liobhraigeadh;
Dheth h-aon bha do na Gaidheil,
Mar Dàibhi do chlann Israel.

[TD 360]

Tha cupall bliadhna 's ràidhe,
O 'n thainig thu do dh' Alba so;
Bu shoilleir dhuinn o 'n trath sin,
An fhailte chuir an aimsir oirnn;
Bha daoine measail miaghail oirnn,
'S bha àrach nìth a sealbhach' dhuinn;
Bha barra' troma tir againn,
Bha toradh frìdh a's fairge againn.

An diugh, an diugh, tha cuimhn' agam,
Air puing nach coir a dhearmadach';
Mu bhreith a Phrionnsa rìoghail,
Dheth 'n teaghlach dhirich Albunnaich;
Togamaid suas ar sùilean ris,
Le urnaigh dhluth gun chealgaireachd;
'S ar lamhan na 'm biodh feum orra,
Le toil, le eud 's le earbsalachd.

Togamaid fuirm a's meanmna,
A's faithnear air ar dùrachd e;
Gu latha chumail sanntachail,
As leith a Phrionnsa Stiùbhartaich;
Gur cal an àm na h-eiginn e,
Ar carruig threun gu sdiùradh air;
Thug barr air cheud am buadhannan,
S tha cridhe 'n t-sluaigh air dlùthadh ris.

Cha 'n iongnadh sin, 'nuair smuaintichear,
An dualchas dheth 'n d' thainig e;
An doimhne bh'ann air faoghlum,
S gun bhonn do dh' éis na nadur dheth;
Mar Shola' 'n cleachda' reusanta,
Mar Shamson treun 's na lamhan e;
Mur Absolum gur sgiamhach e,
Gur sgiath 's gur dion d'a chairdean e.

[TD 361]

Nach faic sibh féin an spéis,
Ghabh na spéuran gu hhi 'g ùmhladh dha;
'Nuair sheas an rionnag dhearsach,
Anns an ait' an robhte sdiùradh leis;
An comhar bh'aig ar Slannui'ear,
Roimh Thearlach thigh'n do 'n duthaich so;
'Nuair chaidh na daoine ciallach,
G'a iarruidh gu Ierusalem.

Nis a Thearlaich Stiùbhairt,

Na 'm biodh an crùn th'air Seòrus ort;
Bu lion'or againn cùirteirean,
Bhiodh tionndadh ghùn a's chleòcaichean;
Tha m' athchuing ris an Ti sin,
Aige bheil gach nith ri orduchadh;
Gu 'n tearuinn e o 'n cheilg ac' thu,
'S gu 'n cuir e 'n seilbh do chòrach thu.

ORAN do bhean bainnse rinn briseadh geallaidh, an deigh a reiteach, 'sa dh' fhalbh le fear eile.

Le Rob Donn.

THUGAIBH 'n t-soraidhs' gu h-iomlan,
Gus an inighin tha 'n Aisir,
Agus cronacha' iomchuidh,
Thaobh an iomrull a dh' fhas innt',
Suil gabhair na h-aghaidh,
Dhol a thaghadh na pairtidh,
Chur na 's mo do dhragh oirr',
'S na 's lugha do chairdean.

[TD 362]

'S ann tha 'n t-suil th' ann a' t-éudann,
Mar an créutoir is taire;
'S tha na 's mo do 'n ghabhair,
Ann ad bhothaig na 's stàine;
Rinn thu turnn air sn am so,
Chuireas antlachd gu brath ort;
Le do raisein a chocadh,
Ris a bhoc a bh' air laraich.

'S e mo bharail nach b' fhiach thu,
Dhol g'a t-iarruidh thair sgìre;
Oir tha t-aighe 's do mheanmna,
Mar tha aimsir na 'm faoilleachd;
Chuir thu craicionn do thiumpain,
Mar mbasg diultaidd air t-aodann;
Rinn thu striopach do d' gheallamh,
Soilleire t-alla no t-aogas.

'Nuair a chì thu do bhroman,
Cha 'n eil thu 'n comain do chairdean;
Thug a chomhairl ort iomlaid,
Cleas na siomlaiche bàtha;
Thig do 'n bhuailidh gu sìobhalt,
'N deigh a laoigh a chur bàs oirr';
Bheir am boinne gu sanntach,
Gun chrann-laogh gun fhearna.

Mas e comhairl do chairdean,
Thug ort Seumus a thréigeadh;
'S e do chliuth-sa tha fulang,
'S e do bhuinig nach d' Rinn iad;
Am mac a rugadh gu bochdas,
Cha ghlac e stochd ach air éiginn;
'S air dhluithhead airgid am pocan,
Buailidh an copar ri cheile.

[TD 363]

Na 'm bu mhise 'n duin og,
Bhiodh dol a phosadh na h-inighinn,
Agus fir a bhi lamh-ri,
Do 'm bu ghnath a bhi 'g iorghaill;
Cha bhithinn mionaid ro chinnteach,
Gan a h-inntinn a dh' iomlaid;
Mur biodh glas agus iuchair,
An crochadh f'a h-imileig.

ORAN do SHALI GRANNTA, maighdionn uasal a bh' ann an Ionmhurnis ri linn
na ciad Reisimeid Chataich bhi anns a bhaile sin, agus mas fìor am bard
gu 'n robh na h-Oifigich a comh strith uimpe;-Le Rob Donn.

Mu 'm faca mo shuil thu,
'S e 'n cliùth ort a fhuair mi,
A riomhainn a àluinn, éibhinn og.
Gu 'n robh thu mar bhan-dé,
Gu 'n geilleadh na sluaigh dhuit,
A riomhainn aluinn, éibhinn òg.

Shaoil mi gu 'm bu spòrs,
Nach bu chòir bhi ri luaidh e;
Ach 'nuair shìn an ceol,
'S gu 'n d' thug iad a suas mi,
Chreid mi h-uile drannt dheth,
'Sa 'n damhsa 'nuair a ghluais thu,
A riomhainn àluinn, éibhinn òg.

'S e 'n t-aobhar nach fhagainn,
Sàli aig a Choirneal,
An riomhainn àluinn, éibhin òg.

[TD 364]

An t-eagal gu 'm biodh càch,
Le nàimhdeas na sgornan,
An riomhainn àluinn, éibhinn òg.

Créatoir cho ghrinn r'i,
A's creatoir cho bhoidheach,
Gu m bu mhor am béud,
Gu 'n cailleadh i d'a deoin iad,
Suireichean an t-saoghail,
Le aon fhear a phosadh;
An riomhainn àluinn, éibhinn òg.

Tha Deorsa ro dhàna,
Air a Mhaidseir na cbainnt,
An riomhainn àluinn, éibhinn òg.

Gu bhi cuir an ceill doibh,
Gu leir gu 'n robh sannt air,
An riomhainn àluinn, éibhinn òg.

Ach 'n uair thig an t-ol,
Mu 'n bhord anns na rancan;

Olaidh e gu sunndach,
Deoch-slaointe na Baintighearn;
'Sa h-uile fear do chàch,
Mach o Shàli toirt taing dha?
An rìomhainn àluinn, éibhinn òg.

Thuit mi ann an dùsal,
Mar gu 'n tùislicheadh tranns orm;
An rìomhainn àluinn, éibhinn òg.

A's chunna' mi air an trùir ud,
Le 'n sùilean 's le 'n samhlachd;
An rìomhainn àluinn, éibhinn òg.

[TD 365]

A reir 's mar a dh' aodainn-sa,
An aodainn a rannsachadh,
Gu 'n duraichdeadh Sàli,
Am Màidseir na bhantraich;
A's aoibhneas air Deorsa,
Mu 'n bhron bh' air a Ghranntach.
An rìomhainn àluinn, éibhinn òg.

Huile duine bha,
'Sa Bhataillein ga 'm b eol i
An rìomhainn aluinn, eibhinn, og
Chuir i ann arm brúadar
Fuasgailt a's post iad
An rìomhainn aluinn, eibhinn, og.

Ach gu ruig a's Tearlach,
Am Maidseir a b' òige,
Ged bu chruaidh ainmeil
Ann an armailt Rìgh Deors' e;
Chaochaileadh e aogas;
Le gaol bhi d'a còirse;
An rìomhainn àluinn, éibhinn òg.

Am fear is mo gradh
Cha nar e bhi suas riut
An rìomhainn aluinn, eibhinn, og
'S e is mo cradh
Mur paighear na dhuais e
An rìomhainn, aluinn, eibhin og;

Bheir mi mo shuil,
No bheir mi mo chluas diom,
Ma tha h-aon do 'n triuir,
Is trice theid a luaidh riut,
Cho tinn le do ghaol,
Ris an aon sin is fuath leat;
A rìomhainn àluinn, éibhinn òg.

[TD 366]

ORAN do dhaoin' uaisle duthaich Mhic Aoidh, air son iad bhi cuir a bhaird as an fhearunn chionn bhi marbhadh na 'm fiadh, agus cuid dhiubh bhi na aghaidh, agus cuid eile dhiubh bhi leis.

Le ROB DONN.

SEISD.

Ho ro 's fada 's gur fada,
'S cian fada gu leòir,
O 'n a bha mi air achdair,
'G iarruidh fasnath fo 'r sgòd;
Nis, mas eiginn domh teicheadh,
'S nach eil leith-sgeul am chòir;
C'uime 'n caonainn ur sgobadh,
'N diugh 's mi togail na 'n seol.

Jain Mhic Naoghais Mhic Uilleam,
Dhoirt iomadai fala,
C'uime am biodh tu g'a m' àicheadh,
'N diugh aig bèula a bharr;
'S e mo bharrail gu 'm b' fhearr dhuit,
Sineadh 'n argumaid eile;
Oir 's tu fhein bha g'a marbhadh,
O 'n la dhfhalbhadh tu 'm baile.
Ho ro 's fada, &c.

Ach mas obair mì-dhiadhaidh,
Bhi marbhadh fhiadh anns na gleannaibh,

[TD 367]

'S ioma laoch dheth do theaghlach,
Thuit gu trom anns a mhealladh;
Bu daoine fuilteach o 'n d' fhas thu,
'S cha b' fhearr cairdean do leannain;
'S mas peacadh sud tha gun mhathanas,
Bidh tusa 's Mathanaich damaint.
Ho ro 's fada, &c.

Gu bheil tinneas na bliadhn-sa.
Dol na 's piantaich 's na 's cràitich,
Ach ni sinn faighidinn chiallach,
Thig an riaghladh na 's fearr oirnn;
Thig an cumant gu socair,
Nuair theid stopadh air Ahab,
'S bidh sinn feuchainn ar lotan,
Air beuladh Doctoir Bohàbhairn,
Ho ro 's fada, &c.

Ach a Dhoctoir Bohabhairn,
Thug mi dàn duit nach tuig iad;
O 'n tha mis air bheag airgid,
Buinidh oircheas ri t-obair;
Tha mo dhuil ri do phlàsta,
'Nuair tha càch g'a mo bruideadh,
'S mar is faid' thu g'a charadh,
'S ann is fearr e 'nuair thig e.
Ho ro 's fada, &c.

Iain 'Ic Eachuinn 'Ic Eain,
Thirc mi 'meadhon mo dhragha;

<eng>* A fictitious name given by the poet to one of the gentlemen whom he expected would be his friend at court.<gai>

[TD 368]

Bheireadh teist gu mo chliuth orm,
Air mo chula 's ri m' aghai,
Le do chomhairlean rùnach,
Bheireadh dùlan luchd lagha;
Bha do chuid ga mo chobhair,
'S cha b' i do chomhairl bu lugha.
Ho ro 's fnda, &c.

Uilleam Mheilinis thàr-leam,
Nach seas cairdeas air aona-chois;
'S math chumadh tu lamh rium,
Gus 'n do thar thu mi 'm plunndrainn;
'Nuair a chunnaic thu 'n àrsmachd,
Gu mo sharach' 'n Tunga;
Dh' fhas thu tolla-chluasach bothar,
'S cha do chobhair thu 'n cunntar.
Ho ro 's fada, &c.

Ma chaidh mo chairdeas am fuairead,
Ri daoine' uaisle na duthcha;
'S eiginn nis dol a dh' iarruidh,
Rathad fiar nach robh duil'am;
Far a bheil Domhull Thapaich,
Leughadh charaidse 'n Sgudaig;
Ach do 'n phreig tha 'sa Gheata,
'N coige athchuing do 'n urnaigh,
Math dhuinn ar cionnta.
Ho ro 's fada, &c.

[TD 369]

RANN na CULAI DH*; le Rob Donn.

Mile failt ort fhir na culaidh,
Thu féin gu meal i,
Nar fhaiceam a choidhch air droch bhuil i,
Fo fhear eil i, 'n deigh dhuit sgur d'i-'
Fhuair thu 'n t-eithear sin o Chormaich,
A's ro mhath 'n airidh,
Bha i diamhain a's mi tharbhach aige 'n uiridh,
Uair ar cladach tiorram treisgte 's uair air feist;
Gun aon duine cuir siol innte no aisd;
'S ann eollach mur na fìor sgiobairean a tha thu,
Mionnan gun ghoimh, iochd gun mhasgul, 's ciall gun chràbhadh;
Cha 'n eil bagar dhaoine thugad, Triath no Sagairt;
Cum o chladach, 's o gharbhach, a's o sgeir i;
Cum air a taobh i, nach faigh i ciùradh, air a deire;
'S air a druim gu socair samhach 'n am a lìonaidh:
'S ann agad fhein a tha 'n t-eitheir maiseach, sgiamhach;
'S i na suidhe gu socair samhach, gidheadh gnìomhach;
'S i gu crannach, meallach, ròpach, 'n àm dhuit sineadh;
Gu ma buadhach air do luchd, 's nach paigh thu 'm frachd;
Na ma luaithe sud as a h-uchd, na tuille steach;
'Nuair theid i air a ciad siubhal, olamaid fòidhe,
Gar am faighear tuille luchd aisde, ach aon bhòidhe.

* Culaidh—<eng>a boat, alluding to a kept Miss.<gai>

[TD 370]

CROS-DHAN le DUIN' Uasal araid da Leannan.

Leam fhein bu bhlasda pog o d' bheul,
Ighean ghasda is taitnich beus;
Le d' ghaol a dh' aomadh mi 's is ann,
Le d' ghradh a dh fhas mo chaileachd fann;
Innseam a dreach, a cosmhalachd 'sa dealbh,
Eisd rium le beachd a's gheibh thu leat a h-ainm.

Cia meachair, maiseach, dreachar tlachdmhor leom,
Amhluidh mar shneachda dh'fhàs a cneas 'sa com,
Mor thuigse 's eolas bunailt agus ciall,
Pairt deth gach subhailc, bhuilicheadh ort gu fial:
B'ait' leam ort còir dhomh fein le deoin na cléir,
Eisd rium òigh ma tha mo ghloir ad réir,
Le tiom-chridh, trocair, truacantachd a's gràs
Le d'ghaol, dìon, saor a's fuasgail mi o'n bhàs.

MARBHRANN UILLEAM MHUILLEIR, an ceard; Le Rob Donn.

O'n uair chaidh Uilleam do'n ùir,
Gur tearc againn sùil tha gun déur;
A mhuilleir, a bhrachadair, na chocair,
Na mhnathan d'a 'm bu choir bhi ri spréidh;
Cha mho na clamhain a's gaohair,
Tha subhach 'sa 'n fhaoghars' na dhéigh,
Air son gu'm buineadh iomull na cloinne,
Gach ugh a's gach eireag dha fhéin.

[TD 371]

'S glan a tha 'n talamhs' na fhàsach,
O 'nuair 'sa chaidh thu bàs o cheann mìos;
Ge maiseach na macain so dh'fhag thu,
Cha seas iad dhuinn t-aite na'n dìs;
'S ann a tha acfuinn do cheairde,
Mur shaothach na chlaraibh 's na dhìosg;
An t-ord a's am balg ris an teine,
An riosp a's an t-innein 'sa'n tìosp.

'S giorra mo sgil na mo dhurachd,
Gu innse do chliuth mar is còir;
S minic a dhearc mi do chruinn-leum,
Gus an t-aite bu chinntich do lòn;
Sgiathan a chòta fo t-achlais,
A's neul an tombac air do shroin,
Gaoir aig na coin gu do ruith,
'S mir air dhroch bhruich ann ad dhorn.

Cha 'n aithne dhomh gin feadh na talmhuinn:
A choiteir a shearbchant, no thuath,
Nach iondrain Uilleam as aodann,
Oir shiùbhladh e'n sgìre ri uair:

Nis o 'na chual iad gu'n deach e,
Tha rud-eiginn snas air daoin' uaisl;
Ar son nach eil gin anns a mhachair
A ghlanas tigh c-c no poit' fhua'l

ALLTACHA DHAILNACABAIG.

Fhir a mheudaich am bolla,
Lughdaich a phris, torradh mara gu tir,

[TD 372]

Sith eidear choimhearsnaich;
Bi leinn, bi againn, bi 'n ar measg;
Beannaich mo bhean 's mo chlann,
A chearc bhuidhe 's na h-eòin,
Cairistiona bheag 's na pàistean;
Cha 'n iarrainn a shòlas an domhain,
Ach buntàta na Dalacha-cruinne;
Agus uisge nan easana' dubha,
Agus casan fada dhol roimhe 'n abhuinn,
'Sa bhi 'n Dailnacàbaig gu Siorruidh suthainn,
Amen.

ORAN eidear an sealgair agus am fiadh, Le Donull mor òg, duin' uasal
Chamshronacha bh'ann an Lochabar.

Fonn.—Gabhail Strath Dhruimnachdair, &c.

Sealgair. Mi 'm shuidhe sa bhachdan chaorainn,
'S beag m' aidhear ris a ghaoidh so,
I gabhail domh sa'n aodann,
Dh'fhag m' aogasg gu gle bhochd.
Mi m' shuidhe, &c.

Tha damh na luidhe suas uam,
'S e'g amharc orm le tuaileas,
'S cha 'n fhaod mi le dha ghruam-shuil,
Ceim gluasad as a so.
Tha damh, &c.

[TD 373]

Nam faighinn as so slaodadh,
Gu bachd na craoibhe caorainn,
Mi fhin 's mo ghunna craosach,
Gu'n taomainn i ad chorp.
Na 'm faighinn, &c.

Fiadh. Gu'm b' fhearr dhuit cur a's cliathadh,
Bhi 'g iomain cruaidh 's ga'm biadhadh,
Na staoic deth m' shithinn bhliodhnaich,
'S nach fhiach i cuir am poit.
Gu'm b' fhearr, &c.

Mo leathar cha'n eil feum ann,
Air tolladh leis na feursnaibh,
Nach grannda dhuit, bhi 'n deigh orm;

'S nach d'rinn mi eucoir ort.

Sealgair. 'N cuimhne leat gach sealbhag,
A Dh'ith thu anns an arbhar,
Theid cuilein ann ad shealbhan,
'S do mharbhadh air an spot.
'N cuimhne leat, &.

Fiadh. Na 'n eisdeadh tu ri m' sheanachas,
Gu 'n innsinn tuille dearbhaidh,
Nach mis a bh'anns anns an arbhar,
Ach fear bu ghairbhe dos.
Na'n eisdeadh, &c.

Sealgair. Na'n innseadh tusa dhomhsa,
'N ceart bhall a' bheil e chomhnuidh,
Bu chuimhneachan do d' sheors e,
Ged dh'fhalbh do bheosa nochd.
Na 'n innseadh, &c.

[TD 374]

Fiadh. 'N Creag chorraig tha e 's t-samhradh,
Air phost an Coire-maltaig,
Tha tolairean cho teann air,
'S nach geall e tighin an so.
'N Creag chorraig, &c.

Sealgair. B'fhearr leam na mo chota,
Mi fhin 's mo ghunna gròbach,
Gu m biodh-mid a' coradh,
Ri crogairneach na'n cnoc.
B' fhear, &c.

ORAN gaoil le IAIN BRUN, Seanachaidh do Phrionnsa nan Gaidheal, d'a leanan 's i air a threigsinn le fear eile phosadh am bliadhnn 1768, agus esan air posadh a peathar d'a cion, am bliadhna 1773.

CLUINNIBH cumha trom a Bhrùnaich,
Mu Nic Dhughaill o Dhunolla;
'S mor a thuit d'a fìor chairdean,
Anns' na blair le Mac Colla.

Bha thu uasal 's bha thu aluinn,
Sona 'n fhardach d'a 'm buin thu;
'S cha lughaide mo ghradhs' ort,
Mi bhi 'n drasd fo do chumha.

Och mo dhith bhi gun storas!
Ao'r mo bhroin bhi as éuguis;
Sud a chaill orm-sa ghruagach,
Bheir do 'n uaigh a's do 'n éug mi,

[TD 375]

Jodhoin, Iseabal Nic Dhughaill,
Maighdeann chliuiteach, deagh bhéusach;
O 'm pearsa og àluinn!
Airidh ghraidh do na céudan

'S ann an Glasacha aig t-fhoghlum,
Ghabh mi eolas a's spéis diot;
'S e mo dhith nach do phos sinn,
A's sinn bhí deonach le cheile.

Bha thu Shìleam na 'n uaislean,
Sheas a suas le Rìgh Seumas;
'S leis na Rìghribh bha Dhundualach,
Ged a bhudhaich orra 'n eucoir.

'S trom do chumhasa ri ghiulan,
'S cha dugh dhomh uaith éiridh;
Oir leithid mo leannains',
'S tearc 'sa 's anna iad air feilltean

Co i nighean a Ghail chrocaich?
Lan do stòras 's do bheurla,
'N diugh a lionadh mo shuileans'
Dheagh Nic Dhughail a d' dheigh-sa,

Siol na 'm boineidean odhar,
'S na 'm falluinge liath-ghlas;
'S ann leamsa O! gu 'm bu choma,
H-aon bha boinionn dhiubh iarruidh.

Ach! cha choirich mi gu brath thu,
'S e do chairdean-sa theum thu;
'S chuir Mac Dhughail Dhunolla,
Air a bhodach thu 'r eiginn.

[TD 376]

Luidh a ghrian air Beinn-Ibheis,
'S chite rionnag 's na speuran;
Solfa 'n d' aontaich Nic Dhughail,
Mise, am Brunach a thréigsinn.

Ach na 'm bithinns' aig Dunolla,
'S cho chomasach a's deonach;
Bheirte la Chuileodair,
Mu 'n do chuir iad air bord thu.

O! gun bhí ann ad dhuthaich,
'S buidheann a Bhrunaich o Chomhal leam;
'S air an turas ud mur buai'chinn,
Bheirte 'n uaigh dhomh mar phorsan.

Oir ged tha mise falamh,
Tha mi fallain deas ogail,
'S cha choimeas mi ri d' cheil-'sa,
Tha na éiginn fo 'n loinidh.

'S gar an d' fhuair mi chum arain,
Ach m' ealdhain a's m' fhoghlum;
Fhad 'sa mhaireas an saoghal,
Bidh daoine 'm feum bhrogan.

Nis cha phos mi ri m' lathaibh,
Dubh-chail' air son stòrais

'S co i thoilcheas mi na deigh-sa,
'S deas a theid i na brogan.

Coig bliadhna o 'n uin' ud.
Chrath am Brunach am bron deth;
A's phos e piuthar do Nic Dhughaill ud,
S lion i shiuilean 'sa sholas.

[TD 377]

B i Mairi mo raoghainn,
'S a thaghainn thair storas;
'S cha 'n eil leithid mo cheil-sa,
'N diugh ag eiridh aig Seorus.

Tha i iorasal agus uasal,
'S i gu truacanta cairdeil,
'S gach buaidh eile tha dualach,
Do bhean uasal an deagh naduir.

Tha i Shileam na 'm fear feachdail,
Ghineadh o 'n t-seachdamh Rìgh Domhnull;
'S tha i Rìoghail 's bu dual d' i,
Deth na Stiubhartaich, chaidh fhogradh.

Sibhs' O! fhearaibh mo dhuthcha,
Fhuair air diultadh, bihibh coma,
'S leanaibh eiseampleir a Bhrunaich,
Mu Nic Dhughaill o Dhunolla.

CUMHA no marbhrann do Dhonull Mac a Phearsain, agus d'a mhnaoi, Caitriona Nic Ghille-mhicheil, a bha poiste ré coig agus da fhichead bliadhna, agus a chaochail beatha mar sheachduin d'a cheile, ann an deireadh a mhios mhaidh 1799. Le Iain Brun ceudna.

Fonn-Deoch slainte Thighearna Chluainidh.

THA mise 'n so 'n Lunnainn,
'S mor mo mhulad a's m aobhar;

[TD 378]

Mu 'n sgeul a fhuaras o m' dhuthaich,
Gu 'n deachaidh 'n uir air mo dhaoine;
Tha 'n lanmhuin onarach chairdeil,
Nis air fagail an t-saoghails';
Mo chliabhain 's mo phiuthar bha aluinn,
Air an caradh 'n Ionmhurchaolain.

'S ann an clagh ud Ionmhurchaolain,
'S i ag caoineadh a h-athar;
Air tigh'n thairis o Bhod d' i,
'S o Aros mor Cheannagharaidh;
Chunnaic Donull air thus thu,
'S e g'a dhuthaich aig dol dachaidh;
O Leamhnaich nan Ard-bheann,
'S o thigh brathair Mhaistir Ailein.

Bu taitneach grasmhor ur beatha,

'S cha do sgaradh 'sa bhas sibh;
'N aon seachduin do dh' uine,
Bha sibh 'sa 'n ùir air ar 'n aireamh,
Bha sibh measail aig uaislean,
Trid ur gluasad 's deagh ghnathacha',
'Sa 'm fad 'sa bha sibh 'raon mairionn,
Bha againn athair a's mathair.

'S ann uaitse Dhomhuil 'Ic-a-Phearsain,
Fhuair mi fasnadh 'nuair b'og mi;
'S on a phos thu Caitriona,
Mhair thu dileas gu leoir duinn;
Coig bliadhna 's da fhichead,
Lion sibh boidean a phosaidh;
'S chaidh ur lathaibhs' a thomhas,
Chaith sibh an sonas 'sa 'n sòlas,

Achaphùir ann do ghin thu,
'S do d' chinneach bha dualach,

[TD 379]

Thainig teachdair a bhais ort,
Thug o t-aros gu t-uaigh thu;
Lean Caitriona do ghiulan,
'S bu ghearr a h-uin anns an uair ud,
Oir anns an uir chaidh a caradh,
Lamh-riut 'sa 'n ath-luain ud.

Bidh Nic Dhughaill gle bhronach,
Tha nochd a chomhnuidh 'n Dunéidionn,
Phos mise gle og i,
'S bu mhor aig a piuthar-cheil' i;
'S moch a dh' fhag i Ionmhurchaolain,
Thigh'n g'ar faoilteach' le cheile;
'S phill sinn dachaidh le solas,
O bhaile Bhoid air la feill leá.

Thoir mo bheannachd le durachd,
Gu mo dhuthaich 's gu mo chairdean,
'S tearc an diugh na tha suas diubh,
'S nach do bhuaidhaich am bas orr';
Tha mo chomhaltan gaolach,
As an t-saoghals' air m' fhagail;
'N Ionmhurchaolain na 'n Dunoimhe,
Cha 'n eil iad romham mur b'abhaist.

Mar a ghrian 's i dol sios uainn,
Air cul Chinntire a's i luidhe;
'Sa bhios a faileus a direadh,
O Bhuachaill-Fhine gu Gleanfalach;
Mur sud bidh cuimhn' air an lamhnuin,
Chaidh an laithibh mar sud thairis;
A Rìgh gu 'm b'ainmeil an Comhal sibh,
'M Baile Bhoid 'sa 'n Ceannagharaidh.

Mur chraobh mi air a rusgadh,
'S air a lubadh a ta mi;

[TD 380]

Ag caoidh na dh' fhalaich an uaigh orm,
'S an cuan do mo chairdean;
Nis tha 'm bas domh am fagas,
'S an t-aiseag chum sioruichd,
'S riamh cha 'n fhacas fear turais,
A phill tuille o 'n tir ud.

LUINNEAG MHIC NEACHDUINN.

'S fhad tha mi 'g eisdeachd ri ur diochuimhn,
Aig cuir air tuireamh gu lionmhor,
Air clann na 'm bodachana' criona,
Gun luaidh air uaislean na tire,
Maighisdir an fhuinn so shios uainn,
An Leitir bheag 'sa 'n Duin phrìseil,
Ceist na 'm ban o 'n Chlachan Shìorach.

Hó hì hiù rubh ó, hì hó riunn ó,
Hì hiù rubh ó, hì hó riunn ò,
Hì hiù rubh ó, hì hó riunn ó,
Hì hiù rubh ó, hì hóg i hò.

Ge b'e thagradh ann an strìth ort,
Gu dearbh cha b' fhada gun dol sìos e,
Dh' éireadh Gordanaich leat dìleas,
Luchd nam trupa gorma cruidheach,
'S lionmhor aca pasgan phicean,
'S lionmhor brataichean a's pìoban,
'S lionmhor clogaid a's cuillìobhair,
'S lionmhor bogha 's suighead dhìreach,
'S lionmhor dag a's sgian phrìseil,
'S lionmhor spainnteach air thaobh clìth orr',
Glac an iudhair ann am bian-ghlaic.
Hó hì hiù rubh ó, &c.

[TD 381]

Ge b'e thag'radh ort gun réusan,
Bu cham a chomhail da 'nuair dh' éireadh,
Thig ioma conspunn leat a Erin,
Thig Iarl Andrum nan each ceumnach,
Bheir a bharcan a's coig céud leis,
'S ioma curaidh calma treubhach,
Thig a Ile ort na 'n deigh sud,
Thig luing a's Saoil an aobhar t-fheirge.
Hó hì, &c.

Cha 'n iongnadh dhuiste bhì eibhinn,
'S ioma sruthan bras fo d' leinidh,
Do shìol na 'n curaine gleusda,
Car thu Dhuimhne, Cholla, Sheimis,
Shomhairle bhuidhe nan geur-lann,
'S do Dhonull gorm a bha 'n Sleibhte,
Car' thu Dhonnacha ruagh na feile.
Hó hì, &c.

Chuir mi iul ort a's cha b' aithreach,
'N tus an t-samhraidh so chaidh thairis,

Air og finealta dh' fhas barrail,
Bha thu cairdeach do Mhac Cailein,
Do Dhunolla nan stuagh geala,
Car' thu Thighearna Loch na 'n Eala,
Do Dhonnacha Diùrach 's do dh' Ailein.
Hó hi, &c.

'S ionmhuinn leam Iain is òige,
Calpa deas air thus na torach,
'S math thig luireach dhuit a's gòirseid,
Agus leine 'n anard Tholaind,
Cota goirid air òradh,
'S boineid hhreac nan caitein gorma,
'S breacan nan triuchana boidheach.
Hó hi, &c.

[TD 382]

Alasdair a chùlain chleachdaich,
Sud am beus a gheibht' ad chaisteal,
Bhi 'g ol fiona 's cluich air chairtean,
Do cheathairne og eutrom ghasda,
'G ol air uaislean 's ga chur seachad,
A piosaibh oir air an lasadh.
Hó hi, &c.

Alasdair a chùlain bhuidhe,
Gu 'n robh an Rìgh dhuit mur mo ghuidhe,
Ceist na 'm ban o 'n Ghleannan chumhann,
'S o 'n Leitir an cois an Rugha,
Slat is dìrich thu a t-uigheam,
Hó hi, &c.

'S Neachdunnach do shloinne dìreach,
'S cha b' ann an cagar os 'n iosal,
Tha thu shliochd nam Moireacha prìseil,
Dheanadh luchd ealaidh dhìoladh.
Hó hi, &c.

Oigeir aigionntach gun ardan,
Ceannard air feachd thu neo chearbach,
Gairdean geal ga math thig armachd,
'S math thig claidhe dhuit a's targaid,
Agus stapull do 'n òr dheallrach,
'S pic ùr a dh' iudhar na Meallraich,
'S glac nan ceann sgaiteach o 'n cheardaich.
Hó hi, &c.

'S lionar claidhe dh' eireadh leatsa,
Thig Mac Raoghnuill ort o 'n Cheapaich,
Mac Iain Stiùbhairt as an Appuinn,
Thig Mac Dhonuill Duibh o 'n Chorpaich,
Thig Mac an Aba a Gleanndochart,
'S Tighearna Ghrannt o Bhaile-Chaisteil,
Thig Mac Shimidh a's Clann Chatain,
'S Iarla Shiophort nan garbh bhratach.
Hó hi, &c.

[TD 383]

Dh' eireadh sud leat ann ad chabhaig,
Alasdair Dubh Ghlinne Garaidh,
Triath na Luib' 's na Learga marr-ris,
'Sa Meinnearach gun ghaog mar charaid,
Ogha Dhonnacha Duibh a Bhealaich,
A's Mac Pharlain as an Arair,
'S Mac Laomainn o thaobh na mara.
Hó hi, &c.

Shaorainn Ealasaid o mhulad,
Ceist nam ban o thur nan uinneag,
Gu 'n gleidh an Rìgh do dhà chuilein,
'S gu 'n seachainn e uatha tubaist,
'S na 'm b' aill leibh e dheanainn tuille.
Hó hi uiù rubh ó, &c.

ROYAL CHARLIE—Or, BEATHA PHRIONNSA THEARLAICH do dh' ALBUINN;—air eidear-
theangacha' o' Bheurla gu Gaidhlic leis an ughdair.

Fonn—Auld Wife ayont the fire, &c.

'NUAIR chuir an Fhraing thugainn cògnadh,
Cuide-ri Prionnsa na còrach,
Air tìr mu thuath thain' e 'n tòs oirnn,
'S e b' ainm do 'n òigeir Tearlach.
Ach o! b' fhada e gun tighin,
O! b' fhada e gun tighin,
B' fhada, b' fhada e gun tighin,
Fear mo chridhe Tearlach.

'Nuair a sheas e air an traigh ann,
Chruinnich na bha 'n sin d'a chairdean,
Toirt pog-an-laimh dha 'sa 'g radhainn,
'S e do bheatha Thearlaich.
Ach o! b' fhada thu gun tighin, &c.

[TD 384]

'Nuair thainig e air tìr am Mùideart,
Thachair Lochiall ris air tus ann,
'S le aiteas rinn e bheatha 'n duthaich,
Le umhlachd do Thearlach.
Ach o! b' fhada e gun tighin, &c.

Cha 'n fhaigh sinn peiceag bhracha thogail,
Gun Deorsa dh' fhaotainn coire 'n obair,
'S càl gun salunn bhios n'ar gogain,
Chion mo bhobain, Tearlach.
Ach o! b' fhada e gun tighin, &c.

Air Tearlach bha an t-eideadh loinneil,
Breacan a's cochd-ard am boineid;
Gu 'm b' e sud am flath bha foinnidh,
Gun choimeas do Thearlach.
Ach o! b' fhada e gun tighin, &c.

Gu ma cuimhneach bhios ar gaisgich,
Air euchd an ath'raichean 's na feachdan,
'S mar bha leotha buaidh nam baiteal,

Le sdiùradh tapaidh Thearlaich.
Ach o! b' fhada e gun tighin, &c.

Sibhse tha dìleas mar bu dùgh dhuibh,
Do reachd ur Rìgh dligheach duthcha,
Biodh an t-snighe tigh'n o 'r sùilean,
Le durachd mu Thearlaich.
Ach o! b' fhada e gun tighin, &c.

'S biodh aig gach Gaidheal duineil,
'N àm dha dol an cinnseal cumasg,
Boineid dhughorm ri chuir uime,
Mur chiumhn' air culaidh Thearlaich.
Ach o! b' fhada e gun tighin, &c.

Fhad 'sa bhios an deo 'n ar creubhaig,
Dh' aindeoin gach rosaid duinn a dh' eireas,
Seinnidh sinn gu h-ard a's eibhinn,
Moladh speiseil Thearlaich.
Ach o! b' fhada e gun tighin, &c.

CRIOCH.

[TD 385-402]

<eng>SUBSCRIBERS NAMES.<gai>